

B 20

2

672

BIBLIOTECA NAZIONALE
CENTRALE - FIRENZE

1176



1200010

LES
HISTOIRES
TRAGIQUES DE
NOSTRE TEMPS.

Où sont contenuës les morts funestes
& lamentables de plusieurs per-
sonnes , arrivées par leurs ambitions ,
amours déreiglées, sortileges , vols,
rapines ; & par autres accidents di-
vers & memorables.

*Composées par F. DE ROSSET, &
dediées à Feu Monseigneur le
Chevalier de Guise.*

Derniere Edition, reveuë, corrigée & augmentée
plusieurs Histoires dignes de remarque.



A L T O N.

Chez ANDRE OLLIER, demeurant
en rue Tupin

M. DCLVII.

B. 20.2.672.



A TRES-ILLVSTRE, TRES-
magnanime, & tres-valeureux Prince,
François de Lorraine de Guise, Cheva-
lier de l'Ordre de S. Iean de Ierusalem,
Lieutenant General pour le Roy en Pro-
vence.

NONSEIGNEUR,

*I'auois juré par Apollon, & par
les Muses de me bannir pour iamais
des yeux de ceux que Dieu a esta-
blis en terre pour estre l'image de sa gloire, si l'en-
clination que i'ay naturellement au seruice de
Godefroy, & l'estime que ie fais de vostre incom-
parable valeur ne me sollicitoient incessamment à
rechercher l'occasion de vous faire paroistre le de-
uoir que toutes les belles plumes sont obligées de
rendre à vostre race & à vostre merite, ie passe-
rois aussi ferme en ceste resolution, tout le reste de
mes iours, que i'y ay demeuré constant tous vs-
lustre. I'ay esté si malheureux aux seruitudes vo-
lontaires que i'ay rendues aux grandeurs du
monde, & si indignement traité de la Fortune,
lors qu'elle me monstroit son visage plus doux &*

EPISTRE.

plus riant, que ie n'ose presque me presenter à vostre Excellence, luy tesmoigner ma deuotion. Mais les loüanges que nous sommes obligez de donner à vos perfections, les obligations que les lettres ont à l'illustre Princeesse vostre sœur, comme à leur seul & unique soubstien, estant naturelles, elles forcent les accidens; & me dispensent d'autant plus de ce serment, que vous estes l'Auteur de la plus belle partie de cet ouvrage. Vostre valeur s'y est depeinte avec de si vives couleurs, que l'esclat en fait rougir de honte les plus valeureux de ce siecle, & efface les pourtraicts des plus prodigieux combats que les Histoires des siecles passez nous rapportent. Qu'on recherche les monumens de l'Antiquité, & qu'on y mesle encore les contes fabuleux des vieux Romains, ie m'assure que vostre exemple n'y tieuant plus d'exemple, non plus qu'il n'en peut auoir d'imitation, & pour le present, & pour l'aduenir; nul ne me pourra nier que la franchise de vostre genereux courage, vraiment innincible, ne surpasse pas les effets de ce qu'on nous represente par des figures. Il n'est pas besoin de reciter en cette Epistre ce que tout le monde doit admirer, puis que ie l'ay fidelement decrit en vne de ces Histoires. Receuez, (ô Prince Generoux) ce qui est proprement à vous, & ce que vostre merite vous acquiert instement sur les volonteiz de ceux qui scauent publier à la posterité la gloire de vos semblables. & croyez que

quand

ESPITRE.

*quand vostre fortune aussi grande que celle du
premier des Césars, elle ne sera jamais pourtant
égale à vostre valeur, & à la felicité que vous
souhaitez.*

MONSIEUR,

Votre tres-humble, & tres-
obeyssant seruiteur,

DE ROSSET.



LES HISTOIRES TRAGIQUES
de nostre Temps.

PREFACE.

Ce ne sont pas des contes de l'antiquité fabuleuse que ie te donne ô France, mere de tant de beaux esprits, qui font rougir de honte, & la Grece, & l'Italie. Ce sont des Histoires si tant veritables que triste & funestes. Les noms de la plupart des personnages sont seulement desguisez en ce Theatre, à fin de n'affliger pas tant les familles de ceux qui ont donné le sujet, puis quelles en sont affligées, Mon dessein n'est pas de publier les hommes, à fin de les rendre des-honorez par leurs defauts : mais bien plustost de faire paroistre les defauts, à fin que les hommes les corrigent, & que par ce moyen l'exercice de la vertu les rende dignes d'honneur & de louange.



TABLE
DES HISTOIRES
CONTENUES EN CE
Liure.



*E la mort Tragique arriué à un Seigneur de Perse pour auoir trop legere-
ment parlé, & de la fin lamentable de son
Fils, voulant venger la mort de son Pere*

*De l'horrible & espouuantable sorcellerie de Louys Gof-
fredy Prestre de Marseille* 29

*Le funeste & lamentable mariage du valeureux Lynde-
rac, & de la belle Calliste, & des tristes accidents qui
en sont procedez.* 60

*Alidor Gentil-homme de Picardie apres la mort de sa
maistresse en fait faire deux pourraicts, l'un mort,
& l'autre vif, & va confiner ses iours aux deserts de
Thebaides.* 90

*Des Amours incestueuses d'un Frere & d'une sœur, &
de leur fin mal-heureuse, & tragique.* 117

*De la constante & desesperée resolution d'un Gentil-
homme & d'une Damoiselle.* 134

*De la cruauté d'un frere exercée sur une sienne sœur,
pour une folle passion d'amour.* 146

*D'un Demon qui apparoit en forme de Damoiselle au
Lieutenant du Cheualier du Guet de la ville de Lyon
De leur accointance charnelles, & de la fin malheu-
reuse qui en succeda.* 164

Des auentures Tragiques de Floridan, & de Lydie. 176
De

TABLE DES HISTOIRES.

Septembre 1642.

444

*Récit véritable de tout ce qui c'est passé depuis que le
Sieur de Saint Preuil fut arresté , jusques à la
Mort.*

445

*Relation véritable des derniers entretiens du Roy de la
Grande Bretagne, avec la Prinseſſe Elisabeth , &
le Duc de Gloceſter , ſes Enfans, le iour deuant ſa
Mort. Enſemble les dernières paroles, qu'il a proſeré
ſur l'eſchaffaut, ou pluſtoſt le Thœatre de ſa Gloire eſle-
uée par ſes Ennemis iougnant ſa maiſon Royale,
de Vitchall, le neufvième de Feurier 1649.*



TABLE DES HISTOIRES

<i>De la cruelle vengeance exercée par une Daimoiselle sur la personne du meurtrier de celui qu'elle aimoit.</i>	190
<i>Du Parricide d'un Gentil-homme commis en la personne de son Pere, & de sa mal-heureuse fin.</i>	221
<i>De l'abominable peché que comit un Cheualier de Malte assisié d'un Moine, & de la punition qui s'en suivit.</i>	238
<i>De la Coniuration de Bajomont Tiepoly, Gentil-homme Venisien, contre sa patrie, & de sa fin malheureuse.</i>	251.
<i>Flamenie Dame Romaine, pour espouser son amoureux, fais mourir Altomont son mary, & de ce qui en aduint.</i>	265
<i>Des horribles exceZ commis par une ieune Religieuse à l'instigation du diable.</i>	291
<i>De la mort pitoyable du valeureux Lyss.</i>	307
<i>De la cruauté d'une femme exercée sur son mary, de sa fin malheureuse, & de celle de son-amoureux.</i>	327
<i>De la fausse trahison comise contre un marchand nommé Beliard, son innocence recognüe, sa deliurance du supplice, & la punition de l'accusateur, des faux tesmoigns.</i>	348
<i>Des grandes voleries & subtilitez de Guillery, & de sa fin funeste & malheureuse.</i>	365
<i>D'un homme qui apres auoir demeuré vingt ans aux Galeres est recognu par son fils, & de ce qui en aduint, & autres chose digne de remarque.</i>	380
<i>Du Baron de Guemadenc, Gouverneur pour le Roy de la Ville & Chasteau de Fougères en Bretagne.</i>	397
<i>Relation verisable de tout ce qui s'est passé en la prise de Monseigneur le Duc de Nemorency, iusques à sa mort.</i>	399
<i>Particularisez. remarquées en la mort de Messieurs de Cinq-mars, & de Thou, à Lyon, le Vendredy 12. Septembr.</i>	



*LA MORT TRAGIQUE ARRIVE'E
à un Seigneur de Perse pour avoir trop leger-
ement parlé, & de la fin lamentable de son
Fils, voulant venger la mort du Pere.*

HISTOIRE I.



Ncores qu'il n'y ait rien de si diffi-
cile au mode, que de taire ce qu'on
ne doit dire: toutesfois ceux qui fœt
professio d'estre sages, & qui cheris-
sent leur vie, doiuent prendre garde
soigneusement à retenir leur lague;
puis qu'une seule parole simplement proferée ruiné
bien souuent toute vne famille, & cause la peste des
corps & des ames. Il n'y a dommage de biens qui ne
se puisse reparer, mais il est impossible de reuoquer
la parole vne fois laschée. Les discoureurs ressemblent
proprement aux Amandiers, qui fleurissent les pre-
miers des arbres, & qui flestrissent à la premiere bruine.
La nature nous a donné deux oreilles, & vne seule la-
gue pour nous apprêdre qu'il faut écouter deux fois
plus que parler. La vie & la mort dépendent de la bou-
che, & quiconque en sçaura bien vser recueillira le
fruit qu'il desire. L'Histoire déplorable que ie vay re-

citer, arriuée depuis peu de iours en Asie, confirme la verité de mon dire.

Durât que l'Empire des Perles estoit accablé des miseres publiques: que l'Estat de l'anciō seruice de la Diuinité estoit en dāger d'estre subuertty par vne secte nouuellement introduicte: que le fer & le feu ragoient les Prouinces, sans espargner mesme les temples des immortels: que le frere attentoit sur la vie du frere, & que le propre fils poullé d'un zele inconsideré de Religion, n'auoit point d'horreur d'enfocer sa main execrable dās le sein de celuy qui l'auoit engendré, & le propre pere de couper la gorge à celuy qu'il auoit fait naistre, il y auoit vn Prince nommé Cleandre, accomply en toutes rares perfections qu'on puisse imaginer. Il estoit riche, vaillant & sage: il estoit ieune, scauant & liberal. Il estoit si beau, & si courtois, qu'il estoit impossible de le voir sans l'aymer, ny parler à luy sans estre gaigné de la douceur de sa parole. Sa foy estoit tousiours ferme comme vn rocher, ainsi que les effets en rendēt telmoignage, car il exposoit tous les iours sa vie à toute sortes de perils pour la foy de ses Peres, pour sa patrie, & pour son Roy. Tantais le Soleil depuis qu'il monte sur l'Orison ne vit tant de perfection. Mais cōme les accidens humains sont diuers, & subjects à l'inconstāte rouë de la fortune, ce braue Prince, digne de ne mourir iamais (si par le merite on euitoit la nuit du trépas) fut vn iour mis à mort par ceux à qui il auoit tant de fois cōserué la vie. Mon dessein n'est pas de d'écriture l'auēture de ceste Tragedie, qui a tāt respādu de sang sur le Theatre de Perse; les histoires fidelles de nostre temps ne sont basties d'autres matietes. Je diray seulement, qu'alors que l'ennie croyāt de

de triompher de ce grand Prince, qu'elle fit cruellement massacrer en présence de Sophy, à qui l'on auoit donné de faulx impressions, qu'il vouloit omprer son Sceptre, l'eût couronné d'as les Cieux d'une couronne d'immortalité, on se saisit de la personne d'Almidor & d'Alphé, deux de ses fils; afin d'en esteindre la race, & oster tout moyen de vengeance. Clorinde aussi vertueuse que belle, chere épouse de Cleandre, auoit déjà produit au monde trois enfans mâles: le grand Almidor de qui le nom est redouté par toute la terre: le genereux Alphée Prince, qui ne cede en mérite à nul des mortels: le sage & prudent Alexandre, dont les perfections ne se peuvent exprimer en ce petit recit: & la belle & genereuse Princesse Philis, l'ornement de son siècle, la honte du passé, & l'ennie du futur.

C'este dolente Mere ayant appris les nouuelles d'un si sanglant desastre, & la prise de ses deux enfans, apres auoir émen les rochers à la compassion, prit les deux autres, & se retira dans la ville de Suze, capitale du Royaume, qui luy tédit les bras, & qui s'estoit rebellée contre son Empereur, quand elle entendit le massacre de Cleandre. Les maux qui procederent tant de ceste rebellion que de la mort de ce Prince, estas inferrez d'as les Chroniques de Perse, i'y renuoye ceux qui prendrôt la peine de lire l'Histoire. La Princesse Clorinde se treuuoit encore grosse de cinq ou six mois, & quand le terme de l'accouchement fut venu & qu'elle eut long-temps appelé Lucine à son secours, elle se deliura du plus parfait des homes. Son nom est Alexandre. C'est un vif tableau d'amour & de gloire, & si semblable à Cleandre en tous les traits & lineaments de son beau corps, que ceux qui le vo-

yent iugent aussi-tost qu'un iour il sera aussi bien, possesseur de sa valeur que de la douceur de son oeil, qui gagne les courages & toutes les volontez. L'on ne s'est pas trompé en ce iugement, comme nous verrons en la suite de ceste Histoire.

Quand la somme des desolations du plus fleurissant Royaume du monde fut accomplie, & que les Dieux appaisez par les larmes, & par les cris des gés de bien donnerent aux Perles pour Sophy le grâd Alexandre: la paix qu'on ne cognoissoit plus en ce Royaume que de nom, commençant de fonder vne longue demeure par les villes, chacun tâchoit de repater les pertes que les d. sordres de la guerre ciuile auoient causées. On ne parloit plus que de festins, d'amour, & de bal. Les Plumes de ce grâd Monarque enlacées des brâches de l'Oltue, couuroiét de leurs feuilles toute l'Asie, de sorte qu'on se reposoit sans trouble, ny sans crainte à leur ombre. Mais lors qu'un funeste & lamentable accident eut rauy un si digne Empereur, & que le Ciel pour ne demeurer imparfait en son ouurage l'eut retiré d'entre les humains, le peuple sujet aux loix de cest Empire, apprehendant soudain les horreurs des calamitez passées sollicitèrent les Estats de s'assembler, pour remettre le gouvernement de la Monarchie pendant la minorité de leur ieune Prince, à celui qui en seroit le plus capable. Ce fut à la diuine Parthenie que le cômun suffrage & le côsente-mét vniuersel mit entre les mains les resnes de ce Royaume, sage deliberatiô, s'il en fût jamais. Il n'y a point de doute que le Conseil en fut alors inspiré du Demon de l'Estât. Jamis la Perse ne se vit colloquée sur un plus haut throsne d'honneur. La prudéce de cette grâde Imperatrice, rûnit soudain

dain les volomez, que des factiōs naiffātes alloient separer. Elle recouura das peu de iours la Prouince de Clarimene, pour vn de ses alliez, & le bruiēt de son nom fit que le grand Roy des Indes rechercha son alliance, offrant sa fille pour estre mariée à l'heretier d'Alcandre, & demātant l'Infāte de Perse pour estre espouse de son fils. Les mariages estans arrestez, l'on dressa des ioustes & des tournois, où le Prince Alcandre (qui pour lors auoit atteinēt l'age de 22 ou 23 ans, & qui venoit fraischemēt d'vne bataille naualle où il auoit rédu la mer rouge d'effect, aussi bien que de nom,) paroissoit sur tous les plus vaillants, cōme vn beau Cypre z parmy les arbrisseaux.

Tandis que les nopces se preparent, vn Seigneur Gouverneur d'vne des Pro uices de Medie arriue à la Cour. On le nōme Clarimōt. L'Imperatrice le void de fort bon œil, parce qu'il est vaillant & sage & bien versé aux affaires d'Estat. Comme il est vn des plus adroicts & accorts Gentils-hommes du Royaume, il sçait si biē mesnager sa fourtune, qu'en peu de iours elle souffle à plaines voiles son vaisseau, du vend des Courtisāns. Heureux, s'il se fust contēté de ceste faueur, & si tant de gloire ne l'eust porté à la legereté d'vn vain discours! Il n'y a piege qui nous attrappe si biē que nostre propre bouche, car chacun est pris par les paroles qui en sortent. Cōme l'on doit estre prompt à ouyr, aussi doit-on estre tardif à parler.

Si Clarimōt eust pratiqué ces maximes, ma plume ne seroit pas maintenant occupée à descrire son desastre, & celuy de sa maison. En fin ce Gentil-homme se treuuant vn iour en bonne compagnie, comme l'on parloit de ce qui s'estoit passé aux guerres detnieres de Perse, & des mal-heurs que la mort

de Cleandre auoit produicts , il proféra ce langage, *Cleandre estoit vn Prince qui auoit beaucoup de valeur & de merite: mais aussi ne manquoit-il pas d'ambition & de vaine gloire. Le grand Sophy ne fit iamais mieux que de se deffaire d'un tel homme. Si i'auois l'honneur d'estre participant des secrets d'un Monarque , comme i'auois alors l'oreille de mon Roy, ie luy conseillerois tousiours de tenir vne pareille procedure. Aussi pouuois- ie destourner ce coup si ie l'eusse voulu, mais mon deuoir estant plus fort que toutes les considerations contraires, ie consentis à la perte de cét ambitieux.*

O discours vainement profeté! Il eut bien mieux valu se taire que parler si legerement. Ce langage scandalisa toute la compagnie , & particulièrement deux ou trois Seigneurs affectionnez au Prince Almidor , à qui ils ne manquent pas de rapporter le soir mesme les propos de Clarimont. Et- il donc vray (s'escrie alors ce Prince) que ce temeraire ait pris à rache la ruine de nostre maison ? Non content de nous broüiller tous les iours avec nostre Maistresse, il se vante encores d'auoir consenty à la mort de mon Pere , & en fait des discours par tout ou il se treuve ! Ay- je bien si peu de ressentiment , que ie ne le chastie de sa folie ! Non , non , il faut qu'il en meure de ma main, & que sa mort apprenne deormais à ses semblables d'estre plus sobres en discours, & moins remplis de temerité.

Il n'y a point de doute que l'effect n'eust suiuy la parole, si le ieune Prince Alexandre, qui fortuitement se trouua present à ce rapport, ne l'eust deuacé: Il ne dit mot pourrant de ce qu'il est resolu dès l'heure mesme d'executer. Encore que son cœur bouillonne de colere, il sçait neantmoins si bien dissimuler sa passion ,

passion, qu'on diroit qu'il est insensible à vne si grande offése. Quand l'heure de se reposer est venuë, il se retire en sa châtre, & enuoye chercher Lindamart. C'est vn braue & genereux Cavalier, qui a fait preuve de sa valeur en vne infinité de cōbats & de duels, & de qui Alexandre fait beaucoup d'estime. Soudain qu'il est artiné, le ieune Prince luy apprend la temerité de Clarimont: luy descouure le iuste suiet quil a de se venger d'vne telle iniure, & le chastiment qu'il en veut faire à la premiere récontre. Il le prie de l'assister en certe action pour en pouuoir redre resmoignage, s'il en est besoin, contre ceux qui en voudroient blasmer la procedure. Lindamart le remercie de l'honneur qu'il luy fait de l'employer en vne si digne action, & dès l'heure mesme ils prennent resolution de venir à bout de cette entreprise en la sorte que ie vay vous reciter.

Le Soleil auoit desia par deux fois redonné à nostre Hemisphere la lumiere accoustumée, depuis le iour que Clarimont, par la libarté de son langage, ayant navré l'ame de quatre grands Princes, estoit cherché de tous costez par le genereux Alexandre, pour en receuoir la punition. Le sort luy fut si favorable, qu'il eut le vent de ce dessein: & bien que sa vanité ne luy persuadast pas aisément qu'on eut le courage de l'attaquer, toutesfois la grandeur de la maison qu'il auoit offensée, se representât à ses yeux il préd l'allarme; & croit que d'vne iniure faicte de gayeré de cœur à des persōnes qualifiées on ne peut receuoir d'exouse, puisque la propre consciēce en a desia donné l'arrest de condamnation. Mais neantmoins voulant se munir contre l'orage qui s'eleue pour le perdre, il a recours à ses parés & à ses alliez, afin d'en implorer l'assistance.

Cleophon est vn digne & parfait Cavalier, à qui la Perse est extremement obligée, pour auoir épé d'un mille fois son sang pour elle, lors que le grãd Alexandre la purgeoit des monstres qui la deuoroient. C'est à luy que s'adresse Clarimont, comme à s^{on} allié, & à qui il tient ce discours ; Le vous ay tousiours fait participer, ô braue Cleophon, à mes aduantures bonnes ou mauuaises, & pris aduis de vostre clair iugement sur ce qui en pourroit succeder. Si iamais i'eu besoin de vostre conseil & de vostre assistance, c'est maintenant qu'une des plus Illustres mais^{ons} de c^{et} Empire trame ma ruine. Le Prince Almidor & ses freres sont courroucés pour vn rapport qu'ô leur a fait de moy sur la mort de leur Pere. Vous scauez bié que la foy que nous d^{onn}ons au Prince souuerain est de telle nature, qu'elle ne souffre point de meslage. Si ie n'aduertis point Cleandre du dessein qu'ô prit de le perdre, n'en dois-je pas plustost recenoit de la louange que du blasme, puis que faisant autrement n'estoit-ce pas pour sauuer vn homme, estre dignement coupable du crime de leze-Majesté, & indigne de participer aux secrets d'un Monarque ? le vous comente doncques par nostre commune amitié, qui doit estre soigneuse de ma conseruation, de me vouloir conseiller en vne affaire, ou l'on me menace de la vie : & neantmoins me vouloir assister de vostre espée, en cas que mes ennemis osent y attenter.

Ainsi parloit Clarimont, lors que Cleophon non moins sage que vaillant, ayant vn peu digéré les paroles qu'il venoit d'entendre, respōdit en cette sorte : Chose estrange (dit-il en soupirant) que les homes les plus prudens sont ceux qui cōmettent ordinairement les plus grandes fautes ! le le dis pour vous
(mon

(mon Cousin) qui ayant la reputation d'estre l'un des plus aulsez Cavaliers de l'Asie, vous estes neantmoins laissé emporter à tant de vanité, que de toucher vne corde dont l'estrainte est si dāgereuse. Et encor apres auoir faict vne telle folie, au lieu de la reparer, vous rentez l'impossible par la resolutiō que vous prenez de la soustenir? Ignorez-vous la valeur des Princes que vous auez offenze, & le moyen qu'ils ont d'en faire la vengeance? L'exēple de ceux qui les ont outragez autrefois, deuroit-il pas repasser par vos, yeux, & vous apredre d'estre plus sage à leur dépēs le meilleur & le plus salutaire cōseil que ie vous puis donner en vne affaire, où il n'y va moins que de la vie, est que vous denēz recourir à la douceur du Prince Almidor, & luy demāder pardō d'un tel outrage. En cela ie m'employeray pour vous assister, suiuant que i'y suis obligé par les loix de nostre amitiē: mais de vous offrir mon espée contre luy & contre ses freres, ie ne puis. L'obligation que ie leur ay de l'honneur qu'ils me font de m'aymer & le seruice que i'ay vouē à ceste maison, n'y peuuent consentir. Seruez-vous doncques de l'assistance que ie vous offre, & croyez que si i'estois reduit aux extremitez où vous estes, ie suiurois tousiours le conseil que ie vous donne. Cependant ne sortez point de vostre logis, bien à propos, de peur que quelque funeste rencōtre ne m'oste le suiet de m'employer à la conseruation de vostre vie,

Ie voy bien repart Clarimont, que le conseil que vous me donnez, & l'assistance que vous me refusez ont quelque aparēce de raison. Ie penseray à ce que ie dois faire, pour le premier: pour l'autre puis qu'il m'est denié ie tascheray de me cōseruer moy-mesme

en me deffendât, si l'on m'attaque. Ce disant, il sort du logis de Cleophon, qui s'efforce par ses prieres de le retenir à dîner: mais la destinée, qui veut trancher la trame de sa vie, est inévitable. O decrets de la fatalité! qui pourra sonder la profondeur de vos abîmes? Nos iours sont contez dès l'éternité, & c'est en vain de vouloir prévenir ce qui doit arriver.

Clarimont entrant dans son carrosse, qui l'attendoit à la porte de Cleophon, commande qu'on le mène à son logis, ou plustost au monument. A peine a-t'il marché cent pas qu'Alexandre, suivi de Lindamart l'appërçoit. Le Prince môté sur un cheual, revenant du logis de la Princesse sa sœur, ne pësoit pour l'heure aucunement à luy: aussi n'estoit-il armé que d'une petite espée qui luy pëdoit en escharpe, & par cõsequët il n'y avoit d'apparëce d'attaquer un Cavalier qui avoit une bõne espée, & qui ne manquoit pas de valeur ny d'adresse pour se defendre. Mais son courage qui ne treuve rië d'invincible, & qui se nourrit dãs les hazards, cõme la Pyralide dans le feu n'ayât point d'esgard à toutes ces cõsideratiõs, s'enfle dans les poulmons, & luy fait haster le pas de son cheual, & approcher de son homme. Lindamart suit tout doucement, bien monté, sans qu'il ose remonstrier au Prince le danger où il se veut exposer, avec des armes tant inégales. Soudain qu'Alexandre est si près du carrosse, que Clarimont qui desia l'avoit descouvert, & qui se preparoit à la deffëse, le pouvoit ouyr, il saute legerement du cheual & luy crie: *Barõ j'ay un mot à vous dire. Mettez pied à terre.* A c'tte response Clarimont fait ouvrir la portiere de son carrosse, & commãdant à ses gens de n'en bouger, sort pour parler à ce ieune Mars, de qu'il les yeux estincel-

lans

lās de courroux, ressembloient à deux Cometes qui presageoient du malheur. Il fait neantmoins bonne mine, & ayant la main sur la garde de son espée, s'approche d'Alexandre, & luy tient ce discours: Et bien (mon Maistre) que voulez-vous de vostre seruiteur? N'est-il pas vray (luy dit le Prince en le prenant par la main) que vous aués esté si temeraire de vous vanter en bonne compagnie d'auoir consenty à la mort de feu mon Pere, & qu'ayant peu destourner cét accident, vous auez plustost auancé la fin de ses iours? Le vous prie (repart Clarimont) m'escouter en mes iustes deffenses, & ne me condamner point sans m'auoir premierement ouy. I'ay à la verité dit que i'en pouuois destourner l'accident, mais d'auoir esté cause de sa mort, iamais ie ne le fus, & iamais ie n'ay tenu vn tel langage. Ce que vous m'ad-uouës (dit le Prince sans le vouloir plus entendre,) suffit pour vous encouster la vie, ou pour me faire icy laisser la mienne pour gage. Mettez doncques la main à l'espée (poursuit-il en se reculant) & deffendez-vous, autrement vous estes mort.

Mon Maistre (s'escriant alors Clarimont en-mettant pareillement la main à l'espée auë) que voulez-vous faire? Au moins faites que i'acheue mon discours, puis si vous n'y trouuez de la satisfaction, ie vous satisferay par la voye des armes. Defendés-vous (luy dit encor Alexandre) c'est en vain que vous rachez d'allonger vostre vie par vos belles parolles. Acheuât ce discours, il lui tire vne estocade que l'autre rabat de son espée, qui se croise avec celle d'Alexandre, si bien qu'ils passent l'vn deçà, l'autre de là. Le Prince voyant qu'il n'auoit rien fait en ce premier assault, reuiert sur luy, l'autre pareillement sur son

son aduerfaire: mais le coup que le Prince tire, ayant rendu vain celtuy de Clarimont, & ne s'y trouuant point de resisterice, il entre sous la mammelle gauche, & ayant trouue le chemin de la vie, il arriue à la demeure, & l'échasse. Le suis mort, s'escrie alors Clarimont, & avec ceste parole, son ame abandonne son corps qui tombe à la renuersse froid & blesme.

Au cry que fit Clarimont, le peuple accourut en foule animé de fureur, croyant de voir le contraire de ce qu'il apperceut vne fausse alarme auoit volé légèrement par tout ce quartier de la ville, que Clarimont auoit tué Alexandre. Si cette infortune fust arriuee l'aduerfaire n'eust pas ioüy longuement du fruit de sa victoire, car l'amour que les Citoyens de suze portent à la brave race des Notalis, & particulièrement à ce ieune Prince (pour des raisons qu'il n'est pas besoin d'inferer icy) est si grande qu'ils eussent mis en pieces Clarimont. Mais quand tout le monde veid Alexandre remonter à cheual, & reprendre froidement le chemin de son Hostel, accompagné de L'indamart, qui durant ce deuil demeura immobile sur son cheual, ayant l'œil tousiours fiché sur le Carrosse, de l'infortuné Gentil-homme, pour voir si quelqu'un des siens feroit mine de brâler, pour secourir son maistre, ce ne furent que cris d'allegresse. Il y en eut pourtât qui releuerent ce corps qui n'auoit point d'ame, & le porterent à vne boutique prochaine. Ses parens & les seruiteurs s'y assëblerent de toutes parts, lamentans sa fin tragique & mal-heureuse. Mais ce ne fut rien au pris des plaintes que fit retentir le ieune Lucidôr, quand il entendit la mort de son Pere.

Ce brave Gentil-homme autant remply de courage & de valeur qu'autre de l'Empire, s'estant rendu
prom

promptement au lieu de ceste sanglante execution, & voyant celuy de qui il auoit receu la vie n'auoir plus de mouuement, est saisi d'une telle detresse, que le coup de la douleur par trop de sentiment le rend insensible. Il tombe à la renuersée froid & blesmé, & quiconque void en cet accident le Pere & le Fils, a bien de la peine à iuger qui des deux est viuât. Mais enfin quâd les esprits, qui se sôr ramassez à l'entour du cœur, cômme les chaudes exhalaisons dâs la froidure d'une nuë, commencét vn peu à s'éuaporer par l'humeur qui destile de ses yeux, & les longs souspirs qui sortent de son sein partelant, il commence à proferer de si pitoyables regrets, qu'il en eust esmeu les trois puissances fatales des Enfers à cōpassiō si ces cruelles n'estoiēt sâs oreilles aussi biē que sâs yeux.

O mō cher Pere, (disoit ce mal-heureux) est-il possible que vostre valeur ait esté surmontée si legeremēt par vn hōme, plus propre à contenter les Dames, que nourry dans les sanglans exercices de Bellonne, Ce mignon qui a plustost les attraiets d'un Medar que d'un Roger, dōt il se vante d'estre issu, se vantera il encor d'auoir mis au tombeau, toute valeur du monde? O femme cruelle auois tu conserué Elarimōt si long-temps parmy des hazards & des peñils si horribles, que la mort mesme y eust paly de peur, pour reseruer son destin à la pointe de l'espée de ce ieune Adonis; Pourray je bien viure & le voir triompher d'une telle gloire; Non, il faut que son sang appaise les Manes de mon geniteur, où bien que ma vie soit encores immolée à sa cruante.

Telles estoient les plaintes de Lucideir, à qui la douleur plustost quela verité faisoit tenir ce langage. Vn si sanglant obiect le rendroit parauanture excusable, si son Pere mourant l'espée à la main n'auoit rendu

du des preuues de s^{on} courage & de s^{on} adresse. Mais quoy ; nous sommes hommes, & par consequent subiects aux passions humaines, qui en des coups si sensibles, nous ostant, & le iugement & la raison. le le laisse rédre les derniers deuoirs à son Pere, pour reciter le bruit qui remplit la Cour de cete mort.

Quand la diuine Partemie en apprend la nouuelle, la Majesté, qui ayme la cōseruation de ses subiets & qui auoit fait prononcer deux ou trois iours auparauât vn edit rigoureux contre ceux qui se priuēt ainsi cruellemēt de vie, fut à bon droit courroucée contre le Prince. Toutesfois quand la Princeesse luy remonstre le iuste ressentimēt de son frere, & que ce mal-heur est arriué plustost par rencontre que par deliberation, elle s'apaise aucunemēt, tādīs qu'Alexandre s'absente pour quelques iours de la Cour attendant que la fumée de ces broüillars s'esclaircisse & que ceux qui iugent de cēt accident, suiuant leur passion plustost que par raison, en puissent voir clairement la verité. Ce nuage passe bien-tost des yeux de tous les plue fauorables à la cause de Clarimont, lors qu'ils ont cognoissance de l'iniure qu'il auoit faicte à vne si grande maison, pendant que le desir de vengeance represente incessamment à Lucidor la mort de son Pere.

Il semble que ce genereux Cavalier est deuenu lethargique durāt quelques iours, & qu'il a plus d'enueie de viure que de se battre. Mais cōme les fleues qui se cachent soudain en terre, ne laissent pourtant de courir où ils tendent, & puis de sortir plus gros & plus superbēs qu'ils ne paroïssoient auparauāt: aussi Lucidor qui chancelle pour quelque pen de temps, les flots de son courroux, en vomit bien-tost les ondes

des à gros boüillons, ne pouuât plus les retenir dâs son sein. Il ne se ressouuiét plus du dire du Sage: que les actions basties sur vne iniure mal fondée, sont tousiours malheureuses: au contraire, il préd le conseil du mal-aduisé, qui dit en son cœur, qu'il fera comme on luy a fait, & qu'il rendra à chacun suiuañt son œuvre, sans regarder la Iustice de la cause.

L'inégale courriere des mois n'auoit pas encorés du tout acheué sa course, depuis le iour que la Parque ferma les yeux à Clarimont quand Lucidor, qui veut accompagner l'ôbre de son Pere, ou bien sacrifier à ses Manes le sang de celuy qui l'a mis au tóbeau, pour mieux executer sa resolution qu'il prend ouure son cœur à vn géril Cavalier appellé Rolâd, qui auoit esté nourry Page en sa maison, qui depuis ayât atteint l'aage d'homme, estoit tousiours sorty victorieux d'une infinité de combats qu'il auoit rendus. Se fiant doncques à son courage, & à sa fidelité, il luy remonstre son iuste ressentiment, & luy dict, qu'il luy étoit impossible, de pouuoir plus viure dâs le monde, pendant que le meurtrier de son Pere sera vivant; que ne pouuant retenir plus long-temps le desir qui le sollicite nuit & iour à la vengeance: s'il a iamais recherché le subiect de luy tesmoigner son affection, c'est maintenant que le chemin luy en est ouuert, par la peine qu'il prendra à porter vn Cartel au Prince Alexâdre. Et pour mieux l'obliger à l'accomplissement de son desir, il le baise mille fois, & le coniure de ne luy denier point ce qu'aussi bien il feroit faire par vn autre.

Roland qui ayme ce ieune Seigneur autant que son ame propre, ayât appris cette ferme deliberatiõ se treuve bié empesché en vn affaire de telle importance.

MONSIEUR,

Nul ne peut estre plus fidelle tesmoin du iuste subiet de ma douleur que vous: c'est pourquoy ie vous supplie tres humblement de pardonner à mon ressentiment, si ie vous conuie par ce billet de me faire tant d'honneur que ie me puisse voir l'espée à la main avec vous pour tirer raison de la mort de mon pere. L'estime que ie fais de vostre courage me fait esperer que vous ne mettrez en auant vostre qualsié, pour euiuer ce à quoy vostre honneur vous oblige. Ce Gentil-homme vous amenera au lieu où ie suis avec un bon cheual, & deux espées, desquelles vous aurez le choix. Et si ne l'auiez agreable, ie m'en iray par tout où vous me le commanderez.

Ce genereux Prince, digne race des Notalis, qui se paist parmy les sanglants exercices de Mars, comme dans son element, ayant leu ce deffi, s'informe de ce Gentil-homme du lieu où son maistre l'attéd. Quand l'autre luy en a donné la cōnoissance, il luy dit qu'il luy pardonne la folie que sa temerité luy a fait cōmettre, osant si librement le venir apeller au cōbat de la par d'une personne que la Nature luy a réduit inegale, qu'il viue doncques sans apprehension pour ce regard: mais qu'il retourne vers Lucidor afin de l'asseurer, que dans vne heure pour le plus tard, il le verra au lieu où il l'attéd, pour luy donner toute satisfaction. Cependant il conseille à ce Cavalier de noublier pas vne bonne espée, parce que sans doute celuy qui l'accōpagnera pour estre tesmoin de cette action ne luy permettra pas de s'en retourner sans auoir espreuue son courage. Roland remercie le Prince de sa courtoisie & de l'honneur qu'il luy fait, le plus grand quil puisse iamais receuoir, & de qui les Histoires parleront eternellement; & apres priéd con-

gé d'Alexandre, monte sur son cheual qu'un laquay luy tiët prest à la porte de l'hostel, & puis sort de la grande ville de Suze. Il le fait aller si legerement qu'en peu de temps il arriue au lieu où Lucidor l'attend avec impatience.

Et bien mon grand amy, luy dit-il en l'embrasant, le Prince aura-il le courage de me faire raison de la mort de mon 'Pere,

Pensez seulement à vous bien deffendre (respond Rolád) & Dieu vueille que cette meslée soit plus heureuse que l'autre. Le Prince ne manquera point de compatoistre presentement icy où vous l'avez conuié. Je crois aussi que ie seray du festin? dõt ie me repüte extrememët heureux, tant pour l'honneur que i'y receuray, que pour le témoignage que ie vous y rendray de mon seruice.

Tandis qu'ils se disposent à bien faire, Alexandre s'habillant promptement enuoye à Lindamart, que se vouloit mettre dans le liët pour se reposer, & qui reuenoit à l'heure mesme de la ville d'un lieu où il auoit demeuré toute la nuët à passer le temps. Ce renommé Cau-lier ne manque pas de se rendre incontinët à la châtre du Prince, qui luy baille aussitost à lire le d'ffi, & puis luy commande à l'oreille d'aller au mesme instant faire viste equipper tout ce qu'il faut, deux bõs cheuaux, & les tirer hors de l'escurie, le plus secrettemët qu'il luy sera possible. Lindamart obeyt soudain au Prince, & à peine les cheuaux sõt à la ruë, que le Prince qui n'auoit pas la patience de se faire habiller descend, saute legerement sur l'un d'iceux, sans mettre le pied à l'estrien, & Lindamart sur l'autre, & puis estans sortis par la porte qu'on nomme de l'Hermite, ils marchent par ceste
belle

belle plaine qu'on descouvre à la sortie de la ville.

Lors que Roland qui est au guet les apperçoit, il en aduertit soudain Lucidor qui est caché derrière le clos de l'Hermitage, & apres piquant son cheual, il s'approche du Prince, le salue & luy tient ce discours
Generoux Prince, vous sçavez la ceremonie qui se pratique ordinairement à visiter ceux qui doiuent combattre à outrance : c'est pourquoy ie vous supplie que vous ne treuuiiez point estrange si ie procede enuers vous, come ie ferois enuers vne personne de moindre estoffe, & puis ce Cavalier qui vous suit, en fera de meisme, s'il vous plaist, enuers Lucidor.

Mon amy (dit Alexandre) il n'est pas besoin que tu prennes tant de peine, pique seulement vers ton maitre ? dy-luy qu'il se haste, & qu'il fasse comme tu me vois faire. Ce disant, il prend son pourpoint qu'il despoüille, & le iette par terre en le deschirant & descouvre à nud sa chair, qui fait honte à la blancheur des lys qu'on vient de cueillir tout fraichement. Roland estonné de ce courage qui n'a iamais veu la peur qu'au front de ses ennemis, doute, & n'õ sans grande raison, de la vie de son Maitre, qu'a grande course de cheual il va promptement faire sortir du lieu, où il s'est mis à couvrir.

Qui dõnera à ma plume le sçauoir de bien depeindre à la posterité le plus funeste, & le plus horrible de tous les cõbats, qui se liront iamais dans les Histoires ; Quel ancre de sang marquera désormais d'une lettre assez rouge, le dernier iour du mois le plus court de l'année : iour que la glorieuse fortune d'Alexandre, & la triste auanture de Lucidor rendent pour iamais memorable ? Il semble que le Soleil palisse de peur à ce sanglant spectacle. O Perse voicy vn nou-

neau sujet de dueil. La perte que tu feras bien-toſt de l'vn des plus gẽtils courages que le flambeau du monde verra iamais te doit eſtre fort ſenſible. A la mienne volontẽ que la paſſion eut trẽuẽ dans ſon ame moins de place que la raiſon, il euſt ſuiuy de bien pres le Prince Alexandre, eu l'honneur qu'il doit vn iour acquerir, lors que ton ieune Sophy ira à la conquẽſte de tout le monde.

Si toſt que le braue Lucidor apperçoit Alexandre en l'eſtat que nous l'auons laiſſẽ, il louẽ ceſte genereuſe actiõ, & pour ne luy ceder en frãchiſe, il ouure sũ pourpoint, le met en pieces, & paroĩt en chemiſe: il pique des eſperons ſon cheual, partant comme vn foudre, l'eſpẽe à la main, il ſe lance ſur le Prince, qui fond ſur luy comme vn torrent qui tũbe d'vne haute mũtagne & qui noye toute vne plaine. Les coups ſont diuers, car en paſſãt Lucidor perce l'eſpaule ſe-neſtre d'Alexandre, pendant que le Prince luy paſſe ſon eſpẽe ſous le bras droit, n'as luy faire autre mal. Le valeureux Cavalier voyant ſon ſang couler à longs filets & ſon aduerſaire ſain & gaillard, s'eſchauffe comme vn ſanglier quand il ſe ſent atteint d'vn coup d'eſpieu. Il tourne ſon cheual, & ſuiuant ſur Lucidor il luy perce le bras gauche, pendant que l'autre luy porte vn coup au coſtẽ droit, que le Prince ne ſçait biẽ equiuer qu'vne piece de ſa chemiſe n'en ſoit emportẽe. O Dieux, (ce dit alors Alexandre tout baſſement) vous ſçauẽz la iuſtice de ma cauſe, ne permettez pas que le deſeſpoir d'vn ieune homme triomphe de ma valeur.

Il acheuoit de prononcet à part ſoy ces paroles, lors qu'il fit faire vn ſaut à ſon cheual; & que paſſãt ſur ſon aduerſaire, il luy tire vne eſtocado qui luy
perce

ce d'outre en outre le costé droit, & en fait iaillir vn ruisseau de sang. Lucidor aucunemét estonné, s'arme plus que deuant d'un courage magnanime, & poulsant son cheual porte au petit ventre du Prince vn coup, auquel ce parfait Cauallier par son adresse incôparable, oppose l'arçon de la selle, qui en est percé de part en part: & cepédant il lasche vn autre coup d'estoc dans l'espaule droicte de Lucidor qu'il ouure d'une profóde playe. l'ay horreur de reciter les horribles coups qu'ils se donnerent. Le Prince en auoit desia cinq ou six qui perçoient à iour l'arçon de la selle de son cheual, & dix ou douze en diuerses parties du corps, & l'autre estoit percé côme vn crible, quand transporté de rage il se iette sur Alexandre, & luy porte vn coup droict au gosier, que le Prince diuertit de son espée, mais non pas si bien qu'il n'atteigne le gras du bras gauche, & ne luy fasse vne playe large de quatre doigts. Qui a iamais veu vn Taureau eschauffe de l'amoureuse rage, se ietter furieusement sur son riuai, qu'il s'imagine de voir Alexandre, lors qu'il se sentit si viuement touché. Tel parauanture estoit le Dieu de Trace, quand Diomed le blessa deuant Troye: mais toutesfois le Prince estoit bien plus resolu à se venger, car de ce bras qui chastie les plus mauuais garçons, il tire vne si roide estocade, que le coup brise vne partie de l'espée de Lucidor qui s'estoit opposée à la rencontre, & penetrant plus auant treuue sous la mammelle gauche le fensier du cœur, qu'il perce de part en part, & en chasse la vie. Bien-heureux guerrier, à qui la cause de sa mort sert de consolation; car s'il meurt pour le moins, c'est de la main du plus digne Cheualier qui ceignit oncques espée.

*Côme un vaillāt guerrier qu'au milieu des combats
 Quelque fameuse espée a fait tomber a bas,
 Et qui se sent la vie & le sang y resspandre,
 En mourant il s'ecrie orgueilleux de sa mort:
 - L'auteur de mon trespas me sert de reconfort;
 Je meurs, mais abbatu par la main d' Alexandre.*

Pendāt ce cruel exercice, le genereux Lindamart, & le braue Roland, qui s'estoient au commencement amusez à considerer la valeur & l'adresse de ces deux ieunes Palladins s'escarterēt quelques cent pas pour éprouuer leurs espées. Lindamart de qui le courage est estimé par tout le monde, auoit esté si pressé lors que le Prince luy cōmanda de le suiure, qu'ayant oublié son espée à la chambre, il en prit à la ruē vne que l'vn de ses Laquais portoit en escharpe, sans auoir la patience d'attēdre qu'on luy apportast la siēne, ny sans considerer si celle qu'il prenoit, estoit de fine trempe.

Ils se tirerēt plusieurs coups memorables, où nous ne nous arresterons plus long-temps, parce que nostre intention n'est pas de descrire maintenant les particularitez de leur combat, que nous descrivons exa^{ct}tement en la suite de nostre Romāt des Chauliers de la gloire, lors qu'il sera tēps d'en discourir. Nous dirons seulemēt que comme les armes sōt iournalieres, Lindamart se trouua percé d'outre en outre de deux coup mortels pour quelque autre, qui eust eu moins de courage, mais non pas pour vn si genereux Cavalier, qui ne moura iamais de coup d'espée. Le malheur l'accompagne encores tellemēt que son chenal venant à broncher, vne profonde playe qu'il a dās l'estomach s'ouure & verse vn deluge de sang. Il se releue pourtant l'espée à la main, & cōme
 il

il est resolu de se vanger, il apperçoit son aduersaire qui ayant veu tomber Lucidor, piquoit vers Alexandre, pour le supplier de se contenter de l'auoir mis à bas. Lindamart croyant que Roland y courroit pour vn autre suiet, crie au Prince de prédre garde à luy. Le Cauallier se tourne tout empourpré de son sang, le glaue droict à la main. Voyant venir l'autre si legerement vers luy, il part comme vn traict décoché par vn puissant archer, en intention de faire sentir le tranchant de sa redoutable espée à ce braue Gentil-homme. Mais Roland s'arreste, & baillât la poindre de la sienne, luy dit : Prince genereux, c'est assez. Comment assez (repart le Prince encores tout eschauffé) ie ne dis iamais, c'est assez, tandis que i'ay l'espée à la main. C'est assez (valeuroux Cheualier poursuit encores l'autre en croisant les bras) contentez vous que toute valeur rend hommage à la vostre. A ces mots Alexandre qui tient du naturel du Lion genereux, qui pardonne aux vaincus, & dompte les rebelles, s'arreste, & profere ce langage : Va doncques, & pense aux funerailles de ton maistre.

Il s'approche cepédant de Lindamart, qui s'estoit assis sur l'herbe, la perte de tant de sang ne luy permettoit pas de remôter à cheual. Le Cheualier outré d'une douleur extreme, pour la crainte qu'il a de perdre vn si fidelle seruiteur, voyant qu'il n'estoit pas temps de discourir, regarde d'un costé & d'autre, & void vn carrosse qui passe, & qui tire vers la ville. Il pique soudain, & prie ceux qui sont dedâs d'y vouloir receuoir vn Gêtil-homme extremement blessé, pour estre conduit à son logis. Au commencement l'on fit difficulté de luy accorder sa priete: parce que de premier abord on ne le reconeust pas ainsi saignant

qu'il estoit. Mais quand on sceut que c'estoit le Prince Alexandre, soudain on arresta le cartosse, & l'on coucha doucement dedans Lindamart.

Tâdis la Renômée, prôpte Messagere des auâtures, seme legerement la nouuelle de ce cōbat par route la ville de Suze. Au bruit qu'elle en fait, vne infinité de Seigneurs se rendent soudain à l'Hostel du grand Almidor. Le Prince en auoit esté aduertry par le moyé du Cartel qu'on treuua sur la table de la châbre d'Alexandre. Il saute legeremēt du lit, & cōme il est prest d'aller promptement vers le lieu de l'execution, vn Gentil-homme arriue, qui luy rapporte le succez du combat: la mort de Lucidor, la gloire d'Alexandre, & les dangereuses blessures de Lindamart. O pauvre Lindamart (dit alors le Prince soigneux de la vie des siens, autant que de la sienne propre) que ie te régrette ! Qu'on aille promptement chercher le sçauant Astibel, afin que leur playes soient par luy visitées de bonne heure. Pendant qu'on va vers le logis de cēt expert Chirurgien, qui fait des miracles en ses cures, vn Gentil-homme dit au Prince Almidor, qu'il ne doit pas se mettre en peine pour la vie de Lindamart, parce que c'est vn tesmoignage infailible qu'on ne meurt point lors que l'on tombe d'un coup qu'on reçoit, si au mesme instant l'on a le courage de se releuer, de même qu'auoit eu Lindamart. O Dieux (repart le Prince) c'est vne foible raison pour m'asseurer de Lindamart, car il n'a que trop de courage.

Comme il tient ce discours, & qu'il se promene à la Cour de son Hostel, avec le Duc incōparable, qui suiuy d'une grande troupe de Cavaliers, estoit hastiuemēt couru au logis du Prince, pour luy offrir sō
eslète,

espée, voila qu'Alexandre paroît marchant au petit pas, sans pourpoint, couuert de son manteau durant la plus grâde froidure de l'Hyuer. Il met pied à terre & Almidor en l'embrassant luy demande s'il est fort blessé. Montaigneur (ce dit-il non pas mortellemēt, comme ie croy. Pleust à Dieu que Lindamart en fut eschappé à si bon marché. Et où est-il (repart Almidor.) Le voila dit Alexandre dans ce carrosse qui s'approche de nous. Cependant la fleur de toute la geueuse Noblesse de Perse, vient baiser la main victorieuse de ce ieune Prince, dont l'ardeur du courage empesche à la froidure de rendre figé son sang, qui degoust de plusieurs parties de son corps. Chacun admire sa franchise & sa valeur, & louë le Ciel de son heureuse for une : mais particulièrement les Citoyens de Suze, accourans à milliers deuant l'Hostel d'Almidor, rendent graces aux Dieux de ce qu'ils leur ont conserué vn si cher Nourrisson. Les vns disent que le nom de Grand, luy est aussi bien deub que celuy d'Alexandre. Les autres asseurent tout haut qu'vn iour il obscurcira la gloire de ses Ancestres, lors qu'il suura le ieune Sophy avec conquestes que les Oracles luy promettent.

Sur ces entrefaites le carrosse où estoit Lindamart arriue. Il est porté doucement dans sa chambre, & couché dans vn bon liēt, où Astibel le traicte avec tant de cure, qu'en peu de iours on prend vn bon augure de ses playes. Nous le laisserons avec le Prince Alexandre remettre entre les mains d'vn si sçauant homme, le soin de leur guérison, & retournerons au recit de Lucidor.

Ce couràgeux Cavalier ayant rendu à la Nature, ce que tous les hommes luy doiuent, & acquis par sa

mort honorable, vn renom qui ne mourra iamais , son ame encores toute allumée de courroux'est receuë dans la barque de l'auare Nautonnier , qui la passe de là du fleuve , en vn lieu où l'on ne void iamais la plaisante lumiere du Soleil , & son corps est portée au monument par ses plus proches , & mis avec le corps de son Pere, dans vne tombe de marbre , couuerte d'une lame de cuiure ou l'on graue ces paroles,seruants à tous deux d'Epitaphe.

O diuers succès du sort des humains! Icy gisent le Pere & le Fils. Pour venger la mort de son Pere, vn Prince donne la mort au premier , & l'autre voulant venger la mort du sien , perd luy-mesme la vie. Passe Passant , & loüe son courage & sa pieté.

C'est la fin tragique & deplorable du Pere & du Fils. La mort de l'un nous apprend, que qui veut cōseruer sa vie, doit empescher que sa lāgue ne deuāce point en parlant ce qu'il doit dire. La parole vole legerement, mais elle blesse cruellement : elle passe comme vn esclai, mais elle brusle en passāt: elle penetre facilement dans l'ame, mais elle n'en sort pas aisémēt. Enfin on la profere sans aucune peine, mais on ne la peut plus retirer: & comme elle vole legerement, elle viole en vn instant toute affection. Il est bien dangereux de dire non seulement des choses fausses, mais encores d'ē proferer de veritables, lors que celuy contre lequel on les adresse ne manque point de pouuoir ny de ressentiment. La mort entre par la porte de nostre logis, quand nous nous enīcipōs de discourir hors de saison, sans considerer le lieu.

lieu, le temps, & la personne de qui nous parlons. Le vain discours est le témoignage d'une vaine conscience, & la parole descouvre incontînét les mœurs de celuy qui la lasche.

Pour le Fils, ie le trouue grandement excusable, si l'on regarde à la rigoureuse ioy de l'horreur, que routes les ames genereuses obseruent si exactement au Royaume de Perse, qu'y mâquer vn seul point, c'est estre des-honné pour iamais. Il me semble encores que l'on remarque de l'iniustice du Ciel au succez de la triste auâtüre de ce Gentil-hôme. Car, ô Dieu! pourra dire quelqu'un si vous estes defendeur de la iustice d'une cause: pourquoy permettez vous que l'un poursuiuant la vengeance de la mort de sô Pere, enuoye l'un de ceux qui consentirent à son trepas aux demeures sombres & tenebreuses? Et l'autre poursuiuant vne pareille vengeance, est luy mesme contraint de mourir de la main propre de celuy qui a donné la mort à son Pere?

O iugemés du grand Dieu (respondra quelqu'autre) que vous estes remplis de droicture! la n'adviene, que nous osiôs vous attribuer liniquité. Le poid & la balance sont vos iugemens, & vous rendez au hommes leurs œures, & leur restituez suivant les voyes des cœurs que vous sondez. L'un auoit végé la mort d'un innocent, & l'autre vouloit venger la mort de celuy que l'on ne peut excuser.

Il ne faut dōcques s'estonner, si vous consentez à sa perte, puisque vous supportez l'equité, & faites vengeance de l'iniustice. On doit suivre ce qui est iuste, si l'on veut viure longuement sur la terre, C'est bien viure, lors que ny passion, ny hayne, ny bien-yueillance, ne sont capables de nous faire embrasser
vne

une mauuaife cause. C'est pourquoy quiconque iugera de cette action, qu'il ne s'arreste pas à l'apparence, de peur de ne donner vn temeraire iugement contre celuy de qui l'innocence ne sera iamais offencée par la temerité : au lieu que la temerité pourroit necessairement estre nuisible à celuy qui entreprendroit d'en iuger temerairement.

L V C I D O R I S I N F O R T V N A T I

V I N D I C I S , N E C N O N M A G N A N I M I

I u e n i s t u m u l u s .

B. I. C. P. C.

Vlscî Patris cadem dum nititur armis

Filius infelix, pro genitore cadit.

Vieta licet pietas tamen est laudanda parentis

Victorem voluit, qui iugulare sua



DE L'HORRIBLE ET ESPOV-
nantable sorcellerie de Louys Goffredy,
Prestre beneficié de Marseille.

HISTOIRE II.

Si iamais l'ennemy commun du genre humain a donné du scandale au monde. Si iamais il a fait paroistre par ses horribles impietez, & par ses abominables seductions la Malice de sa nature, & la tyrannie qu'il exerce sur ceux qui en sont possedez, i'estime qu'il l'a fait en ce siecle où nous viuons, plus qu'en

qu'en tout autre. Je ſçay que l'ariquité peut produire beaucoup d'exéples de la rage & de ſon impoſture, ſi execrables, qu'ils fôſt dretter les cheueux en leſiſant: mais l'ignorance que les mortels auoiét pour lors du vray Dieu, & leur Idolatrie, ſeruiét d'inſtrument à ſes trôperies, de ſorte que la merueille n'eſt pas ſi grande, comme de voir maintenant qu'en ce ſiecle il ait puiffance par ſes organes, de ſe iouer des deux plus auguſtes Sacremens des Chreſtiens, de corrompre la chaſté des filles & des femmes, & de comettre mille autres abominables crimes: en ce ſiecle, diſ-je, & en vn pays où la foy de Ieſus-Chriſt qui abriſé par ſa mort glorieuſe la reſte de ce ſerpét eſt plantée, où le nom du vray Dieu eſt inuocé. L'horreur de cette Hiſtoire reſmoignera la verité de mon dire. Je l'ay eſcrite ſuiuant la verité des actes, & ſelon les memoires que des témoins irreprochables en ont faiéts. Que ceux qui viendront apres nous, ne l'eſtiment point vne fable; il n'y a pas encore deux ans, qu'un des plus grâds, & des plus infames inſtrumens que l'Enſér ait iamais produict, fut publiquement executé en Prouence, apres auoir eſté attainct & conuaincu des execrables abominatiôs ſuiuâtes.

Aux montagnes proches de Grace eſt vn village nommé Beluezer, où vn certain Preſtre renommé pour vn ſainct homme ſe tenoit, nommé Pierre Goffredy. Il auoit vn neveu fils d'un frere, auquel il aprit quelque peu de lettres humaines, afin de le rendre capable de ſuccéder vn iour à vne petite Cure qu'il auoit. Ce Neveu s'appelloit Louys Goffredy, à qui ſon Oncle dóna ſes meubles en mourant, & entre autres ſes Liures. Vn ſoir comme il en faiſoit inventaire, il y treuua parmy vn certain petit liure eſ-

crit

crit à la main, remply de caracteres, & d'inuocatiōs diaboliques, où le moyen de coniurer ces mal-heureux Esprits estoit contenu. Au cōmencement Goffredy estoit en resolution de le mettre dans le feu: mais la curiosité, qui cause tant de mal au monde ayāt plus de pouuoir dans son ame, desia disposee de sa nature au mal, que la crainte de Dieu, il se resolut de faite experiēce de ces inuocations, en la maniere qu'elles estoiet descrites, & prit celle qui s'adressoit à Beelzebub Prince des diables. Si tost qu'il eu acheuē l'execrable myltiere, voilà que Sathan apparoit à luy en forme humaine, & luy tient ce discours: *Qui veux-tu de moy (Goffredy) Je suis sorty de ma sombre demeure aussi-tost que tū m'en as euoqué.* Goffredy fut de premiet abord estōné, toutesfois endurcy en son abominable resolution, il respōdit en cette sorte: *Que es tu qui te presentes maintenant à moy; Je suis (dit Sathan) le Prince de tout le monde: ie gouuerne cōme il me plaist l'air, la mer, la terre & les Enfers. Quiconque fera mon comandement, & se donnera à moy, ie le rendray excellent en tout ce qu'il voudra.* Mais (repart Goffredy) cela seroit bon, si apres la mort on n'estoit point si cruellement tourmenté dans la gehenne de feu, pour auoir adheré à tes volōtez. Que tu es simple, dit le Diable, de croire ce tourmēt. Ce sont des choses imaginées, & forgées à plaisir, pour faire peur aux hommes. Pensez-tu que si cela estoit, moy & tous mes Anges eussions pouuoir d'aller par tout où nous voulons exercer nostre Empire, & ny prédre nos esbats Il faut que tu croyes que les ames de ceux qui font ce que ie veux, deuiennent apres la separation de leurs corps des Demons, & que suiuant qu'elles ont operé en ce mode selon ma volōté, elles

les sont recompensées de charges honorables. Or si tu veux te donner entieremēt à moy, ie t'octroyeray en ce monde tout ce que tu me demanderas, & puis tu seras avec nous apres ta mort, colloqué en quelque degré des plus excellēs. O promesse non moins estrange que diabolique, & neantmoins estimée pour veritable de tous les Sotciers, ainsi que nous le resincignerons par des exemples admirables, en la suite de ceste Histoire.

Goffredy alleché doncques de cette promesse, & desia possédé de ce Lyon rugissant, prie le diable de luy dōner terme d'un iour pour se resoudre à ce qu'il doit faire, & le malin Elprit disparoit. Quād la nuit suiuaire est arriuée, ce mal-heureux reitère sa coniu-ration, & Sathan luy apparoist en mesme forme que la nuit precedente. Il est vray que pour mieux attrapper son homme, il estoit enuironné d'une grāde lumiete. As-tu bien pensé (dit-il à Goffredy) à ce que tu me promis hier? Ouy (respond l'autre) Si tu m'octroyes ce que ie te veux demāder, ie te donneray pareillement tout ce que tu voudras de moy: Or ie te demande trois choses. La premiere est, que ie veux estre honoré, & le plus estimé de tous les Prestres de la Prouence. La seconde est, que ie veux viure trēte & quatre ans sās maladie, ny incommodité en ceste reputation. Et la troisiēme que ie veux estre aymé, & auoir la iouyssance de toutes les femmes quā ie desireray, soit en les soufflant, soit en leur donnāt quelque charme. Le diable luy ayant accordé ces trois choses, Goffredy luy en octroye trois autres. Il luy donne reciproquemēt son corps, son ame & toutes ses actions. Cedula mutuelle s'en fait. Ce maudit escrit de son sang, la signe, & Sathan l'autre

tre de sa main: toutes fois il le trompe, selon sa coutume: car au lieu de trente & quatre ans, il ne met que quatorze, luy éblouissant les yeux, & luy faisant prendre vn pour trois.

Cet accord Diabolique passé, Goffredy quitte le lieu de sa demeure, & s'achemine à Marseille, où il fait dessein de s'arrêter. Il n'y eut pas long-temps esté, que par son hypocrisie, & moyés de son maistre il est fait benedicé en l'Eglise des Accoulés. Le bruit de sa saincteté court en peu de temps par tous les lieux circonuoisins. Toutes les femmes les plus deuotes se vont confesser à luy. Cependant il exerce sur elles ses malefices, & en les soufflant iouyr de toutes celles qu'il veut. O estrange & inouye permission de Dieu! O Seigneur que vos secrets sont profonds & inexplicables! i'ay honte de publier ce qui n'est que trop veritable, & qui neantmoins meritoit d'estre submergé dans le fleuve d'oubly.

Pendant que cét hypocrite est estimé de tous les gens de bien & qu'il seduit les filles, & les femmes de son prochain, il assiste ordinairement au Sabbats des sorciers, & à leurs assemblées generales, qui se fôt en diuers climats de l'Europe, & d'une partie de l'Asie. Il auoit esté esleu en vne des detestables conuocations, pour Prince des Magiciens de France, d'Espagne, d'Angleterre, d'Allemagne, & de Turquie: si bien qu'il menoit la bande, lors qu'on faisoit l'hommage au Bouc, mesme souuent les diables le transportoient, quand il vouloit, au basses Allemagnes, pour y iouyr d'une Princesse sorciere, & puis le ramenoient à Marseille. Quelques années se passent de la sorte, pendant qu'il fait tousiours son sejour en ceste ville, estimé, comme nous auons desja dict, pour

le

les plus hommes de bien du monde. Ceste reputatiō luy donnoit l'entrée de plusieurs bōnes maisons, & entre autres ils s'insinua en celle d'un gentil-hōme Provençal, nommé le sieur de la Palud. Ce Gentil-homme avoit vne ieune-fille nommé Magdelaine de la Palud, assez belle & gentille, & de l'age de dix ans. Goffredy ayant jetté l'œil sur elle, la conuoita & vlsant des charmes accoustumé il en eut la iouyssāce charnelle. Son Pere se tenoit le plus souuent aux champs en vne sienne metairie ou Goffredy alloit souuent, sous pretexte de le visiter: mais en effect c'estoit pour voir Magdelaine, & pour executer ce qu'il avoit entrepris, en la sorte que ie vai le reciter.

Ayant vn iour trouué Magdelaine toute seule, & apres avoir iouy d'elle, il la sollicita de venir avec lui dans vne cauerne proche de ceste metairie, où il promettoit de luy faire voir de grandes merueilles. Ceste ieune fille le creut, & tous deux estans arrivez dans l'Antre, ils y treuverent vn grand nombre d'hommes, & de femmes qui dansoient à l'entour d'un grand Bouc, assis. Magdelaine fut toute estonnée au commencement, & eut vne grande frayeur, voyant ce spectacle: mais Goffredy luy donna courage en luy disant, que ceux qu'elle voyoit estoient de leurs amis: qu'il ne falloit pas qu'elle eust peur: au contraire qu'il falloit que desormais elle fût de la bande, luy promettant de recevoir le plus grād hōneur qui luy peut iamais arriver. Avec ces belles paroles il la mene vers le Bouc, qui estoit Beelzebub, & la luy presente. L'exécrable Demon la prend & la marque comme les autres Sorciers, & puis s'accouple avec elle, & la viole. Ce faict les Sorciers & Sorcieres qui s'estoient assemblez à l'entour jettent yn

grand cry de resiouyſſance, & puis d'un conſentement, la declarent Princeſſe de la Synagogue, de meſme que Goffredy en eſtoit le Prince. Quand elle & Goffredy s'en retournent, il luy commande de ne dire rien de ce qu'elle auoit veu, ny à ſon pere, ny à ſa mere, ny a aucun autre. Depuis il ne ſe tenoit aſſemblée nocturne que les Diables ne l'y transportaſſent, là où elle eſtoit recogneue pour Maiſtreſſe des autres Sorcierres, & cognuë charnellement par le Bouc. Il ſe trouue des perſonnes qui ſe moquent de ce qu'on raconte tant des marques des Sorciers, que accouplemens charnels qu'ils ont avec les Diables, mais s'ils auoient leu les liures des Payens, ils y auroient appris que ce n'eſt pas d'auourd'huy que cét aductſaire pratrique ces choſes. Les myſteres de Cybelle, & de Cerés: & les Orgyes de Bacchus n'eſtoient autre choſe que ce qu'on appelle auourd'huy Sabbat. Les Eſprits d'Orphée, & d'Eumolpe, grand Sorcier s'il en fut iamais, nous teſmoignent, que ceux, qui deſiroient eſtra receus en ceſte confratrie & aſſemblé, y eſtoient enrolés de nuict dans quelque cauerne eſcartée.

L'on faiſoit aſſeoir le Nouice ſur vn ſcabeau, & puis tous danſoient en rond, à l'entour, & l'on aperceuoit des choſes eſtranges & horribles. Au reſte tous ces ſorciers du temps paſſé eſtoient tous marquez comme Orphée, Eumolpe, Tireſias & ſes filles Daphné, & Manto, & autres, & eſtoient viſitez charnellement par des Incubes, & des Succubes. Mais laiſſant à part ce diſcours, & retournans à noſtre Hiſtoire, teſmoignée par vne infinité de perſonnes viuant, & dignes de croire, & confirmée par tant de bons Religieux: voire encore par vn Arreſt d'une ſouueraine

souueraine Court de Parlement , prononcé par son premier President, l'vne des grandes lumieres de ce siecle , soit en doctrine , soit en pieté , nous dirons que par la permission de Dieu, de qui la misericorde est infinie , & la pieté incompréhensible , il vint en fantaisie à Magdelaine de la Palud , qui pechoit en partie de ieunesse , & d'ignorance, de se rendre Religieuse au Conuent de sainte Vrsule , qui estoit sous l'administration des Prestres, qu'on nomme de la doctrine Chrestienne. Ayât communiqué son intention à Goffredy , elle est persuadée de quitter ce desir. Il ne veut point qu'elle entre nullemét en Religion, mais qu'elle espouse vn beau & riche ieune homme, qu'il luy veut donner pour mary. Toutes-foi ces promesses ne sôt pas capables de la détourner de c'este resolution. Le Magicien voyât qu'il ne peut l'en distraire, il vse de menaces, & iura par toutes les puissances des Enfers, que si elle execute son entreprise, il affligera tout le Conuent, & fera mourir ctuellement elle & toutes les autres Religieuses, avec tous les Prestres de la doctrine Chrestienne: Ces menaces ne furent pas sans effect: car aussi-tost que Magdelaine est receüe en ceste Religión, Goffredy en vertu de la promesse qu'il auoit faite au diable , signée de son sang, luy enuoye dans son corps Beelzebub, Leniathan, Asmodéc, Barberith, & Altarot. Deploable condition de ceux qui seruent à tels maistres. Non content de cét acte , il iette encores vn malefice sur vne autre ieune Religieuse, nommée Louyse Cappel, & la fait posseder par vn autre Démon, appellé Verrine , & deux siens compagnons , Grezil, & Sonneillon. Ces deux filles ainsi possedée faisoient paroistre les mouuemens estranges & non

accoustumez. Elles se remuoient, se destordoient, rouloient des yeux, tiroyēt la langue, & faisoient par fois de telle grimaces, que les Prestres qui en auoient le gouvernement en estoient tous esbahis. Le Supérieur qui se nomme Jean Baptiste Romillon, estonné de eēt accident, & recognoissant d'oū en procedoit la cause, de peur de ne diffamer le Couuent, s'efforçoit d'y apporter le remede salutaire, par l'extremise des exorcismes secrets & cachez qu'il faisoit faire en leur chappelle. Mais quelque peine qu'il y prit: quelque ieūne, priere, & oraison qu'il employast, son trauail fut inutile. Iamais les Demons possesseurs de ces corps n'ouurirent la bouche pour parler & pour declarer qu'ils estoient, ny pourquoy ils s'y estoient logez. Ce bon Pere ayant long-tēps trauaillé en cest exercice, & se voyant frustré de son attente, depuis vn an qu'il ne cessoit d'exercer le soing & le remede qu'il y pouuoit apporter, se resolut d'amener Magdelaine de la Palut à S. Maximin. C'est vne ville distante de Marseille de quelque sept lieues, où l'on void plusieurs saintes Reliques, entre autres, la Phiole où le sang que nostre Seigneur Iesus-Christ versa, lors qu'on luy ouurist d'vne lance le costé est contenu, & où le corps de la Sainte Marie Magdelaine qui le recueillit repose. Quand il fut arriué avec la possédée, il alla trouuer le P. Michaelis Prieur du Couuet, personnage fort renommé pour la pieté & Religion, afin de prédre de luy conseil, en vne affaire de telle consequence. Ce Religieux Pere fut d'avis qu'on fist faire vne neufuaine à la possédée, en la chapelle où se repose la sainte Magdelaine: & puis qu'on l'aménast avec Louyse Cappel à S. Baubanne, lieu où la belle pecheresse passa 30. en

vne

vne dure & austere penitence. Ce fut le vingt-septiesme Nouuembre 1610. qu'ils y arriuerent, & trouuerent le Frere François Doms, de l'Ordre des freres Preicheurs, que le P. Michaelis son superieur y auoit quelques iours auparauant enuoyé. Ce Pere Doms ayant esté prié d'exorcer, il commença par Louyle, & apres les coniurations vsitées, le diable Vertine se mit à parler & à discourir, au grād estonnement des assistans. Il nomma luy & ses Compagnons pareillement, Gresil & Sonneillon, & pour preuue qu'il estoit vn Demon, il donna plusieurs signes extraordinaires durant quelques iours. Apres continuant son discours, il entra sur la louange de la sainte Mere de Dieu, sur sa beauté, sur ses richesses, sur son sçauoir, sur sa douceur, & sur sa misericorde. Tous ceux qui l'oyoient parler en estoient tous ravis. Il disoit en outre, qu'il auoit esté expressement destiné de Dieu, pour descouurir deux personnes Magiciēnes, & entre autres, le Prince des Magiciens de Frâce, d'Espagne, d'Angleterre, d'Allemagne & de Turquie, le Createur de l'Vniuers ne pouuans plus supporter les blasphemés, & les iniures que l'on commettoit là contre sa Diuine Majesté, & contre le saint Sacrement de l'Autel. *O peuple Catholique (disoit ce Demon) voicy la plus estrange & la plus innouye chose qui soit iamais arriuée au monde. Iamais de pareille n'y arriuera. Vn Diable est deputé pour la conuersion des hommes. Et neantmoins la misericorde Celeste est si grande, que les peruers ayans renoncé à Dieu, à la mort, & à la passion de Iesus Christ son fils & à tout ce qu'il a merité, aux inspirations du S. Esprit à l'assistance de la glorieuse Vierge : à tous les chœurs de Anges, à tous les Saints ; aux Sacremens, aux Predica.*

tions & généralement à toutes les creatures visibles, hormis au diable, le grand Dieu se sert maintenant des esprits mal-heureux pour les publier, & les manifester aux yeux de tout le monde, voire mesme pour les convertir. Ce diable Verrine continua de faire ces exhortations l'espace de deux mois, & lors que Magdelaine de la Palud fut confrontée à Louyse Cappel, ce mesme demō iururoit Beelzebub, qui estoit dans le corps de Magdelaine, & mesprisoit toutes ses menaces, disant que c'estoit par le cōmandement de Dieu, qui pour cēt effet luy auoit promis de diminuer les peines qu'il deuoit souffrir aux Enfers.

Après que Verrine eut fait des remonstrances dignes & graues, qu'il proféroit contre son gré à la louange de la Trinité, de la tres-saincte Vierge, & de tous les Anges, Saints & Saintes de Paradis: il nomma Louys Goffredy, & dit que c'estoit luy qui estoit le Prince des Magiciēz, qu'il l'euoit enuoyé avec ces compaignons Grezil & Sonneillon dans le corps de Louyse, ayant eu ce pouuoir, parce que souuēt elle auoit demandé à Dieu de luy faire souffrir toutes les plus cruelles peines qu'on puisse imaginer, voire même les tourmens des damnez, pourueu que ce fust pour la cōuersion de l'une de ses sœurs, qui se trouueroit hors de la grace de Dieu. Ce diable eut grād cōbat avec Beelzebub, & avec Louiathan, Astaroth, & Asmodée, qui cōme ses superieurs le menaçoient à tous costz de le traiter cruellemēt en Enfer. Mais pour tous leurs courroux, il ne desista iamais de les mespriser, & de nōmer tout haut Louys Goffredy, l'auteur des horribles méchacitez, qu'on peut inuēter. Cependant le Pere Doms, & après luy le Pere Michaëlis, exorcizerēt Madelaine de la Palud, & fi-

rent

rent tant par leurs prieres, leurs ieunes & leurs oraisons, qu'ils amolirent son cœur, & derechef la rēdirent vraye contrice. Ce ne fut pas pourtāt sans que la miserable ne souffrist beaucoup des malins Esprits qui la possēdoient: & principalement de Beelzebub, qui tātost la sollicitoit de se tuër d'un cousteau, tātost de se precipiter, maintenant de s'enfuyr, & d'autres desespoirs. Mêmes le Magiciē qui l'auoit seduite luy apparoiſſoit visiblement avec d'autres Enchanteurs, sans que les assistans en veissent rien; pour la confirmer aux promesses qu'elle auoit faites au diable, & pour luy ietter des charactères, & des sortiliges propres à la détourner des remedes salutaires que les bōs Peres apportoient pour le salut de sō ame. Et vn iour, qui estoit le 18. Iāuiēr 1611. cōme les Religieux l'exhortoient de confesser ses peches, & publier deuant tous les forfaits horribles & execrables qui se commettēt à la Synagogue. Beelzebub la menaça de l'estrangler, si elle les recitoit; de sorte qu'à mesure qu'elle vouloit ouurir la bouche, ce Prince infernal la prit par le gosier, & la serra si estroitement qu'il luy fit router les yeux, & perdre la parole. Les assistans croyās qu'elle en mougroit, se mirent à luy faire le signe de la Croix sur son gosier & à reciter le cōmencement de l'Euangile de S. Iean, *In pricipio erat Verbum*. Cela fut cause que Sathā l'ayant quittée, elle reprit le fil de son discours, non sans estre tourmentée de nouveau par le Magiciē qui luy enuoyoit des sorciers, & des sorcietes aux autres inuisibles, & non à elle, pour la réplir de charmes, & luy faire perdre le sens & la memoire. Ils entroient par la cheminée, & leurs sortiliges auoient ce pouuoir, que Magdelaine demeureroit long - temps apres comme

morte. Et comme en vertu des exorcismes les Peres l'interrogerēt d'où cela pouuoit proceder, elle leur dit qu'ils en pourroient faire l'experience, s'ils vouloier, lors qu'elle ouuriroit la bouche, que le diable luy faisoit expressement ouurir pour donner entrée à ses sortileges. Il arriva donc que comme on la pressoit de nommer les complices des Sabbats, où elle auoit assisté, & qu'elle ouuroit la bouche, le Pere Fournez, Dominiquain, mit la main deuant sa bouche, & le charme tomba sur le tablier de Magdelaine, au grand estonnement des assistans : mais bien plus encores lors que le Pere Michaëlis prit ce charme avec vn couteau. C'estoit vne matiere grasse & gluante, ressemblant à de la poix & à du miel entremeslez & broüillez ensemble.

Comme l'on veid que ce n'estoient pas des imaginations, mais bien des choses veritables & réelles, on resolut d'auoir despees & des hallebardes, pour s'en escrimer par le vuide de la châtre, & à la cheminée. Entre autres, il y eut vn ieune homme nommé Gobert, qui cōmença à battre dans la cheminée avec vne espee toute nue, pendant que ses compagnons iouoient de la hallebarde par la chambre ; pendant qu'ils se demenoient de la sorte, Magdelaine se mit à crier tout haut, an détordât les mains, & en battât ses cuisses : *Ha miserable Marie que viens tu faire icy ?* Quand cette actiō fut finie, Magdelaine fut interrogée, pourquoy elle s'estoit escriée de la sorte ? Et elle respondit, qu'une fille nommée Marie la Parisienne, estoit entré avec sa seruante nommée Cecile dans la chambre pour luy donner vne lettre amoureuse de la part du Magicien, qu'elle n'auoit point voulu recevoir, & que n'ayāt pas osé sortir par la cheminée, de

peur

peut d'estre blessées, & voltigeâs par la châtre portées par les Demons, cette pauvre Marie, qui estoit vne fille gétille, & qu'elle aymoît par dessus toutes celles de la Synagogue, auoit esté attrainre d'un coup de hallebarde au costé gauche, près du cœur, & la seruâte au reins, de sorte qu'elle croyoit que la playe de Marie en seroit mortelle & incurable. Et lors que des Religieux s'informerēt, pourquoy elle ne perçoit le chassîs, qui n'estoit que de papier, pour s'ēfuîr, elle leur repōdit que lēs diables auoient bien la puissance de faire sortir par la cheminée, ou par quelque trou de telle grosseur qu'un grād char y peust passer les forciers & les forcieres qu'ils y introduisoîēt: mais non pas de rompre ny faire aucune ouuerture, sans la permission du maistre du logis. Ce sont des choses bien admirables, & neantmoins veritables ainsi que l'effect le demonstra; car tous les Peres qui assistoîēt à exorciser ceste pauvre possédée, avec plusieurs autres assistans, ouyrent sur le soir, & enuiron, lors que le Soleil se couche, sur la cime de la prochaine montagne, voisine de la sainte Baume, vne voix qui se plaignoit, comme d'une personne qui est aux peines de la mort. Ces plaintes durerēt un long-temps, pēdāt lesquelles on fit venir Madelaine, pour s'enquerir d'elle de la cause de ce dueil. Elle mit à l'heure la teste à la fenestre, & regardāt vers la montagne d'où la voix prouenoit, elle leur dit: Ne voyez-vous pas Louys le Magiciē, qui tiēr Marie sur ses genoux, qui la console & qu'elle se meurt. Sur les neuf heures du soir, les Religieux du Couuent, avec les fēmes assistantes, & autres personnes, veirent paroître en l'air certains flambeaux, & vne grande quantité de chandelles allumées, qui estoient portées cōme en pro-

cessiō vers Marseille Beelzebub fut le lédemain au matin interrogé, qui estoit cette creature, qui se plaignoit ainsi le toir precedēt. Et apres plusieurs refus il respondit en fin que c'estoit vne ieune fille; que sa blesseure auoit esté faite au cœur, qu'elle estoit morte sur la prochaine montaigne, à 8. heures du soir: & que les sorciers auoient puis apres ietté son corps dans la mer, derriere l'Abbaye de S. Victor de Marseille, où tous les Magiciens s'estoient rédus. Ce malin esprit, concontraint d'abondant par la force des exorcismes, apprit aussi qu'elle estoit de la ville de Paris, fille d'un Gentil-homme nommé Henry Alphōse, qui se tenoit auptes du Louvre à main gauche.

Cependant que les choses passent de la sorte, le bruit s'estēd par tous les lieux de l'ennuiton de ceste horrible auanture. Louys Goffredy est accusé: mais il ne fait que se mocquer de ce qu'on dit de luy. On l'auoit en telle repuration à Marseille, que le peuple & particulièrement les femmes disoient tout haut que l'ēuie que le Pere Michaëlis, & autres Religieux auoient conceüe cōtre luy, estoit cause de ce diffame. Pour faire le bon valet, & plustost cōmandé par ses superiurs, il s'achemina à la Sainte Baume, Le P. Michaëlis treuua bon à son attriuee qu'il exorcizast Louyse, & à ces fins luy remit toute son autorité. Quand il se presenta pour y vacquer, Verrine commença à prier Dieu, & nostre Seigneur Iesus-Christ de cōuerrir ce mal-heureux, qui auoit le cœur plus endurcy qu'un caillou. Iamais on na ouy dire qu'un diable desirast, & requist le salut d'un pecheur; il ne sōge plustost qu'à perdre. Et toutesfois cela est aduenu en nos iours pour les raisons que ce mauuais Esprit alleguoit, & que nous auons desia deduites. mais
lors

lors qu'il prioit avec vn tel zele, plusieurs des assistés pleuroient de compassion: d'autres interrompoient Verrine, & disoient qu'il luy falloit interdire de parler. Toutesfois ils ne peurent si bien faire, qu'il n'interrogeast Goffredy sur quatre poincts, à sçauoir,

Si Dieu est Tout puissant.

Si l'Eglise a puissance de commander aux demons,

Si les Diables peuvent estre cōtraints de dire la verité

*Si leurs iurements faicts avec les solemnitez requises
sont valables.*

Le Magicien luy ayant accordé sa demande, coniu-
ra les assistans de se ressouenir de ce qui luy auoit
esté accordé, & puis il luy dit, qu'il commençast à
exorciser. Ce qu'il fit, mais avec vne si grande igno-
rance, qu'à chaque fois il s'informoit de P. Michaëlis
cōme il falloit faire. Et pendant son exorcisme, Ver-
rine & Beelzebub se mocquoient de luy, & principa-
lement Verrine, qui luy reprochoit l'estat de sa mal-
heureuse vie, & comme il estoit le Prince des Magi-
ciens, les horribles forfaits qu'il commettoit au Sab-
bat, en y celebrant la Messe, y foulant puis apres le
Corps de nostre Seigneur, & le donnant aux chiens.
O crime ! o meschancelé abominable ! Ce mal-heureux
(poursuinit Verrine) ne se contente pas de commet-
tre ce que les diables n'oseroient auoir attenté: mais
encores il respand puis apres le sang du Fils de Dieu
sur les autres forciers, & puis tous d'vne voix il se
mettent à crier, *Sanguis eius super nos, &c.* Son Sang
soit sur nous.

Lors que Verrine proferoit ces paroles, les cheueux
dressoient à ceux qui les escoutoient. Tout le monde
faisoit le signe de la Croix, pendant que ce Pharaon
de meuroit ostiné en sa malice, niant que cela fust
veritable.

ritable, mesmes quand les Peres Religieux luy demã-
 doient & coniuroient de leur dire la verité, s'il n'es-
 toit pas Magiciẽ, au lieu que ce miserable inuouque
 le nom de Dieu, il se donnoit à tous les diables que
 cela n'estoit pas. Et lors qu'il exorcisoit Madelaine,
 elle fermoit les yeux, ayãt horreur de voir vn trom-
 peur, vn abominable, & vn magiciẽ ennemy de Dieu
 & des hõmes. Tandis il menaçoit de tirer raison de
 l'imposture (disoit-il) qu'on luy mettoit sus, & le 8.
 iour de Ianuier ayant esté mandé par l'Euesque de
 marseille, partit de la saincte Baume au grand contẽ-
 tement de Beelzebub, qui croyoit que par ce moyẽ
 l'on iugeroit innocent, & qu'il obtiendrait gain de
 cause. Apres routes les formes & procedures qui se
 font, suivant les Canons de l'Eglise, le bon Pere mi-
 chaëlis, avec certains autres bons Religieux, tãt de
 l'Ordre des Freres Prescheurs que de celuy des Ca-
 pucins, ayant reconnu la verité du faict, qui leur es-
 toit claiement tesmoignée par les marques diaboli-
 ques que madelaine portoit imprimée sur son corps
 & ayant ouy comme les Demons auoient esté con-
 traincts de manifester les horribles meschancetez
 de Goffredy, qui feront peur à ceux qui les liront,
 comme d'auoir inuenté (ainsi que nous auons dit
 cy-dessus) de dire la messe au Sabbath, de consacrer
 veritablement, & puis offrir le Sacrifice à Lucifer:
 manger la chair des petits enfãs, ainsi que madelai-
 ne alleura estre veritable, qu'il auoit incité vne fẽme
 de marseille d'estouffer vne liẽne petite fille aagé de
 deux ans, nõmée marguerite, parce que ce mal-heu-
 reux & detestable forgeron d'Enfer auoit enuie de
 manger de sa chair. M du Vair premier President en
 fut aduertý. Il manda querir les deux possedées, &

luy

luy-même puis apres s'achemina à l'Archeuesché, où estoit Magdelaine en presence du Pere Michaelis & de S. Garandel Vicaire de M. l'Archeuesque d'Aix, & autres: il interrogea cette fille, luy promettât de la fauoriser à n'estre point punie de ses fautes, pourueu qu'elle voulast librement declarer depuis le commencement iusques à la fin l'Histoire de la donation qu'elle auoit faite au diable. Elle comméçoit à obeir au commandemēt de M. le premier Presidēt, lors que Beelzebub la prit par le gosier, & la serra tellement, que l'on pensoit qu'elle estoufferoit. Ses yeux luy tournoient en la teste, & sa face palissoit au grand estonnement des spectateurs. Mais apres les exorcismes accoustumez, Satan abandonna son gosier, & elle poursuivit son discours, & mesme elle monstra vne marque que cēt aduersaire luy auoit faite au pied. M. du Vair, pour épreuue fourra dedās vne grosse épingle, sans qu'elle en sentit riā, ny sans qu'aucune goutte de sang en sortit, tesmoignages euidentz des marques des Sorciers: il apperçeut encores vn autre signe, c'est que Beelzebub se tenoit sur la partie intérieure de la teste, en faisant vn continuel mouuement, la haussant, & la baissant visiblement. Cela se pouuoit verifier par l'imposition de la main. Leuiathan en faisoit de même au derriere de la teste, toutes léquelles choses, suiuant le raport du docte Medecin Fontaine, de Merendol & de Grassin, professeurs en Medecine, & de Bon-temps maistre Chirurgien, & excellent Anatomiste, estoient contre nature.

Tant de circonstances & de temoignages, faisans paroistre que Louys Goffredy estoit vn execrable Magicien, & entre autres celuy de Damoiselle Victoire de Courbier, il est saisi, emmené à Aix, & mis au prison

sons accoustumées. Mais puis que nous venōs à parler de la damoiselle de Courbier, l'histoire en est tel.

Louys Goffredy, suiuant ce que nous auōs dit cy-dessus auoit impetré du Diable, que par charmes, & par illusions il seroit le plus homme de bien, & le meilleur Prestre de la Prouéece. Le bruit de sa sainteté courât par toute cette Prouince, il n'y auoit femme à Marseille qui ne desirast de se cōfesser à luy. Et Dieu sçait si sous pretexte de confession il en reduisoit. Le nōbre est si grand, qu'il y en eut plusieurs qui furent de la confrairie d'Acteon. Cōme sa reputation estoit en vogue, il arriua qu'une Damoiselle nommée Victoire, honneste & pudique autant que femme du pays, & mariée depuis peu de temps avec vn Gentil-homme, fut inuitée à vn iour solennel par sa belle Mere, de s'aller cōfesser avec elle à Messire Louys Goffredy. Elles se tenoient en vne maison des chāps proche de Marseille, & de là elles s'acheminèrent à l'Eglise des Accoulez, où demouroit Goffredy. Ce mal-heureux jettant l'œil de cōcupiscence sur ceste Damoiselle, apres l'auoir confessée, luy fit present d'une sainte relique, enchaînée dans de l'argent, la priant de la porter pour l'amour de nostre Seigneur, luy donnant à entendre qu'elle estoit remplie de grāde vertu. La Damoiselle de Courbier sans penser à aucune malice, & croyāt que Goffredy estoit vn saint hōme, la prit, & lors qu'elle fut arriuée à son logis elle la mit à son col. Mais à peine la luy eut-elle mise, qu'elle se sentit embrazée d'une ardeur & d'une affection desordonnée enuers cete execrable. L'amitié qu'elle portoit auparauāt à son mary, fut contrainte de ceder au charme : & sa chasteté qu'elle auoit tousiours si soigneusement gardée plus que

que sa propre vie, eust esté corrompuë par ce sortilège, si elle en eust eu le moyen. O Dieu tout puissant, est il possible que vous donniez vne telle puissance à vos cruels ennemis, que de triôphet de ceux que vous auez lauë de vostre sang precieux, & regenez par l'eau du Sacré Baptesme? Ceste Damoisel, le n'a point de repos; elle parle à toute heure de Messire Louys, & prie sa belle mere d'aller auez elle pour le trouuer, mesme en presence de son chër mary: Luy, qui ne faisoit que commencer de iourir de celle qu'il auoit tant aymée, & qui pësoit son amour estre reciproque, comme il s'approche pour la caresser, la treuve avec des inquietudes, & des impatiences extraordinaires. Il s'estonné de ce changement, & comme la vraye amour est presques tousiours suivie de deffiance, il prend garde de plus pres à ses actions, & la tient de court: pendant qu'elle qui ne peut supporter le feu dereglé qui brulle ses mouëlles, est comme furieuse, & a tousiours Messire Louys à la bouche. Cette passion dura quelques iours, iusques à tant que Dieu ayant pitié de son innocence, & ne voulant pas permettre que sa chasteté fut ainsi contaminée, voulut qu'en prenant vne chemise, elle osta de son col ceste feinte relique. Elle ne fut pas plustost hors de son col, que la charme cëssa, & l'amour desordonné prit fin. Sa passion se représentant à ses yeux, elle s'en estonne, & s'accusant d'impudicité elle verse vn ruisseau de larmes. *Miserable (disoit ladolente) est il bien possible que ta volonté ait consenty à trahir ton honneur, & à rompre la foy que tu as si saintement iurée à celuy sans lequel tu ne scaurois viure; Quelle eau sera capable, de lauer vn si grand crime; Quand tu y emploierois toute celle de la mer*

encores

encores ne seroit-elle pas suffisante de la nettoyer. O mon Dieu, ayez pitié de ma folie ! & vous mon cher Espoux si vous ne voulés octroyer pardon à celle que vous avez autrefois aimée si chèrement, faites-en la punition sur mon corps telle qu'il vous plaira. Vous ne m'en scauriez donner de si grande, que ma deloyauté n'en merite encorres une plus grieve. Tenât ce discours, son mary qui estoit bien fâché de ses deportemens, & qui ne l'esloignoit guères de veüë, entre dans la chambre où elle lamentoit. Si tost qu'elle le voit, elle court, & l'embrasse estroittement en plurant à chaudes larmes. Luy qui l'ayme comme nous auons desia dit, la caresse reciproquement, & apres luy demande, si elle ne veut point aller avec luy à la ville, pour voir Messire Louys. Ha ! ma chere ame, repond elle, ie vous cōiure de ne me parler iamais de cét hōme, autrement ie me donneray la mort de ma main propre. Ce Gêril-homme la voyât chagée, & en meilleur, sens, que de coustume, se doute soudain de quelque charnie, s'informe d'elle, si Messire Louys ne luy auoit rien donné. Si a Bien, dit-elle, il me donna vn *Agnus Dei*, enchassé dans de l'argent, que i'ay porté pendu à mon col quelque temps. Et où est il (poursuiuit le mary. Il est (repart-elle) dans mon coffre. Il luy demande la clef du coffre qu'il ouure, & puis préd cét *Agnus Dei*, & treuve dedans la patte d'une chauue-souris, & par mesme moyen decouure la meschanceté & la malice de cét execrable sorcier, qui cōme nous auons dit, est desia entre les mains de la Iustice. Ceste Damoiselle se plaint, & faiët partie contre luy. Et en l'Arrest qu'on donna, elle est nommée, ainsi que nous verrons en la suite de cette histoire.

Comme il est prisonnier, la Cour, pour s'informer plus

plus au vray des malefices qu'o luy mettoit sus; apres quelques interrogations faites le fait visiter par maistre Jacques Fontaine, Louys Grassin, & Antoine Merindol Docteurs en medecine, pourvoir s'il n'est point marqué comme sont ordinairement tous les forciers, afin qu'apres leur rapport, il soit procedé comme de raison. Ces Docteurs suivant le Commandemēt de la Cour, le visirent, & le despoüillent assistez de maistre Bon-temps, & beaucoup de maistres Chirurgiens, en presence de Messieurs Thoron & Seguiran, Conseillers & Commissaires deputez, & de Garandel Vicaire general, ils treuvent sur son corps plusieurs marques infaillibles de forcier, & en font leur rapport. Le doctre Fontaine en a faict vn liure sur ce suiet qui se lit publiquement. La Cour cependant l'interroge derechef & le confronte à Magdelaine de la Palud, qui luy soustient constamment sans varier, toutes ses meschancetez, & particulièrement recite en sa presence la maniere dont il vfa pour la corrompre, & la seduire. Il nie tousiours neantmoins, meschāt & execrable obstiné qu'il est. Il est cependant visité par Beelzebub, qui à ces fins quitte par interualles le corps de Magdelaine, suivant que Leuiathan, Astaroth, Barberih, (demeurez dedans pour garder la place; avec Asmodée, & autres esprits Infernaux) assurent. Le mesme Prince des diables confirme leur dire à son retour, forcé par la vertu des exorcismes, & rapporte, comme il a bien endurcy le cœur de Goffredy, afin qu'il ne se conuertisse point. Cependant il ne cesse d'affliger, & de torturer Magdelaine, & voyant qu'elle estoit vrayement repentante, mesme que par la force de sa repentance, les caracteres de forcierre qu'elle auoit au corps estoient effacés, il fit qu'Asmodée, qui est le

Demon qui incite aux salerez la polluoit à toute heure au grand scandale des assistans. Vilenie execrable d'Enfer, qui descouure tousiours par ses effects, ce qu'elle est. Les pechez de cette mal-heureuse estoient bien detestables, puis que Dieu permettoit ces abominations estre exercées sur son corps. En outre elle estoit battuë incessammēt, avec tant de rigueur qu'elle esmonuoit chacun à la compassion. I'ay honte de publier tant d'horreur à la posterité, & de diffamer vne Prouince, si proche du lieu de ma naissance, honteuse pour auoit produit ces prodiges. Ceux qui viendront apres nous douteront, ainsi que i'ay dit, de la verité de ceste hiitoire; mais la caution que ie leur donne d'vn si grand President, & d'vn si Auguste Senat, ioincte au tesmoignage de ces Reuerends Peres & bons Religieux, les doit disposer à la croyance.

Le procès ayant esté fait à cēr execrable Magicien, anant que de proceder à sa condemnation, on rascha de le conuerir. Plusieurs Religieux renommez pour leur saincteté de vie, y prendrent beaucoup de peine: mais ce n'estoit qu'hypocrisie en son faict. S'il pleuroit quelquefois, il iettoit des larmes à la façon des forciers: en mettant les deux doigts indices sur les deux temples de la teste: larmes qui n'estoient pas pourtant chaudes, comme les autres communes, ainsi que l'experience le fit paroistre, les Peres qui l'exhortoient en ayans esté aduertis par Magdelaine. Toutes-fois il se cōfessa & recogneut aucunemēt les pechez: mais l'on voyoit bien que c'estoit à grande peine. Ce miserable obstiné de la sorte, croyoit cōme font tous les Magiciēs, qu'apres sa mort il deuiēdroit vn demon de l'air, qui comme les autres malins esprits tourmenteroit les hommes. Car durant le temps qu'il exer-

çoit

goit l'office de Prince des Magiciens , il estoit plus malicieux & plus execrable que les diables mesmes, ainsi que Verrine & Beelzebub le rapportoient. L'un de ses plus grands desirs estoit d'engendrer l'Antechrist , ou bien de viure iusques à sa venue , afin de pouuoir ioindre sa rage avec celle du fils de perdition. Or que les Magiciens ayent creu d'estre faicts Demons de l'air apres leur mort , la Sybille Erithrée nous le tesmoigne en ces termes. *Lors (dit cette forcieri) que le grand Apollon tirera mon ame hors de ce corps, elle s'ennolera libre , & se pourmenera par les vuides campagnes de l'air, se meslant parmy les voix des vents legers & inuisibles, & predisant parmy leurs confuses haleines , aux oreilles des mortels , l'heur & le malheur de leurs futures auantures. Mon corps mesme engraisant la terre, luy fera pousser des herbes & des racines. Les brebis qui y paistront sentiront couler dans leur foye , une science veritable des choses secretes & incogneuës , & les oyseaux qui mangeront de ma chair, prediront a ceux qui se meslent d'augurer le succez des choses à venir.*

C'est la belle croyance deceux qui se sont donnez à Sathan. Mais ils est temps de reprendre le fil de nostre Histoire, & de dire, que durant la prison de Louys Goffredy, les Magiciens de toutes les parties de l'Europe, & de plusieurs climats de l'Asie s'assembloient tous les iours , tant pour ietter des sortileges contre Magdelaine , que pour empescher la conuersion de Goffredy , & l'accusation qu'il pouuoit faire de ses compagnons. Beelzebub mesme quitta pour quelque heure le corps de Magdelaine: & fut en Enfer consulter le Monarque de tous les esprits, sur ce qu'il deuoit faire touchant leur homme, qui chanceloit en ses responses, & se rendoit coupable à toute heure Lucifer

luy commanda se mettre luy-mesme à la langue, & de respondre pour luy, car (disoit-il) c'est vn *Durber*: mot de Prouence, qui signifie vn sot oyseau, lequel a la teste plus grosse que le corps: c'est autant que si l'on disoit, vn niais, & vn estourdy. Beelzebub au retour qu'il fit au corps de Magdelaine, racontoit ces choses en vertu des exorcismes. Quât aux assemblées & Synagogues de tous les forciers, elles se tenoient plusieurs fois aupres de la saincte Baume, & particulierement le 8. d'Auril: 1611. an & mois de l'execution du Magicien, aupres de Marseille, ainsi que Beelzebub le iura (apres auoir esté conjuré) tant pour le faict de Goffredy, que pour faire mourir Magdelaine de la Palud. Aussi les Diables luy donnerent ce iour-là tant de tourment qu'elle esmouuoit à grande compassion les assistans: ils la leuoient en l'air prests à l'emporter, si les bons Religieux qui l'assistoient ne l'eussent secouruë.

Or ces malins esprits ne la tourmentoient pas seulement. Les Magiciens contribuoient aussi toute leur malice, pour son affliction. Vn iour elle se promenoit en la galerie, qui estoit ioignant sa chambre en l'Archeuesché d'Aix, lors qu'un Magicien nommé Iean Baptiste (ainsi qu'elle disoit) vint à l'instant, & avec vne lancette luy picqua le doigt, plus proche de l'auriculaire, & ayant de son sang se retira.

Alors elle fit vn grand cry, & alla promptement vers les Peres Billet & Bailletot, qui la gardoient, pour leur monstret le sang qui sortoit encores de son doigt: mesme il veirent eux-mesmes trois gouttes sur la fenestre, par où ce Magicien s'en estoit enfuy. Soudainement ils en aduertirent le Sieur Thorton Commissaire, & le Medecin Grassin.

C'est

C'est sans doute que l'Enchanteur luy tira ce sang pour faire contre elle vn malefice, & pour luy rallumer dans son ame l'amour qu'elle portoit auparauant à Goffredy. Et ce malefice fit son operation le lendemain. Elle fut agitée tout ce iour là par des mouuemens si estranges & prodigieux, qu'on croyoit assurément qu'elle en morroit.

Cependant le Prince des Magiciens est tousiours en prison, & souuent sur la cime de la tour de sa prison, l'on void, & l'on entend hurler, & principalement la nuict vn gros char-huant, ensemble vne troupe de chiens effroyablement. On le confronta plusieurs fois à Magdelaine, laquelle entre toutes les autres accusations qu'elle fit contre luy, soustint vn iour qu'il ne luy pouuoit nier quatre choses. La premiere d'auoir rauy sa virginité dans la maison de son Pere. La seconde de l'auoir conduite & menée en la detestable Synagogue des Sorciers, & là apres luy auoir fait renoncer à Dieu, à sa part de Paradis, & aux merites du Sâg pretieux de N. Seigneur Iesus Christ, & generalement à tous les Sacremens de l'Eglise, & autres œures de pieté, l'auoir baptizé au nom des Diables, & oincte de leur chresme, & puis marquée des marques qu'elle portoit encores. En troisieme lieu, de luy auoir donné vn *Agnus Dei*, & vne pesche charmée. Et en fin d'auoir enuoyé dans son corps toute cette legion de diables, lors qu'elle se rendit (contre la volonté de ce Magicien) dans le Couuér de sainte Vrsule, dont les malins Esprits ont dit beaucoup de mal: mais neantmoins confessé malgré eux, que cette sainte compagnie estoit cause de beaucoup de desordre en Enfer. Ce mal-heureux & detestable nia fort & ferme cette accusation, comme controuuée, & iura par le

Nom de Dieu, & pas la tres-saincte Vierge, & par S. Iean Baptiste, que c'estoient des impostures. C'est vostre iuremēt accoustumē (respond Magdelaine) vostre Synagogue le pratique ordinairement. Mais il faut sçauoir comme vous l'expliquez. Lors que vous parlez de Dieu le Pere, vous entendez Lucifer; par le Fils, de Beelzebub; & par le S. Esprit, Leuiathan. Lors que vous atteste le nom de la Vierge, c'est la mere de l'Antechrist: & le Diable precurseur de ce fils de perdition, est vostre S. Iean Baptiste. O Ciel! se peut-il ouyr, ny imaginer rien de plus execrable? En quel siecle maudit & abominable auons-nous pris naissance, que nous y voyons de tels monstres? Les pechez de Sodome & de Gomorrhe, avec ceux de Babylone sont ils comparables à ces blasphemes & impietez. Je fremis moy-mesme d'horreur, escriuant cette Histoire: ma main en frissonne toute, & à peine peut-elle - empescher que la plume ne luy eschappe. Si les diables sont veritables, lors qu'ils sont adiuuez de proferer la verité, par des exorcismes de l'Eglise, ie croy les paroles de Verrine, qui a tousiours asseuré estant dans le corps de ladite Louyse Capel, que la fin du monde estoit proche, & que l'Antechrist estoit desia né d'un Incube, & d'une Iuifue. Il est impossible que la patiēce de Dieu puisse plus long-temps supporter ces detestables pechez. Je m'estonne qu'il n'a desia exterminé la race des mortels N'ayant plus de pouuoir de reciter dauantage les crimes de cēt abominable Magicien, ie m'en vay finir cette Hystoire par la fin de sa vie. La Court de Parlement de Prouence ayant bien & deuēment examiné les actes du procez, tant les preuues & indices de la possession diabolique de Magdelaine de la Palud, auditions, depositions, confessions d'icelle
sur

sur le rapt fait d'elle, paches & promesses aux malins Esprits, & autres cayers d'informations : que les attestations & les rapports des Medecins, commis pour verifier les marques de ladite Magdelaine de la Palud, & de Louys Goffredy : ensemble l'audition de ladicte Damoiselle Victoire de Courbier, sur les charmes à elle baillez par le Magicien, qui luy auoit causé indisposition en son cerueau, & vn amour desordonné enuers iceluy, avec les confessions, tetractions, & secondes confessions volontaires de ce maudit & execrable Sorcier Louys Goffredy, & autres choses contenues au procez, le declara par vn Arrest fort solennel & memorable atteint & conuaincu des crimes à luy imposez, & pour reparation d'iceux le condamna d'estre liuré entre les mains de l'Executeur, pour estre conduit & mené par tous les lieux & carrefours accoustumez de la ville d'Aix, & au deuant de la porte de l'Eglise Metropolitaine saint Sauueur, pour y faire amende honorable; teste nuë, & pieds nus, la harte au col, tenant vn flambeau ardent en les mains, pour là à genoux demander pardon à Dieu, au Roy, & à la Iustice, & puis estre mené à la place des Prescheurs de ladicte ville, & y estre ers, & bruslé tout vif, sur vn bucher, iusques à consommation de sa chair & ossemens, dont les cendres seroient iettées au vent. Et auant l'exécution, d'estre appliqué à la question ordinaire & extraordinaire, pour titer de sa bouche la verité de ses complices. Cét Arrest fut prononcé, & executé le dernier d'Auil, 1611. Si tost qu'il eut esté executé, Marguerite fort honneste fille de la maison de sainte Vrsule, fut deliurée de trois diables, qui la possedoient. Grefil & Sonneillon, deux autres diables qui estoient dans le corps de Louyse Cappel, sortirent pareille-

ment: mais non pas Verrine, disant que la volonté de Dieu estoit telle qu'il ne sortist point iusques à ce que la fin de cette Histoire fust venue, par la déclaration qu'il deuoit faire des complices. Aussi il commença de les nommer par noms, & par surnoms: & particulieremēt vne fille auenue nommée Honorée, qui fut prise, treuuee marquée, & conuaincuë, puis bruslée, avec grande douleur qu'elle ressentoit pour ses fautes. Quant à Magdelaine de la Palud, elle fut aussi deliurée d'Asmodée, cēt Esprit malin qui la poluoit & d'autres diables. Cependāt elle fait des Pelerinages, tantost vers la sainte Baume, tantost à saint Maximin, & maintenant elle va à saint Firmin, Eglise proche de la ville d'Vzès en Lāguedoc. Elle est neātmoins encores possédée de Beelzebub, qui la tourmente tousiours, pour l'expiation de ses pechez. Elle le tient pourtant lié, par la permission de Dieu, dans son corps, de telle sorte qu'il n'en peut sortir aucunement, bien que le Diable luy demande congé pour vn quart d'heure seulement, afin de mettre ordre à ses Sabbaths. Ceste pauvre repentante fait depuis penitence, & va chercher avec d'autres pauvres femmes de Carpentras, nuds pieds, du bois qu'elle vend puis apres publiquement, & tout l'argent qui en prouiet, elle le distribue aux pauvres, non sans estre souuent affligée de ses plus proches parens, pour cette humilité. Dieu la vœille assister par sa sainte grace, & la deliurer entieremēt de la possession du malin Esprit.

C'est la fin. Tragique de ce mal-heureux Prestre, qui pour vn plaisir temporel, & vne fumée d'honneur renonça à son Createur, à la part de Paradis qui luy estoit ouuert, & aux Sacremens de l'Eglise. Si i'eusse voulu escrire routes les meschancetez, il eust fallu
remplir

remplir tout vn gros volume, & non vne simple narration. Je sçay qu'il y en aura plusieurs qui riront de ceste Histoire, encores que la verité en apparaisse par le resmoignage de tant de gens de bien, & par l'Arrest d'un si celebre Parlement, prononcé de la bouche de l'un des plus illustres hommes de nostre siecle. Entre telles personnes, ie vois les Athées, & les Heretiques, qui rapportent aux causes naturelles, ce qu'on racôte des Demoniacles & des forciers. Ils disent que la fantaisie blessée, reçoit des vaines impressions, & des chimeres, qui font fouruoyer l'entendement du droit chemin de la raison, & alleguent l'exemple des pretendus forciers, qui croient estre portez aux Sabbaths pendant qu'ils sont assoupis de sommeil. Enfin ces personnes voudroient mettre cette croyance, qu'il n'y a Esprit, ny forcier, que ce sont choses inuentées. Mais les impiés, tandis qu'ils nous veulent imprimer cette erreur, ils taschent aussi de sapper sourdement vn autre pilier que nous auôs de la connoissance du vray Dieu, & de son Fils nostre Redempteur, qui nous apprend dans les Euangiles qu'il y a des diables, par le commandement qu'il leur fait de sortir hors du corps des possédez, qui imploroient son assistance. Les Actes des Apostres sont aussi mention de Simon le Magicien, & le vieil Testament est fourny d'une infinité d'exemples de forciers, que Dieu commande d'exterminer. La Pitchonisse ou forcierre d'Endor, dont il est parlé au liure de Samuel en fait foy, & autres qu'il n'est pas besoin de reciter. Or quoy que les Libertins de ce miserable siecle tournent à risée ce qu'on dit des forciers; des marques qu'ils portent sur leurs corps, & des hommages qu'ils rendent a Sathan; nous ne laisserons pas de croire ce qui est de la verité, puisque mesme les tó-

moignages des Payens confirment ce que nous voyons tous les iours.

Durant que l'idolatrie estoit en sa plus grande vogue, les Infidelles, & parriculierement les Syriens & les Egyptiens, portoiér des lettres & des caracteres, qui signifioient les noms de leurs Idoles. C'est pourquoy Moyse deffendit aux Israélites de n'imprimer sur leurs corps aucunes marques, lettres, ny caracteres en haine des Idolatres qui en vsoient pour lors. Ceux qui s'entrooloient en la religion du Dieu Mithres en Perse, estoient marqués par lettres de feu. Et puis ne lisons-nous pas dans les liures de l'Antiquité Payenne, comme les Striges & les Sorciers sont de tout temps aides du sang des petits enfans: Caudie entra vn petit garçon iusques au menton, & le fit mourir ainsi lentement, & de sa mouëlle, & de son foye composa vn breuage amoureux. Tout ce qu'on nous raconte des Menades qui suiuióent Bacchus en forme de Bouc, n'est que le Sabbath des Sorciers de ce temps, qui adorent le diable en figure de Bouc, puant & infect. C'est ce Paulacif rant recherché des Marrones d'Italie: c'est ce Démon Dufien, qui s'accouplait iadis avec nos Gauloises. Nous lisons encore qu'en Grece l'on celebrait anciennement les Bacchanales de trois en trois ans sur le mont Parnasse. A la feste on y voyoit arriuer de tous costez des Satyres à grandes troupes, qui s'assembloient, & apres dansoient en rond, faisant sonner des cymbales & des tambours, & crioient hautement à voix enrouée, *Saboe, Euam, Attes, & Hyes.* Je laisse maintenant à iuger, si ce n'estoit pas le Sabbath des Sorciers d'aujourdhuy, qui dansent, & qui se meslent parmy les diables. Suiuât la deposition de ceux qui ont esté
attaints

attaints & conuaincus de sortilege, les sorciers crient aujourdhuy en leurs Synagogues: *Has Sabat, Sabat.* Dieu vueille reduire ces miserables à la voye de salut: ou bien permettre que s'ils demeurent obstinez en leurs souilleures, pailardises, pechez cõtre nature, execrables & diaboliques meurtres, & sanglans desirs de vengeance, la Justice y mette si bien la main, qu'ils soient exterminẽz entierement de la terre, à la confusion de leur Bouc detestable, sale, & puant, & à la gloire de nostre Seigneur Iesus-Christ.



LE FVNESTE ET LAMENTABLE
*mariage du valeureux Lyndorac, & de la
 belle Caliste, & des tristes accidens,
 qui en sont procedez.*

HISTOIRE III.

LYndorac que le Ciel auoit pourueu de valeur & de courage, autant que Gentil-homme de France, tiroit son origine des contrées, où prend sa source le fleuue du Gard, renommé pour le pont admirable que l'Empereur Adrian y fit bastir. Son inclination qui le pouſſoit naturellement aux armes, luy fit en l'aage de quinze ans quitter sa patrie, & s'exposer aux hazards de la guerre, pour en moissonner les lauriers, que l'on ne peut recueillir sans les arroser premierement de sang. Le Languedoc, la Pronence & le Dauphiné, admirent desia sa valeur, & la publient si bien, que le grand Henry amoureux de tels hommes, le veut auoir aupres de sa Maieſté. Il luy donne des charges

charges qui excèdent son aage, & l'employe en des affaires, & des intelligences qu'il a parmy les nations estrangeres. Lyndorac s'en demesle si bien, que ce grand Prince (qui ne se trompoit iamais en son election) l'en aymè, & estime dauantage.

Mon sujet n'est pas de raconter icy particulièrement les effectis de la valeur, du couraige & du iugement de Lyndorac. Il a mieux gravé son nom sur le dos de ses ennemis, que ie ne scaurois faire avec vne plume sur du papier. Je diray seulement, qu'apres auoir receu de son Prince ce qu'il meritoit, avec promesse d'en receuoir d'auantage, l'humeur le prit de reuoir ses parens. Il part avec son congé, & arrive au bas Languedoc. Ce ne sont que caresses & que visites de ses amis. Ceux que son renom attiroit par l'oreille, veulent maintenant contenter leurs yeux, & remarquent en Lyndorac, vne viue image de valeur. Cette belle disposition, cette gaillarde ieunesse, qui commence à pousser vn premier corron, ce corps où la Nature admire ses richesses, & le bruit de sa valeur luy donnent l'entrée libre parmy les plus honnestes compagnies. Les Dames à l'enuy l'honnorent, & plusieurs taschent de gagner sa liberté. Luy que les exercices de Mars auoient iusques alors empesché de receuoir les charmes d'un bel œil, aussi-tost qu'il voit Caliste, vn desir le brûle, & sa franchise gardée si longuement, est contrainte de se rendre.

Caliste n'est pas de ces beautez vulgaires, que le monde prise. C'est vn vif tableau d'honneur & de graces. Ses yeux ne vont iamais en vain à la conqueste. Toute liberté fuit au deuant d'eux, & ie croy que s'ils eslançoient par tout leurs regards, ils la banniroient entierement de la terre. Son humeur libre (mo-
deste

deste neantmoins) fait naistre le desir, & mourir l'esperance. Celuy qui la void, & qui la sert, croit de voir bien tost payer la fidelité de son service : mais il se trouue autant esloigné de son attente, comme il pensoit estre proche de sa gloire. Jeune liberté, que tu cousteras cher à Lyndorac, & à Rochebelle, voire à ton propre repos ! Je ne te blâme pas routesfois, la faute ne procede point de toy. Ton futur espoux, & son aduersaire en sont l'origine.

L'un ne deuoit iamais entrer si aduant en de jalouses humeurs, puis qu'estant comme tu es, vn vif exéplaire d'honneur aussi bien que de beauté, il se rendoit coupable de beaucoup de crimes. Et l'autre ne deuoit iamais abuser de ton honneste courtoisie, & par sa sole vanité porter vn mary ialoux au blâme de ton innocence.

Voila doncques cōme ce braue guerrier, qui n'eust pas crainct d'attaquer le Dieu Mars, se treuve si sensible aux premiers traicts que l'amour luy decoche, qu'il n'a plus d'autre occupation qu'à cherir sa blesseure & honorer sa prison. Il s'efforce de faire paroistre à sa Maistresse les effects de sa passion, mais la crainte qu'elle n'ait engagé son ame en quelque autre part le retiēt. C'est ce qui le desesperes, tandis qu'il se flatte en sa douleur. Il voudroit bien (s'il luy estoit possible) resister à ce nouuel assaut: mais son amour est trop foible; & puis c'est vne folie, de vouloir estre sage contre le destin, de qui les hommes s'efforcent en vain de fuir les loix. Caliste, qui n'auoit encore experimenté ce que peuuent les belles qualitez, & le merite d'un galand homme, aussi-tost qu'elle veid Lyndorac, s'émeut aucunement, & la glace qui seruoit de rempart à ce cœur que les flammes de l'Amour n'auoient

uoient peu eschauffer auparavant , commence de se fondre.

Lyndorac cependât resue tousiours sur son amour, tandis que le sommeil adoucit les trauaux des mortels, il ne peut fermer la paupiere. L'object de Caliste vole tousiours au deuant de les yeux, & l'obscurité de la nuit ne le peut empescher de la voir.

Faut-il doncques (disoit cét amoureux) que ie me rende si soudain, & sans me deffendre à vn ennemy, qui ne peut sur nous, que ce que nous luy dōnons? Sera-il diūt, que Lyndorac, qui n'a iamais paly pour la peur des hazards, mais qui plustost a deffié tant de fois la mort ieincte de sang & d'horreur, au milieu des perils, soit maintenant de si foible & de si lasche courage, qu'il n'ose faire de resistance à vn enfant tout nud, & qui pour toutes armes ne se sert que de nostre consentement? Estouffons de bonne heure ceste passion, indigne de loger dans vne ame releuée, & mourrissions ce penser, enfant d'un courage bas. Bouchons les oreilles à ces Sirenes trompeuses, & fermons les yeux à ce Basiliq, qui tue de son regard.

L'Amour resseble propremēt au riuage Asphaltire, il cache touiours vn noir serpet soubz vne belle fleur.

Ainsi parloit Lyndorac en la naissance de la passiō. Heureux s'il eust eu plus de resolution que d'amour. Mais à peine son cœur enfante ce discours, qu'un autre tout contraire penser luy fait tenir ce langage.

Indigne de joiyr de la lumiere du iour, as-tu bien le courage de blasphemēt contre ce Dieu, qui fait trembler & le Ciel & la terre? Veux tu demeurer seul au monde sans aymer, comme si tu estois vn rocher insensible? L'amour est inseparable d'une ame genereuse, & ces braues guerriers tant vantez aux Histoires de l'antiquité, ont tousiours meslé les Myrthes

auec

avec les Palmes. Aymons doncques, & marchōs avec eux, sous l'enseigne de Cupidon, aussi bien que sous la banniere de Mars. Faisons paroistre à ma belle les trophées de victoire, & les marques de nostre deffaitte. Encores que son cœur fust de roche, nous l'amolirōs avec nos larmes. Mais que sçay ie si quelque autre plus heureux que ie ne suis ne m'a point deuancé? O Amour! entre les mains de qui ie remets ma vie désormais & mon repos, destourne de moy ceste peur, & rend vain ce presage: fay que mon esprit ne soit point troublé par certe nouuelle imagination, qui veut diuiser mon ame de ton obeyssance.

Ce sont les mesmes discours que tenoit cét Amant passionné, lors qu'avec les flambeaux de l'Amour, il allumoit les torches de ses funérailles. Et pour tenter la volonté de sa maistresse, vn iour sa main, plus courageuse que sa bouche, escriuit cette lettre.

S*I s'estois autans priué de ingement (Belle Caliste) comme vous estes pouruenü de beauté, vous ne verriez peut-estre mon amour descrite sur ce papier. Mais estant comme vous estes la merueille des yeux, & moy le plus recognoissant de vos merites, vous excuserez mon audace, & ingerez que l'excez des presens que le Ciel & la Nature vous ont donnez, sont plus coupables que mon extreme passio. Les Dieux vous ont douée de tāt de graces, qu'il est impossible de les voir sans les aymer. Il ne faut donc pas que vous doutiez si ie vous ayme, & si ie desire de vous seruir, puis que vous estes l'obiet le plus aymable des beautez, & moy le plus viuement atteint de vos beaux yeux. Je vous coniure par ces Soleils qui m'esclairent, de recevoir la promesse que ie vous fais de n'adorer désormais autre que vous. Je la signeray de mon sang, si vous le voulez ainsi & vous tesmoigneray par ma mort, que mes paroles, & ma passion sont une mesme chose.*

Ayant

Ayant fermé cette lettre, il la fit donner à vne fille de Châbre de la mere à Caliste, afin qu'elle soit renduë secrettement à sa Maistresse. Cette fille que nous appellerons Melite, connoissoit Lyndorac, & estoit bien aise de luy rédre quelque bon office. Et ne pouuant l'obliger mieux qu'en ce sujet, elle ne manque point de la remettre entre les mains de Caliste, qui l'ouure cōme vne chose indifferente, mais qui l'ayāt ouuerte, & se voyant nommer dedās rougit, & palit en mesme temps. Elle estoit vne fois resoluë de s'arrester sans la lire dauantage, & la ietter dans le feu, si la messagere ne l'eust empêchée par ces paroles.

Et quoy (belle Caliste) est ce cecy le salaire que vous vendez à ceux qui meurent pour vostre amour? Acheuez de lire cette lettre, & reconnoissez que si les Dieux vous ont enrichie de beauté, ils n'ont pas priué Lyndorac de merite. Il est tel, que sa valeur & hōneur demandent vne autre recōpense. Cōment (respond Caliste) estes-vous doncques de celles qui seruent de conseil & d'adrelle aux artifices des hommes trompeurs & abuseurs? Si n'estoit que l'amitié que ie vous ay portée iusques icy, retient vn peu maiuste colere, ie vous ferois chastier comme vous meritez.

Vous appelez doncques (repart Melite) trompeur & abuseur, celuy qui passe en fidelité, aussi bien comme en valeur, tout le reste des hommes; & blasmez vne fille, qui a succé l'honneur avec le laict dans vostre maison. Caliste, celuy qui vous escrit, a fait iusques icy trop de profession de l'honneur, & celle qui vous en parle, desire trop vostre contentement. Mon penser est bien esloigné de vostre impression. Son amour est honneste, & sa recherche loüable.

S'il est ainsi que vous dictes (respond, Caliste) que
n'ente

n'entre-il doncques en ses recherches par la porte de l'honneur? Ne sçait-il pas que ie suis sous les loix d'vne mere: & que ie ne puis auoir d'autre volonté que la sienne? Peut-estre qu'il s'attend que ie responde, ie ne suis pas si forte, encorés que ie sois si ieunë, que ie ne sçache bien connoistre comme l'on s'engage par des responses.

Tenant ce sage discours, elle quitta l'autre qui vouloit repliquer, & entra à l'heure mesme dans vne chambre, & s'enferme dedans toute seule. Ce fut là qu'elle acheua de lire la lettre de Lyndorac, & que d'un costé l'amour commence d'acheuer son ouurage. La valeur, & la beauté de ce ieune guerrier, seruent à ce petit Dieu d'instrument, pour rauer la liberté de cette Belle. Caliste veut tuer cette passion en naissant, mais son cœur trop doux ne tient point de l'inhumanité de Medée, qui fit mourir ceux qu'elle auoit fait naistre. Elle est resoluë d'aymer Lyndorac, mais autant que les bornes de l'honneur le peuuent permettre: Aussi elle dissimule sa passion, luy prescrit des loix, & ne permet pas que personne en ayt la connoissance.

Mais Lyndorac, qui brusloit d'impatience, & qui se promettoit d'estre honnoré d'une response, est presque sur le poinct d'vser de violence sur luy-mesme, lors qu'il apprend par sa fidele messagere le succez de son ambassade. Ha! mal-heureux (disoit-il) que ta folie est bien chastiee! Tu deuois mesurer ton dessein, & tenir le milieu, sans monter aux extremitez. Ne deuois-tu pas croire que Caliste estant la plus belle du monde, la raison veut qu'elle soit seruie de celuy qui possède plus de merite? O fausse esperance! ô desir auantureux & temeraire, que vous me coustez cher!

Il vouloit poursuiure, lors que la parole luy faillit,

au grand estonnement de Melite, qui par ce discours tasche de releuer son courage. Et quoy, Monsieur, vous rendez vous doncques si-tost au premier coup de tēpeste & d'orage que vous esprouez en amour? Estes vous si peu expert en cette nauigation que vous ne scachiez que la bonace n'y peut estre telle, qu'on n'y redoute tousiour quelque nouueau écueil? Si vōtre Maistresse par sa rigueur a monstré qu'elle est femme, vous monstrez maintenant par vostre lascheté, que vous estes moins qu'homme Parauanture voudriez-vous, qu'à la premiere rencōtre elle courust les bras ouuerts pour vous tesmoigner sa flāme? Reprenez vos esprits impatiens & abbarus, & aprenez que l'amour doit proceder de la connoissance, & qu'en amour, non plus qu'en guerre, le soldat ne merite point la courōne, auant que d'auoir combatu.

Ainsi parloit Melite, quand Lyndorac par vn soupir donnant de l'air à son ame oppressée, respond de la sorte.

Ma chete amie, il est bien aisé à ceux qui sont sains, de donner conseil aux malades. Mais en eff. Et, puis que vous m'avez tant obligé iusques icy, que me cōseillez-vous de faire: de vīre ou de mourir?

Vinez (dit Melite) & prenez courage. Dieu nous a donné vne certaine vie, & vne certaine mort. & nous deuōs conseruer l'vne, & fuyr l'autre, puis que l'vne nous manque si-tost, & que l'autre nous est infailible. Voyez vostre Maistresse, sōdez son cœur, parlez à sa mere, & soyez si discret en toutes vos actions, que rien ne vous puisse reculer des bōnes graces de celle qui sans doute vous ayme, quoy qu'elle le dissimule.

Ce furent les discours de Melite, qui firent que Lyndorac le iour mesme eut moyen de parler à Cali-

ste. Si mon dessein estoit de raconter des propos amoureux,plustost que des Histoires Tragiques , i'escriterois beaucoup de choses sur ce suiet : mais craignant d'ennuyer ceux qui prendront la peine de lire ce recit , ie diray seulement , qu'apres que nostre amoureux eut appris de sa Maistresse, que son vouloit dependoit de sa mere , & qu'admirant la sagesse de cette fille bien nourrie, son amour se fust augmenté, il la fit demander en mariage, & employa pour ce suiet ceux à qui il se fioit le plus.

La mere de Caliste , qui est vne Dame illustre de sang, & de vertu, vefue d'un des braues Barons que le Soleil veid iamais, assemble ses parens, & leur cōmunique la recherche & l'amoureuse poursuite de Lyndorac. Et comme les esprits sont differents en leurs iugemens, les vns treuvent bon ce mariage, les autres le rejettent, & par leur raison alleguent que Lyndorac n'est pas assez riche. Toutefois apres qu'il fut representé à la mere comme la vraye richesse consiste aux dons de nature, & qu'en vain vn homme s'efforce à devenir riche , lors qu'il manque des belles parries de l'ame , & qu'on eut mis en aduant la Noblesse , la valeur & la fortune de Lyndorac , ce mariage est conclud, au grand contentement des deux parties.

Voicy de belles roses en apparence, mais leurs espines picqueront iusques au cœur. Toute la Noblesse du Pays vint honorer leurs nopces. On y court la bague , on y iouste , on y danse, & l'on n'y parle que de se resiouyr. La nuit vient cependant avec ses larges voiles, & Lyndorac qui l'a si long-temps desirée, y recueille le fruit de ses trauaux , & sème dans vn jardin clos & fermé pour tout autre. Qui voudroit

contre les mignardes carresses de ce couple amoureux, qu'il nombre les estoilles du Firmamēt, les fleurs du Printemps, & les fruits de l'Automne. Il n'appartient qu'à l'Amour, qui presidoit en cette chaste couche, & qui recueilloit ces doux soupirs, ces mots desirables, ces petits refus suivis d'embrassemens, de les reciter. Il semble desia à Lyndorac, que deormais il doit estimer sa gloire égale à celle des Dieux, & ignore les tragiques, & les sanglans effects, qui sortiront d'une si douce ame.

O decrets du destin ! mais plustost secrets du conseil de la sagesse du grand Dieu, que vos abysses sont profonds & merueilleux ! Faut-il qu'une action si honneste ou plustost vn Sacrement honnotable en la presence du Ciel & de la terre, soit le commencement de tant de mal-heurs ? Iunon ny Pronube ne se treuvent point à cette nopce : la discorde toute la nuit sema les couleures dans la maison, & la chouette, oyseau malencontreux, chanta sur le toict vne triste & funeste chanson.

Après les solemnitez accoustumées, chacun se retire en sa maison, & nos deux Mariez s'abandonnent aux plus cheres delices de leur accouplement. On les void tousiours ensemble, & les petits Amours volent tousiours dedans leurs yeux & baissent incessamment leur visage. Ils furent heureux & contents de la sorte l'espace de six mois, lors que la fortune enuieuse de leur aise, vient semondre Lyndorac de son deuoir. Elle luy represente le service de son Prince, sa valeur qu'il doit exercer contre l'Estranger orgueilleux & perfide, & cette fleur de ieunesse, qui ne doit iamais permettre qu'un esprit masle & genereux comme le sien, se laisse entierement surmonter par les embrassemens d'une femme.

Ces

Ces considerations ont tant de force, qu'il se delibere de quitter, pour vn peu de temps, son plus doux repos, & d'abandonner ce qu'il auoit recherché avec tant de passion. Il en parle à Caliste, qui du commencement a bien de la peine à se resoudre de certe dure separation. Ce ne sont que soupirs & que regrets capables d'arrester Lyndorac, si les loix de l'honneur, tyran des belles ames, eussent eu pour ce coup moins de pouuoir que celles de l'Amour.

Il par doncques, & en partant ils font vn eschange. Lyndorac emporte le cœur de Caliste, & elle retient celuy de Lyndorac.

Belle Caliste que ce depart vous fut de dure digestion! Ceux qu'une veritable & legitime amour a rendu tributaires peuuent iuger des traueses d'une absence. C'est vne nuit route noire de douleurs, & d'autant plus fascheuse à supporter, qu'elle dure beaucoup. Elle fut aussi longue que la nuit qui partage l'année avec le iour, aux contrées qui sont iustement dessous l'Ourse. Cette apprehension de six mois vous est vn siecle: mais si vous auiez connoissance des malheurs que la fortune vous trame au retour de Lyndorac, hélas! Caliste, vous la souhaitteriez eternelle.

Tandis que cette nouuelle mariée soupire l'absence de son mary, sa mere & ses plus proches parents la viennent consoler, & par des belles raisons s'efforcent d'adoucir la rigueur de cet éloignement. On la diuertit, mais non pas si bien, que le souuenir de son époux ne soit rouïours viuement empraint dedans son ame.

Comme la liberté des compagnies est grande en ceste Prouince, où l'on fait plus de profession de l'honneur, que de son apparée, plusieurs Damoiselles voisines, accôpagnées de quelques Gentils-hom-

mes voyent souuent Caliste, & elle leur rend souuēt leurs visites. Parmy ces Gentils-hommes qui menent ces Dames, Rochebelle tient le premir lieu. Sa beauté, sa taille, sa disposition, & la bonne opinion qu'on a de luy, ioincte à ses richesses, le rendent recommandable. Il auoit aymé Caliste, comme ie croy, lors qu'elle estoit fille: mais neantmoins si couu. remēt; que iamais ny elle n'y autre n'en eut la connoissance.

Et comme les premieres impressions amoureuses sōt les plus fortes, la playe demeure encore fraische dans son ame, bien qu'il voye qu'un autre possede ce que son mal-heur luy a osté. Il n'ignore pas comme son espoir mourut le iour que son Rival prit possession de cette place, & que c'est en vain de tâcher à luy redonner la vie, puis que l'honneur aussi biē l'estoufferoit en naissant. Toutesfois il est de ces gēs-là qui embrassent vne ombre au lieu d'un corps, & qui se repaissent de vanité. Il fait doncques si biē ses parties qu'en toutes les compagnies qui vont voir Cariste, ou qu'elle va voir, il se trouue tousiours le premier: car l'humeur libre de cette mariée (cōme nous auons desia dit) permet à chacun de la aborder. C'est ce qui donne courage à Rochebelle, à ourdir le commencement d'une tole, qu'on arrousera de sang & de larmes. Caliste n'est pas si peu fine que dās peu de iours elle ne reconneust bien le dessein de nostre hōme, qui soupire aupres d'elle, & qui en la regardant s'aveugle en l'excez de la lumiere de ses beaux yeux. Et au lieu de chastier sa folie & sa temerité, il sēble qu'elle prenne plaisir à r'allumer sa flamme par des regards mutuels qu'elle luy donne, biē qu'enferme elle le fasse pour auoir du passe-temps, & pour se rire de cette ieune audace. C'est à la verité la plus grande

grande punition qu'un temeraire scautoit receuoir, que celle là, de voir le fruit de son attente aussi vain que son desir, mais semblables procedures ne produisent pas tousiours de pareils effects.

Vne sœur de Lyndorac n'aymoit point Caliste. Je ne scaurois dire particulièrement la source de cette mal-ueillance: routesois ie presuppole que Caliste ne luy auoit donné suiet d'attenter sur son honneur. Son ame est trop franche, & sa vertu blasmée pour un temps, scaura bien faire paroistre differents le mensonge & la verité. Cette sœur s'appelle Doris, qui d'en-ueie, ou autrement veut ruiner Caliste.

La nouuelle passion de Rochebelle, de qui elles'estoit apperceuë, luy seruira de matiere, & d'autât plus encores, que cet oultréuidé Gentil-homme se vante de certaines priuautés imaginaires; & prend plaisir par tout où il se treuve, qu'on luy parle de son Amour. Homme vain & temeraire, si Caliste en eust eu le vent, tu ne l'as iamais troublé l'accord de ce mariage, & donné suiet à ma plume de tracer avec du sang & des larmes cette lamentable Histoire. Et toy Doris, tu penes te venger aux despens de l'innocence, mais l'effect est bien esloigné de ta pensée. Tu verras la mort de celuy qui honoroit ta maison, suivie de tant de morts, que le recit m'en fait horreur. La Comedie est acheuée, voicy le commencement de cette funeste Tragedie.

Après que Lyndorac eut seruy son quartier, & redonné à son Prince de nouuelles preuues de sa valeur & de son ingenient en des choses où il l'employe, particulièrement en un voyage qu'il fait en Allemagne, pour le service de sa Majesté, il obtient congé de re-voir sa maïso. Il y arriue, heureux s'il n'y fust iamais

reueu : car aussi bien tout plaisir y est banny desormais pour luy. Qui dira ia joye de Caliste au retour de son espoux, & le plaisir de Lyndorac reuoyant le doux sujet de ses yeux ? Leurs ames se meslent par leur bouche, & se confondent si bien qu'elles ne sont qu'une. Ils passent ce iour & cette nuit, en tel excez de liesse, qu'il semble qu'ils en veulent faire provision pour adoucir l'amertume qu'ils doiuent boire bien-tost en aduance.

Le lendemain leur maison est pleine de parens & d'amis, qui viennent saluer Lyndorac. Apres tous les compliments, Doris tire son frere à l'écart, & luy dit ces paroles.

Que ie plains ton aduanture (mon cher frere) qu'il falle qu'apres auoir receu tant de gloire aux Prouinces estrangeres tu recoiues tant de des-honneur en ta propre maison!

Si iamais ton courage eut besoin d'estre ferme, c'est à ce coup que tu le dois faire paroistre inuincible, & prendre vne telle vengeance de cet affront, que la memoire en soit immortelle. Caliste indigne que ie l'appelle ton Espouse, recoit en ton absence Rochebelle, avec les priuantez qui n'appartiennent qu'à toy.

Helas! ie voudrois que le Ciel m'eust renduë auuegle & muette, à fin que ie n'eusse point veu de mes propres yeux vne partie de leurs folles amours; & que maintenant le moyen de t'en faire le recit, suivant que le sang m'y oblige, me fust osté. Mais à quoy bon tant de discours ? La chose en est si claire, & l'impudence de Rochebelle en est deuenue iusques là, qu'il se vante par tout des faueurs de ta femme.

Iamais homme touché sans y penser, de l'esclat du foudre ne fut plus estonné que Lyndorac, il demeure
insen

insensible aux paroles de sa sœur, & ne respond vn seul mot. Son âme blessée d'extreme douleur, n'a point de mouuement en cette action, & sans doute elle abandonneroit son corps, si le despit & la vengeance ne venoient au secours. Chose estrange ! que l'amour n'y treuve point de place. O credule ! pourquoy te precipites-tu si-tost, & condamnes si legerement celle de qui la Chasteré ne peut estre souillée, ny par ta credulité, ny par la médifance ?

Lyndorac saisi de jalouse rage sent en mesme tēps que son bon heur s'éuanoit, & que la belle clarté qui l'éclairoit est changée en tenebres. Enfin il iure qu'il rendra sa vengeance memorable. Et de faict il commanda à vn laquay de tenir prest vn cheual, & lors que la nuict est venue, il monte dessus, & part sans dire mot à personne. Caliste qui auoit reconnu de l'alteration en son mary, & qui s'attendoit d'en sçauoir l'origine est bien estonnée d'vn depart si soudain. Elle passa toute la nuict en larmes, croyant ce qu'il n'est pas : car comment eust-elle creu que son mary, qui iusques à cette heure l'auoit tant aymée en apparence, l'eust condamnée à l'ouyr en ses iustes deffences ? Nostre jaloux marche toute la nuict, & arrive le lendemain matin en vn Chasteau où Rochebelle se tenoit.

Le pere & le fils le recoiuent avec mille caresses, toutes ces courtoisies ne sont pas capables d'adoucir sa passion. Ils le traitent honnorablement, & se repaissent bien-heureux de luy resmoigner l'estime qu'ils font de son merite.

Après dîner Rochebelle s'amuse à mōstrer à Lyndorac le bel air de sa maison, & les campagnes & les vallons proches. Mais lors qu'ils arriuent en vn cer-

tain lieu assez escarté du logis, Lyndorac tient ce discours à Rochebelle.

Vous m'avez monsté tout plein de belles choses fort plaisantes à la veüe, & ie vous en veux maintenant descouvrir vne autre qui est bien plus rare; & que vous ignorez encore. Ie vous prie de regarder sous ce buisson. & vous verrez vne grande merueille.

Rochebelle se baïsse, & y iette les yeux, & y treuue deux espées nuës, & deux poignards. Comme il est estonné de ce mystere Ce n'est pas tout (poursuit l'autre) il faut choisir & prendre celle que vous voudrez, & vous en deffendre: car i'ay resolu de laisser ma vie à vostre mercy ou d'auoir la vostre. Encores faut-il sçauoir (dit Rochebelle) le sujet de vôtrecourroux.

Vostre conscience (repart Lyndorac) vous l'apprend assez, sans que ie vous doïue reciter le iuste ressentiment que i'ay de me vanger du tort que vous m'avez fait en mon absence. Mais nous perdôs le temps, ie voy bien, vous voulez dilayer le châtiment que mes mains en doiuent faire.

Lyndorac (dit l'autre) vous me voulez forcer à vne grande extremité: toutefois, puis que i'y suis contraint, ie vous cōtenteray. Mais auant que nous vuidions ce different par la mort de l'vn, ou de l'autre il me sēble que vous deuez écouter mes raisons. Vous sçauiez que vous estes venu chez moy sans compagnie. Vous n'ignorez pas aussi que les armes sont journalieres, & que vostre valeur est suiette au hazard. S'il aduiant que la fortune vous soit contraire, l'on dira que ie vous ay pris en auantage, & par même moyen me voila ruiné d'honneur, qui m'est plus cher que la vie. Au contraire, si mon innocence vient à estre surmōtée par vostre valeur, ne dira-on pas de
mesme,

mesme, que vous m'avez écarté tout seul, & sans armes hors de ma maison, & que m'ayant dressé cette partie, vous avez eu bon marché de vostre ennemy, qui n'auoit dequoy se deffendre ? Si vous balancez mes raisons avec iugemēt, nous remettrons la partie à demain, où ie promets de me trouuer en tel lieu que vous voudrez & tout seul avec vne épée & poignard, & ie vous le iure en foy de Gentil-homme.

Belles excuses que Lyndorac ne peut refuser, autrement il offenserait son honneur. Ils s'accorderent du iour & du lieu, & l'un remonte à cheual, & s'en va coucher chez vn de ses proches voisins, & l'autre se retire dans son Chasteau.

Le iour commençoit à redonner sa lumiere accoustumée, lors que Lyndorac, qui est resolu de recouurer la perte imaginaire de son honneur par la mort de son ennemy, se trouue à l'assignation. Il l'attend tout le long du iour avec vne extreme impatience, mais point de nouuelle. Il ne sçait qu'en iuger : toutes-fois auant que de l'accuser, il luy depesche le soir mesme son Laquay, pour sçauoir ce qui l'a retenu de luy manquer de promesse, & le coniure par l'honneur qu'il doit aux armes, dont ii faisoit profession, de se treuuer le lendemain au mesme lieu.

Le Laquay trouue Rochebelle, de qui il reçoit cette responce: Va, & rapporte à ton Maistre, que sa folie est bien grande, de rechercher la mort de ceux qui ne l'ont point offensé. Dy-luy encores que ie n'ay nullement affaire de me battre contre vn desesperé, qui n'est pas neantmoins si mauuais garçon, que ie ne sçache bien chastier ses folies lors qu'il m'en donnera du subject.

Lors que Lyndorac se veid mocqué par cette responce

ponse, la fureur le saisit: de sorte qu'il se delibere de retourner luy-mesme tout seul au Chasteau de son ennemy, d'y entrer par force, & là luy fendre l'estomach, & d'arracher son cœur. Mais apres qu'un peu de raison luy eut représenté cette chose estre impossible, il le publie par tout pour le plus grand poltron du monde, & par toutes les bonnes compagnies il le ruine d'honneur & de reputation. Et non content de cecy, il retourne à sa maison, & sans autre ceremonie, oste tout le maniement de ses affaires à sa femme, la gourmande, & la traite le plus indignement du monde. Qu'ay je fait (luy disoit-elle) qui merite vne telle indignité? Vrayement ie n'estime point d'estre coupable d'autre crime, que d'avoir trop aymé un ingrat. O Dieux, vengeurs de l'innocence! voyez vous bien de vostre Ciel vne telle cruauté sans la punir? Malheureuse Caliste! faut-il que la naissance de ton plaisir soit celle de ta misere, & que l'amour qu'on te iuroit si ferme, soit sujet au vent d'un soudain caprice? De qui pourray-je désormais estre assurée, puis que celuy qui deuroit rendre ma vie contente, la rend si miserable?

Le poursuiurois les plaintes de Caliste, mais mon cœur trop sensible à la pitié de cette Belle, se fond tout en larmes, tandis que son cruel mary ne s'en esmeut aussi peu qu'un marbre. Vous diriez que c'est Pyrope que l'eau rend plus clair & plus brillant. Les larmes de Caliste l'allument d'autant plus de courroux, qu'elle en verse d'avantage. Au recit de si triste nouvelle, la Mere accourt chez Lyndorac, & voyant ce mesnage, exhorte son gendre de son deuoir, & luy met deuant les yeux l'honneur & la qualité de la maison de sa fille, la fable du monde, & le trophée de
leurs

leurs ennemis. Luy represente par mesme moyē le iuste ressentiment qu'une infinité de gens d'honneur auront de cēt affront, & que tant de bruit ne peut passer sans la perte de plusieurs. Mais cette roche dure à la raison n'ayant devant les yeux que son honneur intéressé par imagination, se laisse tellement emporter à sa folie, qu'il croit n'estre pas satisfait du tort qu'il fait à Caliste, s'il n'ouvre encōres sa bouche contre sa nature.

O jalouse fureur, mortelle ennemie de l'Amour, que tes effects sont prodigieux! Tu donnes en vn moment vne cruelle mort, au milieu d'une douce vie, & parmy les breuuages plus délicieux, tu luy fais aualer vne amere poison. Cette honneste Dame voyant que cette extreme furie possèdoit entièrement l'ame de Lyndorac, & que sa raison estoit desesperée, elle prend la fille & avec vn vif & piquant regret, l'emmene & la retire chez elle.

C'estoit au temps que nostre Prince pour venger le tort que luy faisoit son Altesse, s'apprestoit de conquerir la Sauoye, passer les Alpes, & luy oster encōres le Piémont. Il luy estoit aussi aisé à le faire qu'à le dire, voire de se rendre absolu Monarque de la terre, si sa clemēce eust esté moindre que sa valeur.

Lyndorac se dispose à dresser sa compagnie, afin de se trouuer parmy les gens de bien, cependant que le valeureux Leandre donne sa cornette à Rochebelle. Tous deux sont au camp, lors que Leandre, qui a témoigné en tant de batailles, de rencōtres & de duels, son courage, aprēd de quelqu'un l'affaire de ces deux ennemis, & la procedure de l'un & de l'autre. Il est bien fâché d'auoir mis entre les mains d'un hōme, qui a plus d'apparēce que d'effect, vne chose de tel-

le

le importance, & de qui dépend presque tout l'honneur des gens d'armes. Ce valeureux Cavalier pour mieux s'ôder Rochebelle, le fait appeller, & luy tient ce discours. Lyndorac se vante par tout que vous luy auez mâqué de promesse, & refusé de vuidier vn differant que vous auez ensemble. Que pour cét effect il vous a prins par la main dás vostre propre maison, & vous a mené en vn lieu exempt de toute supercherie. Je vous prie, si vous m'aymez, d'en tirer vostre raison, & faire paroistre que ie ne me suis trompé au iugement que i'ay fait de vostre merite.

Rochebelle se void engagé par ce moyen à se battre. Il ne s'en peut desdire, si bien qu'il enuoye le iour mesme de ses nouuelles à Lyndorac avec ce cartel : *Il est temps que le Ciel vange par ma main ton insupportable folie. I'auois dilayé insque icy de la chastier, esperant que tu t'amenderois. Mais puis que ton insolence perseuere, ie t'attends au lieu où ce garçon te dira, tout seul avec vne espée & vn poignard, afin de te priuier & d'honneur & de vie.*

Je ne scaurois dire si de ces nouuelles Lyndorac receut plus de contentement, que de fascherie. L'aïse de se treuuer bien-tost au lieu qu'il a tant desiré, ne se peut exprimer, & le courroux de se voir mespriser par vn hôme qu'il a braué tant de fois, le possede également, de sorte qu'il méprise de respondre à vn vanteur qui publie son triomphe auant la victoire. Il se porte sur le lieu, monté sur vn petit cheual; & à peine il y arriue, qu'il voit Rochebelle môté sur vn cheual d'Elpaigne fort & puissant. Lyndorac met pied à terre, croyant que son homme en fera le semblable, mais il est bien deceu, car l'autre pique son cheual, & comme vn foudre fondant sur luy, delasche vn pistolet, & luy emporte la moirié de sa fraize, & fuit. Arreste

Arreste poltron (crioit Lyndorac courant apres) & n'allonge point au monde (avec si peu d'honneur) la trame d'une vie pleine de tant d'infamie. Mais le vent emporte ses paroles, & la vitesse du cheual desrobe à ses yeux son ennemy, qui abandonne en mesme tēps & son honneur & l'armée, & s'en retourne à sa maison.

Lyndorac est bien affligé de voir que son homme luy eschappe pour la seconde fois à si bon marché, mais il faut qu'il prenne patience iusques à ce que le temps luy offre le moyen d'en tirer plus de raison. Il prend à témoin quelque passant qui se trouue par rencontre, lors que son ennemy luy lascha le pistolet, & qu'il s'enfuit: le mene au camp vers le grand Henry, à qu'y il monstrent la moitié de sa fraize emportée, luy recite le succez de son duel, implore sa iustice, & employe le témoignage de cēt homme.

Nostre Monarque, de qui l'on pouuoit dire iustement :

Que ce qu'il commandoit en grand & sage chef.

Sa main l'exutoit en valeureux gendarme.

Luy (dis-je) qui s'exposoit luy-même en de tels hazards, que les plus asseurez y fussent deuenus blezmes. Ce grand Prince ennemy mortel des poltrons, fait assembler incontinent les Marefcheaux de France & leur commande de faire droit à Lyndorac.

Il ne falut guieres employer de temps à condamner Rochebelle, puis que la fuitte le rendoit atteint & conaincu du crime dont son aduersaire l'accusoit. L'affaire est pesé avec iuste & meur iugement, & ce fuyard est degradé des armes, & déclaré roturier, & sa posterité. C'est bien perdre vn homme, que de le traiter de la sorte. Il faut qu'il se delibere desormais de viure en vn desert, indigne de conuerser parmy les viuans.

viuans; Pour moy i'estime que c'est estre proprement enfermé dans vne tombe relante, lors qu'on n'ose pas paroistre en la compagnie de ses égaux.

Après que la valeur de nostre Prince eut dompré l'orgueil de ses ennemis, & vsé apres la victoire de sa douceur accoustumée, Lyndorac eut son congé de retourner chez luy. L'aduantage que le droit des armes luy donne sur Rochebelle ne l'empesche pas de se soumettre encores à le faire appeller au combat, mais l'autre n'en veut point ouyr parler. Toute la Noblesse du pays s'en émerueille. Auparauant ce mal-heur, on l'auoit en aussi bonne reputation, que Gentil-homme de la Prouince.

Son pere mesme; qui estoit vn venerable vieillard, luy en fait tous les iours mille reproches; & dit qu'il a esté changé au berceau, & que iamais il n'a produit au monde ce poltron. Mesmes il s'offre à Lyndorac de le combattre pour son fils, si Lyndorac eust voulu s'y accorder. Enfin le Gendre de Rochebelle redoute celuy de Lyndorac, & le Ciel les veut dignement punir tous deux; l'un de sa vanité, & l'autre du tort qu'il faisoit à sa femme.

Que faisiez-vous en ce temps, belle Caliste; Vostre bouche estoit ouuerte aux regrets, & vos yeux versoyét vn deluge de larmes capables de noyer tout le monde si le feu de vostre iuste courroux n'en eust desseiché l'humeur. Ce cruelle bouche les oreilles, lors qu'on luy parle de vous, & fuit les lieux de vostre demeure. Vos parens & vos amis s'assemblerent pour remedier par vn doux accord à ce grand mal: on ne le peut fléchir, son obstination est extreme, mais il sera biē-tost châtié. Il tasche surprendre son ennemy, qui se tient sur ses gardes, & qui le surprend luy-mesme.

Rochebelle

Rochebelle ne sortoit iamais en campagne qu'il ne fust fuiuy de 30. ou 40. mauuais garçons bien armez, En cét equipage il rencotra vn iour Lyndorac avec six ou sept hommes. Aussi tost que nostre ialoux reconnoist son aduersaire, sans considerer l'inégalité de la partie, il picque son cheual, & donne dedans, tandis que ceux qui l'accompagnoient prennent la fuite. Il rendit des preuues de valeur incroyable. Aussi on ne sçauroit luy oster l'honneur d'estre vn des plus vaillans hommes du monde. Mais que fera-il tout seul contre tant de personnés, & encores mal monté & desarmé. C'est vn sanglier au milieu d'une infinité de veneurs. L'un luy dōne vn coup d'épée, l'autre vn coup de picque, & l'autre le traueise d'un espieu: son sang à longs filets change la verdure en pourpre. Il se venge neantmoins & autant de coups qu'il donne, ce sont autāt de morts asseurées. Il cherche à trauers son ennemy, qui se contente de le voir percé de mille coups, sans s'opposer à sa furie. Enfin il est porté par terre tout sanglant & défiguré, & laissé pour mort.

Rochebelle, qui croit desormais viure en repos, se retire promptement en vne sienne forte place, & bien tost apres plusieurs content sur le lieu de l'exécution, & treuuent que Lyndorac s'estoit releué, & assis sur l'herbe, la perte de tant de sang qu'il auoit versé ne luy permettant pas de se tenir sur pieds. Il est emporté par ses amis en sa maison, & si bien secouru, que dans peu de iours il est guery: mais non pas si bien, qu'il ne se ressentie encores de ses playes, & particulièrement d'un coup d'estoc qui luy fut donné au costé droit. La playe est bien fermée, toutes-fois il y a quelque chose qui le picque comme d'une grosse aiguille, & principalement lors qu'il se baisse, ou qu'on

touche en cette partie offensée. Cela ne l'empesche pas neantmoins de mōter à cheual, & de faire vn voyage à la Cour, pour former de nouuelles plainctes à sa Majesté, contre son aduersaire. Rochebelle est la fable des Courtisāns. On luy fait son procez, & par arrest il est condamné d'auoir la teste tranchée. Ses biens sont confisquez & adiugez à Lyndorac, à qui le Roy permet encotes de prendre mort ou vif son ennemy, en quelque maniere que ce soit, & luy laisse en sa disposition de le tuer de ses propres mains, ou de le liurer entre les mains de la Iustice. Lyndorac fait exécuter l'arrest par contumace, & pour cet effect on dresse vne potence près le Louure deuant l'Hostel de Bourbon, où le tableau de Rochebelle est attaché.

Quand le Pere de Rochebelle apprend cette note d'eternelle infamie suruenue à sa maison; il tire ses blancs cheueux, les arrache, & s'abandonne à la douleur. Et en vain on tasche à le consoler. Ce regret treuve sō ame si sensible, qu'en peu de iours il le met dans le tombeau. Nostre homme veut retourner cependāt au pays, pour jouyr du fruiet de l'Arrest: mais le mal que cette blesseure de reins luy donne, l'afflige fort. Il porte tousiours vne face blesme, & traîne sa vie en langueur. La Riuiere, Martin, & la Violette, Medecins renommez, s'assemblent pour y remedier: mais ils n'y voyent goutte, si bien qu'il se dispose de consulter ceux de Montpellier. Il y arrive avec beaucoup de douleur, & y treuve aussi peu de resolution, que d'allegement. Rochebelle en est bien aise, puis-que par ce moyen son ennemy songe plus à se guerir, qu'à le rechercher.

Lyndorac, qui auoit desia gardé plus de quinze mois ce mal insupportable, desespéré du tour de sa

vte,

vie, attend la mort en patience Geronyme Operateur passe cependant par Montpellier, & nostre malade est conseillé de luy monst^r son mal. Il le fait pl^ust^ot pour leur complaire, que pour espoir de gu^rison. Cét homme luy manie son costé, & à mesure qu'il le touche, Lyndorac se sent picquer iusques au cœur. Prenés courage (lui dit alors cet Empirique) j'ay trouué la cause de vostre mal. Vous avez vn fer fiché dans vos reins, il l'en faut arracher. Plusieurs Medecins que Lyndorac auoit appellez pour y assister, se rioient de l'Operateur, lors qu'en leur presence il fait vne incision au lieu de la douleur, & en tire la pointe d'vn fer, long de sept ou huit grands doigts. Il luy applique puis apres de l'onguent, & dans sept ou huit iours il rend le malade sain & gaillard. La viue & fraische couleur luy re vient au visage, & à mesure qu'il reprend ses forces, le desir de se vanger de Rochebelle se r'allume.

Cependant qu'il est sur les desseins d'attrapper son ennemy, les parens de Caliste & ceux de Lyndorac se r'assemblent pour la dernietre fois, afin de voir si l'on peut mettre remede au trouble de leur mariage. Mais c'est escrire en l'air, & peindre dessus l'onde; puisque nostre ialoux demeure tousiours en mesme predicament, insensible à la raison, & au deuoir.

En fin comme on void que son iugement est du tout perdu, le mariage se dissout du consentement des parties, & Bulles s'obtiennent de Rome, qui donnent dispense à tous deux de se separer, & de se remarier là où bon leur semblera.

Il n'entte point en dispute, si cela se pouoit, ou s'il ne se pouoit pas faire. Les hommes peunent par faux entendre tromper l'Eglise, qui ne iuge que de

l'exterieur, mais non pas l'esprit de Dieu qui soude les pensées, & de qui la bouche nous apprend que l'homme ne doit point separer ce que le Ciel a conjoinct. Lyndorac aveuglé de rage ne pense point à cette faute. Toute son imagination est portée à surprendre son ennemy: & deffect, comme il est vn grand petardier, il entrepréd vn soir sur Rochebelle, en force la porte de son Chasteau, l'emporte, tué & renuerse tout ce qui s'oppose, & prend son ennemy prisonnier. Quelle faueur de fortune, s'il en eust bien vsé? Rochebelle se voyât attrappé n'a recours qu'aux larmes. Il se iette aux pieds de Lyndorac, & luy demande la vie qu'il a desia souuent perduë par la perte que tant de fois il a faite de son honneur. Lyndorac, image de valeur, ressemble au lyon genereux, qui s'appaie par humilité. Il se contente d'enfermer son ennemy dans vne chambre, & ià le coniurer avec toute sorte de remonstrances, de luy dire librement la verité de ses amours, & si iamais il a receu de Caliste ce d'ont on l'accuse. Mais Rochebelle qui n'est point asseuré de sa vie, & par mesme moyen qui ne veut point charger sa conscience, appelle le Ciel à tesmoin, & le supplie de l'ascher sur luy les traits de sa foudre, si jamais Caliste luy a montré signe de folle amour: mais plustost si elle n'a vsé en son endroiect, parmy son humeur libre de tant de marques d'honneur, & de modestie, qu'il est impossible de les reciter.

Que peut respondre d'autre, oyant ses horribles serments, qui font dresse les cheueux en les oyant. Lors qu'il n'en peut citer autre chose, il enferme son ennemy, & prend vne nouuelle resolution.

Rochebelle auoit des sœurs capables de dōner de l'amour au courage le plus farouche du monde. Lyndorac

dorac deuiant amoureux de l'ainée, & obtient d'elle sous promesse de mariage, ce qu'il en desire. Ces nouuelles amours achement d'esteindre la memoire de Caliste, & auancent la fin de la Tragedie. O que la jeunesse est volage, & que l'homme est sujet à la passion ! car bien qu'il soit enveloppé de mille affaires, neantmoins il se reserve tousiours du temps pour le donner, s'il luy est possible, aux voluptez. Lindorac n'est pas neantmoins si fort, qu'avec la jouissance de cette beauté, il ne vueille encores tout le bien du frere. Il void Rochebelle pour ce sujet, & luy declare son intention en peu de mots. Vous scauez (dit-il) comme vous m'avez tant de fois traité si indignemēt, & le pouuoir que i'ay de me venger, si ie veux, maintenant de vous, Vostre vie & vostre mort sont entre mes mains, & il est en ma dispositiō de faire mettre vostre teste sur vn eschafaut, Si i'estois aussi prompt à punir qu'à pardonner, vous auriez desia seruy de sanglant & d'infame spectacle au public : mais preferant la douceur à mon iuste ressentiment, tant s'en faut que ie pourchasse la fin de vostre vie, qu'au contrair ie veux, s'il est possible, releuer vostre honneur, par l'alliance que ie feray avec vous. Vostre sœur Amynthe sera le lien qui nous rendra desormais inseparables. Je luy ay desia donné ma foy, & elle m'a donné la sienne. Il ne reste sinon que vous acheuiez vne si bone œuvre par vostre consentement, & par l'auantage que vous luy ferez, tel que ie le desire.

L'honneur que vous me faicte (respond Rochebelle) me tient desia lieu d'eternelle obligation que ie vous auray desormats. Je vous jure, que i'en garderay la memoire jusques au tōbeau. C'est à vous à me

faire la part que vous voudrez , aussi bien tout est à vous.

Les arrests que i'ay obtenus ioins au don du Prince (dit Lyndorac) me donnent à la verité tout vostre bien. Mais ie ne suis pas si rigoureux, que ie ne vous laisse de quoy viure. Vostre sœur a six mil escus, par le testament de vostre Pere. Elle vous remettra son legat, & vous luy remettrez l'heritage, & par accord public confirmeriez ce que la Iustice me donne.

Ie vous ay desia dit (repart Rochebelle) que ie n'ay point d'autre volôté que la vostre. Ie me sens trop favorisé de cette offre, & plus honoré de vostre alliance.

A ces mots ils s'embrassent, & s'entre-salüent comme beaux freres, & iurent desormais vne eternelle conçoide. Lyndorac que vous estes credule en toutes choses. Estimez vous qu'un homme remplý de vanité, & qui fait plus estat des biens du monde que de l'honneur, se despoüille si legerement d'un tel heritage. Vous croyez peut-estre à ses iuremens. Voyez-vous pas qu'il est de ceux qui tiennent pour maxime, que l'on trompe les enfans avec des osselets & les hommes avec des sermens.

Tandis que Lyndorac prepare ses nouvelles nopces, Rochebelle qui a la clef des champs se saisit d'une forte place de sa maison, & s'y fortifie. Vne ville prochaine d'où il estoit natif, luy rend la main, & luy offre tout secours. Cette derniere procedure accuse Lyndorac d'auarice, & plusieurs de ses amis l'en blasment. Son aduersaire assisté luy rend de tous costez des pieges. La premiere rencontre deuoit auoir réduit Lyndorac plus prudent : mais luy qui croyoit que tout le monde ensemble ne scautoit le surmonter, quand il a vne espée à la main, fort tous les iours en

campagne avec peu de gens. Son ennemy a tousiours 50. ou 60. hommes bien armez, qui le suiuent par tout. En fin ils se treuuent. Lyndorac met la main au pistolet. Il tuë le premier qui s'oppose : les gens plus resolués que la premiere fois font plus de resistance, mais la gresse des mousquets & les arquebuses de l'ennemy les estonnent. Leur Chef vaillant comme de coustume, vend sa peau cherement. C'est vn foudre qui passe au trauers d'un nuage, lors qu'un autre foudre luy donne dans la teste, & le porte mort par terre. Il n'est pas plustost abbatu, que le reste de la troupe se sauue à la fuitte, & le cháp de bataille demeure à Rochebelle, qui descend du cheual, & perce de son pistolet son ennemy tout mort qu'il est. Il luy passe puis son espée au trauers du corps, & laue ses mains de son sang. Il a si grande peur de son retour, qu'il luy ouure la poictrine, & luy tire le cœur. O barbare ! tu fais bien paroistre qu'un genereux courage ne fut iamais hoste de l'ame d'un poltron.

La mort tragique de de Lyndorac est regrettée de plusieurs gens d'honneur, encores que tout le monde le blasme des rigueurs qu'il exerça contre Caliste, sans aucune apparence de raison. Sa sœur. Doris le plaint & reconnoist bien tard la faute qu'elle commit, lors qu'elle luy bleffa le iugement du traict de jalousie. Cependant le Gouverneur de la Prouince commande aux Preuosts de se saisir de la personne de Rochebelle, qui comme vn Oreste agité de furies court de lieu en lieu, & ne s'arreste iamais de peur de receuoir le châtiment qu'il merite. Ses Complices sont presque tous pris. Les vns sont estendus sur la rouë, les autres seruent d'ornement à vn gibet.

Lors qu'Aminthe sçait la mort de Lyndorac, elle

peint & la face des couleurs du trespas. Le coup de la douleur par trop de sentiment la rend insensible. Enfin comme les esprits ramassez commencēt à s'évaporer par l'humeur de ses yeux, & par les sanglots continuels qui sortent de son cœur: elle commence à proferer de si pitoyables regrets, qu'elle eust contraint la mort mesmes à pleurer son tourmēt, si cette fureur eut eu des oreilles pour entendre ses plaintes.

Ha! mal heureux frere (disoit Amynthe) est ce cecy le partage que ie recois en ta maison; Me donnes tu du sang à boire, le premier iour de mes nopces, Sont ce cecy les premiers mets du banquet, O cruel! que ne commençois-tu à laver tes mains de mon sang, puis qu'en ostant la vie à l'un, tu scauois bien que l'autre ne pouuoit demeurer uiuant? O Soleil! qui as veu meurtrir celuy qui seruoit de lumiere au monde, que ne cachois tu sous nostre hemisphere, & que ne couurois-tu d'éternelle obscurité le monde, comme tu fis iadis en la faute d'Acrée, Que desormais ce iour soit marqué d'une lettre assez rouge dans nostre Ephemerides, & qu'il y pleuue tousiours du sang. O Lyndorac, qui n'eus oncques ennemy plus grand que ton courage, ta valeur t'a perdu. Si tu eusses creu le conseil de celle qui t'aymoit plus que ses propres yeux; tu eusses logé en ton ame le soin de ton salut, aussi bien que celuy de ta gloire. Ce perfide à qui tu auois donné la vie, lors que tu la luy pouuois oster si iustement, n'auroit point maintenant rany la tienne, avec tant de cruauté. Mais ie te vengeray, quelque chose qui en puisse succeder, & me blasme qui voudra d'inhumanité, ie feray reuiure celle qui pour sauuer Iason, mit en pieces son propre frere. Je ne craindray pas de deliurer ta terre d'un tel monstre, puis que le regret de t'auoir perdu (ô mon Lyndorac) me priue en mesme temps, de crainte aussi bien comme d'espoir.

Ainsi

Ainsi parloit Amynthe, & ses paroles furent bien-
tost suiues des effectz. Rochebelle quelque temps
apres ; & lors qu'il fuit tant qu'il peut la main de la
iustice, est atteint d'une mousquetade qui luy perce
la teste, ainsi qu'il passe par vn vilagé proche de sa
maison. Son ame qu'il auoit si cherement conseruée,
iusques à cette heure, quitte à grand regret son bel
hoste. La Parque luy fille hastiuement la mourante
prunelle, & ce corps miracle de nature, indigne de
loger vn courage si cruel & si poltron, demeure froid
& tranly.

Caliste apres tant d'orages, & de tempestes, se trou-
ue au port de ses desirs. Le Ciel qui auoit pris sa cau-
se en main, espouse sa querelle, rompit la fascheu-
se chaine qui l'attachoit. Elle fut pour vn temps ex-
posée comme vne autre Andromede à la mercy du
monstre de la Calomnie, mais sa patience a depuis été
recompensée ; car elle vit maintenant heureuse &
contente, avec vn Gentil-homme honneste & riche.
Elle nous apprend par son exemple que la verité peut
estre obscurcie, comme le Soleil, lors que l'obscurité
de la Lune se met entre luy & la terre, mais seulemēt
par interualles. La verité ressemble à la palme, elle se
releue d'autant plus qu'on la charge, & l'on diroit
que les fardeaux augmentent sa vigueur. C'est la fin
de cete Histoire Tragique. Prenez patience d'en
ouyr vne autre non moins triste & funeste.



*ALIDOR GENTIL-HOMME DE
Picardie, apres la mort de sa maistresse, en fait
faire deux pourtraicts : l'un mort, & l'autre
vif, & va confiner ses iours aux deserts de
Thebaide.*

DE toutes les passions humaines ie pense que celle de l'amour est la plus violente. Lors que ceste fureur s'est reduë la maistresse de nostre ame, la raison ny treuve plus de place. C'est en vain qu'on y veut apporter du remede, la playe en est incurable. Il faut le plus souuent qu'on en recoiue la guérison de la main du desespoir, principalement lors qu'on perd le suiet d'où procede ce mal. L'Histoire que ie veux raconter en rend tesmoignage. Elle contient tout ce qui se peut remarquer en amour de funeste & de Tragique. Je ne puis l'escrite sans larmes: si le commandement d'une grande Princesse ne m'y obligeoit, j'en laisserois la charge à vn autre. Mais puis que le deuoir & la raison m'y forcent, ie la decriray en cette sorte.

Alidor n'auoit pas encores atteinct la vingt & deuxiesme année de son aage, que sa valeur estoit renommée par toute l'Europe. C'estoit vn Gentil homme de Picardie, qui auoit tesmoigné sa valeur en plusieurs rencontres & batailles fameuses. Il cōmandoit à vne cōpagnie de cheueaux legers lors que le grād Henry fit rougir les eaux de la Dordonne du sang de ceux, qui non contens de l'auoir esloigné de la Cour luy vouloient encores oster l'espoir d'estre vn iour asis au throsne de ses Ancestres.

Après

Après que le couraige de ce Cavalier, qui tenoit le party de la ligue, fut contrainct de ceder à la valeur, & à la fortune de ce grand Monarque, il se retira en son pays en vne sienne maison de plaissance, où il se mit à passer le temps. Tantost il couroit le cerf, tantost il faisoit voler le herô: maintenant il prenoit vn liure, & assis sous vn arbre, ou bien aux bords d'une claire fontaine, il lisoit les auantures des Cheualiers renommez dans les Histoires. Quelquesfois il composoit de beaux vers en sa langue, & louoit le Ciel dans ses escrits, de ce qu'il viuoit sans passion, priant la liberté plus que tous les thresors du monde. Heureux, s'il eust continué en cete resolution, & si les charmes d'une beauté n'eussent troublé le doux repos de sa vie, & donné subiect à sa plume d'escrire plustost sa passion que sa valeur.

Durant que son ame n'estoit point encores esprise d'aucune flamme amoureuse, il arriua qu'un Gentilhomme son voisin, que nous nommerons Lycidas reuint de Flandres, où il auoit demeuré dix ou douze ans, cōmandant vn regiment pour le seruice du Roy Catholique. Si tost que la nouuelle de sa venue fut semée par la prouince, tous les Cavaliers alloient à la foule en sa maison pour le voir, & pour le saluer. Alidor, qui estoit remply de courtoisie, ne manqua point de le visiter, il y fut vn iour avec vn sien Gentilhomme nommé Faryme. Lycidas, qui auoit connoissance du merite d'Alidor, & du rang qu'il tenoit au pays, le receut avec toutes sortes de complimets. Il le fit promener par toute sa maison, il luy fit voir les parterres de son jardin, le bois plâtré d'arbres qui portent des fruiçts les plus delicieux: les cabinets, & les allées couuertes de feuilles vertes. En fin il lui fit voir
vne

vne autre chose bié plus singuliere. C'estoit Callirée qu'il auoit espousée en Fládre. C'estoit vne beauté la plus rare qui se peut voir, l'Amour se seruoit de ses yeux pour brusler toutes les ames genereuses, & son front estoit vn tableau où toutes les belles graces estoient représentées. Alidor n'eut si-tost ietté les yeux sur ce beau Soleil, que son cœur non encores atteint des flesches, de ce petit Dieu, qui preside sur l'aíse des humains, sent vne blessure secrette & inconnue. Callirée qui, n'auoit encores veu tant de grace & tant de beauté en vn homme se treuua en mesme temps atteinte des perfections de ce Cavalier. L'Amour frappe leurs deux cœurs a la fois. Lycidas, qui ne se défioit nullemét de la fidelité de son épouse, luy commanda d'entretenir Alidor, pendant qu'il alloit receuoir vne nouuelle compagnie, qui venoit pour le visiter. O que ce commandement luy fut agreable ! Elle s'assit en vne chaire, & pria Alidor de s'asseoir en vne autre qu'elle fit apporter. Ce Cavalier voyant deuant les yeux celle qui commençoit desia de rauer sa franchise, ne sçauoit par quel chemin il deuoit tourner ses pas pour paruenir au lieu où il desiroit arriuer. Le Dedale amoureux où il se trouuoit engagé, luy monstroir plusieurs voyes, mais elles estoient confuses, & incertaines. Ainsi balançant entre l'esperoir & la crainte, il demouroit immobile. Ses yeux arrestez sur le beau visage de sa maistresse faisoient l'office de sa langue, qui demouroit attachée à son palais, d'où sortoient par fois des soupirs interrompus, messagers de sa passion. Il ne l'eust iamais declarée ouuertement, si la belle Callirée n'eust par ces paroles chassé sa crainte, & releué son esperance. *Monsieur (dit-elle) il semble que ce lieu,*

ble, & que l'absence de quelque ſuiect pour qui vous ſouſpirez, vous faſſe ſouhaiter à partir d'icy auſſi-toſt que vous venez d'y entrer. Au moins ie vous puis aſſeurer, qu'il y a ceans vne perſonne qui fait autant d'eſtime de voſtre merite, qu'autre qui ſoit au monde. Acheuant ce diſcours, elle ietta vn regard ainouteux ſur Alidor, capable de le faire mourir & reuiure à meſme temps. *Helas!* (reſpondit-il) *pleuſt à Dieu que ie fuſſe condamne à demeurer eternellement en ce lieu. Ce n'eſt pas l'abſence de quelque ſuiect qui me faiet ſouſpirer. C'eſt pluſtoſt la preſence d'un autre, que ie ſeray contrainct de perdre bien toſt, & peut eſtre ſans eſpoir de le reuoir iamais. Ce ſouuenir m'afflige, & me fait ſouffrir deſia vne mort plus cruelle, que la mort meſme.* Tenant ce propos, il tira vn ſouſpir du profond de ſon ame, qui interrompit ſon diſcours, cependant que Callirée repart en cette ſorte: *Ie voudrois auoir connoiſſance de la perſonne de qui vous apprehendez l'abſeẽce. Si elle eſtoit ſi inhumaine que de vous defendre ſa veuẽ, ie me forcerois de la diſpoſer pour voſtre contentement. O Dieu!* (ſ'eſcrie alors Alidor) *ſi voſtre parole eſt veritable, ie ſuis le plus obligẽ des mortels à l'Amour. I'ay cõſacrẽ cydeuant ma ieuneſſe au Dieu de la guerre, & poſſedẽ du deſir d'aquerir de l'honneur, ie n'ay point eſpargnẽ d'eſpandre mon ſang, & d'en arroſer les lauriers que i'y ay gaignez: mais ie veux deſormais employer le reſte de mes iours à cultiuer les myrthes, ſi vous daignez auoir pitiẽ de ma paſſion. C'eſt vous (Madame) & nom autre, qui auez deſia acquis ſur moy, ce que toutes les beautez du monde ne ſçauroient aquerir. Il faudroit que ie fuſſe ſans yeux, ou ſans iugement, ſi ie ne vous aymoies point. C'eſt vous que ie veux deſormais non ſeulement reuerer par deſus*

sus toutes les creatures; mais encores adorer comme
 l'on fait les Dieux. Il vouloit acheuer ce discours, lors
 que la venuë du mary de Callirée l'interrompt, &
 épelcha cette beauré à luy respôdre. Tout ce qu'elle
 pût faire, c'est qu'elle prit la main d'Alidor, & la ferra
 amoureusement, en tesmoignage, qu'elle receuoit les
 offres de son seruice, & qu'elle se dispoisoit à l'aymer
 d'une amour mutuelle. Cependant elle se leue, & va
 pour receuoir la compagnie qui entroit dans la salle
 avec Lycidas. Apres elle fait preparer la collation, &
 tandis qu'il s'amuse à entretenir les vns & les autres
 elle a moyen de dire à Alidor, qu'il treuve vn expe-
 dient pour passer la iournée dans ce logis, afin qu'ils
 puissent s'entretenir plus au long de leurs nouuelles
 amours. Alidor ne manque point de le mettre en exe-
 cution: il commande dès l'heure mesme à Fatyme de
 monter à cheual, & ne reuenir que sur le soir. Ce
 Gentil-homme luy obeyt. Tandis la Noblesse qui
 estoit venuë pour visiter Lycidas, prend congé de luy
 & chacun s'en retourne en sa maison. Il n'y a qu'A-
 lidor qui demeure, & qui fait le fasché de ce que son
 homme ne reuent point du lieu où il l'a enuoyé. Il
 faict semblant de vouloir s'en retourner tout seul:
 mais Lycidas ne le veut pas permettre, il le prie de
 demeurer chés luy ce soir. Pour le garder de s'énuyer,
 luy & sa femme le menent promener au jardin. Alidor
 la prend sous les bras, pendant que le mary n'y préd
 pas garde, elle reçoit apres beaucoup de protestations
 amoureuses, son seruice. Et pour arches de leur nou-
 uelle alliance, elle tire vn diamant de son doigt, & luy
 en fait present, & luy vn rubis qu'il luy donne. Hasol-
 le alliance! où pensez vous Callirée; Ne vous ressou-
 uient-il plus de la foy que vous auez iurée si solé-
 nellement

nellement à vostre mary ; Ignorez-vous que le Ciel qui en fut le témoin, n'en soit encore le iuge ; Helas ! ie parle à des personnes que l'amour a rendus sans ouye, aussi bien que sans yeux.

Après que nos amoureux se furent iurez l'un à l'autre vne eternelle fidelité, ils treuvent vne inuention pour se faire sçauoir de leurs nouuelles. C'est que Callirée doit faire croire à son mary que Fatyme est amoureux d'une de ses Damoiselles nommée Iris, en qui elle se confie entierement. Par ce moyen sa maison luy estant ouuerte sans aucun soupçon, ils auront ce contentement de receuoir les lettres qu'ils s'escriront, attendant que l'amour leur offre plus de commodité de se voir. Cette resolution prise, ils dissimulent leur passion. Callirée s'approche de son mary, & le caresse extraordinairement afin de l'endormir. Mais elle se trompe la premiere, ainsi que la suite de cette histoire nous l'apprendra. Il est bien difficile d'abuser vn homme, qui entend le cours du marché, & que l'experience a rendu habille. Le Soleil commençoit desia à decliner, lors que Fatyme arriva, & qu'Alidor veut monter à cheual pour s'en retourner. Lycidas l'arreste, & le ramene au logis, où l'on auoit desia couuert pour le souper. Alidor tire cependant Fatyme à part, & luy declarant en peu de mots sa passion, luy commande d'entretenir Iris, à qui desia Callirée a ouuert son cœur. Fatyme ne manque point de jouër son personnage. Il l'accoste apres souper, & se met à chanter vne chanson amoureuse. La douceur de sa voix, qui rauissoit les assistans, fait que Lycidas le pria de la recommencer, & ayant appris d'Alidor, qu'il jouoit fort bien du luth, il luy en fit apporter vn. L'ayant mis d'accord, il se mit à marier sa voix au son de l'instrument

ment, & à chanter vne chanson pitoyable, qu'un bel esprit de ce temps, plein de desespoir auoit nouvellement composée. Elle est assez commune par toute la France. La teneur en est telle.

Après des beaux yeux de Philis.

Mouroit l'amoureux Calliante,

Heu-eux en sa fin violente,

De ses iours si-tost accomplis.

En chantant, il leuoit tousiours les yeux sur Iris, & sçauoir si bien contrefaire le passionné, que le mary de Callirée ne pouuoit s'empescher de rire. En fin comme l'heure de se retirer fut venuë, Alidor ayant donné le bon soir à Lycidas, & son Espouse, il fut conduit en vne chambre richement parée. Auant que se coucher, il tira à part Fatyme, & luy ayant donné vne plus entiere connoissance de son amour, il le coniura de le vouloir assister, à la charge qu'il ne seroit pas ingrat à le recompenser de sa peine. Après que Fatyme luy eut promis non seulement de luy rendre seruice en cette action, mais encorës d'y exposer sa vie s'il en estoit besoin, nostre amour ux se mit au liët. Le repos qu'il y eut ne fut gueres grand, toute la nuict il ne fit que penser à son amour, & la beauté de Callirée luy reuint tousiours deuant les yeux.

O Ciel(disoit-il par fois) faut il que ie sois priué si-tost des rayons de mon beau Soleil ? Mes yeux se peuuent bien disposer aux tenebres, & mon ame à toutes sortes d'ennuys. Quel astre pourra désormais m'esclairer, quand ie seray priué de ma douce lumiere ? Et quel contentement sçaurois-ie esperer, lors que ie ne verray point la clarté de mon ame ? O amour, que d'espines accompagnent tes roses ! Que sçay-ie si durant cette absence ma belle ne changera point d'affections,

d'affection. Si cela doit arriuer, ô mort ! décoche sur moy ta fleſche cruelle, & mets dans le rôbeau ma vie avec mes amours. Puis en ſe reprenânt, il proferoit ces paroles. Ha ! mal-heureux, commences. tu à douter ſi-toſt de la fidelité de ta Maieſtreſſe ſans ſuieſt ? Que diroit-elle ſi elle ſçauoit cette deſſiâce ? N'auroit-elle pas occaſion de ſe plaindre du mauuais iugemēt que tu fais de ſon bon naturel ? Pardon Madame ie reſſemble à l'auare, qui a toujours ſon cœur au lieu où eſt ſon theſor, & qui craint inceſſamment de le perdre. Et puis voſtre merite me doit excuſer ; car , puis qu'il eſt incomparable, & que rien n'eſt digne de vous, ce n'eſt pas donc ſans iuſte raiſon ſi ie crains :

Il paſſa vne partie de la nuit à ſ'entrecenir de ces penſées , & l'autre à compoſer vn Sonnet ſur les perfections de Callirée. Je l'ay icy inferé, parce qu'il me ſemble fort bon.

STANCES.

IL n'eſt point de beauté ſemblable à Callirée,
Son front eſt vn miroir où ſe mirent les Dieux :
La liberté ſ'enſuit au deuant de ſes yeux,
Et l'amour eſt lié de ſa treſſe dorée.

Mortels, ne cherchez plus le beau Ciel Empirée,
Voicy l'heureux ſecour des eſprits glorieux :
C'eſt la beauté qui rend l'amour victorieux,
Et qui faut que ſa fleſche eſt par tout reuerée,
Qui la void ſans l'aymer, n'a point de iugement,
C'eſt vn viuant rocher priué de ſentiment :
Pour moy dont la fortune en ſes yeux eſt en cloſe.

Encores que l'Amour ſoit plein de cruauté
O Dieux ! puis ie bien voir ce Soleil de beauté,
Sans bruſler de l'amour d'une ſi belle choſe.

Tandis qu'il soupire d'un costé son amour, sa Maîtresse se plaint tout bassement de la passion qu'elle ressent. Alidor a cet avantage de pouuoir alléger aucunement son mal en soupirant, mais elle n'ose respirer qu'à grande peine, de peur que son mary n'en ayt la connoissance. Desguisant neantmoins sa douleur, elle parle à luy de la sorte. Et bien Monsieur, que dites-vous de ce Gentil-homme qui accompagne ce Cavalier, qui loge aujourd'huy ceans? N'est-il pas bien passionné d'Iris? Nous aurons au moins le plaisir de l'oüir souuent chanter, & de jouer du luth; car il ne manquera pas de visiter ces amours, pourueu que vous l'ayez agreable. Il m'a coniurée de vous en supplier. Il y sera le bien reçu (respond Lycidas) toutes les fois qu'il y viendra, pour l'amour de son maistre, qui est vn fort braue, & fort honneste Gentil-homme. Callirée bien ayse de sçauoit la volonté de son mary, passe le reste de la nuict avec inquietude d'en aduertir Alidor.

A peine l'Aurore commençoit à semer ses lys & ses roses par l'Orizon, que nostre amoureux saute du lit, & s'apreste pour prendre congé de Lycidas. Luy sçachant qu'il vouloit partir, se leue pareillement, & le va treuuer à sa chambre. Il s'excuse du mauuais traitement qu'il a reçu en sa maison, & Alidor de l'importunité qu'il luy a donnée. Lycidas ne veut pas qu'il parte sans déjeusner. Il ne s'en fait gueres prier, afin d'auoir moyen de voir callirée, qui par sa damoiselle aduertit fatime du plaisir que son mary receura si par fois il les vient visiter. Fatyme apprend cette bonne nouuelle à son maistre, qui en reçoit vn plaisir extreme. L'heure de partir estant arriuée, il prend cōgé de Lycidas, & aussi de sa femme, & monte à cheval.

ual. Mais l'amour qui a desja pris possession de ces Amans, faict vne chose impossible en nature. Il fust qu'Alidor se priue de son cœur, & Callirée du sien pour leur en faire vn change mutuel. Quand il fut arriué en sa maison, son humeur aupatauant libre & joyeuse, commence à deuenir morne & triste; & la chasse qu'il auoit cy-deuant tant aymé, luy desplaist. Il fuit toute compagnie, & tout son contentement est de s'écarter tout seul dans vn bois, ou dans quelque antre, & là conter aux rochers & aux arbres les beautez de sa Maistresse, & la violence de sa passion. Il passa quelques iours en ces solitudes, où il composa famille beaux vers, que i'inscrerois icy, s'ils n'estoient imprimez autre part. En fin se ressouenant de l'inuention que sa Maistresse auoit trouuée, pour s'écrire l'un l'autre, il escriuit cette lettre.

IE voudrois (mon beau Soleil) que vostre lumiere penetraست les nuicts sombres où ie suis reduit. Vous verriez toutes les passions que l'Amour peut faire ressentir à un mortel, qui n'attend la deliurance des peines qu'une cruelle absence luy donne que du bien de vostre chere presence. La Deité que ie reuere m'en donnera le contentement, lors que lassée de mon tourment, j'auray le bon-heur de vous reuoir. Attendant cette felicité, ie vous coniuire de me tesmoigner par vos lettres le ressouenir que vous auez de celuy de qui les desirées dependent de vos beaux yeux. Il bailla cette lettre à Fatyme, & le pria de la rendre secrettement à sa Maistresse, sous coul-ur de reuoir Iris. Ce gentilhomme part, & arriue le lendemain matin au chasteau de Lycidas. Le Ciel doux & serain l'inuitoit ce iour là d'aller à la chasse. Comme il sortoit de la porte de son logis, il rencontra Fatime qui vouloit y entrer. Il salue Lycidas, cōtefait le hō-

teux. Entrez seulement dedās (luy dit le mary) ie ſçay de vos affaires plus que vous ne penſez pas. Vous y trouuerez vos amours. Fatyme apres vne grāde reuerence entre, & treuue Iris, qui ayant deſia appris ſa venuë, venoit pour le receuoir. Apres qu'il luy eut ſecrettement fait entendre le ſubjet de ſa venuë, elle en aduertit Callirée, qui toute transportée de ioye ſaute du liēt, elle n'a pas la patience de s'habiller. Le deſir d'apprédre des nouuelles d'Alidor, faiēt qu'elle cōmande à Iris de luy amener ce meſſager d'Amour. Quand il fut entré dans ſa chambre, il fit vne grande reuerence, & s'approchant d'elle, luy dit cōme il luy apportoit des lettres du plus accōply Cavalier de la terre. Mon amy (dit elle) auant que nous les voyons, ie vous veux recompenser de tant de peine. Ce diſāt, elle s'en va vers vn Cabinet d'Alegmagne, qu'elle ouure, & en tire cent piſtoles qu'elle luy donne. Ce ne ſōt point des cōtes faits à plaiſir. Il recite la pure verité de cette Histoire. Fatyme eſt encores en vie pour témoigner que ce que ie dis eſt veritable, il fait à preſēt ſa demeure près la première des Citez de l'Europe Il remercie cette Dame de ſon preſent, qu'il prit fort bien ſans en faire refus, & en recompense luy rendit les lettres d'Alidor. Elle les prend, & les baiſe mille fois auant que les ouurir. Apres qu'elle les eut ouuer-tes, & qu'elle eut leu ce qu'elles contenoient, elle commanda à Iris d'aller faire deſieuner Fatyme. Tandis elle ſe retire toute ſeule dans ſon cabinet, pour faire reſponſe à ſon amoureux en cette ſorte.

MA chere ame ſ'il eſtoit auſſi bien en ma puissance de vous tirer des peines d'ont vous vous plaignez, que i'en ay la volōté, croyez que vous en receuriez bien- toſt la deliurance. Je vous prie de conſiderer que le moi-
dre



dre soupçon qui pourroit naistre en l'ame de mon mary, qui est assez ombrageux de luy meisme : seroit capable de nous ruyner. Consoléz-vous de l'esperoir que la Deité que s'adore aussi bien que vous, me donne, que nous aurons bientost le plaisir de vous reuoir, avec plus de commodité que nous n'auons encore vüe. Cependant enuoyez moy souvent vostre homme, afin que si elle s'offre, ie puisse vous en aduertir. Adieu ma tres-chere ame, conserue tousiours la memoire de celle qui ne vit que de la creance qu'elle a que tu l'aymes.

Cette lettre fermée, elle fit venir Fatyme à qui elle la bailla, & puis le chargea de joyer son personnage contrefaisât l'amoureux d'Iris. C'estoit vn plaisir que de le voir en cette action. On eust dit qu'il mouroit d'amour. Lycidas estant reuenu de la chasse, le fit dîner avec luy & le gaussa tout le long du repas. Apres dîner il luy fit prendre vn luth, dont il joua fort melodieusement au grand plaisir du mary qui le prioit de le voir souvent. Sur le soir il prend congé, & s'en retourne vers la demeure d'Alidor, qui l'attédoit d'une impatiéce d'amoureux. Si-tost qu'il le veid reuenir il courut pour l'ébrasser, & pour luy demander des nouuelles de ses amours. Tenez (luy dict Fatyme) ces lettres vous apprendront ce que vous desirez de sçauoir. Il les prend, il les baise, & les ayant ouuertes, il les lit. Quand il les eut leuës, il s'enquiert plus particulièrement de l'estat de sa Maistresse. Fatyme luy raconte tout le succez de son voyage. Si ie voulois icy descrire toutes les particularitez de leurs amours, il faudroit que ie fisse vn liure entier, & non vn simple discours. En fin Fatyme va presque tous les iours au logis de Lycidas, comme s'il y alloit pour voir Iris. Mais il ne peut jouer si secrettement son personnage

que le mary qui auoit de l'esprit & du iugemēt n'ētre en quelque défiance. Il commence à remarquer sans mot dire, les actions de sa femme, & la voyant moins ioyeuse que de coustume, il se doute qu'on n'attēte quelque chose sur son honneur. Or qu'il est impossible de receler le feu d'amour à vn mari défiāt. C'est vn Argus, qui penetre au trauers des plus secretes pensées Lycidas, apres beaucoup de soin & de peine, treuve vne lettre qu'Alidor escriuoit à Caliré. Ce fut à l'heure, que deux contraires passions commencent à posseder son ame. Le iuste ressentiment qu'il auoit le pousse d'vn costé à vne cruelle vengeance, il veut expier le tort qu'on luy fait par le sāt de sa femme, & par celuy d'Alidor: mais l'amour que iusqu'à present il a portée à l'vne, & le dāger qu'il se represente deuant les yeux de faire mourir vn Gentil-homme qualifié, retiennent d'autre part quelque peu ce courage nourry dans les sanglans exercices de Mars. Apres auoir beaucoup ruminé en son esprit comme il deuoit proceder en cette action, il treuve que le meilleur expedient est de s'en retourner en Flandres, & par ce moyen empescher le cour de ces nouuelles amours, en priuant pour iamais Alidor de reuoir Callirée. Cette resolution est bien-tost suiue de l'effect. Il part vn iour sans prendre congé de ses amis, & emmene sa femme qui est route estonnée de ce changement, & qui neantmoins n'ose rien dire. Quand Alidor eut appris ce depart si soudain, il s'abandonna aux regrets, & aux larmes. Il inuoca mille fois la mort, que le desespoir luy eust bien souuent fait treuuer, si Fatyme ne luy eust promis de faire des voyāges en Flādres pour y porter de ses nouuelle à sa Maistresse. Tandis qu'il passe les iours & les nuits

à plaindre & à soufpirer, Lycidas, qui estoit defia arriué à Anuers, est mandé par le Duc d'Albe, de le venir treuuer à Bruxelles. Auant que partir il laissa sa fême sous la garde d'une sienne parête, à qui il auoit defia déclaré ce qui luy étoit arriué en picardie. Estât à Bruxelles, bien-venu aupres de son Excellence, vne entreprise se fait fut vne place forte que ceux du party contraire auient en leur puissance : Lycidas y est blessé d'une arquebuse au trauers du corps, & renporté à Bruxelles demy mort. Les Medecins & les Chirurgiens desesperent de sa guerison. Sa femme en ayant appris la nouuelle, y court pour faire bonne mine. Elle verse vn torrent de larmes sur sa couche, mais ce sont larmes de Crocodile. Elle ignoroit que son mary sceust l'estat de ses amours, car il remit la lettre au mesme lieu où il l'auoit treuuee. Il fut neantmoins si bien secouru, qu'il comença à se porter aucunemēt mieux. Ce fut toutesfois sous cette condition, que les Medecins ne luy donnerent que six mois de vie, parce que la blesseure qu'il auoit receuë luy offensoit les poulmōs. Il se leua doncques du lit deux mois apres, mais ce fut en traināt, & languissant apres la fin de ses iours. Comme les choses passēt de la sorte, Callirée en aduertit secreteement Alidor par vne lettre qu'elle enuoye. Cēt amoureux qui auoit perdu tout espoir de reuoir les beaux yeux de sa maistresse, commence dès l'heure mesme à bastir de nouueaux desseins. Il croit que l'Amour lassé de le tourmenter, le recompensera bien tost de tant de trauerses, par le moyen qu'il luy ouure d'épouser Callirée. Il communique la lettre à Faryme, & apres le prie de faire vn voyage en Flandres, sous couleur de visiter Lycidas de sa part, & luy tesmoigner la douleur qu'il

a reçeu de son defastre, Fatyme part, & arrive à Bruxelles, il va droit au logis de Lycidas, & luy rend vne lettre d'Alidor. Ce fut la ruine de ces amoureux, & sans doute si Alidor eust patienté ce mary qui n'estoit desia que trop possédé de jalousie, n'eust point vsé de la cruauté qu'il pratiqua. Doncques (disoit-il en luy-mesme) ie souffriray l'iniure qu'on me fait? Sera-il dict que certe infame que j'auois si cheremēt aymée, se rie apres ma mort de ma sorise, & de mon peu de courage? Non, non, ie veux apprendre à la posterité que c'est que d'offencer vn mary qui a du ressentiment. Pleust a Dieu que celuy qui attente sur mon honneur, sans que ie luy en aye donné suiet, peust si bien estre payé de sa trahison, cōme i'espere me venger de cette louue: mon ame sortiroit plus contente hors de ce corps, & auant que mourir, j'aurois ce contentement de voir au tombeau ceux qui establisent desia leur ioye sur l'esperoir du peu de vie qui me reste. Il tenoit de tels & de semblables discours en luy-mesme, pendant qu'en apparence il faisoit mille caresses à Fatyme: il remercia mille fois son maistre du ressouvenir qu'il auoit d'un homme qui auoit si peu merité de luy, & le pria d'attendre quelques iours, pendant lesquels il feroit reponse à Alidor.

Fatyme accorda sa priere, & seiourna là quelque temps, mais comme quelques iours apres il est prest à partir, il survint vn grand accident; car voila qu'un excez de fievre saisit Callirée avec tant de violence, qu'elle fut emportée en moins de 24. heures, sō mary la voyant aux peines de la mort, lamente, crie, & arrache ses cheveux. Il sçait si bien feindre le contentement qu'il a de la voir mourir, par la feinte douleur qu'il estalle, qu'on diroit que c'est l'image de l'ennuy mesme.

mesme. En fin la Parque qui rait toutes choses, ferme les yeux & la bouche de cette beauté, que les roses & les lys accompagnent dans le tombeau. Cette mort si precipitée estonna merueilleusement Fatyme: il vouloit s'en retourner promptement lors que Lycidas le coniura de demeurer encor quelques iours chez luy, durant lesquels il escriuit vne lettre à Alidor, par laquelle il le coniuroit de vouloir prendre la peine de le venir voir en Flandre, afin que sa veuë luy apportast quelque soulagement au mal qu'il ressentoit de la perte incomparable qu'il venoit de faire. Fatyme part avec cette lettre, bien fâché d'estre le porteur d'une si mauuaise nouuelle. Lors qu'il fut de retour à la maison d'Alidor, il tira ce mal-heureux à part, & luy donna la lettre que Lycidas luy escriuoit. Il n'y a pas plustost apprise ce qu'il ne cherchoit pas, qu'il tombe à terre palmé de douleur. Lors qu'il reprend ses esprits il veut ouurir son sein d'une dague si Fatyme ne le contenoit par ces paroles: Et quoy (Monsieur) où est vostre courage acoustumé; Qu'est deuenue la constance qui vous accompagnoit ordinairement aux perils où vous vous estes treuvé si souvent; Voulez vous perdre avec vostre ame l'honneur que vous avez iusques icy conserué, & par mesme moyen ruiner la reputation de vostre Maistresse, que vous deuez cherir apres la mort; Si vous exercez vne telle cruauté sur vous-mesme ne donnerez-vous pas occasion à Lycidas de croire ce que sans doute il soupçonne: il me semble que vous deuez plustost vous vaincre vous mesme, pour maintenir vostre reputation, & celle de vostre maistresse, & en vous contraindre aller voir Lycidas: mais toutesfois bien accompagné & puis attendre que le temps, ou qu'un

nouveau subject soit le remede de vostre passion.

Ha! Fatyme (respond Alidor) il m'est impossible de viure plus long temps; puis que i'ay perdu le Soleil de mon ame. Toutefois ie ne veux point mourir que ie n'aye auparavant arrousé de mes larmes son tombeau, afin de protester à ses Manes que ie ne tarderay gueres à le suiure. Acheuant son discours, il dissimule sa passion & fait preparer son equipage, & part le lendemain. Quand il est arriué à Bruxelles, il va chez Lycidas, qui le voyant se iette à bras ouuerts sur luy, & puis profere ces pitoyables paroles: *Helas ! Monsieur, ie suis deliuré d'esperance & de crainte. Je n'ay plus d'espoir au monde, puis que i'ay perdu la douce consolation de ma vie, & ie ne crains d'y perdre rien plus, puis que i'y ay tout perdu. Il ne me reste que le plaisir que ie reçois, scachant que ie mourray bien-tost, sans cette consideration i'aurois auancé desia la fin de mes iours.* Alidor qui auoit bien plus de besoin d'estre consolé, & qui ressentoit vne douleur, pensa mourir à l'heure mêmes: toutes-fois dissimulant son mal, il luy dit seulement que si son courage genereux s'estoit fait paroistre en tant d'occasions, il le deuoit maintenant témoigner en cette perte, où il acquerroit plus de gloire qu'en toute autre, puis qu'elle estoit la plus grande qu'un mortel scauroit recevoir. Apres quelques discours tenus d'une part & d'autre, Alidor prit congé de Lycidas, sans vouloir aucunement s'arrester chez luy, s'excusant sur quelques affaires qui le pressoient. Avant que partir, il va à l'Eglise où sa Maistresse estoit enterrée. Il respandit mille larmes, & y profera mille paroles que sa passion luy dictoit, & puis monta à cheual, & s'en retourna avec ses gens en sa maison, ne cessant de pleurer & de sospirer. Quand il est chez luy,

luy, il se retire dans vn sien cabinet escarté, & alors la violence de sa douleur qu'il auoit iusques icy retenüe, cōmence à luy faire proferer mille iniures contre le ciel. Il maudit les destins, mais plus encores la cruauté de Lycidas, qu'il croit auoir empoisonné sa maitresse: *Ha cruelle fortune!* (disoit il) *que te reste il de-fermais pour me nuire, Si tu me voulois pour suyre avec tant de rigueur, que ne prenois-tu ma vie lors que ie l'exposois librement aux perils & aux dangers? Las! pour me tourmenter dauantage tu m'as osté celle qui m'estoit plus chere que la vie même & par ce malheur amené toutes les autres que tu me reseruois. O ma douce lumiere! vous estes au Ciel bien heureuse, & ie demeure parmy les ennuyes & les desespoirs. Helas! ie vous pleure, non pas pour la felicité dont vous iouissez, mais pour le regret que i'ay de ne vous auoir pas suivie, & de ne vous accompagner en vos aises. Proferant ce discours, il vouloit remply de desespoir, se dōner d'vne épée au trauers du corps, quād Fatyme, qui l'auoit suiuy, entre dans son cabinet, & luy remonstre les actes qu'il faisoit, indignes d'vn Chrestien, de murmurer ainsi contre Dieu: que nous naissons pour mourir, & que tous ces pleurs ny ces plaintes ne r'animeront pas sa Maistresse. Que s'il se donne luy-mesme la mort, il est en danger de ne la reuoir iamais, puis que les Enfers sont destinez aux desesperéz, & qu'il n'y a point de doute, qu'estant morte en bon estat, elle ne soit maintenant au Ciel jodysât des lieesses eternelles. Ces raisons eurent tāt de pouuoir enuers Alidor, que dés l'heure mesme il prit vne autre resolution: Et bien (dit il) ie veux doncques viure, mais à telle cōdition, que vous m'assisterez en vn voyage que ie feray. Fatyme le luy promet, & luy se resoult au desespoir que ie vay vous reciter.*

Au temps qu'il perdit sa Maistre , la France estoit desia diuisée en deux partis. Le peuple de Paris oubliant la fidelité qu'il deuoit à son Prince, venoit de rédre notable en infamie ce iour des barricades si funeste en nos Histoires. On ne parloit que de sang, & que de carnage par toutes nos Prouinces. Alidor qui pour plusieurs raisons que ie rais maintenant, estoit obligé à vn Prince de la maison de Lorraine, prend suitte de parler à sa mere, & de luy remôstrer l'orage apparent qui se leuoit en France : que leur maison estât alliée de ce Prince, il estoit obligé d'vn costé à suiure sa fortune; & que d'autre part le deuoit naturel qu'il deuoit à son Roy le poussoit de se bander contre ses propres amis & bien-faiteurs. Que pour ce suiet il auoit resolu d'aller faire vn voyage en Italie, & de passer la le temps aux exercices vertueux, attendant que la saison fut plus calme : que par ce moyen il se rendroit indifferent, & n'acqueroit point l'inimitié ny des vns ny des autres. Cette bonne Dame, qui n'auoit que ce Fils, & qui l'aymoit à l'esgal d'elle-mesme, trouua au commencement fort aigre de l'éloigner de ses yeux: mais ayant bien pesé ses raisons & considéré qu'il se pouuoit perdre en quelque bataille, ou en quelque rencontre, elle luy fait donner l'argent qu'il voulut. Comme son equipage se preparoit, il fit appeller vn peintre, & sur vn pourtrait qu'il auoit de sa Maistresse, il en fait titer 2. autres en petit volume, l'vn mort, & l'autre viuant. Quand le peintre eut acheué son ouurage, Alidor les mit dās son sein, & apres il prēds seulement avec luy Fatyme & Anielme son valer de Chambre, & en cete compagnie il part, & commande à ses gens de ne le saluer deormais qu'au nom de sa maistresse, de ne boire à luy

luy qu'au nom de sa Maistresse : bref de ne parler jamais à luy, que de sa Maistresse, il arrive à Marseille : & treuvant vn Navire d'Espagne, qui estoit prest de faire voile pour Alxeandrie il fit marché avec le Patrô & se mit dedans. Les Mariniers pensoient faire bon voyage, quand vne galiotte de Turcs les attaqua, & apres leur auoir osté ce qu'ils porroient, les mena pour esclaves à Arger. Alidor qui ressentoit son bié, & qui nonobstant son extreme douleur, faisoit paroistre ie ne sçay quoy de releué par dessus tous les autres, il fut mené au Roy. Ce Prince le voyant si beau, si ieune, & de belle taille, le retiét à son seruice en qualité d'esclau, se seruant de luy à sa chābre. Ce Gentil homme faisoit de si bonne grace les actions, qu'on eust dit qu'il auoit fait ce mestier toute sa vie. Aussi se fust-il rendu le plus accomply Cavalier de son temps, s'il eust pû dompter sa folle passion. Ayāt aquis la faueur du Roy d'Arger, il eut moyé de retirer près de luy Fatyme, & Anselme son valet de chābre. Quand il eut demeuré six mois en cette seruitude, le Roy d'Arger, qui le voyant tousiours triste croyoit qu'on luy eust faict quelque desplaisir, le tira vn iour à part, & luy tint ce langage: Vien-ça (Chrestien) que veut dire que ie ne te vois iamais joyeux; Est-ce pour autant que tu n'as point la liberté de retourner en ta patrie; Il me semble que ta condition n'est pas si mauuaise que tu pourrois estimer, puis que tu as acquis les bonnes graces d'un Prince, qui non seulement te mettra quand tu voudras en liberté, mais encores te partira de ses biés, pourueu que tu vueilles demeurer à sa Cour. Tenant ce discours, il iettoit ses regards sur Alidor, qui versoit de ses yeux vne fontaine de larmes. Qu'as-tu (poursuit le Roy;) As-tu re-

ceu

ce u despaistr de quelqu'un des miens; Dy-moy, & ie te iure Mahomet, que i'en feray la vengeance. Nô Sire (respond Alidor) ie ne vous ay que trop d'obligation, ie ne me plains aussi d'aucun des vostres, ie regrette seulement la perte que i'ay faite il n'y a pas long-temps. Ie suis insensible à tous les bonheurs, & à tous les mal-heurs, & ie n'ay du ressentiment que pour cette perte seule. Comme il acheuoit ces paroles, il tira du profond de son cœur vn soupir qui émeut à compassion ce Prince. Ie veux (dit-il) que tu te découures entierement à moy, afin que si ie puis, ie donne quelque allegement à ta douleur. Dy-moy donc qui tu es, & le subijet de ton auanture. Puis que vous me pressez de la sorte (SIRE) ie ne veux pas estre (repart Alidor) si mal apris de ne la declarer à vostre Maiesté. Ie suis vn Cavalier François, qui estois sorty de mon pays, en intention d'aller confiner mes iours aux deserts d'Egypte pour y pleurer mon desastre. Et pourquoy (demande le Roy;) N'y a-il pas moyen de donner remede à ton mal? Non, Sire (dit Alidor,) qui achenant ce langage, mit la main dans son sein, & en tira les deux portraits qu'il auoit toujours gardez iusques à l'heure, sans les en retirer horsmis que tous les matins & tous les soirs il les prenoit, les baisoit, & les adoroit, & parloit à eux comme s'il eut parlé à sa Maistresse. Sire (poursuit cet amoureux infortuné) *J'adore ce vif & pleure ce mort.* Ce disant, il luy monstre les deux tableaux. Le Roy d'Arger, voyant ce mystere, aprit aussitost qu'un desespoir d'amour le possedoit, dont il en eut encores plus de compassion, de sorte qu'il ne se peut tenir de larmoyer. Vrayement (dit-il) c'estoit vne belle creature que ta Maistresse: toutes-fois il me semble
que

que puisque tes plaintes & tes pleurs ne la peuuent plus r'amener, tu deurois enfin donner quelque relasche à ton affliction, & te consoler par raison. Le conseil en est pris, Sire (respond ce Cavalier) fass la fortune ce qu'elle voudra desormais faire de moy, iamais ie ne changeray d'humeur. Puis que tu es si obstiné en tō malheur (dit le Roy) ie ne te veux point contraindre. Dy-moy seulement ce que tu veux que ie fasse pour roy: si tu veux demeurer avec moy, ie te feray vn des premiers de mon Estat, & parauanture le temps sera le medecin de ton infortune. Ie vous rends graces Sire (repart Alidor) de tant de faueurs que vous m'offrez, sans que ie l'aye merité. Ie vous assure que sans la resolution que i'ay faite de ne seruir, & de n'adorer iamais autre que ma Maistresse, il n'y a Prince au monde pour qui i'exposasse si librement ma vie, que pour le seruice de vostre Majesté. Tout ce que ie requiers d'elle, est seulement de me donner la liberté, afin que ie puisse accomplir mon entreprise, puis qu'il n'y a que la seule mort qui m'en puisse oster la volonté. Ie te la donne dès à present (dit le Roy) & si ie te feray encores fournir de l'argent pour subuenir à tes necessitez. Alidor continua de le remercier, & luy dit qu'il n'en auoit pas autrement besoin, car il auoit encores vn diamant de mille escus, qu'il auoit caché sur luy lors qu'on le fit esclau. Ayant recouuert la liberté en cetterorte, & pour luy & pour ses gens, alors il prit congé du Roy, & se mit dans vn Nauire, & arriua en peu de temps en Alexandrie, ou il vendit son diamant. Apres il s'habille en pelerin, & avec Faryme & Anselme habillez de mesme, il se met en chemin, & fait tant qu'il paruient aux deserts de Thebaide, il n'est pas besoin que ie décriue cette solitude. Les Histoires

des anciens Peres Hermites la depeignent assez. Se diray seulement qu'apres auoir fait eslection d'un haut rocher, proche de certains hermitages des Chrestiens qui s'y tiennent, il y fit bastir vne maisonnette en forme de Chapelle. Là il fit aussi dresser vn Autel, où il mit vn Crucifix au milieu, & à costé les deux portraits de sa Maistresse. Durant qu'on bastissoit cette Chapelle, Fatyme le tira à part, & luy remonstra le rang qu'il tenoit en France; le besoin que sa patrie pouuoit auoir de sa valeur, & la reputation qu'il auoit acquise auparauant: qu'il la flestrissoit & estouffoit maintenant, en se confinant ainsi dans vn desert; qu'il feroit la fable & la risée du monde, & que l'on diroit que la peur de combattre l'auoit reduict en ces extremes. Il luy mit en auant plusieurs autres semblables raisons pour le destourner de celle folle resolution & voyant qu'il y estoit obstiné, & qu'il estoit impossible de luy arracher cette fantasie: pour moy (dit-il en fin) ie ne suis ny fol, ny amoureux, vous estes l'un & l'autre. I'en'ay point enuie de passer mes iours inutilement parmi des bestes sauvages. Ie suis contraint de vous dire adieu, puis que vostre folie est incurable; & de m'en retourner en France sans vous. Ie vous ay accompagnée iusques au lieu où vous desiriez de paruenir; puis que vous y estes arriué, ie ne suis point obligé de faire dauantage. Cōment (dit Alidor) me voulez-vous dōcques abandonner si-tost? Au moins attendez encores vn petit de temps, ma vie ne sera plus gueres longue. Apres ma mort vous vous en retournerrez, & en porterez les nouuelles à mes parens. Ie n'en seray iamais (repond Fatyme) le triste messenger, Dieu vous vueille remettre en vostre bon sens, Adieu. Ce disant, il part dès l'heure mesme, & s'en re-

uient

uient en France, pendant que ce mal-heureux Gaudier demeure avec son valet de chambre, qui ne l'abandonne jamais.

Lors que la Chapelle fut acheuée, & qu'en prophanant les ceremonies de l'Eglise, il eut appendu les deux pourtraicts de Callirée, il estoit à genoux, toute heure deuant cét Autel. Tantost il s'adressoit au viuant, & parloit à luy en cette sorte: *Ha pourtraict qui me representés mes lieffes passées, si les images des Saints se peuent adorer sans idolatrie, puisque l'honneur qu'on leur rend se rapporte tout à Dieu, ne peux ie pas t'adorer? Tu es l'image d'une Déesse, de qui dependoit tout mon bien, & tous mon bon-heur. Veuille permettre le Ciel, que bien-tost ie la puisse reuoir, & que mon ame qui ne vit qu'à regret dans ce miserable corps, puisse voler au sejour bien-heureux, qui retient la plus belle chose que la Nature ait iamais produicte. Apres il contemploit le mort, & proferoit ces paroles: *Ha! seul repos de mes desirs, combien me seroit la mort plus douce, & plus agreable, que de voir un si tragique spectacle! O Parque inique, & detestable! pourquoy lors que tu raus le doux espoir de ma vie, ne me mis tu pareillement au tombeau? Ignorois-tu que nous n'auions qu'un mesme destin, & qu'il estoit impossible à l'un de demeurer au port tandis que l'autre faisoit naufrage? O loup cruel & rauissant! quelle furie, & quelle rage t'a poussé à commettre une si grande cruauté, que de faire mourir une si belle chose? Ces beaux yeux les miroirs de l'Amour, & cette bouche le sejour des graces & des beautés ne t'ont-ils pas peu fischir à quelque compassion; O Dieux! auancez bien tost la fin de mes tristes iours, afin que ie tienne compagnie à celle, sans qui ie ne puis longuement estre. O ma chere Déesse, en recompense de nostre amour que la Parque ne peut esteindre, ie ne**

vous puis offrir que des larmes, & que des gémissemens, que ie continueray à respendre sur cet Autel iusqu'à tant que mon ame dolente & affligée, abandonne la miserable prison de son corps. Tels & semblables discours tenoit ce mal-heureux à des choses inanimées, cependant que son valet de chambre qui auoit soin de luy en tout ce qui luy estoit necessaire pour l'aliment de sa miserable vie, l'aduertir que son argent estoit court, & qu'il en deuoit pouruoir auant qu'il en manquast du tout. Il croyoit que la necessité le diuertiroit de la poursuite de sa folie, mais il fut trompé : car au lieu que cet amoureux desesperé songeast à s'en retourner en France, il coniuira tant son homme, qu'il luy persuada d'y faire vn voyage, pour y aller querir de l'argent. Cependant qu'Alidor continuë cette vie solitaire & lamentable, Anselme part des deserts inhabitez, & treuuant vn Navire en Alexandrie, qui vouloit partir pour Genes, il se mer dedans, & arriue en peu de temps au port de cette superbe ville. Il passe puis apres les Alpes du costé du mont Cenis plus aysément encorés qu'ils soient tous puez de neige, qu'il ne fait par les villes, & les Prouinces de France. Le glaive y exerceoit alors sa cruauté par tout, le pere n'y espargnoit pas le sang de son propre fils, ny le fils celuy de son propre pere. Le zele inconsideré de Religion animoit les plus chers amis les vns contre les autres. Neanmoins il paruint à la fin en Picardie, & treuua la mere d'Alidor au lieu de sa demeure. Cette honneste Dame y passoit les iours en regrets pour l'absence de son fils, dont elle auoit appris les tristes nouvelles par Faryme. Apres qu'Anselme luy eut rapporté ce dont son fils la requeroit, & que luy-mesme luy eut fait entendre la necessité où il se trouuoit reduict,

duist, elle commença à pleurer amèrement, & dit à cét homme, qu'elle estoit resoluë de ne luy enuoyer point la somme qu'il demandoit : mais seulement quinze cens escus pour le mettre en equipage, & pour s'en retourner. Qu'à ces fins elle le prioit de le coniurer par tous les deuoirs qu'on doit à vne mere, de reuenir le plustost qu'il luy seroit possible, & de tirer tant de bons amis, qui le regrettoient tous les iours, de l'ennuy qu'ils receuoient, pour estre priuez de sa personne, & pour sçauoir la déplorable vie qu'il menoit. Anselme ayant reçu cét argent, & promis à cette Dame faire tout son possible, pour disposer son Maistre à reuenir; fit tant qu'il sortit de France, & s'estant mis sur la mer, il aborda en Alexandrie. De là il s'achemina au desert, où Alidor faisoit sa triste demeure. Il croyoit treuuer son maistre en l'estat où il l'auoit laissé : mais il fut deceu en sa croyance. La rigueur qu'il auoit exercée sur son corps, le peu de repos qu'il auoit pris depuis la mort de sa Maistresse: en fin la melancholie & le tourment l'auoient tellement miné, que ne pouuant plus resister à tant de souffrances, il venoit de rendre l'esprit. Quelques bons Hermites qui tous les iours le visitoient, émeus de pitié & compassion, auoient allumé desia des cierges, & chantans sur luy l'Office des Trespassez, s'apprestoient de le porter en terre.

Le pauvre Anselme voyant ce piteux spectacle, tomba de son haut tout éuanouy. Apres qu'il fut reuenu à luy il se mit à profeter les plus pitoyables regrets, que la douleur enseigne en son escole. Helas ! (lisoit-il) mon bon maistre, faut il que ie sois si malheureux de vos perdre, lors que ie croyois vous treuuer au lieu où ie me separay de vous ? le vous y treu-

te, mais sans mouuement, & couché dans vne biere.
O Amour que tu causes de mal-heurs au monde! Tu
mets dans le tombeau toute la valeur, & toute la
courtoisie du monde. Desolé que ie suis, que feray-je
donc desormais, que deuiendray ie, puis que l'ay per-
du celuy, de qui dependoit mon espoir & ma fortu-
ne, le l'ay accompagné en son tourment, il faut que
ie le suyue encores en la mort. Ce disant il estoit en
volonté de se trauerfer le corps d'un coup d'épée, n'eût
esté qu'il se representa deuant les yeux, que s'il se
auoit, l'on ne scauroit iamais la verité de la fin pi-
toyable de son maistre: au contraire l'on croiroit que
pour auoir son argent, il luy auroit couppé la gorge,
& par ce moyen la memoire seroit en horreur & en
execution à tous ceux de son pays. Cette seule con-
sideration eut tant de pouuoir, qu'elle l'empescha
de se donner la mort: de sorte qu'apres luy auoir
faict dresser vne tombe honorable, & rendu les der-
niers deuoirs que l'on doit au Trespassez, il s'en re-
tourna en France avec l'argent qu'il y auoit receu.
Quand il y fut de retour, il fit recit à la mere d'Ali-
dor de la triste fin de son fils, & restitua les quinze
cens escus. Grande fidelité, & bien rare au siecle où
nous sommes. Cette dolente Dame ne suruesquit
pas long-temps vn si cher enfant. La douleur qu'elle
en ressentit luy donna dans peu de iours la mort.
Dieu iuste Iuge des viuants & des morts, vueille
traicter en l'autre vie l'ame d'Alidor, plus douce-
ment que l'Amour lascif & desordonné n'a pas faict
son corps & son esprit durant le temps qu'il viuoit
en ce monde.



DES AMOURS INCESTUEUSES

*d'un frere & d'une sœur, & de leur fin
mal-heureuse, & tragique.*

HISTOIRE V.

L ne faut plus aller en Affrique pour y voit quelque nouveau monstre. Nostre Europe n'en produict que trop auionrd'huy. Je ne serois pas estonné des scandales qui arriuent tous les iours, si ie viuois parmy des infidelles. Mais voir que les Chrestiens sont entachez des vices si execrables, que ceux qui n'ont pas la cognoissance de l'Euangile n'oseroient commettre, ie suis contrainct de confesser que nostre siecle, est l'esgout de toutes les vilainies des autres, ainsi que les Histoires suyuentes en rendent tesmoignage, & particulièrement ceste cy que ie commence à vous reciter.

En vne des meilleures Prouince de France, appelée anciennement Neustrie, estoit vn Gentil-homme de bonne maison, qui se maria avec vne honneste Damoiselle fille d'un autre Gentil-homme sien voisin. Ils eurent plusieurs beaux enfans, & entre autres vne fille que nous appellerons Doralice, & vn fils plus ieune qu'elle de quelques 18. mois, que nous nommerons Lyzaran. Cette fille & ce fils estoient si beaux qu'on eust dit que la Nature auoit pris plaisir à les former, pour faire voir vn de ses miracles. Ils se ressembloient si parfaictement que iamais la Bradamente de l'Arioste ne fut si semblable à son frere Richardet. Le pere fut soigneux de les faire instruire en

leur aage en toutes sortes d'exercices vertueux, comme à jouer de l'espinette, à danser, à lire, à escrire, & à peindre. Ils y profitoient si bien, qu'ils surmontoient le desir de ceux qui auoient la charge de les enseigner. Au reste ces deux ieunes enfans nourris tousiours ensemble, s'aymoient d'une telle amour, que l'un ne pouuoit viure sans l'autre. Ils n'estoient iamais contents, que quand ils se voyoient, & mesprisoient de courir, & de passer le temps avec les autres enfans de leur aage. En ce temps d'innocence tout leur étoit permis. Ils couchoient ordinairement ensemble, & parauanture ce fut trop long-temps. Les peres & les meres deutoient prendre garde à cecy, pour se rendre sages par cét exemple. Ce siecle, comme i'ay desia dit, n'est que trop corrompu. Les enfans qu'on vient d'arracher à la mammelle, y scauent plus de malice, que les enfans de douze ans n'y auoient iadis de simplicité. Je croy fermemēt que le mal proceda de cette trop lōgue accointance qui continuoit de iour à autre, & iusques à ce que Doralice ayant desia atteint l'aage de 10. à 11. ans, & Lyzaran estant entre 9. & 10. il fut enuoyé en vn College pour y estudier. Cette separation leur fut si griefue, qu'ils en verserent tous deux mille larmes. Ce n'estoient que sanglots, & que souspirs interrompus d'une part & d'autre, que le pere & la mere attribuoient seulement à l'amitié fraternele. Mais l'amour impudique & detestable y estoit desia sans doute meslée. L'apparence y est grande, ainsi que nous verrons par la suite de cette Histoire. Lyzaran ayant esté mené au College, en vne des meilleures villes de la Prouince, se rendit en peu de temps si capable, qu'il deuanca tous ses compagnons. Quand il eut demeuré aux estudes l'é-

pace

pace de 4. ans, sô pere eut desir de le reuoir. Il le r'appelle doncques fort ayse, quand il le veid si scauâr, & desia grand. Mais ce ne fut rien au prix du contentement que sa sœur en receut. Elle ne cessoit de l'embrasser & de le baisser, toutes-fois ils n'auoient pas les priuantez qui leur estoient octroyées en leur enfance. Et puis la honte les retenoit tous deux, & le peché detestable qu'ils se representoient deuant les yeux. Toutes fois ny l'un ny l'autre ne pouuoient si bien refrenner leur maudite passion, qu'elle n'échappast par fois au frein de la raison. Cependant le pere fit retourner au College Lyxaran, pour y acheuer ses estudes, pendant qu'il faisoit dessein de luy faire auoir vne Abbaye. Il auoit plusieurs autres fils, & estoit bien ayse d'accommoder cestuy-cy qui estoit le cadet, de quelque bonne piece d'Eglise, afin de décharger d'autant la maison. Ce qu'il fit, tandis que la beauté & la bonne grace de Doralice attiroient plusieurs braues & honnestes Gentils-hommes à luy venir offrir leur seruice. Elle fut recherchée d'une infinité de Caualliers qui auoient beaucoup de merite, & qui estoient d'aage sortable à celuy de cette Damoiselle. Toutes-fois preferant les moyens à toutes ces considérations, il l'accorda à vn Gentil-homme son voisin, fort riche, mais desia grison. Ha maudite auarice que tu causes de mal au monde. Celuy qui t'appella racine de tous vices, auoit bien connoissance de ce que tu es & de ce que tu produits. Nostre Histoire appelle ce Gentil homme Timandre, heureux, s'il eut passé le reste de ses iours, sans s'allier avec vne beauté trop ieune pour luy, & laquelle luy faisoit mille affronts, lors qu'il l'accostoit. Au moins quand les parties sont d'accord, la bône volôré qu'ils ont l'un enuers l'autre, supplée au

deffaut de l'aage. En fin Doralice, quelques plaintes qu'elle fassé, & quelques larmes qu'elle respande, est contraincte d'obeyr à la volonté de son pere. Le mariage est conclud, & Lyzaran est appellé de ses estudes pour assister aux Nopces. Si tost que sa sœur le veid, & qu'elle eut moyen de parler à luy sans se-estre entenduë d'aucun autre, elle commença à professer ces paroles : *Mon cher frere que ie suis miserable ! Faut-il que ie passe la fleur de mon aage, avec une personne que ie deüeste plus que la mort mesme ? Mon pere n'est-il pas bien cruel, de me liurer entre les mains d'un mortel ennemy ? Consumeray-je donc desormais mes iours en une seruitude si contraire à mon aage, & à mon humeur. Que seruent les richesses, si le contentement n'y est, Conseillez-moy, ie vous prie, en une si grande affliction, ie suis presque reduite à cette extremité, de me donner la mort de ma propre main.* Apres que Lyzaran eust escouté ses plaintes, il luy respondit en cette sorte. *Ma chere sœur, ie plains vostre infortune. Vostre mal est le mien propre, i'en ay autant de ressentiment que vous mesme : ie ne puis que ie ne blasme la cruauté de mon pere, de ce qu'il vous marie ainsi outre vostre gré, & avec vn homme de qui l'aage est si different du vostre. Toutes-fois puis que la puissance que les Peres ont sur leurs enfans est absoluë, ie vous conseille de prendre patience. La fortune parauanture vous reserue quelque chose de meilleur. Au moins assurez vous qu'aussi tost que vous serez mariée avec Timandre, ie ne vous esloigneray gueres de veüë, & ie feray ma demeure ordinaire chez vous. Il m'est presque impossible de viure sans vous voir.* Acheuant ce discours, ils s'embrasserent & se baisèrent estroitement, & sans la honte qui les retint, & la

la crainte qu'ils eurent d'estre apperceus, ils eussent accompli leurs execrables desirs. Doralice consolée par la promesse de Lyzaran qu'elle aymoit non seulement comme frere, mais encore d'une amour violente par dessus tout le reste des hommes, ne se soucia gueres plus d'espouser ce vieillard, qui desormais seruirait de couverture à ses abominables plaisirs. Elle est donc espousée, & Timandre recueille le fruit qu'il aiant désiré. Apres que la feste est finie, il emmene la femme à sa maison, qui estoit vn Chateau proche de celuy de son beau pere. Lyzaran, qui n'estoit desia que trop sçauant, ne retourna plus au College. Il jouyssoit d'un bon benefice que son pere luy auoit fait obtenir. L'amour desordonné qu'il portoit à sa sœur, ne permit pas qu'il fust longtemps sans l'aller voir en son nouveau menage. Il y faisoit sa demeure ordinaire, tousiours auprès d'elle.

Leurs desirs commencerent par cette frequentation à s'allumer de telle sorte, que bien souuent sans la honte d'un si grand & execrable peché, ils les eussent tous assouuis.

L'horreur d'un tel crime se representoit souuent à leurs yeux, & particulièrement à ceux de Doralice, qui tenoit ce discours à elle-mesme: *Ha! cruel amour, qui me fais follement aymer celuy, de qui ie deurois, pour la proximité du lignage, non seulement fuir l'impudique regard, mais encores craindre qu'autre que moy n'eust iamais connoissance de ma folle incestueuse passion, à quoy me reserves tu? Faut-il que ie commette vn peché si detestable? Otons ceste maudite fantaisie, auant qu'elle s'imprime plus auant, & representons nous le malheur qui pourroit proceder d'un crime si detestable.* Ces bonnes inspirations la destournoient presque bien souuent

de ses folles pensées, lors que la beauté, la bõne grace, & l'amour qu'elle portoit à son frere, s'opposant à même temps, elles estoient aussi-tost esteintes qu'allumées. *Et qui me peut (disoit-elle puis apres) empêché d'aymer? N'est ce pas une chose naturelle, Durant le tẽps d'innocence, & que l'on viuoit au siecle d'or auoit on toutes ces consideratiõs; Les hommes ont fait des loix à leurs plaisirs: mais la nature est plus forte que toutes ces considerations; ie la veux sũyre, puis qu'elle est une bonne & sœur gnide de nostre vie.* Ainsi parloit cette execrable, tãdis que son frere viuoit aux mēmes peines. En fin i'ay horreur de reciter icy leurs raisons maudites & peruerſes, ce n'est pas mon intention; mon dessein est de dẽpeindre & de faire paroistre la saleté du vice, & non de le deffendre. Je diray donc, qu'apres plusieurs & diuers mouuemens, ils prindrent pour exemple la loy que Iupiter & Iunon, execrables Deitez des Payens practiquerent. Ils continuerent leurs detestables plaisirs, sans que personne s'en doutast. Encores qu'õ les surprit ensemble couchez sur vn lit, qu'ils se baissassent deuant tout le monde, & qu'ils s'écartassent dans le bois, & en des lieux solitaires, qui eut iamais presumé vne telle accointance, toutesfois le Ciel, qui ne peut plus long temps souffrir cẽt horrible & incestueux adultere, permit qu'vn iour vne seruãte les treuast sur le fait. Elle en fit mille fois le signe de la Croix, & ferma les yeux, afin de ne voir vne chose si execrable: Et ne voulant pas tout à coup l'esuancer, elle se contenta de remonſtrer priuément à sa maistresse le grand crime qu'elle commettoit, & le grand scandale qu'il en prouviendroit, s'il estoit decouuert.

Doralicé, au lieu de receuoir son aduertissement en bonne part, la traita le plus indignement du monde:

car

car apres l'auoir outragée de paroles, elle la batit fort bien, & puis luy donna son congé. Cette seruante indignée du tort qu'elle auoit receu, pour auoir procuré du bien, aduertit secrettemens Timandre, du subiet qui auoit induit sa femme à la chasser du logis, & qu'il prit garde sur elle, que sans doute le frere iouissoit impudiquemēt de sa propre sœur. Le mary bien estonné de cēt aduis, ne sçauoit que dire, ny que faire. Vne fois il vouloit sans autre procedure se venger d'eux : tant le desir de vengeance possedoit son ame, mais puis apres venāt à se représenter, que parauanture, c'estoit vne calomnie, il dissimula sa iuste douleur, espiaut en tant de sortes les actions de sa femme, & de son beau frere, qu'il ne fust que trop assuré de leurs incestueux deportemens.

L'amour qu'il portoit à sa femme, ioinct à quelque opinion qu'il se forgeoit, que parauanture cela n'étoit point veritable, encore qu'il en eut apperceu toutes les apparences, qui se peuent remarquer, fit qu'il se contenta d'interdire à son beau frere la maison. Douceur fort grande d'un mary qui receuoit vne si indigne offense. Voila doncques, nos amoureux priuez de se voir au grand déplaisir de l'un & de l'autre. Doralice contrefaisant la femme de bien, s'informe de son mary, quelle animosité il a contre son frere, qu'il luy deffende ainsi son logis. Timandre luy met alors de uāt les yeux leur execrable paillardise, & le iuste ressentiment qu'il en deuroit auoir, s'il ne preferoit la douceur à la vengeance: luy promettre de mettre toutes choses sous les pieds, pourueu qu'elle vueille désormais viure vne meilleure vie, & demander pardon à Dieu d'un crime si horrible & detestable, sinon qu'il sera contrainct de faire exercer sur eux le chastiment qu'ils ont merité. Elle oyant les raisons de son mary,

commença à verser vn torrent de larmes. Sa bouche proféra puis apres des plaintes & des regrets, ioincts à des sermens si horribles qu'ils estoient capables de faire croire à Timandre le contraire de ce qu'il scauoit bien, si la jalousie n'eust desia possédé entiere-ment son ame. Les hommes qui tirent desia sur l'aa-ge, ne sont pas tant allumez du feu d'amour que les ieunes : mais aussi ils sont beaucoup plus jaloux. Le moindre soupçon leur demeure dans la ceruelle, & & ie vous laisse à penser, si vne chose qu'ils ont veüe de leurs propres yeux, n'y est pas imprimée. Pour conclusion, il ne veut nullement que Lyzaran re-uenne plus à son logis; & iure que s'il l'y rencontre, il leur fera vn mauvais party. Comme ces choses se passaient, Lyzaran s'estoit retiré au logis de son pere, qui ne scauoit rien de tout ce mauvais mesnage. Il y demeueroit les iours & les nuicts en tourment, pour ne voir pas ses detestables amours. Elle estoit d'autre costé la plus trauaillée d'ennuy & de desplaisir, que l'on puisse imaginer. A la verité s'ils n'eussent esté si proches de sang, ils seroient plus excusables en leur folle passion; car elle estoit vne des beautez les plus parfaites que i'aye iamais veüe & luy l'vn des plus beaux Gentil hommes qu'on puisse voir. Mais quand ie pense à leur vice si scandaleux, ie suis contrainct de m'estonner, comme Dieu qui void tout, pouuoit tant souffrir cette meschanceté, sans la punir. Sa pa-rience est bien grande, d'attendre si long-temps à penitence des pecheurs si obstinez en leur malice.

Après que Lyzara eut sejourné quelques mois chez sô pere, le desir de reuoir sa sœur ne permit pas qu'il y demeurast dauantage, sans luy faire à scauoir de ses nouuelles par vne lettre qu'il lui écriuit en ces termes.

IE suis aux peines de la mort, privé du contentement de vous voir. S'il faut que ie demeure long temps esloigné de vos beaux yeux, vous serez une perte que vous ne recouvrerez iamais. Le moyen de conseruer ma vie est, que ie puisse parler à vous, afin de vous tirer de la captiuité où vous estes reduite, & au iourment que i'endure en cette cruelle absence. Apportez y tout le remede que vous pourrez [ma chere sœur] si vous desirez vostre repos, & ma vie, qui ne depend que de vostre venue.

Quand il eut escrit & fermé cette lettre, il la bailla à un valet de son pere, en qui il se fioit entièrement. Cét homme appris en ce qu'il deuoit faire, arriva vn soir au chasteau de Timandre, feignant de venir d'autre part que de la maison de son beau pere. Il y fut bien receu, sans qu'on le soupçonast de son message. Le soir il bailla la lettre à Doralice, qui l'ayant leue, ne voulut faire d'autre répôcé à son frere, sinon que elle chargea ce valet de luy dire, qu'il vint le lendemain sur le tard la trouuer secrètement au logis par la porte du iardin qu'elle luy feroit tenir ouuverte, & où elle l'attendoit. Ce valet ayant le lendemain pris congé de Timandre, & de sa femme, sans auoir autrement cognoissance des deportemens du frere & de la sœur, retourna au logis de son maistre, où il rapporta à Lyzaran ce que sa sœur luy madoit. Luy ayant appris cette nouuelle, monte à cheval, & arriva le soir même au lieu où sa sœur l'attend. Apres s'estre embrassez, & contentez leurs appetits desordonnez, ils delibererent ensemble du moyen qu'ils pourroient prendre pour iouyr avec plus de liberré de leurs plaisirs. C'est que le lendemain elle prendroit tous ses joyaux, & puis sur le soir, lors que tout le monde seroit couché, il la monteroit en croupe, & apres cela
ils

mere de l'autre costé péla mourit d'ennuy. On n'entend que regrets & que gemissemens dās le logis. Le bruit de cette auātute s'épand par tout le pays. Tout le monde en parle, mais diuersement. Les vns ne peuvent croire vne telle melchanceté, mais seulement que Lyzaran, de pitié qu'il a eüe de voir sa sœur indignement traictée par vn mary jaloux, l'a retirée de cette captiuité. Les autres disent au contraire, que si cela estoit, ils ne s'en seroient pas enfuyz si secretement, & qu'ils auroient descouuert leur entreprise à d'autres. Tandis que les choses passent de la sorte, ces incestueux adulteres vont par les villes & par les provinces de France, sans estre cogneus de personne. Tātoſt ils ſont en poiçtou, tātoſt en Anjou, & maintenant en Bretagne. En fin croyans estre descouverts, ils pensent qu'il n'y a ville en France, où ils se puissent mieux cacher que dans Paris. Cette multitude de personnes, qui fait vn petit monde, les doit tenir clos & couverts, à leur opinion, mieux que s'ils estoient en Canada. Opinion qui leur reussit pour quelque temps, mais qui les trompa à la fin. Il falloit que le detestable crime qu'ils commettoient deuant Dieu, fut publié deuant les hommes par vn chastiment public & exemplaire. Timandre auoit enuoyé de tous costez par toute la France à ses amis pour mettre peine de les apprehender, & pour cēt effect il les dépeignoit viuement. A la fin estant luy-mesme vn iour à Paris, vn de ses amis le vint aduertir qu'il auoit aperceu son beau frere, & decouuert le lieu où il estoit logé. Le mary bien ayſé de c. rre nouuelle, va soudain vers vn Commissaire à qui il fit sa plainte, & puis il le mena à la demeure où ces adulteres se retiroient.

Il estoit nuict, & les portes du logis estoient fermées:

mées. Le Commissaire les fait ouurir, & apres s'estre informé de l'hoste, en quelque châtre logcoit vn ieune Gentil-homme avec vn ieune Damoiselle, & appris ce qu'il demandoit, il monta accompagné d'un nombre de Sergens. Il frappa à la porte. Au commencement l'on fit quelque difficulté de l'ouurir, car ils estoient couchez: mais le Commissaires ayant menacé de l'enfoncer, on luy ouurit. Elle estoit dans le lit & luy à demy-habillé. Le Commissaire les ayant faicts prisonniers de par le Roy, il comanda à Doralice de s'habiller. On se saisit de leurs hardes & l'ô les mena au Chastelet. Le mary le lendemain r'apporte l'information qu'il auoit desia faicte, & fait ouyr de nouveaux telmoins. Les coupables sont ouys. Doralice estoit grosse, on luy demande de qui; car elle ne pouuoit dire des œuvres de son mary, s'estant absctée de luy depuis 8. mois, & n'estât grosse que depuis 4. Elle ne sçait que dire à cette demande. Ses responces sont variables Tantost elle dit vne chose, & puis vne autre, & pour conclusion, que c'est d'un valet de son maty, qu'elle nomme. Ce valet est interrogé, mais l'ô descouure en peu de temps son innocence. Elle neârmoins n'accule iamais Lyzaran. Cependant elle & son frere apres tant d'indices & de preuues sont condamnéz à perdre la teste: mais auparauant que prononcer la sentence, les Iuges attendent qu'elle soit deliurée de son enfantemēt, qui fut d'une fille. Leur iugement leur est puis apres signifié. Ils en appellent à la Cour. Plusieurs poursuyurent leur deliuiace: car ils ne manquoient pas ny d'amis ny de moyen. Le Pere mesme prit leur faict & cause, & informa du mauuais traictement que son Gendre auoit faict à sa fille, & comme cela auoit donné suiect à son frere,

pour

pour la compassion qu'il en auoit eüe de la luy oster, & de l'emmener Luy au contraire produit ses informations, & faict voir au Senat leur inceste & adultere plus clair que le iour. En fin cette venerable assëblée de gens les plus sçauants, & les plus iustes du monde, ayant examiné, & pesé cette cause au poids de l'equité, confirme par son Arrest la sentence du Chastelet.

Le miserable pere ayant appris la teneur de ce iuste Arrest, se va ietter aux pieds du Prince, pour obtenir leur remission, Les larmes qu'il repandit aux pieds de Henry le Grand, les souspirs & les regrets qui sortoient de la bouche de ce Gentil homme tout chenu de vieillesse, toucherent viuement le cœur de cét inuincible Monarque, qui n'estoit que trop sensible à la pitié

Mon pere (luy dit) leuez vous, & me dites le subiect de vostre dueil, i'y remedierai, si ie puis. Helas! Sire (respond cét infortuné) ie vous demande la vie de mes enfans, qui sont prests d'estre executez, s'ils ne sont secourus de vostre misericorde. S' l'y a (reparle le Roy) quelque apparence qu'ils doiuent viure, ie leur donne la vie. Et comme il se vouloit informer plus auant du subiect de leur condamnation, vn Seigneur qui l'accôpaignoit luy apprit en peu de mots ce qu'il en sçauoit. Mon pere (dit alors le Roy) ie ne sçauois deuant Dieu pardonner ce crime; il est trop grand, il faudroit qu'un iour i'en rendisse conte à celuy qui m'a constitué souuerain Iuge de son peuple.

Le pauvre pere aperceuant qu'il falloit que la Justice fust exercée sur sa miserable geniture, n'eut autre recours qu'aux pleurs & aux cris.

Cependant l'Arrest est prononcé aux coupables. On leur donne temps de se confesser. Courage mon frere (dit Alors Doralice) puis' qu'il faut mourir, mourons patiemment. Il est temps que nous soyons punis de ce que nous meritions. Ne craignons plus de confesser nostre beché deuant les hommes, aussi bien faut-il que nous en rendions bien tost conte à Dieu. Sa misericorde est grâde (mon cher frere) il nous pardonnera, pourueu que nous ayons vne vraye cōtri-tiō de nos fautes. Helas! Messieurs (dit elle puis apres aux Iuges) ie confesse que ie merite iustement la mort: mais ie vous supplie de me la donner la plus cruelle qui se puisse imaginer, pourueu que vous donniez la vie à ce pauvre Gentil-hōme. C'est moy qui suis cause de tout le mal. l'en dois receuoir toute seule la punition: & puis la grande ieunesse vous doit toucher à compassion. Il est capable de seruir vn iour son Prince en quelque bonne occasion.

Elle tenoit ce discours aux Iuges, à fin de les es-mouuoir à pitié & compassion pour son frere. Mais c'estoient paroles perduës. La Sentence estoit desia prononcée, & eux liurez entre les mains de l'executeur de la haute Iustice. Ce fut en la place de Greve, où l'execution se fit. Iamais on ne veid tant de peuple, qui aecouuroit à ce spectacle. La place en estoit si remplie, qu'on s'y estouffoit. Les fenestres & les couuertures des maisons en estoient routes occupées.

Le premier qui parut sur cec infante Theatre fut Doralice, avec tant de courage & de resolutiō, que tout le monde admiroit sa constance. Tous les assistans ne pouuoient deffendre à leurs yeux de pleurer cette beauté. Aussi estoit-elle telle qu'on en trouue-
roit

roit bien peu au monde, qui luy peussent estre comparables. L'on eust dit quand elle mōra sur l'eschafaut, qu'elle alloit iouer vne feinte Tragedie, & non pas vne veritable. Iamais elle ne changea de couleur. Apres auoir ietté ses yeux d'un costé & d'autre, elle les esleua au Ciel; & puis les mains ioinctes, elle fit cette priere.

O Seigneur, qui estes venu au monde pour le pecheur, & non pour le iuste, prenez pitié de cette pauvre pecheresse, & faictes que la mort infame de son corps qu'elle recoit maintenant, soit l'honorable vie de son Ame. Pardonnez encores (ô Dieu de misericorde) a mon pauvre frere, qui implore vostre mercy. Nous auons peché, Seigneur, nous auons peché, mais ressouvenez vous que nous sommes les ouurages de vos mains. Pardonnez nostre iniquité, non pas comme aymant le vice, mais comme aymant les humains, en qui les vices sont attachez des le ventre de leur mere.

Ayant acheué sa priere, elle se degraffa elle mesme sans vouloir permettre au Bourreau de la toucher. Ayant osté son rabat, elle se mit à genoux, & l'exécuteur luy banda les yeux; & comme elle recomman-
doit son ame à Dieu, il separa d'un coup la teste d'un si beau corps, de qui la beauté estoit obscurcie par son abominable passion. Quand cette execution fut faicte, vn des valets du Bourreau tira le corps à l'escart, & en le retirant le descouurit iusques à demy-heure, & fit voir vn bas de soye incarnat, ce qui facha tellement le Bourreau, qui ne se pouuoit contenir luy mesme de pleurer avec tous les assistans, qu'il poussa d'un coup de pied son valet, de sorte qu'il le fit cheoir de l'eschafaut en bas. Aussi vne telle Beauté; encores qu'elle eust merité la mort, ne deuoit pas

estre si vilainement traitée, tant pour la maison dont elle estoit issue, que pour l'heureuse fin qu'elle venoit de resmoigner.

Tout le peuple pleuroit encore à chaudes larmes, quand on fit monter le frere sur le theatre. Si la compassion auoit émeu l'assemblée pour le subject de la sœur, la pitié qu'elle eut pour celui du frere ne la roucha pas moins. Il ne pouuoit auoir que 20. ans, & à peine vn petit cotton, messager de ieunesse paroissoit à ses ioues. Il estoit le viuant pourraict de sa sœur, comme nous auons desia dit, & par consequent doué d'excellente beauté. Quand il veid cette belle teste separée d'vne si belle gorge, il pensa rendre soudain l'esprit, sans attendre l'execution du Bourreau: *Helas* (ce dit-il) *na pauvre sœur, qu'en exerceoit-on toute la cruauté qu'on eust sceu imaginer contre moy, pourueu qu'on vous eust donne la vie & qu'on se fust contenté de vous enfermer dans vn Monastere Il n'est tourment si rigoureux que ie neusse souffert avec alligresse. Mon ame auroit quité ce miserable corps avec ce contentement de ne voir point mourir celle à qui i'ay causé la mort. L'on deuoit excuser sa fragilité, & tourner toute la coulpe sur moy, comme sur l'auteur du crime, O Dieu! ayez pitié de son ame, de la mienne, qui n'a son recours qu'à vostre misericorde.* Il proferoit ces paroles avec tant de zele, que tout le peuple en ressentoit vne grande douleur. Après qu'on luy eut osté son pourpoint, & fait les cheueux, il s'agenouilla. Le Bourreau luy voulut bander les yeux, mais il ne le voulu iamais. Descharge (dit-il seulement ton coup, i'ay assez de courage pour le recevoir. Tu as desia veu la constance de ma sœur. Tu dois penser que ie suis son frere, & que par cōsequent la raison veut que i'aye encores plus de courage ?

Ayant

Ayant finy son discours, il se mit à dire, *In manus tuas* tandis que l'executeur luy fit voler la teste. Leurs corps furent le iour mesme emportez, & mis dans vne bierre, pour estre enterrez dans vne Eglise de Paris, où ils reposent avec ces mots,

*Cy gisent le Frere & la Sœur. Passant ne t'in-
forme point de la cause de leur mort, passe,
& prie Dieu pour leurs Ames.*

C'est la fin tragique & lamentable de Lyzaran, & de Doralice, que le Ciel auoit pourueus de beauté & d'esprit, autant que toute autre personne. Leurs execrables amours auancerent la fin de leurs ieunes ans. Exemple memorable, qui doit faire trembler de peur les incestueux & les adulteres. Dieu ne laisse rié d'impuny. Sa vengeance treuve tousiours le coupable, s'il perseuere en sa malice. Tels exemples sont si rares parmy les Payens, qu'à peine en treuueroit-on deux ou trois dans leurs fable, voire mesme sans que l'Adultere y soit conioinct. Dieu vueille si bien defendre son peuple des aguets de Sathan, que iamais vn tel scandale n'arriue plus parmy nous.



*DE LA C O N S T A N T E E T
desesperée resolution d'un Gentil-homme,
& d'une Damoiselle.*

HISTOIRE VI.

QUand ie lis les Histoires des Payens, & que i'y treuve des exemples d'amour, de constance & de fidelité iusques au dernier soupir de la vie: que i'y

Vois les resolutions que des personnes ont autresfois prises , à se donner la mort de leurs propres mains, auant que la receuoir de celles de leurs ennemis , ou plustost qu'estre menez au triomphe , & qu'honorer leur victoire , ie ne puis que ie ne loüe leur courage, puis qu'ils ne faisoient autre profession , que de ne craindre point la mort , & qu'ils estoient priuez de la claire lumiere du Soleil de Iustice , qui nous deffend le desespoir , sur peine de faire perte de la plus chere partie que nous ayons. Mais lors qu'il se treuve parmy nous qui sommes Chrestiens , des hommes qui pratiquent la même resolution, ie dis que ces personnes sont dutout esloignées de leur salut , & qu'au lieu d'estre loüables , leur memoire est pleine d'infamie. L'histoire que i'escriis maintenant, arriüée depuis 3. ou 4. ans, traite d'une constance plus prodigieuse qu'imitable. La posterité la lira pour luy seruir d'exemple à bien viure , & à n'irriter point la vengeance du Ciel, qui permet quelquefois la peine du peché , & la perte des hommes, ainsi que ie vous vay raconter.

Valeran estoit vn Gentil-homme de Picardie , qui durant nos troubles derniers auoit acquis vne grâde reputation parmy ceux qui suiuent le train des armes. La fortune l'auoit fauorisé en toutes ses entreprises. Son nom estoit crain & redouté de ses voisins. Si tost qu'il se faisoit quelque partie au pays, on l'inuioit à s'y treuuer: soit en des rencontres, ou des duels qui ne sont que trop ordinaires en France, encores que nos bons Roys , & particulièrement Henry le Grand d'heureuse memoire, & la sage Reine Regente son espouse , ayent fait publier des Edicts rigoureux, pour empescher ces funestes iournées, où l'on perd miserablement le corps & l'ame. En ce qui concerne

cerne l'honneur des hommes, il auoit tousiours fait paroistre vne franchise, & vn courage genereux. Les belles parties dont il estoit accomply, luy acquerirent l'amitié d'une ieune & belle Damoiselle, que nous nommerôs Amarylle. Leur amour fut si violente, que cette fille luy laissa cueillir le fruit qu'elle auoit conserué chetement iusques à l'heure. L'honneur qui doit estre en si grande recommandation aux femmes, & notamment à celles qui sont de noble extraction, n'eust point d'esgard en son endroict. Le respect qu'elle deuoit à sa mere, qui estoit vefue, ny la crainte de ses parens, ne furent pas capables de l'empêcher de se donner à Valeran. Ce Gentil-homme possesseur de cette beauté, s'estimoit heureux d'auoir fait vne telle acquisition, & leurs affections estoient si bien liées qu'Amarylle ne fit point difficulté d'aller faire sa demeure avec luy dans vne mesme maison, sans qu'il y eust entre eux auec promesse de mariage que l'vnion de leurs corps. Comme ils estoient enyurez en leurs amours, & qu'ils ne s'esloignoient gueres l'un d'avec l'autre, & que mesmes ils auoient desia vne fille, il arriua que Valeran se treuve vn iour en vne assemblée de Gentils hommes Aronce y estoit aussi. C'estoit vn Cavalier voisin de Valeran, fort renommé pour sa valeur, & pour sa courtoisie. Je ne scaurois dire particulièrement l'origine de leur querelle. Iay seulement appris que luy & Valeran se picquerent pour peu de chose. Ils en fussent venus aux mains, si leurs amis communs ne les en eussent empeschez. On les mit d'accord, & on leur fit iurer amitié, Aronce y proceda fort franchement, mais non pas Valeran, qui croyant estre encores offensé, quelque accord qu'il y eust, ne songea depuis qu'à se vebger, & à luy oster la vie. Iuf-

pris l'acte indigne de Valeran, fit venir le grand Preuoſt de ſon Hoſtel de France, & luy cōmanda expreſſément de ſe ſaiſir de la perſonne de ce perfide, & de l'amener, pour eſtre procedé contre luy par les voyes du droit. Le grand Preuoſt obeyſſant a ſon Prince, fit partir ſur le champ la Morliere, l'un de ſes Lieutenans de Robbe courte, à qui il bailla vne douzaine d'Archers pour l'aſſiſter. La Moliere ſe transporte deuant le Chateau de Moyencourt, & apres l'auoir ſommé d'obeyr à ſa Majesté: qui eſtoit, que Valeran la viſt treuuer à Paris, il n'eut pour toute reſponſe qu'un refus. Le Lieutenant du grand Preuoſt luy reiterra le cōmadement, ſur peine de deſobeyſſance, & d'eſtre atteinct de crime de leze-Majesté, & luy demanda, s'il ne le connoiſſoit pas. Je vous reconnois aſſez (reſpond Valeran) les казаques de vos Archers me teſmoignēt aſſez que vous eſtes vn des Officiers du Roy: mais pour tout cela ie ne ſuis point d'auiſ d'obeyr au cōmandement que vous me faiçtes, que premierement ie ne voye mon abolition ſignée, & ſcellée du grand ſeau, ou que Meſſieurs de Créquy & de Sault, ne viennent icy eux-mesmes en perſonne, pour me rendre entre leurs mains. C'eſt peine perduë de penſer me tirer hors d'icy autrement. J'ay reſolu de n'en faire autre choſe.

La Moliere voyant ſon opiniſtreté, & qu'il luy eſtoit impoſſible de prendre la place ſans auoir vn plus grand ſecours, ſ'achemine à Noyon, à Perōne, & à Amiens, exhibe la commiſſion du Roy, & ſomme les garniſons qui ſont en ces trois villes, de luy preſter main forte, pour l'execution du vouloir de ſa Majesté. Les Capitaines obeyſſans au mandement, ſe diſpoſent, & ſe mettent en ordre pour aller donner l'aſſaut

à la place. Mais s'ils assaillent brauement, ils sont repoussez couragement. Valeran accompagné d'Amarille sa Maistresse, tire sur eux, & en blesse cinq ou six. Cette courageuse Damoiselle armée de toutes armes, paroist comme vne Amazone sur le bastion, & à cost avec vne arquebuzé, & tantost avec vne pique.

Quand Valeran n'auroit point de cœur, la braue resolution de sa Maistresse seroit capable de le rendre le plus courageux de la terre. *Mourons* (disoit-elle) *mon cher amy, plustost que nous rendre à la mercy de ceux en qui tu ne treuueras iamais de pitié. Si ie craignois la mort, ie m'en pourrois bien exempter, puis que ie ne suis nullemēt coupable de ce dont l'ont t'accusé. Mais ma vie est si bien attachée avec la tienne, qu'il m'est impossible de te suruiure.* Valeran tout estonné de son grand courage, s'efforçoit de la faire retier, de peur qu'il auoit que quelque coup d'arquebuzé ne l'enuoyst en l'autre monde. *Mon ame* (disoit-il) *ie vous coniuire par l'amour qui nous a iusques icy assemblez avec tant de concorde, d'espargner vostre vie. Je suis assez capable de me deffendre de ceux qui nous attaquent, sans que vous y éployez vostre courage. Laissez moy seul soutenir cēt assaut, & si ie meurs, ayez soing que mon corps ne tombe point entre les mains de nos ennemis. Oütroyez moy ceste requeste, pour dernière obligation de tant d'autres qui ie vous ay. Que vous mouriez* (respond-elle) *& que ie viue, vous pensez à vne chose impossible. La parque a filé dans un mesme fuseau mon destin avec le vostre. Mon sort & le vostre ne sont qu'une mesme chose. Si vous faictes naufrage, croyez. vous que ie vueille demeurer au port; Non non: si vous estes forcé par vos aduersaires, il faut que la mort nous raniſſe tous deux à mesmes instant, & que nos ames soient portées ensemble*

an lieu qui leur est destiné. Cependat qu'ils se preparent à mourir plutost qu'à se rendre, la Morliere sage & bien ausé voit qu'il ne peut forcer la place par assauts, l'as perdre beaucoup de gés, fait venir 2. petards de Noyon. Mais auant qu'on les pose, il tasche de redpire ce miserable à composition, & le fait derechef sommer. La peine qu'il y prend est inutile. Valerá ne veut point s'y resoudre. Le Preuost tente vne autre voye, il prie le Curé de Moyencourt, hómme docte, & de bóne vie, de parler à ce desesperé, & de tascher par ses sainctes remonstráces de le ráger au deuoir. Le Curé s'approche des murailles, & demande à parlementer. Valeran paroist, & le Curé luy remonstre le peu de sujet qu'il a de se perdre de la forte, luy met deuant les yeux la clemence du grád Monarque tant celebre dás nos Histoires modernes luy apprend que les Roys auoiét les mains lógues, & que c'estoit réter l'impossible, que de cuider faire resistáce à la force d'un si grád Prince. Il l'aduerit puis apres de ne pésar pas rár à sauuer son corps, qu'il en oublie le salut de s'ó ame. Que le desespoir où il le voyoit porté, causeroit la perte de l'un & de l'autre: qu'il estoit son Pasteur, & par consequent obligé pour la descharge de sa cōscience de luy tenir ce discours qu'il deuoit receuoir en bóne part, & le croire pour son bien, pour son hómneur, & pour son salut. Valerá apres l'auoir escouté avec patiēce respondit en cette sorte: le vous remercie, M'óieur le Curé, du soing que vous auez de la conseruation de ma vie & de mon salut. le prendrois en bonne part vostre aduis & le suiurois, si c'estoit en vn autre lieu qu'en cestuy cy. Pour conclusion, mes ennemis n'auront iamais ce contentement de me voir porter

ma teste sur vn eschaffaut. Je sçay qu'il ny aura iamaïs de pardõ pour moy, si bien que ma resolution est de mourir ce. Dieu est pitoyable & misericordieux parauanture qu'il aura mercy de mô ame. Je vous prie de vous retirer, & de rapporter à ceux qui vous ont icy enuoyé, qu'ils fassent du pis qu'il pourront, & que pour moy ie n'en feray autre chose. Le bon Curé voyant qu'il employoit inutilement le temps enuers ce miserable, les recommanda à Dieu, & s'en retourna.

Lors que la Morliere eust appris par la bouche du Curé l'obstination de Valeran, il voulut encore essayer vn autre moyen, pour tascher à diuertir ce perdu de sa folle resolutiõ. Il auoit leu dans les vies des hommes Illustres de Plutarque, comme Coriolanus indigné de l'affront qu'il auoit receu de ses Citoyens tenoit la ville de Rome si estroitement assiegée qu'elle alloit estre le pillage de ses ennemis. Le Senat, les Vestales, ny les Haruspices, n'auoient peu adoucir son fier courage. Aulieu d'esteindre le feu de sõ courroux, ce n'estoient que des allumettes qui l'enflammoient d'auantage, lors que sa mere sortant de la ville, & se prosternant deuant son fils, amollit de ses larmes ce cœur de diamant, La Moliere creut que la mere d'Amarille émouvroit peut-estre le courage de ces desesperés, par ses larmes & par ses plaintes. Il l'euoya querir, afin qu'elle mit peine de venir à bout de ce, où tout les autres auoient failli. Lors que ceste bonne Dame fut dedans le Chasteau, où le Lieutenant du Preuost luy donne moyen d'entrer, en faisant retirer les compagnies des soldats; elle se mit à verser vn torrent de larmes, en presence de la fille, & de son amy, & puis profera les plus pitoyables paroles

les qu'on apprend de sa douleur. Que pensez-vous de faire misérables (disoit-elle) ne voyez-vous pas que vous vous perdez mal-heureusement par vostre obstination ? Le petard est desia tout prest, pour donner entrée à ceux , de qui il ne sera pas puis apres temps d'implorer la misericorde. Hé ! Valerant, ne vaut-il pas mieus que vous vous rendiez de bon gré entre les mains de ceux qui ont commission de vous mener au Roy , plustost que d'attendre qu'on vous y traîne par force ? Vous ne manquez pas de bons amis, qui obtiendront facilement vostre grace de la bonté d'un si doux Prince. Comme Valeran luy vouloit respondre, Amarille le denança & parla à sa mere en ces termes: Je vous supplie, ma mere, de ne tenir jamais ce langage à mon amy: car aussi bien vous ne faictes que consumer inutilement le temps. Luy & moy sommes resolu de viure & de mourir ensemble. Je sçay bien que s'il est pris, jamais il n'en eschappera. Il sera plus estimé s'il meurt honnorablement, que si vne infamie perpetuelle luy allonge quelque peu la trame de ses iours. Je vous iure que si le soin d'allonger sa vie de quelques heures luy faisoit charger de resolution , ie luy planterois tout presentement ceste espée iusques aux gardes dans le corps. Ne le sollicitez donc plus à faire un acte si lasche, & si poltron , autrement ie l'occiray en vostre presence de mes propres mains, & apres me tueray moy mesme. La miserable mere oyant la desesperée resolution de sa fille , pensa mourir de dueil. Faut il (poursuit-elle) que j'aye produict vne creature si desornée ? A la mienne volonté que la mort t'eust estorffée d'as le berceau , ie n'aurois pas maintenant tant de sujet de regretter la perte de ton ame. Je vois que ton

deses

desespoir te precipite dans les Enfers. Vienne ce que pourra (respond la fille) au moins ie n'auray iamais le regret de voir honteusement mourir celuy que j'ayme plus que moy mesme. Tandis que la bonne Dame s'efforce par les dolents regrets à les destourner de leur cruel dessein. Valeran luy proteste que le plus grand contentement qu'il peust receuoir en la mort c'est voir la vie de sa Maistresse conseruée, & sur cela il la coniure de sortir avec sa mere hors du Chasteau avec leur petite fille, & leur laquay: mais Amarille n'y veut point entendre. & se plaint du peu d'estime que Valeran faict de son amitié. Retournez-vous, en s'il vous plaist (ma mere,) ie veux mourir (dit-elle) avec mon cher amy. Vos pleurs, & vos plainctes sont vaines. La dolente mere n'ayant rien pû gagner sur leur obstination, fut contrainte avec larmes, & gémissements de sortir du chasteau, sans rapporter autre chose que le regret d'auoir mis au monde vne fille si peu soigneuse de sa vie & de son salut. Si tost que le Lieutenant du Preuost eut appris, que tous ces delays ne seruoient qu'à retarder l'effect de sa commission, il voulut pour la derniere fois parler à Valeran, afin de sçauoir encores son intention. Ce Gentil-homme parut au donjon du Chasteau, & alors la Moilliere luy tint ce langage: l'ay tasché par diuers moyens de vous induire à vouloir obeyr au commandement de sa Majesté. Mon pouuoir ne s'estend point qu'à vous mener deuant elle. Vous n'ignorez pas la clemence de nostre Prince, loüée par les ennemis mesme. Croyez vous qu'il refuse de vous pardonner, pourueu que vous imploriez sa mercy? Rendez-moy raison tout presentement de ce que vous auez desir de faire. i'ay dilayé iusques icy de vous forcer, pësant

à vostre conseruation. Je ne puis plus différer. Je m'en vais faire iouer le petard, si vous n'estes plus soigneux de vostre salut. Valeran luy respondit en cette sorte: Je vous ay desia déclaré si souuent ce qui est de mon intention, que vous n'en deuez plus douter. Je vous dis encores, que mes ennemis n'autont iamais le plaisir de triompher de mon corps, ny mes amis le regret & la honte de me voir entre les mains d'un bourreau. C'est ma derniere resolution, neantmoins ie vous remercie de la peine que vous dites auoir prise pour mon salut. C'est vne obligation que ie vous ay. Je vous prie de m'en faire vne autre, c'est de vouloir receuoir vne miserable fille, & vn petit laquay, qui seront bié roist priuez, l'un de pere & de mere, & l'autre de maistre & de maistresse. Ne deniez pas cette faueur à vn infortuné Gentil-homme, qui vous en supplie autrement vous auriez cy-apres regret peut estre de ne l'auoir pas fait. La Morliere luy ayant accordé sa requeste, il les deuala l'un apres l'autre avec vne corde, liez par le milieu du corps. Cependant qu'il estoit empesché à cette pitoyable actiō, Amatille ramassoit de tous costez des matieres combustibles dās la salle du donjon, dont elle faisoit vn bucher. Lors qu'elle l'eut preparé, elle se mit à proferer si hautement ces mots, qu'on l'entendoit d'en bas: Il sera tantost temps, que nous nous disposions à mourir, puis qu'aussi-bien on nous veut interdire de viure plus longuement. L'amour qui nous lioit d'une estreinte si ferme, ne pourra point estre des-vnie par la mort. Je vous prie (poursuit-elle en mettāt la teste à la fenestre) de prier Dieu pour nous. A Dieu ma chere mere, ie vous recommande ma fille. Le Ciel luy vueille estre plus favorable qu'à celle qui l'a engendrée. Ainsi qu'elle

acheuoit

acheuoit ce propos, le perard joua avec tant de violence qu'il mit la porte par terre, & à mesme instant cette courageuse Amazône mit le feu au bucher, qui enuironoit elle & son amy. Comme les soldats entroient, ils veirent ce pitoyable spectacle. Vn grand feu allumé en demy rond, & deux Amants dedans tous prests à lascher chacun sur sa teste vn pistolet qu'ils tenoient à la main. Si-tost qu'ils veirent qu'on estoit entré dedas, ils les debanderer. Les coups leur percerent la teste de part en part. Leurs corps tomberent roides morts, & furent bien-tost consumez par le feu; & leurs ames s'en allerent pour brusler dâs les flammes eternelles, si Dieu n'en a eu pitié par son extreme misericorde. Voila la fin deplorable de ces desesperes; qui au temps du Paganisme eussent esté renommez pour leur grande constâce; mais particulièrement eust-on celebré la memoire d'Amarille.

Exemple rare s'il en fut iamais, & d'autant plus remarquable que l'infidelité regne au siecle où nous sommes parmy le sexe feminin. Les Dames y fônt profession de l'inconstance, & à peine en trouueroit-on vne semblable en tout le môde. Ce bel esprit qui l'a comparé dans les escrits qu'il en a faicts à Gleopâtre, & à la femme de Pœtus, l'a fait avec vn grand & solide iugement. Cette Keyne d'Egypte (dit ce grand honneur des lettres) voyant son Soleil proche de son Eclipse, & craignant l'obscureir d'auantage en le suruiuant, monstra par sa mort constante & genereuse, qu'en tout braue cœur l'amour est indissoluble. & que la dissolution du corps n'est qu'une plus forte estreincte pour en cimenter la continuation. Quant à Pœtus, il auoit conspiré contre l'Empereur Claude, & scachant qu'il ne pouuoit euitier de mourir,


rit, il refout de preuenir son fuppliee par vne douce
& prompte mort. Mais comme l'homme n'a rien de
fi cher que la vie, ce coupable ne fe pouuoit refou-
dre à l'effect de fon deffein, lors que la femme nom-
mée Arria prenant vn poignard, le plonge dans fon
eftomach, & puis le retitant, elle profera fes gene-
reufes paroles, en rendant le glaue à fon mary, *Tien*
(dit. elle) *Pætus, ie meure il ne fait point de mal. Le feul*
regret que ie puis auoir, eft de te voir forcé d'en faire ap-
tant. A ce fanglant & pitoyable fpectacle Pætus, com-
me frappé d'un coup de foudre, fe refueille, & voyant
fa femme à fes pieds, qui eftoit aux poines de la
mort, bannit la crainte de fon ame, & prenant le
poignard tout rouge du fang de celle qu'il eult vo-
lonriers s'animée du fien propre, s'en donne dans le
fein, & tombe fur le corps de fa magnanime compa-
gne, qui luy auoit tracé l'exéple d'acheuer honora-
blement fes iours. Autant en fit Amarille. Elle prit la
premiere le piftolet à la main, & par fes courageufes
paroles, & par fon exemple elle anima Valeran, qui
ne fe pouuoit refoudre à cette cruelle execution.
Eftranges effects de l'amour, ils voulurent prati-
quer ce que dit vn Ancien, qu'en matiere de mutu-
elle affection, il vaut mieux mourir avec ce que
l'on ayme, qu'en fuyuant ce qu'on a che-
ry avec tant de paffion, s'en vouloir di-
fioindre & fe parer par la mort. Dieu
vueille auoir plus de pitié de leur
ame, qu'eux-mefmes en eu-
rent de leurs pro-
pres corps.

K



DE LA CRUAUTE' DVN FRERE,
*exercée contre vne sienne sœur, pour vne
 folle passion d'amour.*

HISTOIRE VII.

 Vel ancre noircy d'infamie pourra bien tracer à la postérité, l'Histoire que ie vay descrire ? En quel siecle maudit & detestable auons - nous pris naissance, qu'il faille que nous y voyons attriuer des choses, dont le seul recit faict dresser les cheueux de ceux qui les entendent ? Mais faut - il encores que tant d'exemples barbares & dénaturez, patoissent parmy la nation la plus courtoise, & la plus humaine du monde ? O Ciel ! à quoy nous reseruez - vous ? Ces accidents execrables & inouys sont les auant-coureurs de vostre ire, si par vn saint amandement nous ne la preuenons. Voicy vne cruauté non moins estrange que veritable. I'en parle comme tesmoin oculaire. Elle merite d'estre escrite en lettres de sang en ceste sorte.

La France iouyffoit du paisible repos que le grand Héry luy auoit acquis par ses travaux, plus memora- bles que ceux d'Hercule. L'on n'auoit plus de crainte de voir tant de pitoyables spectacles que la fureur de nos guerres ciuiles produisoit tous les iours. Le Pere ne recherchoit plus la mort de son fils, par vn zele inconsideré de religion, ny le fils n'attentoit plus sur la vie de son Pere. Le frere & la sœur, ny les plus proches parens & amis, n'auoient plus de desffiance les vns des autres pour ce mesme sujet. Chacun se repo-
 soit

soit sous les palmes & les lauriers de ce grand Monarque, lors qu'à Paris il y auoit vn personnage venerable pour son merite, & pour sa qualité, que nous nommerons Ariste. Il auoit deux enfans procréez de legitime mariage. Vn fils, & vne fille : l'appelle le fils Iracond, & la fille Isabelle: noms empruntez, par ce que ie ne ve~~x~~ point diffamer leur famille, pour les considerations que i'ay alleguées au commencement de cet ouurage. Isabelle aussi chaste, & aussi belle que celle que le diuin Arioste a tant vantée dans ses escrits, fut recherchée en mariage pour ses perfections par plusieurs personnes de qualité. Sa beauté & sa bonne grace, qui estoient capables de rauir la liberté des cœurs les plus farouches, & plus insensibles, acqueroient à l'Amour ce que les forces de ses armes n'auoient pas le pouuoir de surmonter, & ses rares vertus seruoient de patron à celles qui portent l'honneur : sur le front, & qui n'ont que la crainte de Dieu deuant les yeux. Bien-heureux Pere d'auoir produit vne telle fille, si la felicité des hommes estoit durable. Comme plusieurs raschèt par leur merite & par leur perseuerance d'acquérir ses bonnes graces, vn seul emporte en fin le prix. Ce joyau precieux luy est destiné du Ciel. Il portoit le tiltre de Cheualier, & le nom que nous luy donnons est Eranche. Ce couple lié de la sainte chaisne de mariage jouyssoit d'vn contentement indicible, & d'vne concorde souhaitable de tous ceux qui se rangent sous les loix d'Hyménée, pendant qu'Iracond frere d'Isabelle estudioit en vne des celebres Vniuersitez du Royaume. Il y faisoit vn tel profit, que son Pere estoit du tout satisfait de ce qu'on luy en rapportoit. Ceux qui auoient la charge de l'instruire auoient vne si bon-

ne opinion de luy , qu'il s'affecteroient qu'yn iour il seroit vn des ornemens de sa Patrie. Jamais durant sa jeunesse on ne remarqua en luy aucun trait de folie. Il estoit sage, prudent, & discret en toutes ses actiōs. Mais le naturel de l'homme est vn Protée, il change de forme à toute heure, & se rend si diuers en ses inclinatiōs, qu'à peine le peut-on recognoistre du iour au lendemain. Iracond reueu des estudes avec ses liences, se fit recevoir Aduocat en ce renommé Senat, où le droict est également rendu à chacun. Son pere vouloit qu'il passast quelques années au barreau, pour se rendre vn iour digne de son office qu'il luy vouloit resiner, ou bien de quelque autre encores plus hōnorable. Ils'y rendoit assez assidu au commencement, & contenoit le desir de son pere, qui remercioit le Ciel de luy auoir donné deux enfans si si bien nays. Cependant il visitoit souuent sa sœur en son mesnage, où il receubit toute sorte de courtoisies.

... Tout le monde scait la liberré que les Dames de Paris ont de se voir les vnes les autres, & comme les voisines principalement on ceste coustume de s'assembler les iours de feste au logis de quelqn'vne d'entre elles pour y passer le temps; soit on à deuifer, soit à d'honnestes exercices, soit pour aller à la promenade. Isabelle, pour estre vne des plus apparentes du quartier en toutes sortes de qualitez, ne manquoit iamais de compagnes chez elle, les iours du repos. Sa maison estoit vne petite Academie de rares beautez qui la frequentoient. Entre elles en qui le Ciel auoit respandu ses richesses particulieres, & qui approchoient de bien près les perfections d'Isabelle, Elinde estoit la premiere. Ces deux Dames estoient liées

liées d'une si ferme estrainte d'amitié, qu'on les trouvoit presque tousiours ensemble, lors que le loisir le leur permettoit. Leur humeur conforme rendoit leurs desirs égaux, & ne souffroit pas qu'elles se perdissent gueres de veüe. Elinde estoit mariée avec vn riche & honorable Bourgeois de Paris avec lequel elle viuoit avec tant d'amour & de contentement, que ce que l'vn vouloit estoit la volonté de l'autre. Il aduint vn Dimanche, comme vne troupe de belles Dames estoit assemblée au logis d'Isabelle, & entr'autres Elinde, qu'Iracond y arrive. La coutroisie naturelle à la nation Françoisë, & le merite de sa sœur, fit que chacune le receut avec toute sorte d'honneur & de respect, & qu'on luy donna seance en cette compagnie, entre Elinde & vne autre Damoiselle. Mais il n'eut pas plustost ietté ses regards sur Elinde, que l'Amour qui estoit en embusche n'entraist par ses yeux, & ne perçast son cœur de part en part. Cette nouvelle blesseure le rend aussi-tost si espris de la beauté de cette Dame, qu'il ne sçait quelle contenance tenir. Il veut parler, pour remercier la troupe de l'honneur qu'il en reçoit; mais sa langue se treuve attachée à son palais. Ses yeux font seulement leur office, & se tournent neantmoins incessamment vers le beau visage d'Elinde; comme l'aiguille vers l'estoille du Nord. Misérable destourne ta veüe de ce Soleil, qui t'esbloüit. Elle est trop foible pour le supporter. Nouveau Icare tu tentes vne chose impossible. Les subcez ne peut estre autre que ta mort! Cette honneste Dame est possedée par vn autre. Tes desirs sont friuoles, & la peine que tu prendras à cette recherche ne te peut estre qu'innutile.

Iracond se treuvant follement passionné de cette

amour, accompagne, lors qu'il est temps de se retirer, cette Dame iusques à la porte de son logis. Il voudroit luy faire entendre le mal qu'il endure : mais, quand d'un costé l'Amour le pousse, le respect & la crainte le retient. Toutesfois ce n'est pas en telle force, qu'Elinde ne s'apperçoive bien de son émotion. Elle n'en fait pas pourtant semblant. L'amitié qu'elle porte à sa sœur, la conuie de faire les doux yeux à Iracond par tout où ils se rencontrent. C'est ce qui l'enflamme davantage, & qui le rend si hors de luy-mesme, qu'il mourroit d'angoisse, si l'esperoir de la jouissance ne le consolait. Que de soupirs, & que de plaintes sortent de la bouche de ce miserable! Souuent la difficulté qu'il void de pouuoir paruenir à ce qu'il souhaite, se representant à ses yeux, il veut quitter cette folle poursuite: mais la passion démesurée ne le permettant pas, il se laisse emporter au courant de cette mer, pleine d'orages & d'écueils. La raison qui tasche de luy seruir de pilote, est bannie de son vaisseau, & son desir temeraire le guide. En fin apres auoir beaucoup souffert, sans oser declarer sa passion, il se resolut de treuver son aduersaire, comme fit Telephe, pour luy guerir sa playe, plustost que de mourir en la celât.

C'estoit au mois de May, que les belles campagnes sont parées d'une robe verte, que les fleurs rendent leurs odeurs de toutes parts, & que les oyselets peints de diuers plumages volent de branche en branche, & font un agreable concert: Isabelle ayant fait une partie avec ses compagnes, fut se pourmener avec elle hors la ville, en un iardin delicieux. Son frere qui sçauoit leur dessein ne manqua pas de les accompagner. L'occasion s'offrant en ce Paradis, qui fut l'entrée de son Enfer, de declarer sa passion à Elinde. Il le

fit

fit en ces termes: Si vous tournez seulement les yeux (belle Elinde) sur vos perfections, ie sçay bien que vous m'accuserez de temerité, & que vous me iugerez digne de chastiment plustost que de recompense, d'auoir porté mon desir si haut. Mais aussi si vous cōsiderez la force de l'amour, qui ne treuve rien d'inuincible, ie ne fais point de doute que vostre bon naturel ne se represente par mesme moyen ma cruelle langueur, & qu'elle n'en aye compassion. Elle est telle que si la pitié n'y treuve point de place, la mort m'est inéuitable. Si cela arriue, vous ferez perte de la plus fidelle conqueste que vous puissiez iamais faire. Ie vous coniure par vos beaux yeux, douces lumieres de ma vie, de conseruer ce que vous auez conquis, plustost que de le destruire. Pleust aux Dieux que ie peusse vous faire aussi bien paroistre ma douleur, comme ie la ressents, ie pense que vostre cœur n'est pas si insensible, que vous n'en fussiez aucunement touchée. Il est impossible qu'une telle beauté cache tāt de rigueur. Il proferoit ces paroles avec tāt d'ardeur, qu'à tous coups ses sanglots, & ses souspirs l'interrompoient. Si Elinde eust esté autre qu'elle n'estoit, ou plustost si elle eust esté libre, parauanture en eust-elle eu pitié. Iracond estoit ieune, & agreable, fils vnique d'une bonne maison, & accomply en beaucoup de rares parties. Mais quoy? Elinde, qui aymoit également son honneur, & son mary, ne pouuoit estre touchée d'autre affection. Aussi le desdain qu'elle eut de la temerité de ce ieune homme la mit en telle colere, que sans le respect qu'elle portoit à sa sœur, elle luy eust fait sur le champ vn affront. O que si elle eust esté de cette rigueur, l'auanture funeste & execrable que nous descriuons ne seroit pas arriuée! Mais la pre-

miere consideration eut tant de force en son ame, que dissimulant son courroux, elle respondit à cét amoureux en ces termes : le ne sçay (Monsieur) pour qui vous me prenez. Vous croyez peut-estre que ie suis de ces folles, qui foulants aux pieds la crainte de Dieu, & leur propre honneur, se laissent prendre aux charmes d'une passion desordonnée. Je vous prie d'oster cette croyance de vostre cerueau, & vous asseurer que sans l'excuse que vostre ieunesse me donne, & l'amitié que i'ay vouée à vostre sœur, ie chastierois vostre temerité, en telle sorte que la memoire en seroit de longue durée. Desistez vous doncques de me tenir ce langage, & adressez vos yeux à vne autre, qui sans la tache de son honneur, vous peut rendre plus satisfait, que ie ne fay pas: autrement il me seroit impossible de supporter vostre folie, sans la faire sçauoir à tel qui s'en ressentiroit à vos despens. Iracond oyant cette response, pensa mourir de desespoir. Il en receut vne telle douleur, qu'il fut longtemps cōme immobile, de mesme qu'un qui est touché du foudre. Ayant repris ses sentimens, il se retira à vn coin d'un venger, là où il versa vn torrent de larmes, & proféra mille pitoyables patoies. *O cruel amour (disoit-il) que d'amertume pour vn peu de douceur! Que d'espines pour vn bouton de rose. Helas! qui eust iamais creu que sous vn si beau visage se cachast tant de cruauté!* Il eust continué ses plaintes, si la crainte d'estre descouuert ne l'eust empesché. Apres qu'il eut exhalé par ses yeux & par sa bouche vn peu de l'ardeur de son ame, il se contint le mieux qu'il peut, & dissimulant son angoisse, il s'approche de ces belles Dames, qui s'estoient assises sur l'herbe fraische, où elles s'entretenoient d'honnestes & de plaisans discours,

Il se mit parmy elles, tout triste neantmoins, & re-
uenant tousiours à sa folle passion, sans qu'il la peust
oster de sa fantasie. Souuent il iettoit ses regards sur
Elinde, qui ne daignoit pas de ietter sur luy vne œil-
lade seulement: aussi depuis ne luy donnoit-elle pas
tant de priuauté, comme elle auoit accoustumé de
faire. Elle luy ostoit tout suiet de l'accoster, & de
parler à elle. Ces rigueurs, au lieu de le rendre sage, le
rendirent plus follement transporté. Quelques fois il
se flattoit en son mal, & croyoit que ces cruantez
estoiēt feintes, & qu'elle en vsoit pour faire espreuue
de son amour, & de sa perseuerance. Toutesfois, cō-
me son ardeur croissoit, & qu'il taschoit d'amolir
Elinde, l'esperoir luy en fut du tout osté par la priua-
tion qu'elle luy fit de sa presence. Elle ne pouuant
plus supporter ces folies, se resolut de ne hanter plus
la maison d'Isabelle. Ce fut alors qu'Iracond deuint
entierement forcené. Il inuquoit la mort tous les
iours, & deuenoit d'heure à autre si possédé de rage
qu'il en estoit au desesperoit. Sa sœur, qui s'estonnoit,
de ce qu'Elinde ne la venoit plus voir, comme elle
auoit accoustumé de faire, voulut en sçauoir la cause.
Elle l'alla trouuer chez elle, & luy tint ce langage: Je
croy (ma chere amie) qu'on vous fait quelque mau-
uais rapport de moy, qui vous estränge de ma compa-
gnie. Je vous prie de croire que ie suis tousiours telle
en vostre endroit, que i'estois lors que nos cœurs liez
d'une chaine d'amitié, ne permettoient pas d'estre si
long-temps sans nous voir. Elinde en souffrant, luy
respondit en ces termes: Je n'ay iamais douté de vo-
stre affection (ma douce vie.) vous m'avez trop tes-
moigné vostre amitié. Si ie ne vous vois si souuent
que ie desire, vostre sœur en est le suiet. Il ne cesse de

m'importuner de mon honneur. Vostre respect m'a fait vser de plus de discretion que ie n'eusse pas fait enuers vn autre. Il faut que vous treuuiiez moyen, ou de le guerir de sa folie, ou de luy interdire de ne m'importuner plus, si vous voulez que nous continuons nos honnestes priuautez.

Isabelle, qui iusques à l'heure auoit ignoré ceste amour, n'en fit que rire, & pria Elinde d'excuser sa jeunesse, luy promettant d'y apporter le remede salulaire. Mais, ô cruel malheur! au lieu d'esteindre son feu, il allumera sa rage à l'encontre d'elle mesme.

Tandis qu'elle prend ceste resolution, Iracond pleure & lamente son cruel defastre, qui le rend amoureux d'un cœur de rocher, qu'il ne peut nullement amollir par ses pleurs ny par sa perseuerance. Son fol desir luy fait rechercher tous les iours quelque nouuelle inuention pour voir sa maistresse, & pour luy faire entendre sa passion. Elle ne sort iamais de son logis, qu'il ne la guette pour la saluer, & pour parler à elle. Il se met à genoux à l'Eglise deuant ceste sainte, où il adresse ses vœux, & non à Dieu. Mais voyant qu'elle deuient de iour en iour plus rigoureuse, il prend vne autre voye. Il s' imagine que sa sœur luy fera vn bon office en ses amours, tant il est hors de iugement. Auec ceste croyance il va chez elle, & l'ayant tirée à part, il luy dit ces paroles.

Ma chere sœur, il n'y a que les marbres, & les pierres dures qui se puissent empescher d'aymer. Je pense que vous auez autres fois esprouué la force de l'amour, si vous n'estes vn tronc insensible. Pour moy qui suis homme, & par mesme moyen subiect aux loix de ce petit Dieu, qui force les Dieux mesmes à recognoistre son pouuoir, il faut donc que ie vous
confesse

confesse que ie suis tellement embrasé des perfectiōs d'Elinde, qu'il m'est impossible de viure plus longtemps, si elle n'a compassion de mon mal. Je vous supplie par le soing que vous deuez auoir de la conservation d'une personne qui vous est si proche, de vouloir adoucir ses rigueurs, & fléchir ses cruantez. Je sçay que vous avez tant de pouuoir sur elle, que ma mort & ma vie sont entre vos mains. Ayez doncques pitié de vostre frere, qui vous sera obligé de la vie, de laquelle vous pourrez disposer comme la tenant de vous. Isabelle ayse que son frere l'eust releuée de la peine qu'elle vouloit prendre à luy parler de cette folle amour, & rencontrât ceste occasion si à propos, luy fit ceste response: Je suis fort estonnée (mon frere) de deux choses, de la vaine poursuite que vous faictes, en recherchant le des-honneur d'une Dame, qui ayme si cherement son mary, qu'elle aymeroit mieux souffrir mille morts, que d'auoir consenty à d'autre amour. Et de vostre impudence, qui passe tellement les bornes de la modestie, qu'elle veut m'employer en vne action si deshonneste, que d'estre la courratiere de vos folles amours. Où avez vous les yeux? Je pense que vous estes auéuglé, & priué de vostre bon sens. Considerez ie vous prie les vertus & les rares qualitez de celle à qui vous adressez temerairement vos desirs, & ce que ie suis; & vous aduouèrèz aussi tost la verité de mō dire. Esteignez ceste folle passion, & ne me parlez iamais plus de ces choses, autrement ie serois contraincte d'informer mon Pere de vos folies. Il pourroit vous chastier cōme vous meritez. Et puis pensez-vous qu'Elinde, si vous continuez d'auātage à la recherche de son deshonneur, ne perde enfin patience, & que sans consideration

sideration de l'amitié qu'elle me porte, elle n'en aduertisse son mary? Il est homme pour vous faire vn affront, s'il en a vne fois la cognoissance.

Iracond tout confus des sages & honnestes raisons de sa sœur, ne sceut que repartir. La rage qu'il auoit de voit qu'elle ne luy vouloit point seruir de truchement, le fit retirer sans luy repliquer vn seul mot. Il va au logis de son Pere, & là se retirant dans sa chambre, il recommence ses plaintes & ses regrets accoustumez, & cent fois il se veut luy mesme priuer de vie. Estrange passion d'amour desordonnée, qui n'a pour but qu'un fol plaisir, qu'elle cause de malheurs! Pour elle le fils ne fait point de conscience d'oster la vie à celuy qui l'a luy a donnée, & vne fille ruine sa Cité & meurtit son propre Pere. Le frere coupe la gorge à sa propre sœur, & vne sœur met en pieces le corps de son frere. Les histoires sacrées & prophanes sont toutes remplies de tels exemples. Iracond accuse sa sœur de peu d'amitié, sans qu'il aye esgard à l'honneur dont elle fait profession. Il demeura quelques iours sans aller à son logis, ny sans rechercher, comme il auoit de coustume, la veuë d'Isabelle, qui ne se soucioit gueres de luy donner allegiance: mais qui estoit toutesfois bien marrie de sa folie.

Après que cét amoureux enragé eut desisté de visiter pour quelque temps sa sœur, son desir l'indita d'y retourner, là où il se plaignoit à toute heure à elle du peu de soin qu'elle auoit de sa vie, & ne cessoit d'importuner Elinde, soit en l'accompagnant outre son gré à l'Eglise, soit en luy iettant quelque poulet dans son manchon. Cette honneste Dame voyant qu'il n'amandoit point, se resolut entierement de ne frequenter

quenter plus Isabelle, afin de ne donner plus suiet à Iracond de la voir, & avec cela elle deffendit à cét amoureux de l'accoster plus. Elle auoit bié du regret de se priuer de la compagnie d'une personne qu'elle aymoit rât, mais son honneur luy estoit encores plus cher. Isabelle d'autre part faschée des deportements de son frere, & voyant qu'il ne se vouloit aucunemēt ranger au train de la raison, fut forcée à la parfin, apres beaucoup de remonstrances inutiles, d'aduertir son Pere de ce qui se passoit. Ariste iustement courroucé, si-tost qu'il void Iracond commēce à le gourmander de paroles, & à le menacer de le bien estriller. Est-ce cecy la peine (disoit-il) que i'ay prise à te faire instruire en tout ce qui peut rendre accomply vn ieune homme de ta profession? Est-ce la belle moisson que ie recueille d'un tel terroir? Au lieu de vacquer à l'estude des bonnes lettres, où ton sort t'appelle, tu t'amuses à faire l'amour, & tasches de seduire celle que la saincte loy de mariage deffend de rechercher? Tu veux encore faire seruir de maquerelle à ta folle passion, ta propre sœur, & luy faire perdre en vne heure tout l'honneur & la reputation qu'elle a acquise de si long-temps. Si iamais on m'abbreuue les oreilles de ces rapports, ie te monstreray qui ie suis, & te traitteray suiuant ton merite,

Iamais homme ne fut plus estonné qu'Iracond, & il n'osoit leuer les yeux de honte: neantmoins le despit & la fureur bouillonnoient dans son ame de telle sorte cōtre sa sœur, qu'il se resolut dès l'heure même de se vanger. Il s'enferme dans vne chambre, où il passa toute la nuict à maudire Isabelle, comme celle qu'il croyoit seruir d'obstacle à son aise. L'ennemy du genre humain, voyant cét homme si transporté hors
des

des bornes de la raisõ, se fourre dedås sõ ame, luy propose la végeáce, & le possède entieremét. Ce mal-heureux n'attend que la venuë du iour pour executer la plus execrable cruauté dõr on ait ouy parler de longtemps. O Soleil! arreste ta carriere en l'autre Hemisphere, pour n'auâcer point par la lumiere que tu veux redonner au nostre, vn si sanglant desastre. Si tu montes sur nostre Horizon, tu seras contraint de voir vne barbarie la plus dénaturée qui arriuera peut-estre iamais au monde. Demons de la douleur, genies offroyables, prestez-moy vos plaintes lamétables, afin que ie puisse dignement descrire cette pitoyable auanture. Que n'ay-je autant d'yeux que celuy que Mercure priua de chef, pour pleurer dignement cette infortune? O Pere! ô mary infortunez! empeschez ce bourreau d'approcher d'vne chose que vous tenés si chere.

Cét execrable frere, poussé par routes les furies des Enfers, apres auoir blasphemé tout le lõg de la nuit le Ciel, la Terre, les Astres, & tous les Elemens, se prepare à l'execution de son dessein abominable. Si tost que l'Astre du iour a chassé les tenebres, il se lene & s'habille, & prend vn poignard qu'il met dans sa poche. Porté d'vne execrable resolutiõ, il s'achemine puis apres au logis de sa sœur. Il monte à sa chambre, & treuve qu'elle sortoit du liët. Elle estoit assise au bout d'vne table, n'ayât pour toute compagnie qu'vne fille de chambre, qui l'aydoit à peigner ses blonds cheveux. Quand elle appercent son frere, elle luy donna le bon iour, & luy demanda où il alloit si matin. Iracond ne luy dit mot, mais il s'assit en vne chaire, tout passe & tout defiguré comme vne furie infernale. Sa sœur que ses cheveux empeschoiët, ne prit pas garde à sa contenance. Lors que le mal-heureux void
q ue

que la fille de chambre descend en bas à la cuisine pour aller querir vn bouillon pour la Maistresse, qui n'estoit gueres bien disposée, à cause qu'elle estoit grosse de six ou sept mois, il prend son temps; & se leuant de la chaire où il estoit assis, il se ruë furieusement sur elle avec son poignard qu'il auoit tiré de sa pochette, & luy en donna vn coup mortel dans son sein d'albastre qu'elle auoit descouuert. La pauvre Dame iette vn cry, tandis que le parricide redouble ses coups, & enfonce deux ou trois autres dans le corps. Au bruit qu'elle fit en tombant & rendant l'esprit, & se recommandant à Dieu, les domestiques accourent, & voyans estenduë leur Maistresse, toute ensanglantée, & cét execrable le poignard encores à la main, ils appellent au secours. Les voisins y accourent pareillement, qui se saisirent du meurtrier, bien estonnez de ce funeste accident.

Sur ces entrefaites le mary arriue, qui voyant de ses yeux celle qu'il aymoit plus que luy mesme, verser vn ruisseau de sang, tombe par terre évanouy. Lors qu'il se releue, il commence vn duel le plus pitoyable du monde, & sçachant qui en estoit l' homicide, il tire son espée, & s'en va contre cét execrable, qui ne faisoit que rire de ses lamentations. Il eust vengé le sang de sa chere espouse, si on ne l'eust retenu: Dieu le permettant pour reseruer l'expiation de ce forfait à vn plus digne supplice. On le saisit, & il est mené prisonnier à la Conciergerie, & mis dans vne basse fosse. Qui pourra dignement reciter la iuste douleur du pauvre pere? Quelle poire d'angoisse! Quel glaive de douleur! Le peintre qui peignit Iphigenie prestre à estre immolée, apres auoir représenté les assistans tristes & dolents, tira son pere

Agamem

Agamemnon avec vn voile sur la face, pour apprendre que la douleur qu'il ressentoit de la perte de sa fille, ne se pouuoit exprimer. Et moy ie laisse au iugement de ceux qui liront ceste histoire, si Ariste n'auoit pas du subject de lamenter son infortune par la perte qu'il venoit de faire d'une telle fille, & par la mort ignominieuse qu'il voyoit preparée à son fils vnique. Pendant qu'il se tourmente & qu'il inuoque le Ciel à luy dōner patience, la Cour veut auoir la cognoissance d'un meurtre si extraordinaire & si execrable, qu'elle pese à la balance de l'equité: meurtre qui est accomgagné d'un autre, non moins dénaturé, qui est la mort de l'enfant, qui meurt avec la mere & encores sans Baptisme. C'est Auguste Senat treuue qu'il n'y a peine de mort si cruelle, que ce meschant ne merite. Comme il est prest d'estre iugé, l'on dit que le pauvre pere poursuit, non pas afin qu'on luy octroye la vie de son fils: mais qu'on le fasse mourir en prison, à fin que sa maison ne recoiue point ceste infamie, de voir son fils mourir publiquement par la main d'un bourreau. Sa Majesté mesme est importunée de ceste grace. Mais le faict est trop atroce, & de trop de consequence. Il est condamné d'auoir le poing coupé à la porte du grand Chastelet, & puis d'estre roué tout vif à la place de Greue. Auant qu'on luy prononçast son Arrest, il estoit resolu à la mort la plus cruelle qu'on luy peust ordonner. Sa passion auoit desia faict place à la raison, de sorte que se representant iour & nuict l'enormité de son crime, il ne faisoit que pleurer, & que lamenter la mort de sa sœur, & d'implorer la mercy du Ciel. O ma sœur (disoit ce mal-heureux) s'il m'est permis de vous appeller ainsi, hélas! quelle fureur
execra

execrable a poussé ma main à respandre vostre sang? Fut-il iamais cruauté semblable à la mienne, que de faire mourir & la mere & l'enfant, & encores des personnes innocentes, pour qui ie deuois exposer mille vies? Quel supplice me peut-on destiner capable d'expier vne telle meschanceté? O terre! que ne t'ouures-tu pour engloutir cét execrable, indigne de respirer, & de comparoistre iamais à la veüe des hommes? O Dieu de misericorde treuueray-ie bien de la remission deuant le trosne de vostre Majesté, lors que ceste ame damnable quittera le logis de c'est infame corps?

Tenant ce discours il eust souuent entré en desespoir, s'il n'eust esté assisté de quelques bons Religieux, qui le venoient voir pour le salut de son ame. Ces bons Peres en luy remonstrant d'un costé le detestable meurtre qu'il auoit commis, luy proposoient d'autre part la douceur infinie de Dieu, qui auoit toujours les bras ouuerts pour ceux qui vrayement contrits & repentans imploroyent sa grace. Leurs saintes remonstrances eurent tant d'efficace, que iamais homme ne fut plus resolu à attendre patiemment la peine qu'on luy ordonneroit, ny plus confiant en la misericorde de Dieu.

Quand on luy prononça son Arrest, il dit aux Iuges qu'il estoit indigne de la douceur de ce supplice, mais qu'il en meritoit vn autre bien plus seuer & plus rigoureux. Estant liuré entre les mains de l'executeur, & mené sur vne claye au lieu où il deuoit auoir le poing coupé, il le rendit, sans iamais faire demonstration d'auoir regret de le perdre, ny de ressentir aucune douleur. *Il est bien raison* (dit-il tout haut) *ô execrable main! que tu reçoies ceste punition.*

*A la mienne volonté que tu l'eusses receüe auant que de
sommenestre le crime , qui me rendra infame eternellement.
Achene bonrreau, & exerce sur mon corps la cruauté que
tu voudras. Tu ne me peux faire tant souffrir de tourment,
que ie n'en merite encore dauantage.*

Tout le peuple admirant la constance de ce ienne
homme, ne pouuoit contenir ses larmes, bien que sa
cruauté fust detestée d'un chacū. Estant arriué au lieu
ou il denoit finir ses iours, auāt qu'on l'estédist sur la
rouë, & monté sur l'echauffaut, il proféra tout haut ces
paroles pleines de bonne repentāce. Contemplez (*As-
sistans*) l'auanture infame & mal-heureuse d'un cruel ho-
micide de sa sœur. Ses pechez l'ont conduit en ce lieu pour
y receuoir un cruel chastiment, mais non pas si senere, qu'il
esgale sa cruauté. Poussé d'une folle passion, i'ay trempé mes
mains dans le sang innocent, & priué mesme (ô execrable
forfaict) pour iamais de la vision de Dieu une creature,
qui n'a iamais veu la lumiere du Soleil. O bon Dieu !
(poursuit-il en s'agenouillant) qui auez promis d'exau-
cer le pecheur toutes & quantes fois qu'il gemiroit à vous
pour son peché, ie vous se mons de vostre promesse. lettez
les yeux pitoyables sur un miserable pecheur, & pardon-
nez son peché non comme ayant le vice, mais comme ay-
mant un homme, en qui le vice est natu rellement attaché.
Et vous, ô Catholique Assemblée, (dit-il encōres en
tournāt les regards d'un coisté & d'autre) si vous estes
touchez de la charité tant recommandable parmy les
Chrestiens, secondez mes humbles prieres, & vncillez par
des vostres implorer du Ciel, qu'il traicte plus favorable-
ment mon ame, que mon corps n'est pas maintenant trai-
cté. O mon pauvre Pere! Dieu vous console. Vous pensiez
que ie serois un iour le baston de vostre vieillesse, &
vous n'auex pas este deceu. Je suis vrayment vostre
baston,

baston, non pour vous soutenir : mais pour vous battre, & pour vous affliger. Ce regret m'est beaucoup plus cuisant & plus sensible que la mort ignominieuse que ie vay recevoir.

Ces paroles estoient accompagnées de tant de zele, & de tant de signes apparents de vraye repentance, que tout le peuple ne pouuoit contenir ses larmes. Chacun prioit pour luy. Et la priere publique, qu'on a accoustumé de faire en ces pitoyables spectacles, estant acheuée, il fut attaché sur la rouë, & rompu bras & iambes par le bourreau, sans que iamaïs il proferast autre parole que le nom de Iesus-Christ. La Iustice auoit commandé au bourreau de l'estrangler bien - tost apres, encores que son Arrest portast, qu'il demeureroit viuant, apres estre rompu, autant que ses forces le pourroient supporter. L'executeur le fit, encores que le patient requist, que pour l'expiation de son crime, on le laissast pâtir en ce monde, afin qu'en l'autre il y treuuaist plus d'allegement. Ainsi finit miserablement ses iours Iracond, pour s'estre laissé emporter à vne rage desespérée d'amour. L'on ne doit pas si follement s'embarquer avec cette passion, qu'on en perde le iugement. Et puis les affections illicites sont tousiours vituperables. Quand on s'y porte avec tant d'ardeur, Dieu permet qu'un peché attire l'autre, & qu'en fin vne iuste punition s'en ensuyt. L'amour honneste est permise, & louable d'elle-mesme : mais d'attenter à la pudicité d'une Dame d'honneur, & de violer un si saint Sacrement, cela n'est iamaïs auoué du Ciel. Les scandales & les horribles excez qui en arriuent tous les iours deuroient seruir d'exemple à ceux qui ne les peuuent ignorer. Mais quoy

La pluspart des mortels n'est iamaïs sage, ny arrestée qu'après le coup receu, & après le dommage. Bien-heureux sont ceux qui ne font à autrui ce qu'ils voudroient ne leur estre point fait. Iamaïs ils ne tomberont en-ces termes. Leur memoire sera memorable, & la recompense suiura leurs œuvres & bien-faits. Ainsi soit-il.



*DVN DEMON QVI APPAROIST
en forme de Damoiselle au Lieutenant du
Cheualier du Guet de la ville de Lyon. De leur
accointance charnelle, & de la fin mal-heuren-
se qui en succeda.*

HISTOIRE VIII.

Em'estonne de l'incredulité de ceux à qui l'on ne peut persuader, que ce qu'on raconte de l'apparition des Demons, soit veritable. Les raisons qu'ils amenant sont si foibles, qu'elles ne meritent presque point de responce, puis qu'elles se refurent d'elles-mêmes. Tout ce qu'ils alleguent pour la preuue de leur dire est, qu'ils rapportent ces visions, ou aux sens qui sont deçeus & trompez, ou à la fausse imagination, ou aux Atomes. Telles personnes sont Achées, & des Epicuriens, qui veulent que tout arriue à l'auanture, & par consequent qu'il n'y ayt ny bon, ny mauuais esprit. Mais nous qui sommes enseignez en vne meilleure escole, & sçauôs par le témoignage que les saintes Escritures en rendent, que les bons

bons & les mauuais Anges apparoissent aux hommes suiuant qu'il plaist à Dieu; nous dirons que tous esprits se peuuent former vn corps. Les bons Anges, comme purs & nets de toute matiere terrestre, en prennent des aériens, purs & simples, qu'ils font mouuoir par la celerité de leur flamme celeste. Et les mauuais Anges ou Demons, comme elementaires & abbaissez iusques à la terre, prennent des corps composez de ce que plus ils desirent. Tantost ils s'en forment d'une vapeur terrestre, congelée par la froidure de l'air: & maintenant de feu, ou d'air & de feu tout ensemble: mais le plus souuent des vapeurs froides & humides, qui ne dorent qu'autant qu'il leur plaist, & qui se resoluent aussi-tost en leur element. Quelques-fois aussi ils se mettent dans les charongnes des morts, qu'ils font mouuoir & marcher, leur influans pour vn temps vne espee de propriété & d'agilité. Les exemples en sont si euidens, & en si grand nombre, que qui les voudroit nier, nieroit la clairté du iour. Et particulièrement celuy que ie veux maintenant rapporter en cette Histoire, arrivée depuis quatre ou cinq ans.

En l'une des meilleures villes de France arrosée de deux beaux fleuves, de la Saone, & du Rhosne, il y auoit vn Lieutenant du Cheualier du Guet, nommé la Iaquier. Suiuant le deuoir de sa charge il alloit la nuit par la ville, pour empescher les meurtres, les voleries, & autres insolences & meschantetez, qui ne sont que trop en vſage aux bonnes villes. Mais avec cela il se dispoſoit luy-mesme quelquefois à visiter les garces, quand il en ſçauoit quelque belle, si bien qu'il estoit grandement blasmé de ce vice. Vn ſoit bien tard entre onze heures & minuit, comme il se

vouloit retirer chez luy, il tint ce discours à cinq de
 ses compagnons qui marchotent avec luy. *Je ne sçay*
mez auis (dit-il) *de quelle viande j'ay mangé. Tant*
y a que ie me sens si eschauffe, que si maintenant ie ren-
controis le Diable, il n'eschapperoit iamais de mes mains
que premierement ie n'en eusse fait à ma volonté. O iu-
 gement espouuantable de Dieu ! A peine a il ache-
 ué de profeter ces paroles qu'il apperçoit en vne rue,
 qui est proche du pôrt de Saone, vne Damoiselle bien
 vestue, accompagnée d'un petit Laquay qui portoit
 vne lanterne. Elle marchoit à grand haste, & sembloit
 à la voir, qu'elle n'auoit pas enuie de sejourner gue-
 res par les rues. La laquiere esmerueillé de voir vne
 Damoiselle si bien parée aller de nuict avec vne si
 foible compagnie, doubla le pas avec ses compagnons
 & l'ayant atteinte, il la salua. Elle faisant vne grande
 reuerence, osta son masque & la salua pareillement. Si
 la laquiere auoit esté émerueillé de rencontrer vne
 personne de ce sexe si bien couuerte à vne heure si
 indenne, croyez qu'il fut encores bien estonné de voir
 tant de grace & tant de beauté luire en son visage.
 Les doux regards qu'elle luy auoit jettez en le saluât,
 l'allumerent aussi tost d'un desir amoureux ; de sorte
 qu'attiré par ceste douce amorce, il s'approcha de
 plus près d'elle, & luy tint ce discours : Vrayement
 Mademoiselle, ie suis fort esbahy de ce que vous al-
 lez par la ville si tard. N'avez vous point peur d'y re-
 ceuoir quelque desplaisir ? Je vous accompagneray
 s'il vous plaist iusques en vostre logis. Je serois bien
 marry si vne telle beauté receuoir quelque affront : Ce
 disant il la prit sous le bras, sans qu'elle le refusast : au
 contraire elle luy respondit en ces termes. Je vous re-
 mercie, Monsieur, de vostre courtoisie. Il n'y aura
 iour

iour de ma vie, que ie ne me publie vostre obligée. Mais pour respondre à la demande que vous me faites, pourquoy ie suis si tard par les rues, vous devez sçauoir que i'ay souppé ce soir chez vne de mes parentes : & maintenant ie me retire à mon logis, encorcs qu'il soit si tard. Si i'eusse esté en vostre place, dit la laquiere, i'eusse mieux aymé passer le reste de la nuit là où vous auez souppé, que non pas m'exposer au hazard de quelque mauuaise rencontre. Je l'aurois bien fait; (repart-elle) mais la necessité me contraignoit à faire autrement. Acheuant ce discours, elle tira vn grand soupir du profond de son cœur. *Quelle necessité* (poursuit le Lieutenant du Guet) *& qui est ce qui peut contraindre vne telle beauté, capable de reduire en seruitude tout le monde?* Mon mary (dit-elle) qui est le plus rude, & le plus mauuais qu'on puisse treuuer. La laquiere se voyant en si beau train, pour luy offrir son seruice, poursuyuit encore son propos en ceste sorte. Est-il possible (dit-il) Mademoiselle, qu'il y ait vn mary si barbare, & si dénaturé qu'estant possesseur d'vne si rare chose, il la puisse indignement traicter? Si ie le cognoissois, ie luy en dirois particulièrement ce qu'il m'en semble. Vrayement (dit ceste Damoiselle) on le luy a assez remonstré. Il est obstiné en sa malice. Pour le present il est allé aux champs, ou il a feint d'y aller. S'il ne me treuuoit au logis, il y auroit bien du bruiet. Sa jalousie est si grâde, qu'il m'assommeroit de coups. Il me tient en telle captiuité, que ie n'ose presque parler à personne. Mademoiselle (poursuit la laquiere) parauanture vous ne sçavez pas qui ie suis. Je puis faire plaisir & seruice à vne infinité de personnes en ma charge, qui est de veiller sur les mauuaises actiôs

des hommes. Asséurez vous que si vostre mary continue à vous traicter si indignement, j'auray moyen de vous en vanger, & de le rendre sage. Elle le remercia de sa bonne volonté, & luy promit de l'en recompenser en temps & lieu. Ils poursuivirent ce discours, & eurent plusieurs autres propos, que la laquiere faisoit tousiours tomber sur l'amour, sans qu'elle fist semblant d'en estre mal contente. Cela pouſſoit nostre homme à poursuiure ses brisées, avec vne ardeur excessiue, car il en estoit desja follement passionné. Or ils auoient loisir de discourir tout à leur aise, parce que le quartier où cette Damoiselle s'alloit retirer, estoit vers Pierre Ancise, bien esloigné du lieu où ce Lieutenant du Guet l'auoit rencontrée. Cependant qu'ils sont en ces termes, où la laquiere s'efforce de tesmoigner à ceste Damoiselle l'amour qu'il luy porte, tant par paroles, que par petits attouchemens, il congedie trois de ceux qui l'accompagnoient & en retient deux avec luy, qui estoient de ses plus intimes amis, & arriue avec eux, & avec ceste femme vers Pierre Ancise, à la porte d'une maison fort escartée. *C'est icy ma demeure* (dit-elle) & à l'instant le petit Laquay qui portoit la lanterne, tire vne cléſ qu'il auoit à sa pochette, & ouvre la porte. Ceste maison estoit fort basse. Il n'y auoit que deux estages: chacun deux membres, & encores les deux plus hauts ne seruoient qu'à tenir du bois & autres choses semblables. Les deux d'en bas estoient vne petite salle, & vne garde-robe. La salle estoit assez bien accommodée. Il y auoit vn liſt de taffetas jaune, & vn pauillon de mesme. Les chaires estoit couuertes de pareille estoffe, & la tapisserie estoit de sarge jaune. C'estoit au mois de

Iuillet,

Iuillet, neantmoins le temps estoit vn peu froid, à cause d'une bise qui s'estoit leuée. Cette Damoiselle commanda au Laquay d'allumer vn fagor. Tandis qu'il obeyt à son commandement, la laquiere s'assied en vn coin de la salle dans vne chaire, & elle en vne autre. Le desir qu'il auoit d'esteindre le feu qui le consumoit, fit qu'il luy descouurit entierement son amour, & la coniura d'auoir pitié de sō mal, luy promettant toute sorte de seruices, pourueu qu'elle luy octroyast la courtoisie. Elle faisoit semblāt de le refuser, opposant l'honneur pour sa defence, l'infidelité des hommes au siecle où nous sommes, & leur peu de discretion; qui publie aussi tost vne faueur qu'ils l'ont receuë. Cēt Amoureux fait des serments horribles, & dit que iamais elle n'aura sujet de se plaindre pour sō regard: que plustost il perdrait mille vies que de la des-honorer, & qu'il est prest de s'exposer pour son seruice à toutes sortes d'occasions. En fin apres beaucoup de propos tenus d'une part & d'autre, elle consent de luy accorder sa demande, à la chargē qu'il se ressonuienne de sa promesse, & de ses serments. La laquiere luy confirme par d'autres, & au mesme instant ils entrent tous deux dans la garderobbe, où il y auoit vn petit liēt de pareille estoſſe que les autres, & là ils prennent leurs deduiets ensemble.

Nostre homme ayant receu l'accomplissement de ses desirs, commença de la caresser, & à luy protester de nouveau que iamais il n'oublieroit vne telle faueur, & que deormais elle pouuoit disposer de luy & de ses biens, comme des siens propres: *Toutefois* (dit-il) *Madamoiselle, bien que ie vous sois si redevable, vous m'obligeriez, encores d'auantage, si vous me vouliez accorder vne autre faueur.* Et de quoy (respond-elle) me

ſçauriez vous requerrir que ie ne vous octroye , puis que ie vous ay deſia eſté ſi liberale de ce que i'ay plus cher au monde ?

Vous devez ſçauoir, Madamoifelle (repart la laquiere) que ie ſuis venu ceans en compagnie de deux les plus grands amis que i'aye au monde. Nous n'auons rien de propre, & tout eſt commun parmy nous. Si ie ne leur faiſois part de ma bonne fortune , parauanture cela ſeroit cauſe de rompre le lien d'amitié qui nous eſtreint ſi fermement, & par meſme moyen ils pourroient publier nos amours. Ie vous ſupplie doncques que la meſme courtoisie que vous m'avez octroyée, ne leur ſoit point refusée. Iamais nous n'oublierons vne telle faueur, & vous pourrez vous vanter deſormais d'auoir trois hommes à voſtre commandement qui ne ſont qu'un, & qui ne respireront que voſtre obeyſſance. Helas que ie ſuis mal-heureux ! (reſpond la Damoiſelle.) Ie penſois auoir fait acquisition d'un loyal amy, qui vouluſt tenir chere la faueur qu'il auoit receuë de moy: mais ie vois maintenant qu'il ne viſoit à d'autre deſſein, qu'à tirer de moy ce qu'il deſiroit, puis qu'il le diuiſe de la ſorte. Eſt-ce icy la recompence que i'en reçois ? Eſtimez-vous que ie ſois vne louue, pour m'expoſer à l'abandon de tant de perſonnes ? Ie n'euiſſe iamais creu cela de vous, qui auez receu de moy ce qu'homme viuant, hormis mon mary, n'a iamais peu receuoir: ie vous prie, ne me parlez plus de ces choſes, autrement ie me donnerois la mort de ma propre main. Ce diſant, elle ſe leue, & faiſt ſemblât de vouloir ſortir hors de la garderobbe, mais la laquiere la retient, & puis avec les plus belles paroles qu'il peut proferer, il la ſupplie d'appaier ſa colere: il l'embrasse, & la baiſe, & s'eſchauffe

s'échauffe si bien encores en son harnois, qu'il continuë pour la seconde fois de prédre ses plaisirs avec elle. Ayant acheué cette belle œuvre, ils sont collez bouche à bouche l'un avec l'autre, & la laquiere qui veut que ses compagnons ayent part au gasteau, la coniuere vne autre fois de ce dont il l'audit auparavant requise, & la flatte si bien avec tant de douces promesses, qu'en fin apres beaucoup de refus & de plainctes qu'elle faict, il la fleschit à ce qu'il desire, encores qu'elle face semblant d'en estre dolente. La laquiere ayant obrenu à grande peine ce qu'il souhaitoit, sort de la gardrobe, & s'approchant de ses compagnons, qui l'attendoient avec impatience, & avec vn desir violent d'esteindre leur salé ardeur, il guigne de l'œil à l'un deux, afin qu'il entre au lieu où il l'auoit laissé. Cét homme ne se faict gueres prier. Il y trouue la Damoiselle sur le liét; & sans autre ceremonie il en faict à son plaisir. Apres il sort, & l'autre qui restoit y va pareillement, & reçoit d'elle le don de l'amoureuse mercy. Les voila donc tous trois si aises de ceste bonne fortune, qu'ils ne la changeroient pas pour vn Empire. Chacun d'eux prend vne chaire où ils s'assient, & la Damoiselle s'assied en vne autre auprès d'eux. Ils ne cessent de la contempler, & de l'admirer. L'un loüe son front, & dit que c'est vne table d'yuoire bië polie. L'autre s'arreste sur ses yeux, & assure que ce sont les deux flambeaux dont Amour allume toutes les ames generenses. L'autre se met sur la loüange de ses blonds cheveux qu'elle delioit, parce qu'il estoit temps de s'aller coucher, & ne cesse de profeter tout haut, que es sont les filers où le fils de Cypris arreste la liberré des hommes & des Dieux. En fin il n'y a partie en son corps qu'ils ne prisent,

présent. Ses mains ne vont iamais en vain à la conquête. Sa gorge surpasse la blancheur de la neige, & les petits Amours volettent à l'entour de ses joües, pour y succer les roses, les lys, & les œillers que la Nature y a semez. Apres qu'ils ont bien chanté les perfections, elle se leue de sa chaire, s'approche du feu, & puis se retournant vers eux leur tient ce discours : *Vous croyez (dit elle) auoir fait vn grand gain d'auoir obtenu de moy l'accomplissement de vos desirs. Il n'est pas si grand que vous penseriez bien. Avec qui pensez vous auoir eu affaire ?* Ces hommes estonnez d'entendre ce langage, ne sçauoient que respondre, lors que la laquiere profera ces paroles. Je croy Mademoiselle, que nous auons eu affaire avec la plus belle, & la plus galante Dame qui viue. Quiconque diroit le contraire, manqueroit d'yeux, ou bien de iugement. *Vous estes trompez (repart-elle :)* *Si vous sçauiez qui ie suis, vous ne parleriez point de la sorte.* Ils furēt encores plus esbahys de ces paroles, & comme ils auoient tous trois les yeux fichez sur elle, & qu'ils se doutoient quasi de ce qui en estoit, elle continua de parler à eux en ces termes : *Je veux me descouurir à vous, & vous faire paroistre qui ie suis.* Ce disant, elle retroussa sa robbe & sa corte, & leur faict voir la plus horrible, la plus vilaine, la plus puante, & la plus infectée charongne du monde. Et au mesme instant il se faict comme vn coup de tonnerre. Nos hommes tombent à terre comme morts : La maison disparoît & il n'en reste que les masures d'vn veil logis descouuert, plein de fumier, & d'ordure. Ils demurerent plus de deux heures estendus comme des pourceaux, dans le boubier, sans reprendre leurs esprits. En fin l'vn d'eux commença à respirer,

& à ouvrir les yeux & veit la Lune qui acheuoit dans le Ciel sa course. Il fit le signe de la Croix, & se recommanda à nostre Seigneur. Il s'efforça de crier, mais la grande frayeur qu'il auoit eüe, luy auoit osté la parole. Comme petit à petit il commençoit à se plaindre, Dieu permit qu'un homme portant vne lanterne s'arresta en ce lieu pour y descharger son ventre. Quand il entendit ces gemissemens, il s'enfuit, & courut pour l'annoncer aux maisons prochaines. Le iour commençoit desia à pointer, lors que les voisins vindrent à grande haste pour voir que c'estoit, & trouuerent la laquiere qui commençoit de respirer & d'implorer le secours d'en haut. Le premier qui auoit commencé à se recognoistre se plaignoit pareillement : tandis que l'autre dormoit d'un sommeil eternal. Il mourut de peur sur le champ. Ceux qui estoient accourus ayant recogneu le Lieutenant du Cheualier du Guet avec ses compagnons, les emporterent chacun en son logis, tous souillez d'ordure, comme ils estoient. On enterra vn des trois, & les autres deux demanderent vn Confesseur. La laquiere mourut le lendemain, & l'autre ne vesquit que trois ou quatre iours apres. Ce fut celuy qui raconta le succez de ceste auanture. Le bruit ayant bien tost esté semé par toute la ville, il se respendit en peu de temps par toute la ville, il se respendit en peu de temps par toutes les Prouinces de la France. Ceux qui nient l'apparition des Esprits, ne scauroient que dire, se voyans confondus par vn tel exemple. Mais les Chrestiens & Catholiques y remarquerent les iustes iugemens de Dieu. Ces choses n'arriuent point à ceux qui se disent de la compagnie des fideles qu'ils n'ayent commis d'autre pechez. La paillardise attire l'adultere,

l'adultere, l'inceste, le peché contre nature, & apres Dieu permet qu'on s'accouple avec le Diable. Je ne dis pas que ces hommes fussent entachez de tous ces vices. Mon dessein est de ne blasmer personne. Je ne deteste que le vice ; & soustiens qu'on est bien delaisé de l'assistance du saint Esprit, quand on tombe en de tels inconueniens. Il reste maintenant à dire, si c'estoit vn vray corps celuy avec qui ils s'accoupleroient, ou bien vn corps fantastique. Pour moy ie croy fermement, que c'estoit le corps mort de quelque belle femme, que Sathan auoit pris en quelque sepulchre, & qu'il faisoit mouuoir. Et si l'on me dict qu'il n'y a pas d'apparence que le Diable vueille emprunter vne charongne, parce qu'on le descouueroit aisément par sa puanteur : ie responds, que puis que le malin esprit a pouuoir de donner mouuement à ce qui n'en a point, il a bien aussi la puissance de luy donner telle odeur, & telle couleur qu'il voudra. Ioinct qu'il peut tromper nos sens, & s'insinuer dans eux, pour nous faire prendre vne chose pour vne autre.

Nous en auons plusieurs tesmoignages arriuez de nostre temps. Celuy de la Demoniaque de Laon entre autres en fait foy. Vn Diable appellé Baltazo, prit le corps d'un pendu à la plaine d'Ailon à la sollicitation d'un sorcier qui s'ingeroit de guetir la patiente. Si quelqu'un desire de sçauoir comme la fraude fut descouuerte, il ne faut que lire l'Histoire de cette possédée, qui est assez commune en France. Il y a vne autre infinité de tels exemples dans les histoires anciennes & modernes. Phlegon affranchy de l'Empereur. Adrian en rapporte vne estrange, d'une ieune fille, nommé Philinion de Thessalie, qui apres auoir
esté

esté mise au sepulchre parut à Machates Macedonien, coucha long-temps avec luy & iusques à tant, qu'ayans esté descouverts, le Diable abandonna ce corps, qu'il faisoit mouuoir, & on l'enterra pour la seconde fois, comme si elle fust encores trespassee.

Le mesme Auteur rapporte, qu'apres la bataille qui se donna entre les Romains, & Antiochus Roy de Syrie aux Thermophyles, comme les Romains s'arrestoient sur le pillage, & despoüilloient les corps morts des ennemis, vn Capitaine du Roy, nommé Duplage, se leua d'entre les morts, & puis en voix gresle & desliée proféra ces paroles : *O soldats Romains ! cessez de despoüiller ceux que l'auare Nainonier a desia passez au delà du fleuue infernal, Le grand Iupiter, de qui l'on doit redoubter l'ire & la fureur, est transporté de colere pour cette cruauté & inhumanité. Vn iour viendra, que ce Dieu souverain couvrira vostre terre d'un peuple nourry aux sanglants exercices de Mars. Il sacagera vostre pays, & pillera vostre grande Cité. Vostre Empire sera par luy destruiët, en la mesme sorte que vous auez destruiët les autres.*

Ces tesmoignages sont capables de refuter les Achées, & les Epicuriens, qui nient l'apparition des Esprits : mais l'Histoire horrible & espouuantable, que ie vous ay desia racontée par cy-deuant, le tesmoigne bien encores dauantage.

* * *



DES AVANTURES TRAGIQUES
de Floridan, & de Lydie.

HISTOIRE IX.

Que la race des mortels est sujette à des accidents diuers ! La vie de l'homme est vn branle perpetuel, vn flot inconstant, & vn nuagé porté au gré des vents. Rien ne se treuve de durable, & la felicité qu'on s'y propose pour la plus assurée, est celle qui est la plus sujette au changement. L'amour, l'honneur, les richesses, la beauté, & le contentement s'y rendent comparables à vn éclair, à qui naistre & mourir, luire & s'esteindre est vne mesme chose. L'histoire deplorable que ie veux descrire en rendra tesmoignage. Les memoires que l'vn de mes amis, curieux de recueillir les choses plus memorables qui arriuent tous les iours au monde, m'en a donnez, me l'ont apprise en cette maniere.

Cleon heretier d'une des plus illustres maisons de France, estoit vn Seigneur accomply en beaucoup de rares qualitez. Il auoit mille fois tesmoigné son courage & sa valeur aux yeux de son Prince, en tant de batailles & de rencontres, qu'à bon droit il auoit acquis le tiltre de parfait Cavalier. Lors que l'aage le dispensa de se treuver desormais aux sanglans exercices de Mars, il se retira en vne sienne maison bastie aux bords du beau fleuve de Loire. Quand il quitta le train des armes, il auoit desia perdu Cleonice sa chere esponse, à qui les vertus seruoient de lustre & d'ornement. De leur chaste couche estoit procedé vn
 fils

filz nommé Floridan, doüé de beauté & de bonne grace, autant que Gentil-homme de son temps. Apres que le Pere l'eut faict instruire en tout ce qui peut rendre recommandable vne personne de pareille qualité, il delibera de le marier de bonne heure, avec la fille d'un Seigneur, sien voisin, fort riche, & fille vnique, de mesme que Floridan estoit fort riche, & filz vnique. Comme les deux Peres estoient sur le point de faire cette alliance, il arriva que Floridan, qui estoit pour lors à la Court en reputation de l'un des plus galans Cavaliers, se rencontre vn iour en la galerie du Palais: lieu où communement la ieune Noblesse se rend pour y voir vne infinité de belles Dames, qui y abordent aussi de toutes parts. Comme il s'y entretient avec d'autres Cavaliers, vne ieune Damoiselle y passe masquée. Elle estoit de belle taille, & de fort bonne mine: *Si cette Damoiselle (dit Floridan) est aussi belle sous son masque, comme elle le faict paroistre en apparence, elle merite d'estre servie des plus braves.* Tenant ce discours, & ayant tousiours ses regards arrestez sur elle, il void cōme elle s'arreste à vne boutique pour y acheter vne escharpe. Floridan se servant de cette occasion s'approche, & la salue courtoisement. La Damoiselle voyant vn si honneste & si beau Gentil-homme, oste son masque, & luy rend son salut. Ce ieune Seigneur n'eut pas plustost apperceu son beau visage, qu'Amour qui estoit en embusche, n'aura son cœur de telle sorte, qu'il fut contrainct de s'aduoüer pour vaincu. Il se met à entretenir cette Damoiselle, qui n'estoit pas moins estonnée de sa bonne grace, qu'il l'estoit de sa rare beauté. Floridan apprend d'elle son nom, le lieu de sa naissance, sa demeure, & les affaires qui la retiennent en ville à la

poursuite d'un procez deuolu par appel en la Court de Parlement. Apres que cette Damoiselle, que nous nommerons Lydie, yssue d'une noble famille de Picardie, eut conté à Floridan l'estat de ses affaires, il l'accompagna en son logis, & dès l'heure il luy offrit de l'assister, & d'employer ses amis pour luy faire obtenir le gain de sa cause. Et d'effect il la prit si bien en main, & la sollicita de telle sorte, qu'en peu de temps elle obtint un Arrest fauorable. Comme elle eut obtenu ce qu'elle desiroit, elle voulut s'en retourner à son pays, lors que Floridan luy representa l'amour qu'il luy portoit si violente, qu'il luy estoit impossible de viure plus longuement, si elle n'auoit soin de son allegiance. Qu'il la coniueroit par son extreme passion d'allegier son martyre, & de n'exercer point sa cruauté contre une personne, qui ne viuoit que pour l'aymer & pour la seruir. Lydie comme une fille bien apprise, luy opposoit aucontraire, qu'encores qu'elle luy fust si sedeuable, elle faisoit neantmoins tant de conte de son honneur, qu'elle ayroit mieux perdre la vie, que de le noircir d'aucune tasche. Quelle le supplioit de prendre la raison pour guide, & d'oster son amour d'un suict, qui pour la difference & inégalité du sang, luy deuoit estre interdit.

Vous estes grand Seigneur (disoit-elle) & ie ne suis qu'une simple Damoiselle. Vous devez adresser vos vœux à une Beauté digne de vostre maison, & de vostre merite. Il faut que i'aduouë que ie vous honore, & vous aime plus que toute autre personne: mais la reputation que toutes les honnestes Dames doiuent auoir en estime, empeschera tousiours que ie n'accomplisse mon desir & le vostre. Contétez-vous ie vous prie, de l'un, & ne m'importunez point de l'autre,

l'autre, puis qu'il n'est point en mon pouuoir de vous l'oëtroier, sans faire vne cruelle bresche à mon honneur. Floridan oyant la sage respõse de cette Damoiselle, l'en estimant dauantage luy repart en ces termes: la n'aduienne (ma chere ame) que ie tasche à vous oster vne chose, pour qui i'exposerois mille vies. Si ie vous recherche, ce n'est que par la voye d'un legitime mariage, que ie celebreray lors que vous me voudrez accorder tât de grace que de m'aduouier pour vostre espoux. I'en feray paroistre les effects quand il vous plaira. Monsieur (dit elle) ie ne sçay comme cela se pourroit faire. Vostre Pere n'y consentira iamais:& si vous le faites clandestinemẽt, ce sera luy donner suiet de se plaindre & de vous & de moy. Iamais nous n'aurons du contentement auprès de luy. Floridan luy respond qu'elle ne se mist point en peine de ce costé, qu'il sçauoit bien vn moyen pour venir à bout de ce dessein.

Durant que leurs amours s'allument, le Gouverneur de ce ieune Seigneur, nommé la Garde, au lieu de le reprendre à bon escient, le fauorisoit, & se laissoit emporter au courant de sa passion. Encores qu'il fust sage & bien aduisé, & qu'on eust fait eslection de sa personne, pour veiller sur ses actiõs: toutesfois il se representoit que desia ce ieune Seigneur estoie grand, & que l'amour estant vne flamme qui ne peut aisément s'esteindre, il pourroit encourir la mauuaise grace, & perdre la recompense qu'il esperoit de son long seruice. Foibles raisons d'un homme à qui l'on a commis vne telle charge. Sans doute s'il eust aduertý secrettement le Pere de Floridan de cette affaire, les malheurs qui en arriuerent depuis, eussent esté detournez par le remede que Cleon y eust mis: La con-

clufion de ce mariage prise; Floridan accompagne Lydie en fa maison, qui estoit, ainsi que nous auons desja dict en Picardie. Lors qu'ils y sont arriuez, elle dispose de ses affaires, emporte ce qu'elle peut du logis paternel, & sans prendre congé d'aucun de ses parens, elle treuve le gouuerneur de Floridan, qui l'attend hors la ville, & qui la monte sur vne haquenée, & la mène en Auvergne, en vn Chasteau que le pere de Floridan y auoit. Tandis Floridan qui s'estoit arresté à Paris pour leuer des estoifes, & pour acheter des bagues & des joyaux, prend la poste, & arriue aussi-tost qu'eux au lieu assigné. Cependant les parens cherchent cette Damoiselle par tout, & emploient inutilement beaucoup de peine pour sçauoir de ses nouvelles, tandis que Floridan faict venir vn Prestre, & en presence de la Garde & de son valet de chambre, espouse Lydie. Les voila doncques mariez, iouyffants à souhait de leurs desirs. Ils n'auoient qu'un cœur. Ils sont tousiours ensemble, & ne peuvent, sans souffrir vn cruel tourment, d'estre separez l'un d'avec l'autre. Toutesfois Floridan est contrainct de faire quelque voyage vers son pere, mais c'est le plus rarement qu'il peut. Au bout de l'an Lydie produict de ce mariage clandestin vn fils. Ils le font nourrir & esleuer, & Floridan luy faict porter le nom de sa maison. Je l'appelleray Gentian. Mais pendât qu'ils cueillent le fruit de leurs amours sans trouble ny empeschement, la fortune qui n'a d'autre fermetté que l'inconstance, apres leur auoir monstré vn visage si riant, & si fauorable, & qu'elle leur eut faict goustertant de douceurs, se prepare à leur tourner le dos, & à leur faire aualer tout ce qu'elle a d'amertume. Le Ciel qui leur auoir esté si calme & si serain, ne fera desormais
pour

pour eux qu'un orage de mal & de lueur & d'infortune.
La cause en fut telle.

Le Roy pour venger le tort que des Provinces
Estrangeres luy faisoient, & pour recouurer ce qui
luy appartenoit iustement, auoit en ce temps leué
vne grande armée, & passé les monts. Des-jà tout
trembloit au bruit de ses conquestes, & la victoire
qui l'auoit accompagnée en deux sanglantes batailles,
luy promettoit le triomphe entier de ses ennemis;
quand Floridan considerant le rang qu'il tenoit en
France, & le merite que ses Ancêtres s'estoient ac-
quis dans les Histoires fidelles, se resolut de quitter
pour vn temps le myrthe, pour le laurier, & d'aller
employer la force de son bras en vne occasion si cele-
bre & si remarquable. Il communique son dessein à
Lydie, qui au commencement ne pouuoit se resou-
dre à souffrir l'Eclypse de son beau Soleil. Ses beaux
yeux ne cessoient de verser vn torrent de larmes, &
sa belle bouche estoit incessamment ouuerte aux sou-
pirs & aux sanglots. Floridan luy representoit l'hon-
neur qui le conuioit à partir: & la bresche qu'il fe-
roit à sa reputation, si pendant que tant de braues
Cavaliers auoient pour tesmoins de leur valeur, les
yeux d'un si grand Monarque, il demeueroit en sa mai-
son, avec autant d'infamie, que les autres possedoient
de gloire. Que cela luy apportoit vn grand preiudice,
& à luy & à sa posterité, & luy seroit deormais vn
obstacle pour atteindre aux charges & aux qualitez
que les predecesseurs auoient si dignement exercées.
Qu'elle ne trouuaft doncques bonne sa resolution,
puis qu'elle estoit fondée sur l'honneur qui doit seruir
de conduite aux ames genereuses, & qu'elle se con-
solast de l'esper d'un prochain retour.

Ces raisons si iustes furent en fin capables d'appaiser en quelque sorte le ducil de Lydie, que Floridan pourueut de tout ce qui luy estoit necessaire pendant son absence, & laissa en charge le Chasteau où ils se tenoient à son Gouverneur, le priant d'auoir soin de sa femme, comme de luy-mesme, & promettant de l'en recompenser, ensemble des autres seruices qu'il luy auoit rendus, si tost qu'il seroit de retour. La Garde luy promit toute fidelité, & toute assistance, en ceste affaire, & d'y exposer mesme sa propre vie, s'il en estoit besoin. Mais le traistre garda mal sa promesse, ainsi que nous verrons par la suite de ceste histoire. Apres que Floridan fut party, avec vn équipage digne de sa grandeur, la Garde alla treuuer son pere, pour voir ce que l'on disoit, & pour decouurir s'il n'auoit pas eu le vent de ce mariage.

Celcon l'ignoroit : mais neantmoins il auoit soudement appris que son fils entretenoit vne Damoiselle en Auvergne, en ce Chasteau, dont nous auons desia parlé. Cela la faschoit fort, & il eust volontiers empesché ces amours & chassé le sujet de cette place, s'il eust peu : mais elle estoit si forte & si bien gardée, que personne n'y pouuoit entrer, sans la permission de celuy qui en auoit le gouvernement. D'autre part, il auoit peur de faire desplaisir à ce fils qui estoit vnique en sa maison, & qu'il ay-
moit à l'esgal de luy mesme. Si tost qu'il veid le Gouverneur, il commença à se plaindre, & à luy tenir ce langage. *Je n'eusse iamaïs creu (La Garde) que vous eussiez procedé au gouuernement de mon fils comme vous auez fait. Je fis eslection de vostre personne, comme d'un sage Gentil-homme, qui ne doit auoir pour but que l'honneur & la reputation. Mais au lieu de re-*
primer

primer les folles passions d'une ieu nesse ; vous avez non seulement presté vostre consentement à ses desirs : voi e encorez vous luy avez seruy de support. Est-cecy le fruit que i'espérois de la nourriture qu'il deuoit receuoir de vostre main ! O Dieu quelle gloire avez vous acquise ! l'ay appris que vous avez changé la qualité de Gouverneur, en celle de maquereau, non indigne de Gentil-homme, & qui vous fera porter désormais une marque sur le front, que vous n'effacerez iamais. La Garde ayant ouy ce discours, & piqué iusques au vif par vne telle injure, respondit à Cleon en ces termes : Monsieur vous me faites un grand tort de m'auoir en vne si velle estime. Si un autre que vous, & qui fust de ma qualité, me tenoit ce discours, ie perdrois la vie ou i'en tirerois ma raison. Je n'ay iamais appris à Monsieur vostre fils que tout exemple d'honneur, & de vertu. Les rares dons dont il est accomply en pourront tousiours donner un fidel tesmoignage. S'il a esté transporté d'amour, ie n'en suis pas cause. L'amour est vne si violente ardeur, qu'il est bien difficile de l'esteindre. Je pense que vous l'avez assez expérimenté, lors que vostre aage vous connoit à le servir. Je puis neanmoins dire avec assurance que les amours de Floridan ne m'ont iamais esté cogneus, iusques à tant qu'il me fit appeller pour tesmoin, & qu'il espousa en ma presence, vne honneste Damoiselle, qu'il chérit, & qu'il tient maintenant pour sa femme & dont il a eu un fils. Appelez vous maquerelage, ce qui se fait par la voye de l'Eglise, & par consentement des parties : Pouuois- ie désormais separer ce que Dieu auoit joint ? Quand vous considererez bien tout, vous trouuerez que ie ne suis si coupable que vous me faites. Il voulut continuer ses excuses, lors que le pere ne pouuant supporter d'auantage le regret qu'il ressenoit

de ceste clandestine alliance, l'interrompt par ces paroles. Mon fils est doncques marié sans mon consentement, & avec vne fille desbauchée, & de bas lieu : O Ciel puis-je bien ouyr ceste nouvelle sans mourir ! Est-cecy l'alliance que j'espérois de faire pour la grandeur de nostre maison. Haila Garde vous m'en deuiez aduertir plustost, & i'y eusse apporté le remede qu'il y falloit apporter. Si ie l'eusse fait (respond le Gouverneur) il y alloit de ma vie, mais si vous me voulez croire, & me recompenser de ma peine, ie scay vn moyen pour tirer dehors ceste femme, & pour l'enuoyer en vn lieu, dont vous n'orez iamais parler. Si vous le faictes (dit Cleon) ie promets de vous recompenser si dignement que vous aurez sujet de viure content le reste de vos jours. Le gouverneur le prie de luy laisser manier l'affaire, & l'assure qu'il s'y comportera si dextrement qu'il n'aura occasion de se plaindre de luy. En ceste resolution, ce meſchant perfide part de la maison du pere, pour s'en retourner en Auvergne, & durant le chemin il inuente la plus grande trahison dont on aye iamais ouy parler. Auant que d'arriuer au chasteau où estoit Lydie, il s'abille de noir, & en cét accoustrement il se presente à la maistresse de Floridan tout triste, & les larmes aux yeux. Helas Madame (ce dit il) la grande petre que nous venons de receuoir, vous & moy ! Vous avez perdu vn tel mary, qu'il est impossible que vous en recourriez iamais vn semblable, & moy le meilleur maistre du monde. Nous auons du sujet de nous plaindre. Tout nostre espoir est mort avec Floridan, qui a esté tué en vne bataille. La dolente Lydie tombe à ces tristes mots par terre pâmée. Sa Damoiselle de chambre avec la Garde, taschent

taſchent à luy faire reprendre ſes eſprits, & à la conſoler. Lors qu'elle ſe recognoiſt, elle proſere de ſi pitoyables plaintes qu'elles ſeroient capables d'eſmouvoir les pierres, & les marbres. Ha ! fauſſe fortune (diſoit ceſte miſerable) m'auois-tu colloquée en vn ſi haut throſne de gloire, pour m'en faire cheoir ſi promptement. A qui auray- ie deſormais recours, puis que j'ay perdu le ſouſtien de mon heur, & de ma vie. J'ay abandonné mes parens, qui ſe moqueront maintenant de moy, ſi ie me retire vers eux. Pour ſuture Floridân ie me ſuis renduë odieuſe à tous mes amis. Itay- ie vers ſon pere ? Il me tiendra pour vne impudique, & au lieu de me traicter comme ſa belle fille, il voudra me faire punir comme coupable. Acheuant ce diſcours elle ſ'eſuanouÿt derechef: cependant la Garde la faiſt emporter en ſa chambre, & coucher ſur vn liſt, où elle pleure, crie & ſe tourmente : mais c'eſt la maniere des femmes, qui pleurent & rient à meſme temps, & de qui l'amour (comme l'on dir) & la douleur ne durent que l'aage des animaux qu'on nomme Ephemerés, qui ne vivent qu'vn iour. L'exemple de Lydie me ſeruira de caution. Quand elle a bien crié & appellé à ſon ſecours la mort, triſte recours des miſerables, la Garde la vient veoir, & apres quelques diſcours & quelques plaintes ſur le ſuiect de leur commun deſeſtre, ce traïſtre tient ce langage: Vous ſçaucez (Madame) que les choſes que la mort rait, ne retournent plus au monde. Il n'eſt plus temps de nous conſumer aux ſouſpirs & aux regrets, mais de donner ordre à nos affaires. Floridân n'eſt plus en vie pour nous aſſiſter à noſtre beſoin. Vous eſtes deuëe de tout ſupport, comme moy de maiſtre. On ne vous aduoüera iamais pour

la femme, de sorte que ny vos parens ny les siens ne vous traicteront jamais suiuant vostre merite. Si vous voulez redre l'oreille à vn aduis salutaire que ie vous donneray, vous pourrez viure desormais, sinon avec tant de fortune que vous auez, pour le moins en vne paisible condition. Je fay tant de conte de vos perfections, que si vous voulez me receuoir pour vostre espoux, ie m'efforceray desormais de vous rendre, non seulement tout deuoir de mary : mais encore de seruiteur, quand ie n'aurois autre consideration que vous auez esté la femme de mon maistre. Si vous considererez l'estat où vous estes reduicte, & ma cōdition, la chose ne vous semblera pas si desauantageuse que vous pourriez estimer de premier abord. Je suis Genril-homme d'assez bon lieu, qui ay encores en Poictou deux mille liures de rente. Si nous sommes contraincts à desloger de ce lieu, nous y passerons le reste de nos iours avec tant de contentement, que nous auons mainrenant de desplaisir.

Lydie oyant ce discours, ne sçauoit que luy responde, tant elle se trouuoit confusé. D'un costé elle se representoit l'honneur qu'elle auoit eu d'espouser vn si grand Seigneur, dont elle auoit vn fils, qui selon le droict diuin & humain, deuoit vn iour posseder soixante ou quatre vingts mille liures de rente. La mort si fraische & si recente de Floridan, & les reproches qu'on luy pourroit faire de l'auoir peu aymé, si elle consentoit si tost à ceste amour, se representoit deuant elle. D'autre part sa misere presente offroit deuant ses yeux le peu de support qu'elle pouuoit receuoir de ceux qui luy appartenoient, & le peu de moyen qu'elle auoit pour faire authoriser son mariage. Ces dernieres considerations meslées avec l'ap-
prehen

prehension de deuenir plus miserable qu'elle n'estoit, eurent tant de force, qu'elle fut induitte à cōsentir à la recherche de la Garde. Par cēt exemple nous pouuons remarquer l'inconstance de ce sexe, plus variable que la giroüetre d'une tour, & plus mouuant que le fable. C'est vn rare oyseau qu'une femme constante. Nos siecles n'en produisent plus, & s'ils en ont produit quelqu'une, la semence en est perduë. Voila doncques comme ce traistre ayant la volonté de cette legere, paruient au but qu'il auoit tant desiré. Sans doute il y auoit long - temps qu'il en estoit amoureux, mais iamais il n'auoit osé declarer son amour, pour le respect de son maistre, & pour la peur qu'il auoit d'estre chasté de sa temerité. Ils accomplissent doncques leur mariage en cette sorte : C'est que la Garde faict venir le Curé du prochain village, & en presence d'un des domestiques qui luy estoit affidé, il espouse Lydie, & souille perfidement la couche de celuy à qui il auoit autresfois donné contraires instructions. Apres auoir asseruy ses desirs durāt l'espace de quelques iours, il dit à Lydie, qu'il auoit appris de bonne part, comme le Pere de Floridan le menaçoit de leur enuoyer vn Preuost pour se saisir de sa personne, disant qu'elle auoit retenu plusieurs bagues & joyaux appartenans à feu son fils: que pour euitier cēt inconuenient, il estoit d'aduis que tous deux se deuoiēt retirer en Poictou, en la maison qu'il y auoit, où ils pourroïēt desormais passer leurs iours sans aucun trouble. Lydie veut ce qu'il veut, & se remet à son iagement, pour disposer de sa personne, comme celuy qui a toute puissance sur elle. Ils disposent doncques de leur depart, & emportent ce que Lydie a de plus precieux, & font tant par leurs iournées qu'ils

qu'ils arriuent en Poictou, en vne maison où se tenoit le frere aîné de la Garde. Apres y auoit sejourné quelques iours, le traistre dit à Lydie qu'il veut faire vn voyage vers le Pere de Floridan, pour tirer de luy ce qui luy estoit deub de reste de ses gages, pour rachat à receuoir quelque digne salaire des longs seruices qu'il luy a rendus au gouuernement de son fils: l'asseur de reuenir bien-tost, pour viure désormais avec elle en toute sorte de liesse, & en sa presence il la recommande à son frere, & à sa belle sœur, & les prie de luy faire le meilleur traitement qu'il luy sera possible. Cependant il aduertit secrettement son frere, que sept ou huit iours apres son départ, il la chasse & mette hors de sa maison, & qu'on n'en entëde plus parler. Indignité la plus cruelle qui se puisse iamais imaginer, ainsi que vous apprendrez tout presentement. La Garde part doncques, & arriue en peu de temps en la maison de Cleon. Si-tost qu'il le void, il luy apprend le beau traiet dont il a vsé enuers Lydie, & les moyens qu'il auoit pratiquez pour s'en defaire. Le Pere de Floridan aise au possible, l'embrace mille fois, & luy donne telle recompense qu'il veut. La pauvre Dame, qui ne songe point à toutes ces trahisons, n'auoir pas encores achené de demeure six ou sept iours au logis du frere de la Garde, que ce cruel la va treuuer sur la minniët à sa chambre, il l'esueille, & comme tout effrayé, il luy apprend qu'un Preuost des Mareschaux est au village prochain pour venir se saisir de sa personne à la poincte du iour, suiuant vne permission qu'il a, à la requeste du Pere de Floridan, & luy dir que ce luy seroit vn grand etene-cœur, s'il la voyoit ainsi mener prisonniere, de sorte qu'il luy conseilloit de se leuer promptement, & de gagner au

piéd

pied pour sauuer sa vie. La miserable bien estonnée, respond qu'il n'y auoit d'aparée, qu'elle sortist à vne heure si indeuë, sans sçauoir où tirer, sans secours, ny sans compagnie. L'autre luy repart, que c'est vn faire le faut, & qu'il n'est pas temps de discourir, parce que peut estre le Preuost estoit desia en campagne. Ainsi bon gré, ou malgré qu'elle en ayt, elle est forcée de sortir du logis en corte, & avec vn habillement de reste. La peur qu'on luy auoit imprimée luy fit gagner vne prochainne forêt, où elle marcha tout le reste de la nuict, en pleurant, sans tenir ny chemin, ny sentier. Les ronces & les espines l'arrestoient souuent par ses blonds cheveux, dont elle en laissoit des marques en plusieurs lieux. Toutesfois elle ne s'en soucioit gueres, estimant que bien-tost elle mourroit de faim, ou bien que quelque cruelle beste affamée la deuoreroit. Elle y chemina cette nuict, & presque tout le long du iour suiuant, sans treuver personne viuante, ny maison aucune, sinon sur le soir, qu'ayant ouy aboyer des chiens, elle tourna ses pas de ce costé, & elle apperceut vne grange, & vne vieille femme, qui y ramenoit vn troupeau de brebis. S'estât approchée, elle la pria de luy donner à boire, si elle auoit de l'eau. Cette bonne femme la regardant, & la voyant toute escheuclée, & toute sanglante, en eut compassion, & la mena dans sa cabane, où elle la fit repaistre de ce qu'elle auoit. Lydie auoit encores vne bague d'or qu'elle luy donna le lendemain au matin, en recompense de son bon traitement, & se vestit d'une meschante robbe que la vieille & son mary luy baillerent en échange de sa corte. Et cét habit elle s'en alla de Chasteau en Chasteau, & de village en village demandant sa vie, incogneüe, & habillée en pauvre gaeuse.

Quel

Quel creue . cœur ressentoit- elle en son ame , de se voir si miserable, elle qui s'estoit veüe autrefois tant honorée. Que si la crainte de perdre son ame ne l'eust retenuë, elle se fust donnée plus de cent fois la mort de sa propre main.

Quand la Garde seroit de nature sauvage , & engendré d'un Tigre, ie croy qu'il en auroit compassion s'il la voyoit reduite en ceste extremité.

L'infortunée fit tant de chemin, croyant tousiours qu'on la poursuivoit , qu'à la fin apres beaucoup de tours , & de destours , elle arrive à Laual au pays du Maine. Elle entre dans la ville , & comme les autres mandians , elle s'arreste à la porte du Chasteau , & y demande l'aumone. La Dame de Laual qui viuoit en ce temps , grande aumosniere s'il en fut iamais, venoit de la pourmenade lors qu'elle apperçeut ceste gueuse qui luy demande l'aumosne. Son langage autre que celui du pays fit que ceste vertueuse Dame s'informa d'elle de quelle contrée elle estoit. L'autre luy respond qu'elle estoit vne pauvre femme de Picardie , qui venant d'un pèlerinage auoit perdu son mary par les chemins : & que pour viure , elle estoit contraincte de quaimander. La Dame l'ayant de plus près regardée, & ayant remarqué en elle , ie ne sçay quoy qui ressenoit son bien, encores que Lydie eust le visage tout barbouillé, luy dit: si elle voudroit bien la seruir; pour nettoyer la vaisselle de la maison. L'autre s'y accorde, & dès l'heure mesme elle s'employe à ce vil exercice. Apres qu'elle y eut demeuré quelque tēps, elle ne peut si bien receler les traits de sa beauté , quoy qu'elle se defigurast , & qu'elle portast un chapperon gras, & vne robe de mesme, qu'un vieil seruiteur du logis, qui auoit la charge de l'argenterie

en

en deuint amoureux. Il estoit veuf & riche & n'auoit
iamais eu aucuns enfans de sa premiere femme. Il par-
la souuent de mariage à Lydie, qui s'excusoit sur sa
pauvreté & le vieillard luy remonstroit qu'il auoit as-
sez de bien, & pour luy, & pour elle. Iugez encores vn
peu de l'inconstance de ceste femme. Sous l'esperoir d'a-
uoir quelque peu de resue de ses malheurs, & de pas-
ser desormais le reste de sa vie avec quelque repos, el-
le s'accorde d'espouser cet argentier, pourueu que la
Dame leur maistresse y consente. Nostre amoureux
transsy ayant tiré ceste joyeuse responce de Lydie, va
vers Madame de Laual, & se jettant à ses genoux la
supplie que pour tant de seruices qu'il luy a rendus,
elle luy vueille accorder vne demande, qui ne la peut
en rien incommoder. Leuez vous (dit-elle) pourueu
qu'elle soit raisonnable, ie vous l'octroye. Ma reques-
te est (poursuit l'argentier) que vous me permettiez
d'espouser Lydie: la Dame oyant ceste requisition, &
considerant l'ardeur dont il estoit porté, luy en donna
la permission. Alors les nopces se firent, & voilà Ly-
die mariée à trois diuerses personnes toutes viuantes,
encores qu'elle ignore que Floridan soit au monde.
Elle est excusable pour le second mariage qu'elle con-
tracta: mais pour cestuy-cy elle ne se scauroit deffen-
dre encores que la Garde ayt vsé en son endroit d'ex-
treme cruauté. Quelques iours se passent, durant les-
quels Lydie à qui l'apprehension de tomber entre les
mains du Pere de Floridan auoit osté presque le sens
vient à se recognoistre, & à se représenter l'honneur
qu'elle auoit receu d'estre l'espouse d'un grand Sei-
gneur, la faute qu'elle auoit faicte d'espouser si lege-
rement la Garde, qui parauanture pourroit bien l'a-
uoir trahie, sous quelque faux entendre, & encores
cette

ceste dernière, de prendre en mariage vn homme si esloigné de sa conditior. Elle ressent vne telle douleur du ressouvenir de sa fortune passée, & de l'estat de sa misere presente, qu'elle en perd presque le boire, & le manger. Elle diminuë peu à peu comme vne fleur exposée à l'ardeur du Soleil, sans receupir aucune humeur. Son vieillard qui l'ayme plus que luy-mesme, s'estonne, & participe à sa douleur. Il tasche de luy donner routes sortes de contentemens, mais en vain car en fin vne maladie la saisit de telle sorte, que les Medecjns desesperent de son salut. Estant presté à rendre l'ame, & apres auoir confelsé ses fautes, & receu le sainct Sacrement, elle prie son mary d'impetrez ceste requeste de la Dame de Lual, qu'elle puisse luy dire vn secret qu'elle a sur le cœur, auant que rendre l'ame : le bon homme, treuve sa Maistresse, & luy rapporte ce que sa femme luy auoit chargé, la Dame s'achemine à la chambre où Lydie estoit gisante. S'estant assise aux pieds de son liect, elle luy demande si elle auoit besoin de quelque chose, & l'assure que rien de sa maison ne luy sera espargné. La malade la remercia de sa courtoisie, & fait priere au Ciel, qu'il l'en vucille remunerer. Apres elle fait retirer de sa chambre tous ceux qui y estoient, hormis la Dame, & son mary ; puis elle leur expose ce qu'elle estoit, & commence par le lieu de sa naissance, & par ses parens. Elle leur conte en suite comme Floridan se rendit amoureux d'elle : la sorte qu'il l'emmena en Auvergne, comme il l'espousa, & comme il partit pour aller à la guerre, la nouvelle de sa mort à elle apportée par la Garde. Ses secondes nopces, la ctuauté de son frere, & en fin en quelle maniere, craignant la colere du Pere de Floridan, elle arriva à Lual. Cette
bonne

bonne Dame ayant appris tout le succez de ceste aventure, se mit à pleurer de compassion qu'elle eust de tant de maux soufferts par ceste pauvre miserable. Elle tascha de luy faire reprendre courage, & enuoya chercher les plus excellents Medecins du pays pour la guerir: mais c'estoit trop tard, Dieu la retira peu de temps apres de ce monde, plein de miseres & d'ennuis, pour luy donner vn lieu exempt de passion. La Dame de Lual la regretta fort: mais particulièrement le bon vieillard qui l'auoit espousée, conçut vn si grand desplaisir de son trespas, qu'il la suinit incontinent apres, faisant voir par là qu'il luy estoit impossible de suruiure celle en qui il auoit logé tout son bon-heur, & laquelle il tenoit plus chere que luy mesme.

Cependant que ces choses passent de la sorte, Floridan reuient de la guerre, tout couuert de palmes & de lauriers, qui seront bien tost changez en aches & en cyprez. Il pensoit treuuer à son Chasteau sa Maistresse, mais il n'y a que la Garde avec quelques domestiques. Le traistre faisant bonne mine court pour le saluër, tout triste en apparence. Floridan luy demande nouvelles de sa femme & de son fils: & l'autre luy respond que son fils est en bon portement, mais que la mort qui rauit toutes choses a mis sa femme dans le tombeau. Il vous laisse maintenant à iuger quel tourment il ressentit. Il demeura immobile de douleur, & apres il versa vn deluge de larmes, & profera des regrets que la douleur apprend à ceux qui sont touchez de pareille affliction. Mais voyât enfin que la mort n'a point d'oreilles, ny de cœur pour eutendre nos cris, ou pour s'en esmouuoir, il voulut rendre les devoirs que l'on doit aux morts,

Il fit faire les obseques de la femme, fit prier Dieu pour son ame, prit vn accoustrement de dueil, & fit habiller toutes les gens de même. O que s'il eust sçeu ce qui en estoit, quelle cruelle vengeance eust-il exercée cõtre la Garde! il n'y a supplice tant cruel soit-il qui peust égaler celuy qu'il luy eust fait souffrir. Encore n'eust-il sçeu le punir suiuant qu'il l'auoit mérité. Aussi ce perfide, si tost que ce ieune Seigneur fut reuenu de la guerre, prit incontinent congé de luy, sous pretexte qu'il se vouloit retirer, & qu'il estoit las de suiure la Cour. Floridan luy fit donner vne honnesté recõpense, au lieu qu'il meritoit vne cruelle punition. Comme il se fut retiré en Poictou, vn seruiteur de Floridan, à qui le valet de la Garde auoit conté toute la trahison, tire vn iour sõ Maistre à part, & luy apprend qu'il portoit le dueil d'vne personne qui estoit en vie. Il luy recite ce qu'il en auoit appris: la menée de son Pere, & de la Garde, & luy assure qu'il estoit allé avec Lydie en Poictou. Floridan bien esbahy de cette nouuelle, & plus encores de la trahison de la Garde, iure qu'il s'en vengera, & de ce pas prend cinq ou six de seruiteurs bien armez, & s'achemine vers le Poictou. Il faict tant par ses iournées qu'il arriue à la maison du frere de la Garde. Il luy demande qu'est-ce qu'est deuenue vne ieune Dame, que son frere laissa dans sa maison. L'autre luy respond, qu'à la verité il auoit logé quelques sept ou huit iours vne ieune Damoiselle chez luy: mais qu'elle estoit puis apres partie sãs qu'il eust eu pouuoit de la retenir. Ha traistre, dit Floridan, vous estes cause de sa mort, si elle est morte, mais assurez vous que i'en auray la raison en temps & lieu. Ce disant, il va & cherche les lieux d'alentour, & de fortune il arriue

riue à la grange de la pauvre femme qui l'auoit logée. Il sçait d'elle la funeste auanture de sa femme, & passant plus outre dolent & affligé, va tant de costé & d'autre, qu'énfin il arriue à Laual, desespéré de trouuer ce qu'il cherchoit. Et bien que le Seigneur du lieu fust son parent, il ne vouloit pas pourtant loger chez luy, car il auoit resolu de ne se faire point connoistre qu'il n'eust nouuelles de ce qu'il cherchoit. Le Comte de Laual l'ayant rencontré comme il vouloit entrer en vne hostellerie, & iugeant à sa mine qu'il estoit, le pressa tant, qu'il le mena à son Chasteau sans touresfois le connoistre. La Comtesse le receut avec toute sorte de bonne chere, suivant l'honneste courtoisie, qui se pratique en France entre la Noblesse. Apres souper, la Dame de Laual luy recita l'auanture qui estoit arriuée en leur maison depuis quelques iours, non sans ietter des larmes; Floridan oyant ce qu'il ne cherchoit pas, fut à l'heure saisi de tant de douleur, qu'il cheut à terre esuanoüy. Le Comte & son espouse croyans que ce fust quelque defaillance, coururent à l'eau & au vinaigre pour luy faire reprendre ses esprits. Quand il reuint à soy, il ietta vn profond soupir, & puis en voix basse & debile, il proféra ces paroles: *Ha! cruelle mort, qui m'as ravny celle pour qui j'ay tant pris de peine en la cherchant, que tardes-tu d'acheuer le reste de ta cruauté.* A ces mots le Comte & la Comtesse conneurent que c'estoit Floridan. Ils tischerent de le consoler, mais son mal estoit trop grand. Quand il venoit à se ramentouir la trahisõ de la Garde, la simple credulité de Lydie, & sa facilité à entendre si tost à vn nouveau mariage, il creuoit de despit, de sorte qu'abhorrât le lieu où il se trouuoit, il commanda à l'un de ses gens de


faire promptement brider son cheval pour partir sur le champ. Quelques prieres que luy sceussent faire ses parens, il ne fut iamais possible de l'arrester. Il chemina vers Paris toute la nuit, sans reposer, tousiours soupirant & se plaignant. Au poinct du iour il repout quelque peu, & reposa : mais avec mille fantaisies, & mille imaginations. Celuy estoit son ennemy, qui s'ingeroit de le consoler. Estant arriué à Paris, il alla descendre à son ancien logis, & se mit dans vn liât, accablé de douleurs & d'angoisses. Là il se mit à detester la cruauté de son pere, & la trahison de la Garde. *O cruel Pere!* (disoit-il) *vous avez creu me procurer du bien, en me priant de ce que i'auois aussi cher que moy-mesme, & pensiez en ce faisant traicter vne autre alliance plus aduantageuse pour moy selon vostre opinion: mais vous ne consideriez pas la force de l'amour, & mon inclination qui ne pouuoit estre forcée que par la mort: & quel fruiet receurez vous de vostre cruauté, sinon que vous ne verrez iamais plus celuy, pour qui vous auez en autresfois tant de soy? Et toy perfide & cruel, qui non content d'auoir abusé mon esponse, & souillé par la plus grande trahison du monde ma couche, as encores exposé à toutes sortes d'inhumanitez celle que tu estois obligé d'honorer, ie n'ay d'autre regret en la fin de mes iours, que de ce que ie ne puis te payer comme tu merites, & laisser à la posterité vne marque memorable de iuste vengeance. Je prie à Dieu qu'il l'exerce pour moy, il est iuste Iuge, ie ne doute point que tu ne ressenties l'effect de sa Iustice diuine, quoy qu'il tarde. O miserable Lydie que vous fustes bien credule & plus encores prompte à quitter nos amours! Helas! ie vous excuse. La misere où vous estiez reduite, estant abandonnée de tout le monde, estoit capable de forcer à cette extremité la plus constante du monde.*

Floridan

Floridan passoit les iours & les nuits avec tant de douleur, qu'enfin son corps ne pouuant plus supporter tant d'angoisses, & estant saisi d'une violente fièvre, son ame fut contraincte d'en desloger, & de payer à la Nature le commun peage des mortels. Son Pere qui sceut aussi tost son trespas que la maladie, & ayant reconneu, mais trop tard, sa faute, en reçut vn si grand desplaisir, qu'il s'en mit dans le liét, où il mourut dans peu de iours. Et auant sa mort il fit son testament, & disposa de ses biens, instituant heritier vn sien frere, d'où sont issus ceux qui portent maintenant le nom de sa maison, braues & genereux Cavaliers s'il y en a au monde. Quant au bastard de Floridan (ainsi appelloit-il Gentian, qui estoit pourranch legitime) il luy legua certaine somme de deniers. Le perfide la Garde estoit cependant en Poictou, où il se maria, bien aise de la mort de Floridan, de qui il ne pouuoit euiter le chastiment, s'il eust dauantage vecu. Le ieune Gentian fut instruit aux bonnes lettres dès sa plus tendre ieunesse, où il profita si bien, que pour son sçauoir & pour sa preud'homme le Roy le fit Euesque de Tarbes, en l'age de vingt ans. Chose rare en ce temps, où l'on regardoit plus au merite, qu'au lustre de la maison. Comme il estoit en son Euesché, la Garde estant en sa maison, commence à se ressouuenir de la trahison qu'il auoit commise enuers Floridan, & de la cruauté exercée contre la pauvre Lydie. Le souuenir de la trahison, & de la cruauté, luy picque si viuement le cœur, qu'il ne peut auoir aucun repos en sa conscience. Le remords qu'il a d'auoir perpetré vn si grand crime, luy sert de bourreau perpetuel. En fin accablé de regrets, il se couche au liét malade, où il maudit sa mal-heureuse vie. Quel

que consolation que des bons Religieux luy donnent pour remede à son mal, il ne peut bannir le desespoir qui s'est emparé de son ame. En fin estant prest à rendre son mal-heureux esprit, il recite publiquement sa trahison, & le succès de l'avanture que nous auons racontée, & charge vn sien fils vnique qu'il auoit, d'en escrire l'Histoire tout au long, & de la porter à l'Euesque de Tarbes, & de luy demander pardon du tort qu'il luy auoit fait. Son fils apres son trespas se dispose à executer sa volonté, & se met en chemin. Mais il meurt en vne hostellerie proche de la demeure de l'Euesque. En mourant il charge son hôte d'accomplir ce qu'il n'auoit peu faire. L'hôte apres son deceds prend le memoire, & le rend à l'Euesque. Luy qui iusques à lors s'estimoit estre bastard de Floridan, met en procez ses parens qui iouÿssient du bien de son Pere, produict le contract de mariage que la Garde auoit tousiours retenu, & l'attestation du Curé. La Cour de Parlement retenant la connoissance de la cause, apres auoir meurement pesé cette affaire, reconnoit qu'à la verité l'Euesque Gentian est vray, & legitime fils de Floridan, & que par consequent l'heritage luy appartient de droit: neantmoins pour ne dissiper point vne si grande maison qui eust peu estre ruinée si elle tomboit entre les mains d'vn Prestre, elle ordonna que l'heritage ne seroit point osté à ceux qui le possedoient: mais qu'vne pension de dix mille liures de rente annuelle seroit seulement payée à l'Euesque pour en iouyr sa vie durant: declarant en outre, bon & valable le contract de mariage passé entre Floridā & Lydie, & Gentian leur fils legitime, à qui il fut permis de prendre & de porter les armes de la maison. Voila l'histoire Tragique & lamentable

mentable de ces deux infortunez amoureux. Je l'ay
escrite succinctement. Si i'eusse voulu m'estendre, il
eust fallu composer vn gros volume, & non vne sim-
ple narration. Passons maintenant au recit d'vne au-
tre non moins funeste & pitoyable.



DE LA CRUELLE VENGEANCE

*exercée par vne Damoiselle, sur la personne
du meurtrier de celuy qu'elle aymoit.*

HISTOIRE X.

Quelle vengeance que tu as bien souuent du
pouuoir sur les hommes! Tu bannis la raison de
l'ame, & sans te soucier de sa perte, tu reduits les per-
sonnes en de telles extremitez, qu'elles executent des
entreprises si horribles, qu'à peine ceux mesmes qui
le voyent en peuuent imaginer les effects. Mais par-
ticulierement le sexe qui est le plus benin, est subiect
à cette passion. Mille histoires en rendent tesmoigna-
ge & particulierement celle-cy que ie donne à la po-
sterité pour l'vne des plus pitoyables & tragiques
qu'on puisse lire.

Du temps que le zele inconsideré de Religion ar-
moit nos Prouinces les vnes contre les autres; que
les sacrileges, les meurtres, les vols, les rauissements, &
les autres maux infinis estoient en regne, & le plus
flourissant Royaume de la Chrestienté deschié de
routes parts, il y auoit vn Gentil-homme François,
qui apres auoir rendu vne infinité de marques de sa
valeur & de son courage en Hongrie contre les infi-

delles, retourna au pays de sa naissance. Le le nommerois de son propre nom, & dirois le lieu de son origine: mais pour le mal-heur arriué à sa maison, ie m'en tairay pour le presét, & l'appelleray Adraсте. Le long-temps qu'il auoit demeuré sans voir ses parens & ses amis, fit qu'à son arriuéee tous accouroient à sa maison pour le voir & pour le saluër. Ce n'estoient que resioüyssances & compliments reciproques. Apres qu'il y eut seiourné quelques mois, fasché de suiure desormais le train des armes, & importuné de ses plus proches, il se resolut de s'arrester auprès de ses amis, & de prendre femme. Il auoit honnestement des moyens, & auoit acquis assez de reputation parmy les hommes, de sorte qu'il estoit recherché de l'alliâce de plusieurs nobles familles. Il épousa doncques vne Damoiselle fort sage, fort vertueuse, & pourueuë de beauté & de noblesse, autant qu'aurre du pays. Ils passerent quelques années ensemble sans auoir lignée, heureux s'ils n'en eussent iamais eu. Tant de subjects de mal-heurs n'employeroient pas maintenant ma plume à descrire vne histoire si sanglante. En fin ils eurent vne fille, que le Ciel & la Nature douèrent à sa naissance d'vne beauté si rare, qu'à peine en eüst-on trouué vne pareille en toute la Prouince. Nous l'appellerons Fleurie. Le Pere & la Mere la firent instruire en sa plus tendre ieunesse en routes sortes d'honestes gentilleses: comme à iouer de l'espinoette & autres instrumens, à chanter en musique, à lire, à escrire, & à peindre, où elle profitoit si bien, qu'elle surmontoit le desir des personnes qui en auoient la charge. A mesure que ses ans croissoient, ses perfections croissoient pareillement: de sorte qu'à l'âge de 13. à 14. ans, le bruit de sa beauté & de sa bon-

ne grace couroit par tout le pays. Et parce qu'elle estoit fille vnique & accomplie de tant de rares dons, plusieurs Gentils-hommes d'illustre maison venoient au logis du pere, raichans de la seruir, & en acquerir avec le temps la possession. Le Pere comme personne pleine de courtoisie, les receuoit tous honorablement, sans demonstration d'amitié aux vns plus qu'aux autres; car il voyoit que sa fille n'estoit pas encores en aage d'estre mariée, joint & qu'il y vouloit pesser meurement auant que la marier. Il n'auoit que cét enfant qu'il aymoit à l'esgal de luy-mesme, & il desiroit de le pouruoir selon son desir. Tandis toute la fleur de la Noblesse du pays abordoit chez luy. On ne voyoit que courses de bagues, & autres semblables exercices: chacun pretendoit à gagner les bonnes graces de Fleurie, les vns d'une façon, les autres d'une autre. Plusieurs composerent des vers à sa louange, d'autres raschoient par leurs belles paroles, & par leurs plaintes amollir son cœur, sur qui l'Amour n'auoit encores décoché le trait qui le fait redouter des hommes & des Dieux. Elle se rioit de tous indifféremment, & les entretenoit de mesme, sans resmoigner aucune particuliere faueur. Son Pere se tenoit le plus souuent en vne sienne maison de plaisance, bastie aux bords d'un coulant ruisseau, dont l'on voyoit la source au pied d'un haut rocher voisin de cette demeure. Il y auoit aussi tout proche vne grande forest plantée d'arbres si épais, que le Soleil ne les perçoit iamais. Desia le grand Henry auoit donné la paix à son peuple, & l'Estranger auoit vuidé nos Prouinces, de sorte que chacun vivoit & dormoit en assurance en sa maison. Vn iour comme Fleurie, accompagnée de quelques autres Damoiselles voisines, qui la ve-

noient souvent visiter, estoit aux bords de ce coulant ruisseau, sous des saules verds, & qu'elles y passoient la chaleur du iour à diuiser, & à se gauffer entre elles des hōmes, & qu'elles asseuroient que la plus grande partie d'eux n'est que dissimulation, & qu'inconstance; & qu'il faut bien que les filles au siecle où nous sommes, prennent bien garde à elles, afin de n'estre point abusées, la belle Fleurie prit vn luth, & puis mariant sa diuine voix au son de cét instrument, elle se mit à chanter ces vers contre l'Amour.

*Auant que ie m'engage à ce Dieu des Amours,
De qui la tyrannie est par tout si connue:
Je prie, aux Immortels, qu'ils retranchent mes iours,
Et qu'ils couurent mes yeux d'une eternelle nne.*

*Le despite ses traits, mon cœur est un rocher,
Aussi dur pour ses coups, comme il est insensible:
Il a beau contre moy ses flesches décocher,
Il trouuera tousiours que ie suis invincible.*

Toute la compagnie prenoit vn singulier plaisir à ouyr la douceur incomparable de sa voix meslée aux accords du luth, lors qu'un ieune Gentil-homme passant le long de ce riuage, planté (comme nous auons dit) de saules verds, s'arresta oyant cette voix Angelique. Et pour mieux l'entendre, il s'approcha tout doucement, le plus à couuert qu'il peut de cette belle troupe.

A l'heure le Sol. il commençoit à plonger ses rayons dans l'Occident & les ombres se preparoiēt de couvrir la face de la terre, tandis que ce beau Soleil, qui jouoit de l'instrument, & qui chantoit si melodieusement, allumoit les lieux d'alentour de si clairs rayons, qu'il sembloit que l'autre qui luit dās le Ciel, courust plus viste que de coustume, pour se cacher, de honte.

honte. Si-toſt que ce Gentil-homme eût ietté les yeux ſur ce nouuel Aſtre, l'excez de ſa lumiere l'eſbloüit ſi bien, & l'eſtonna ſi fort, que tirant vn grand ſouſpir du profond de ſon eſtomack, il tomba de ſon haut tout eſtendu. Au bruit qu'il fit en ſouſpirant, & tombant à terre, ces Damoifelles ſe leuerent ſur pieds routes effrayées. Vne plus courageuſe que les autres, s'eſtant approchée du lieu où l'on auoit ouy le bruit, & y ayant treuü vn homme eſtendu à la renuerſe, elle ſe mit à crier, & à proferer ces paroles : *O Dieu qu'eſt ce que ie voy ? C'eſt mon Couſin Lucidamor.* C'eſtoit vn Gentil-homme des plus accomplis du monde. Il ne faiſoit que de reuenir d'Italie, où il auoit acquis tant de gloire parmy ceux qui y font les exercices, qu'il eſtoit eſtimé le plus adroit Cavalier de ſon temps. Il eſtoit doüé d'vne beauté ſi excellente, que ſans doute l'infidel époux d'Oenone luy en euſt quit-té le prix. A peine auoit-il alors vingt-ans. Iamais aucune beauté n'auoit peu rien gagner ſur ſa franchise. Toutes luy auoient eſté iuſques à ce moment indifférentes. Mais ayant veu paroître cette belle clairté, qui doit eſtre de ſormais la lumiere de ſon ame, il perdit au meſme inſtant ſa liberté avec ſes ſentimens, contraint de ſe rendre ſans faire de reſiſtance. Il n'y auoit que trois ou quatre jours qu'il eſtoit reuenu à ſa maiſon, proche de celle du Pere de Fleurie : & chaſſant dans cette prochaine foreſt qui luy appartenoit, s'eſtoit eſgaré courant apres vn ſanglier. Le malheureux penſoit prendre, lors qu'il fut pris. Sa Couſine Cloriſ s'eſtât eſcriée de la ſorte que nous auons dit, Fleurie quitta ſon luth, & avec ſes autres compagnes courut pour voir cettē auanture. Cloriſ luy prit la teſte, & l'ayant couché en ſon gyron, elle verſa tant de

de larmes, qu'ayant repris ses sentimens, il ouurit les yeux, qu'aussi tost il referma, voyant deuant luy celle d'où son mal procedoit, & en euanoüissant derechef, profeta ces paroles: *O Dieux!* (dit-il) *faut il que ie meure pour auoir trop veu?* Fleurie estonnée de ce nouuel accident, ne peut si bien se contenir, qu'apres auoir consideré la beauté de ce Gentil-homme, de qui les cheueux estoient plus blonds que l'or, & le teint plus blanc que les lys que l'on vient tout fraichement de cueillir, elle ne se retirast à part pour pleurer, tandis que les autres apportans de l'eau du prochain ruisseau, luy en arrouserent le visage, & tournerent tant, qu'elles luy firent reprendre ses esprits. *Helas Amour* (cria-il alors) *combien tes effets sont contraires à ton nom! ô dommageable regard!* Acheuant cette plainte, il ietta ses yeux d'un costé & d'autre, & voyant tant de belles Damoiselles empeschées pour le secourir, il se leua tout honteux, & apres leur auoir fait la reuerence, dissimulant son mal, il les pria de l'excuser, s'il ne les auoit pas plustost salüées, rejetant la coulpe sur vne foiblesse qui l'auoit prins, lors qu'il s'aprestoit de s'acquitter de son deuoir. Comme il acheuoit ce discours, trois ou quatre Gentils-hommes qui le cherchoient, arriuerent à sô grand regret: parce que de peur qu'ils ne s'apperçussent de sa nouvelle amour, il fut contrainct de prendre congé de cette belle compagnie: mais auparauant il tira à part sa Cousine Cloris, de laquelle il apprit le nom de la Damoiselle qui iouïoit du luth, & qui elle estoit. Estant de retour chez luy, au lieu de se resiouyr comme il auoit de coustume, il se retira dâs la chambre à part, & puis se jettant sur son liêt, il comença de tenir ce langage. *O Ciel, pourquoy m'auez-*

vous esté iusques icy tant favorable, puisque vous me deniez faire mourir d'une si cruelle mort. Que me seruent tant de dons de Nature, s'il faut desormais que ie passe les iours & les nuits, à plaindre & à soupirer ? Helas ! Amour, que tu se venges bien maintenant de moy. l'auois iusques icy mesprisé ton pouuoir : mais maintenant ie voy bien qu'il n'est puissance mortelle qui puisse résister à ta force : au moins si i'espérois que celle pour qui ie meurs si cruellement, eust pitié de moy, i'aurois quelque consolation en ma douleur : mais las ! quel espoir puis-je auoir d'en receuoir allegement, puis que les Dieux mesmes ne sont pas dignes de la servir.

Plusieurs autres plaintes & regrets faisoit nostre amoureux quand la belle Fleurie, qui commençoit desia d'ouurir son cœur aux traits de l'Amour par le souuenir de l'incomparable beauté de Lucidamor, que ce petit Dieu luy representoit à toute heure, soupiroit tout bassemēt lors qu'elle estoit couchée dans son lit. D'où me viens (disoit-elle) ceste nouvelle blessure ? Faut-il que ie quitte le rempart de ma franchise gardée si longuement, contre ceste Déesse, qui ne peut sur nous que ce que nous luy donnōs. le veux arracher de l'ōne heure ceste mauuaise semence, & passer desormais mee iours, comme i'ay faict cy deuant, sans passion, & sans inquietude. Vne fois elle faisoit resolution d'oster Lucidamor de sa fantasie : mais venant puis apres à s'imaginer ses graces, & ses perfections elle estoit forcée de dire ; Helas ! ie voy bien Amour, que ton pouuoir est infiny. C'est en vain que ie tasche de repouller ce luy qui donne des loix au Ciel & à la terre.

Fleurie balançoit de la sorte, comme vn chesne agité de deux vents contraires. Tantost elle estoit resoluë de n'assubjectir iamais sa liberté sous les loix
de

de l'amour, & tantost elle protestoit de l'en reconnoistre.

Cependant que le fils de Cypris se jouë de ces deux Amants, & qu'il traaverse leurs cœurs d'une seule fleche, il arrive qu'une parente de Fleurie se marie : Les nopces s'en preparent en grand pompe & magnificence. On y doit courir la bague, que la nouvelle mariée doit donner avec un bracelet de perles de grande valeur à celui qui la gagnera. Toute la Noblesse du pays s'appreste pour y faire paroître sa disposition, chacun y veut avoir pour témoins de son adresse les yeux des parfaites Beautés qui s'y doivent trouver. Ceux qui aspireroient à l'acquisition des bonnes grâces de Fleurie, ne manquoient pas de dresser des parties. Lucidamor en fait une avec trois de ses intimes amis. Desjà tout le monde est assemblé pour avoir le plaisir des courses. En fin Lucidamor desguisé sous le nom du Chevalier de la Renommée, après une grande dispute l'emporte par dessus tous. Nul hormis ceux qui estoient en sa compagnie & sa Cousine Cloris, à qui il avoit déclaré auparavant son entreprise ne le connoissoit point. Après avoir gagné l'honneur, il s'approcha de l'eschaffaut de la mariée, qui estoit au milieu de Fleurie & de Cloris, & ayant reçu de sa main la bague, & le bracelet, il attacha le diamant avec les perles, & puis ayant mis le tout au bout de sa lance, il s'adresse à Fleurie, & luy tint ce langage : *C'est vous (ô belle Deesse) qui avez remporté le prix de ces courses. Mon bras n'a esté guidé que par vous, ie n'ay point esté éclairé que par les rayons de vos beaux yeux, plus luyzans que la clarté qui nous donne le jour. Je vous supplie doncques de recevoir ce qui vous appartient si justement.* Fleurie

toute

toutte honteuse d'ouyr proferer ces loüanges, ne sca-
uoit au commencement que respondre, si elle devoit
prendre ou refuser le present : toutesfois ayant ap-
pris par vn signe que fit Cloris, que c'estoit Lucida-
mor elle le prit ; & respondoit en ceste sorte : *Vostre*
courroisie plustost que mon merite, vous faiët tenir ce lan-
gage. Je ne refuse point neantmoins ce que vous me pre-
sentez, car ie ne doute pas que ce present ne parie d'un
courage noble & genereux. Toutesfois c'est à condition
que vous osteriez ce masque, qui nous priue du bien de
vous voir, & de vous cognoistre, afin que ie sçache qui
ie dois remercier, & recompenser de la bonne volôié qu'il
fait paroistre enuers vne personne de si peu de merite.
Lucidamor ne pouuant refuser la premiere requeste
que luy fit sa Maistresse, osta son masque, & à l'heu-
re tout le monde le recogneur. La joye qu'il auoit
d'auoir emporté le prix, & de voir celle sans qui il ne
pouuoit viure, augmentoit de beaucoup sa beauté
naturelle. Il n'y auoit Damoiselle en la trouppes qui
ne jettast les yeux sur luy, & qui ne portast de l'ia de
l'enuie à la beauté de Fleurie, qui auoit en le pou-
uoir d'acquérir vn si braue Cavalier. Aussi s'estimoit
elle heureuse de ceste acquisition, plus que si elle eust
acquis le plus grand Monarque du monde. Ce fut à
l'heure que les affections qui ne commençoient que
de naistre s'accroissent avec telle violence, qu'ils ne
pouuoient estre l'un sans l'autre. Si quelques fois ils
estoient priuez du bon heur de se voir, ils se visiroient
par lettres, & se consoloient de l'esper d'estre bien
tost ensemble. Ils n'auoient qu'un mesme desir. Ia-
mais amour ne lia deux ames d'une estainte si fer-
me. Ils n'outrepassoient pourtant les bornes de
l'honnesteré : mais attendoient que l'union du saint
mariage

mariage assemblast leurs corps , aussi que leurs cœurs.

Durant que leurs affections sont plus allumées il arrive qu'un riche Baron, que nous nommerons Clorizande , revient aussi d'Italie . où il avoit fait les exercices. Si tost qu'il fut au pays, il alla voir Lucidamor, avec qui il avoit une grande familiarité, comme ceux qui estans pareils d'age, & de Noblesse & d'un mesme pays, se hantoient ordinairement. Lucidamor luy fit mille caresses , & entre autres choses le soir estans couchez ensemble, luy ouvrit son cœur, & luy declara l'amour qu'il portoit à Fleurie, dont il luy fit voir le lendemain un pourtrait racourcy, tiré naïfvement. Clorizande n'eut pas plustost apperceu le tableau , que les perfections d'une telle beauté le redirent si vivement espris, qu'il en perdit tout repos. Il dissimule neantmoins la passion , ayant loué son amy du jugement qu'il avoit fait paroistre en l'election d'un si divin sujet, il s'offrit de l'assister en toutes occasions contre toutes sortes de rivaux, dont le nombre estoit infiny. Lucidamor l'ayant remercié, ils firent resolution d'aller voir Fleurie. S'ils furent les bien receus , il ne faut pas que personne en doute. C'estoient deux ieunes Gentils hommes des plus illustres de la Prouince. Clorizande voyant celle qu'il n'avoit iamais auparavant veüe qu'en pourtrait seulement , sentit augmenter le feu qui le consumoit , de sorte qu'il se resolut dès l'heure même de s'en rendre possesseur à tel prix que ce fust. Il m'est impossible (disoit-il à part luy) que ie vive sans jouyr d'une si rare beauté. Puis que la mort m'est infaillible, si un autre vient à la posseder, il ne me chaut de tenter toutes voyes extraordinaires pour l'acquérir. voi-
la

la comme desia ceste folle passion luy faisoit oüir la trahison qu'il executa ainsi que vous verrez en la suite de ce discours. Ce fut doncques depuis que palliât son amour il faisoit l'entremeteur des amours de son amy & de sa maistresse, & par mesme moyen il sçauoit tous leurs secrets. Il sondoit plus souuent avec vne grande dexterité le cœur de Fleurie, pour prendre garde s'il y auoit moyen de gagner ses bonnes graces, & la destourner de l'amour qu'elle portoit à Lucidamor : mais voyant que c'estoit tenter l'impossible, il prit vne autre voye cruelle & detestable. Desia le bruiet de la recherche que Lucidamor faisoit de Fleurie, estoit espandu par tous le pays Sa beauté, sa courtoisie, sa valeur, & sa noblesse auoient gagné le courage du pere & de la mere; de sorte que voyans l'inclination de leur fille, disposée d'aimer ce Cauallier, ils auoient resolu de la luy donner en mariage. On n'attendoit plus sinon que les parens s'assemblassent d'un costé & d'autre, pour conclurre l'affaire, lors que Clorizande desesperé de iouer de celle pour qui il mouroit iour & nuict, faict tant par promesses & par presents, qu'il induict vn sien vallet, mauuais garçon, de se cacher vn soir dans ceste forest dont nous auons cy-dessus parlé, & d'attendre à vn mauuais passage, avec vne harquebuse pour la charger sur Lucidamor, à vn signe qu'il luy donnera lors qu'ils y passeront tous deux. Cét Arfacide ne manque point. Il charge vne grande harquebuse de chasse, pendant que le traistre Clorizande va à l'accoustumée voir celuy qui ne se doutoit nullement de la trahison. Il le treuve prest d'aller voir sa maistresse, mais Clorizande luy dit qu'il faut attendre que la chaleur du iour soit passée, si bien qu'ils ne partent du logis que bien tard.

Quand ils furent arriuez dans la forest, & qu'ils s'approcherent du passage, où le cruel assassin estoit cache, Clorizande le mit à chanter vne chanton, qui estoit le signe qu'il luy auoit donné. La Lune estoit fort clair, & luitante, le Ciel sans brouillars. On y voyoit pr sque aussi bien que de iour. Le meurttier ayant bien remarqué celuy, sur qui il deuoit exercer sa cruauté, dalaicha l'harquebuse. Le coup fut si funeste & si mal-heureux pour le pauvre Lucidamor, qu'une des bales luy donna au trauers du corps, & l'autre dans la teste. Mal-heureuse destinée ! La fleur de la beauté, & de la valeur du monde fut contraincte de payer le tribut que l'on doit à l'auare Nautonnier. Ce braue Cauallier n'eut point loisir de proferer vne parole, tant s'en faut qu'il eust le moyen de mettre la main à l'espée. Sa belle ame quitta soudain sa premiere demeure, toute despitée de ce qu'elle ne deslogeoit de son corps en quelque Theatre d'honneur, pour son Prince, & pour sa patrie. Le meschant qui fit le coup, fauorisé de l'espaisseur du bois & de la nuit, gaigna soudain au pied, tandis que Clorizande mit la main à l'espée, avec les deux valets qui les accompagnoient. Il se fourra dans la forest faisant semblant de poursuivre le meurttier, pendant que le pauvre valet de Lucidamor, ayant mts pied à terre, & couché dās son gyron, son maistre, faisoit les plus pitoyables regrets qu'on scauroit imaginer. Clorizande arriua bien-tost apres, les bras croisez, & les yeux vers le Ciel. Helas ! (disoit ce maistre) mon fidel & loyal compagnon, comment est-il possible que ie reste viuant, puis que vous estes mort ? Faut-il que la Parque des vnisse deux ceurs qu'une amitié sainte auoit si bien assemblez. Au moins si ie scauois qui est le meurttier de mon

mon cher amy , i'arrozerois sa tombe du sang de ce meschâr, & rascherois par vne cruelle vengeance de rendre ce dernier deuoir aux Manes de Lucidamor. Acheuant ce discours, il se battoit la poictrine , & se iettoit sur le corps du deffunct, de qui les playes s'ou-
urirent & ensanglanterent ce maudit autheur de l'assassinat. Chose qui arrive le plus souuent, soit que ce soit vn miracle , ou vn cas naturel. Mon intention n'est pas icy de decider cette matiere que i'ay traictée au long en l'histoire d'un paricide, dans cét ouurage. Quiconque sera curieux d'apprendre les raisons, que i'en donne, qu'il prenne la peine de les y lire.

Le valet remarquant ce pitoyable ipectacle , se doubra aussi-tost de la trahison. Il n'en fit point pour tant aucun semblant sur l'heure. Il pria seulement Clorizande & son valet de l'assister à mettre son Seigneur sur son cheual, pour conduire le corps chez luy. La renommée qui a tant de langues , & tant de bouches, annonce bien-tost par toute la contrée cette pitoyable auanture. Fleurie l'apprend comme les autres, encores qu'on tasche de la luy celer. Mais que dit cette Damoiselle explorée ? Ou que ne dit-elle pas ? Elle accuse les astres innocents , elle maudit la mort; & par vn cruel desespoir, elle veut accompagner son amy dans le tombeau. Son Pere & sa mere taschoient de la consoler , mais elle ne veut pour toute consolation que sa douleur. On la tient de court, on la veille , de peur qu'elle n'imite Alcione ou Porcie. Tandis qu'elle se plaint & se lamente sans cesse, Clorizande pour faire du bon valet , la vient visiter, toutesfois ce n'est que rengrement de douleur.

Le voyant elle se pàsme, elle se lamente, elle arrache ses blonds cheveux. Son pauvre pere recherche

tous les moyens pour donner quelque remede à son desespoir, & le meilleur & le plus expedient, est qu'un bon & saint Religieux sçait si bien vser des remonstrances puisées dans les saintes Escritures, & luy mettre deuant les yeux la perte qu'elle faict de son ame, qu'elle modere pour quelque temps sa passion. Sa resolution fut dès l'heure de faire eslection de quelque austere Religion pour y passer le reste de ses jours. Comme elle pense à quitter le monde, voicy vn accident qui l'en destourne, comme vous orrez presentement.

Clorizande se voyât deliuré de celuy qui luy donnoit empeschement en ses amours, & craignant d'estre descouvert du meurtre, prit vn iour vn grand laquay qu'il auoit chez luy, & de qui il se fioit fort, & l'ayant tiré à part, il luy dit que Maubrun (ainsi s'appelloit l'homicide) luy auoit faict le plus grand deplaisir du monde, & que s'il le vouloit venger, en le tuant qu'il luy donneroit cent escus. L'autre ouurant l'oreille à ceste somme de deniers, promit à son maistre d'en depescher le monde, & de faict il receut de luy cinquante escus d'auance. Ce Laquay alloit souuent à la chasse avec Maubrun, & il n'attendoit que de treuuer quelque lieu favorable, & escarté pour faire son coup. Vn iour apres auoir tous deux chassé dans vn bois, Maubrun s'endormit sous vn arbre. Le laquay voyant que l'occasion s'offroit d'executer ce que son maistre luy auoit commandé, tire son poignard, prest à le luy fourrer dans le sein, lors qu'un remords de conscience le saisit. Dieu le permettant ainsi, afin que la trahison de Clorizande fust descouverte, & que les meschants en fussent punis, comme ils meritoient : de sorte que se proposant la cruauté
de

de son maistre, & se representant que petit eusse il luy en pendoit autant sur la teste, il remit son glaiue dans le fourreau, & esueillât Maubrun, apres quelques paroles il luy demanda pardon de ce qu'il auoit pensé faire. Et de faict, il luy raconta la charge qu'il auoit de le tuër, & la recompense qu'il en receuoit, dont il en auoit desia touché la moitié, Maubrun bien estonné de ceste chose, remercie ce Laquay de ce qu'il luy auoit descouuert vne telle trahison, & luy conseille de retourner vers son maistre pour luy dire qu'il auoit executé son dessein, à fin d'auoir les autres cinquante escus. Quant à luy, il auoit delibéré de s'en aller habiter en quelque autre pays, puis qu'au lieu où il demouroit pour le present, les seruices estoient si mal recogneus. Il luy apprit en suite comme Clorizande se vouloit despescher de luy, parce qu'il l'auoit induit à tuër Lucidamor. Que luy sans autre, auoit fait le coup induict par la persuasion de son maistre, qui maintenant, de peur que sa trahison ne fust cogneüe vouloit l'enuoyer en l'autre monde.

Ce Laquay ayant ouy la trahison de Clorizande, commença à le detester, resolu de quitter aussi son seruice si tost qu'il auroit touché les autres cinquante escus. Il prit doncques congé de son maistre, à qui il fit entendre la mort de Maubrun, dont il fut extrêmement aise, croyant que son crime ne viendroit iamais à la notice d'aucun.

Mais Dieu qui ne laisse rien impuny, & qui apres auoir long temps attendu le pecheur à penitence, paye avec usure le fruiet du peché, voulut que Maubrun auant qu'esloigner de la Prouince, alla trouuer le valet de chambre de Lucidamor, qui s'estoit re-

tiré en vn village prochain, auprès de son pere, resolu de passer ses iours, sans engager sa liberté à quelque autre maistre puis qu'il auoit faict perte du meilleur qu'il eust sçeu recouurer. Ils se cognoissoient familièrement, de sorte qu'il fut aisé à Maubrun de le tirer à l'escart, là où il luy raconta tout au long la trahison de Clorizande, & ce que nous vous auons recité, & puis gaigna le bois prochain. Ce valet qui n'auoit ny espée ny baston, & qui sçauoit que l'autre estoit vn dangereux garniment, n'osa crier apres luy, de peur qu'il ne retournaist, & ne le mist à mort. Tout ce qu'il fit, c'est de s'en retourner chez luy, & de penser comme il pourroit venger la mort de son bon maistre. Apres auoir beaucoup ruminé en sa ceruelle, il treuve que le plus expedient estoit d'aduer-tir Fleurie, qui passoit les iours & les nuits à plaindre, & à regretter la mort de s^{on} amy. La belle ne l'eut pas plustost veu que ses cris & ses douleurs se renforcerent, au souuenir de la joye passée qu'elle receuoit lors que ce valet fidele secretaire de leurs chastes affections, leur rendoit des lettres mutuelles. Mon amy (disoit ceste dolente) quelle perte commune auons nous faicte : toy d'auoir perdu vn si bon Maistre, & moy vn si digne seruiteur ? Au moins si ie pouuois auoir cognoissance du meurtrier, la cruelle vengeance que i'en prendrois, allegeroit parauenture le mal que ie souffre.

Madamoiselle (respond l'autre en sanglottant) ie ne suis venu icy que pour vous apprendre la plus grande trahison qui ayt jamais esté perpetrée. Clorizande en qui mon maistre se fioit autât qu'à luy même, en est l'aurheur. C'est luy sans autre qui a priué de vie la personne pour qui nous soupirons. O Ciel!

(s'escrie

(s'escrie-elle) comment le sçais tu ? Alors l'autre luy raconte tout ce qu'il en auoit appris de Maubrun, & le salaire qu'il en auoit pensé receuoir.

Qui eust veu alors Fleurie, on l'eust iugée comme vne personne qui est trāsportée de fureur & de rage. Ses beaux yeux où la douceur de l'amour souloit faire sa residence, sont maintenant deux astres qui preparent vne mauuaise influence à Clorizande. Ses iouës auparavant teintes de lys, & de roses vermeilles, sont rouges comme vn Montgibel. Elle est tellement transportée de colere, qu'elle iroit dès l'heure mesme toute forcenée plonger mille fois vne dague dans le sein du traistre, si puis apres reprenant vn peu ses esprits elgarez, elle ne deliberoit d'en faire vn plus rigoureux chastiment. Mō amy (dit-elle) ie te prie de tenir secret ce que tu viens de me rapporter, & sois assuré que ce maudit & execrable assassin receuta le salaire digne de sa meschaceté. Cependant ne bouge point du logis de ton pere, iusques à tant que ie te mande pour venir vers moy. Le valet luy obeyt, & prend congé, & en partant elle luy donna vne chasne d'or de la valeur de cent escus, & vne bague de pareille valeur, à fin de l'obliger à l'assister en ce qu'elle auoit entrepris d'exécuter. Tandis que les choses se passent de la sorte, Clorizande visite souuent Fleurie, pour voir si le temps qui adoucit toutes les passions humaines, ne donnera point de remède à la sienne.

La premiere fois que ceste Damoiselle le veid, depuis qu'elle eut cognoissance de sa trahison, elle fut en resolution de luy sauter dessus, & le dague; mais les considerations que nous auons dictes l'ayant retenuë, elle dissimula dès l'heure son mal-talent, & se

monstra vn peu plus joyeuse que de coustume , au grand contentement de son pere & de sa mere : mais plus encores de Clorizande , qui se promettoit de succeder bien-tost à la place de Lucidamor. De faict elle commença à luy faire les doux yeux , & à luy donner de petites priuantez, afin de mieux paruenir à bout de son dessein.

Ces amorces rendirent plus courageux Clorizade à luy declarer sa passioⁿ. & à luy remonstrer l'injustice qu'elle commettrait d'employer ses beaux yeux aux larmes, lors qu'elle les deuoit exercer aux conquestes de l'amour. Que si elle vouloit le receuoir au rang qu'elle tenoit son compagnon, elle ne perdrait rien au change, puis, qu'il ne luy cedit ny de courage, ny de valeur , ny de noblesse , & qu'il le surpassoit en amour, qu'il auoit iusques alors recelée, pour l'amitié qui estoit entr'eux deux. Elle feignant d'estre desia esprise de semblable ardeur, escoutoit ses paroles, & luy promettoit, que pourueu qu'elles ne fussent point dissimulées , elle perdrait la memoire de sa premiere amour, pour ne penser deormais qu'à luy complaire.

Clorizande croyant d'estre desia possesseur de la place , la voyoit presque tous les iours , & le bruid^t couroit que le mariage s'en accompliroit. Enfin Fleurie impatiente de se venger, tint vn iour ce discours à Clorizande : Mon cher amy, il faut que i'aduouë que vos perfections sont telles , qu'il m'est impossible de plus celer l'amour que ie vous porte. Je vis neantmoins cõtente, de ce que ie sçay que vous m'aymez aussi. Vous sçaez les accidents qui arriuent tous les iours aux mortels. Je vous prie que i'aye ce bien de vous voir demain au soir à ce petit pavillon , qui est au coin de nostre jardin , afin que nous puissions là
discourir

discourir librement de nostre mariage. Le vous donne cette permission que iamaïs homme n'a eüe, asseurée que vous n'outrépasserez point les bornes de l'honneur: autrement vous perdriez en vn moment, ce que vous auez acquis sur moy avec tant de travail. Vous ne manquerez donc pas de vous y rendre par vne petite porte de fer, où ie vous attendray.

Si Clorizande fut ioyeux de cette nouvelle, ie le laisse imaginer aux amoureux passionnez, lors que telles faueurs leur sont accordés. Il remercie mille fois sa maistresse, de la compassion qu'elle a de son mal, & pour signe de reconnoissance, il baise encores mille fois les mains qui le feront cruellement mourir, ainsi que vous apprendrez maintenant. Cette resolution prise. Fleurie enuoye vers le valet de Lucidamor, afin qu'il ne manque point de la venir treuver dès le iour mesme. Le messager fait ses diligences, & l'amene. Fleurie le tire à part, & luy raconte la trosse qu'elle a baillée à Clorizande, & puis le coniure de l'assister à la vengeance qu'elle veut prendre de la mort de son maistre. Le valet qui estoit poussé de même desir, luy promet d'y employer son honneur & sa vie, s'il en est besoin. Sous cette promesse Fleurie luy fait sçauoir comme elle a recouuert des filets, qui lieront pieds & mains à Clorizande aussi-tost qu'il sera cheu dedans, sans qu'il ayt moyen de se remuer. Le lendemain, auant que personne soit debout, elle & ce valet vont au lieu assigné, & tendent ces filets au seuil de la porte du pavillon, que Fleurie ferme puis après avec la clef qu'elle emporte.

Cependant Clorizande attend que le Soleil acheue sa course, & que la nuit avec ses larges voiles couure la face de la terre. Il accuse de paresse la sœur

d'Apollon, & se plainct que son frere va trop lentement. Vn moment luy est vn siecle. Mal-heureux ! si tu sçauois ce qu'on te prepare, tu voudrois qu'il ne fust iamais nait, & t'esloignerois du lieu dont tu t'approches, aussi viste que le berger qui a marché sur vn serpent qui vomit feux & flammes, & qui se iette apres sur luy, pour luy planter son venimeux aiguillon. Le Soleil s'estoit à la fin plongé dans le gyron de l'Ocean, & la troupe des estoilles brilloit sur nostre Orizon, lors que Clorizande arriva à la porte assignée. Il y treuve Fleurie, de qui la beauté luy soit parmy les tenebres, comme vn nouuel astre paré de mille rayons.


Elle n'auoit qu'un simple couure-chef d'un ouurage, au trauers duquel l'on voyoit ses cheveux blonds & deliez. Elle portoit vne cotte de satin incarnat, avec des bandes de clinquant d'argent. Ses bras n'estoient couverts que d'une chemise fine & desliée. Lors que ce Gentil-homme l'apperçeut, à peine que le contentement qu'il receuoit ne le fit mourir dès l'heure mesme. L'excez de la joye le rendoit insensible & muet, lors qu'elle le prit la main, & luy tint ce langage: Mon cher amy, l'extreme amour que ie vous porte, m'a forcée de vous octroyer tant de priuantez, ie vous prie entrons dans la salle de ce paillon, où nous aurons plus de moyen de discourir de nos amours. Clorizande sans se douter du piege, entre: mais il n'y eut pas plustost mis le pied, que le voila pris à autres liens que de ceux de l'amour. *O traistre!* (s'écria alors Fleurie) *c'est à ce coup que tu receuras le chastiment de l'assassin que tu as commis en la personne de Lucidamor. Ce qui me fasche, est que ie ne te peurs donner qu'une mort, car mille ne seroient pas suffisantes pour*

pour expier son crime. Ce disant, elle se ruë sur luy, & à belles ongles luy égratigne tout le visage. Le misérable veut crier, mais Maubrun est là tout prest, qui luy met vn baillon dans la bouche. Fleurie tire vn petit couteau dont elle luy perce les yeux, & puis les luy tire hors de la teste. Elle luy coupe le nez, les oreilles, & assistée du valet, luy arrache les dents, les ongles, & luy coupe les doigts l'un apres l'autre. Le mal-heureux se demene, & tasche de se dessempestrer, mais il s'estreint plus fort. Enfin apres qu'elle a exercé mille sortes de cruautéz sur ce misérable corps, qu'elle luy a ietté des charbons ardents dans le sein, & proféré toutes les paroles iniurieuses que la rage apprend à ceux qui ont perdu l'humanité: elle prend vn grand couteau, luy ouure l'estomach, & luy arrache le cœur, qu'elle iette dans le feu qu'elle auoit auparauant fait allumer dans cette salle. Quand cette execution est acheuée, & qu'elle void que l'aube du iour commence d'ouurir les portes de l'Orient, elle donne deux cens escus d'or qu'elle auoit sur elle au valet de Lucidamor, & le fait sortir par cette petite porte du jardin. Tandis elle ferme l'huy du pavillon, s'empore la clef, & se retire tout bellement à sa chambre. Lors qu'elle y est, elle prend de l'ancre & du papier, & escrit sommairement la trahison commise par Clorizande, & la iuste vengeance qu'elle en auoit prise. Ce fait, elle ouure vn petit cabinet, & prend du poison qu'elle destrempe dans vn verre avec de l'eau. Auant que l'aualer, elle tient ce discours: *Reçois (mon cher Lucidamor) agré la vengeance que j'ay prise du traistre, qui t'a priué de vie, en la fleur de tes ans. Mon ame qui est liée avec la sienne d'une estrainte si ferme, que la Parque ne scauroit la des-vnir, te serois*
de sin

desia allé treuuer, soit que tu fasses la demeure dans le Ciel Empyrée ou dans les campagnes plantées de mirthes amonreux: mais ie voulois que ton cruel meurtrier receust auparavant le salaire digne de sa cruauté. Proferant ce discours, elle auale couragement le poison, & puis se couche dans son lit. La violence & la quantité du breuage, c'estant bien tost emparé de son cœur, elle commence à fermer les beaux yeux, où l'amour cachoit ses traicts & ses flammes, & avec vn grand soupir qu'elle tire, son ame quitte ce beau corps, miracle de la Nature. Ce soupir fut tel, qu'il fut ouy d'vne Damoselle de chambre, qui touchoit en vn garderobbe prochain. Elle se leue, & court vers le lit de sa Maistresse, où elle void le triste spectacle de ses yeux mourans, & de la bouche qui tiroit les derniers traicts. Cette fille crie aussi, tost, & tout le monde accourt au secours. Le pere & la mere y attriuent, & font les plus pitoyables plaintes qu'on puisse descrire. Quelqu'vn void vn papier sur la table, il le lit, & apprend vn autre estrange accident. On va vers le pavillon, qu'on ouure, & l'on y treuve vne cruelle & sanglante execution. La clameur se redouble. Le pere & la mere sont au desespoir, & on y fait venir la Iustice. Le corps de Clorizande ainsi mutilé est remporté chez luy, au grand regret de ses parens, qui intentent procez contre le Pere. Pendant que les affaires s'alterent, vn Preuost prend par cas fortuit Maubrun, qui confesse tout le faict, sans attendre la question. Il est mis sur vne rouë, & le pere de Fleurie hors de Cour & de procez. Tout le monde accuse la trahison de Clorizande & regrette Luci amor & Fleurie. Il y en a neantmoins qui blasment quelquesfois la grande cruauté qu'elle exerça sur Clorizande: mais
quand

quand ils viennent à considerer puis apres sa iuste douleur & sa perte, l'on la met au rang de ces genereuses Dames tant celebrées dans les Histoires des anciens. Elle fut mise dans vn mesme sepulchre avec Lucidamor. L'on fit leur Epitaphe en cette sorte.

*Cy gisent deux Amants, dont le cruel destin
Trancha les plus beaux iours au point de leur matin:
L'un mourut par la main de la jalouse enuie,
L'amante desolée ayant vengé sa mort,
Se priua puis apres elle mesme de vie,
Pour monstrier qu'ils n'auoient tous deux qu'un mesme
sort.*



*DV PARRICIDE D'VN GENTIL-
homme, commis en la personne de son
Pere, & de sa mal-heureuse fin.*

HISTOIRE XI.

Est-il possible que ce siecle soit si maudit, & si execrable, qu'il produise des monstres que l'Afrique auroit honte d'aduouer? le croy que c'est l'esgout des autres siecles, & l'infame Theatre où tous les vices jouient leur personnage, & où les fureurs exercent leur plus grande forcenerie. O France autre fois mere de pieté, & de religion, & maintenant de tant d'horreurs & de prodiges que ton infamie a bien obscurcy l'esclat de ton ancien renom! A la mienne volonté qu'une autre plume que la mienne s'occupast

past à descrire ceste Histoire, que ie ne puis donner à la posterité, sans la vergongne qui te demeure empraincte sur le front, pour auoir mis au monde vne personne, qui donna la mort à celuy qui luy auoit donné la vie. Cét accident Tragique & execrable arriua en ceste sorte.

Il n'y a pas long-temps qu'au pays de Brie estoit vn Gentil-homme que i'appelleray Alderan, yssu de fort bonne maison. Il possedoit plusieurs belles terres que son pere luy auoit laissées. Il se maria avec vne Damoiselle belle & sage, s'il y en auoit en toute la contrée. Tant que sa femme vescu, sa maison se maintint en sa premiere splendeur: mais apres son trespas elle commença bien tost à decliner. Ils passerent neuf ou dix ans sans auoir aucuns enfans, & au bout de ce terme ils eurent vn fils. Heureux s'ils n'en eussent point eu du tout, ou s'il fust mort au point qu'il receut la vie. Sa naissance donna le trespas à sa mere, & sa meschanceré perpetra depuis vn double parricide. Il est vray que l'innocence de l'aage excuse l'vn de la peine: au lieu que l'autre merite le sac de cuir. Ce fils nommé Syluestre, fut nourry en la maison de son pere avec beaucoup de soin. Il donnoit en ses premiers ans esperance d'estre vn iour ce qu'il ne fut pas, tant les iugements des hommes sont incertains & abusez. Tandis qu'il est instruit aux vertueux exercices, par des personages capables, son pere qui depuis la mort de sa femme, n'auoit point eu enuie de se marier, se donnoit du bon temps, & se laissoit emporter à ses plaisirs desordónez, sans auoir gueres soucy de son mesnage. Il fit si mal les affaires qu'apres auoir emprunté de notables sommes d'argent, il fut contraint de vendre aujourd'huy vne ter-

re,

re, & de main vne autre. Quoy que les proches pères luy remonstraissent d'auoir plus de soin de la conseruation de sa maison, il ne quitta pas pourtant ce train de vie: si bien que de iour en iour tout alloit de mal en pis. Cèpendant Syluestre deuint grand. Lors qu'il se vit en liberté, le mauuais exemple de son pere, & son inclination, que la crainte de ceux qui auoient eu la charge de sa personne auoient iusques alors retenuë, le porterent bien tost à vne grande licence; il ne s'amusoit qu'à hanter d'hommes vains, & dépensiers qui iouoyent incessamment, ou qui voyoient les Dams. En tels exercices il faut auoir des moyens, & encores on est assuré de les espuiser bien tost. Desia la maison de son pere estoit incommodée, à cause de son mauuais ménage, & luy la vouloit rendre du tout vuide. Il empruntoit des vns & des autres qui luy prestoient pour vn temps, mais qui en fin voulurent estre payez, de sorte que se treuuant redevable enuers beaucoup de personnes il fut contrainct de se retirer en vn Chasteau qu'il auoit en Brie, quatre ou cinq lieües près de Paris. Ce fut là qu'il commença d'apprehender la necessité, & qu'il tascha à releuer sa maison par l'espargné qu'il s'y my à faire. Et parauanture fust il venu à bout de son dessein si son pere se fust voulu reduire comme luy, sans vendre & engager tous les iours, & continuer vn même train. Syluestre luy representoit bien souuent leur incommodité, & le coniueroit de considerer, que s'il venoit à rechercher quelque honneste party on feroit difficulté d'y entendre, pour le desordre qui estoit en leur maison: qu'il estoit desia temps qu'il se mariait, à fin de sortir d'affaires, dont il estoit impossible qu'il se desbrouïlassent que par la vöye de mariage. Le pere
apres

apres plusieurs prieres & remonstrances, promet à son fils de faire tout ce qu'il voudroit pour son aduancement, & de ne se mesler plus des affaires de la maison. Et d'effect dès l'heure mesme il luy fit donation de tous & chacuns ses biens, excepté d'une terre qu'il se reserua pour en faire à sa volonté, à la charge que son fils luy donneroit son entretien tant qu'il viuroit. Ce contract passé, Sylvestre prend le maniemment de tout, & commence des lors à mettre quelque ordre en sa maison. Toutesfois il y auoit tant de debtes qu'il vid bien qu'il ne les acquiteroit iamais, si ce n'estoit en se mariant richement. Il y auoit vn Gentil-homme voisin, qui n'estoit pas de si illustre extraction qu'Alderan; mais neantmoins fort riche, & principalement en argent. Entre autres enfans, il auoit vne fille nommée Amaranthe, belle & gentille au possible. Sylvestre se mit à la courriser, & tascher par vn continuel seruice d'acquérir ses bonnes graces. Il estoit assez agreable, & bien accort. Les bonnes lettres qu'il auoit apprises luy seruoient de beaucoup en compagnie, de sorte qu'il sceut tant faire par ses belles paroles, & par sa perseuerance qu'il fleschit aucunement le cœur de ceste Damoiselle à luy vouloir du bien. S'il n'eust tenu qu'à elle leurs nopces eussent esté bien tost accomplies. Mais le pere qui ne regardoit pas tant à la Noblesse qu'aux moyens, n'estoit gueres porté à prester l'oreille à ceste recherche. Sylvestre luy estoit bien assez agreable, & il n'ignoroit pas que ce luy estoit assez d'honneur qu'il fust son gendre: toutesfois il se representoit la charge qu'il auoit prise sur son dos, d'entretenir son pere dans sa maison tant qu'il viuroit: que c'estoit vn homme insupportable, & grand des-

pensier

penſier qui auoit mangé deſia quatre ou cinq belles terres meſmes qu'il venoit tout fraiſchement d'en vendre vne, qu'il s'eſtoit reſernée pour en diſpoſer à ſa volonté, & qu'il eſtoit capable de diſſiper encores le reſte. Toutes ces conſiderations bien digérées, il ſe reſolut de reſuſer ſa fille à Sylueſtre. Ce ieune Gentil-homme eſtoit cependant aſſidu à voir Amaranthe, & à luy reſmoigner par les ſeruices qu'il s'eſſorçoit de luy rendre ſon affection. Vn iour comme ils eſtoient tous deux dans vn verger, luy ne pouuant plus ſouffrir l'ardeur qui le conſommoit nuit & iour, luy tient ce langage : Si le Ciel vous auoit rendué autant ſenſible à la pitié, comme il vous a doüé de merite, il y a long temps que vous auriez octroyé quelque recompence à vne perſonne qui vous ſert avec tant de paſſion. Mais hélas ! mon malheur eſt tel, que ie ſouffre pour vous le plus cruel martyre que l'on puiſſe imaginer, & toutesſois vous deuenez tous les iours plus dure & plus cruelle. Il ſemble que ie ſuis né au monde pour eſtre l'exemple de ſouffrance, & vous celuy de cruauté. Il eſt temps (Madamoifelle) que vous donniez quelque allegement à mes maux, ou bien que voſtre rigueur acheue de me donner la mort. Elle ne peut beaucoup tarder, ſi vous eſtes reſolué de perſeuerer à me traiter ſi cruellement, & à perdre celuy qui ne peut viure, que par l'eſpoir de poſſeder vos bonnes graces. Amaranthe ayant ouy le diſcours de cét amoureux paſſionné, elle luy reſpondit en ces termes : Je ne ſçay (Monsieur) quel ſujet vous pouuez auoir de vous plaindre ſi fort de moy, que vous m'accuſiez de tant de cruauté ; Je ne vous ay iamais reſmoigné que ie meſpriſaſſe l'affection que vous me portez.

Tant s'en faut, i'en ay fait plus d'estime que de toute autre. S'il estoit aussi bien en mon pouuoir de vous aliger de vostre mal, comme i'en ay la volonté, assurez vous que vostre desir seroit bien tost satisfait. Mais vous sçavez que ie suis retenuë par deux chaines que ie ne puis rompre. Auant endure-rois-je mille morts. Par celle de l'honneur, qui m'est plus chere que la vie, & par la volonté de mon pere, à qui ie me dois conformer. Je vous ayme bien, ie l'ad-uouë, & parauanture plus que toute autre personne: neantmoins cette amour n'est pas si desordonnée, que ie n'aye tousiours deuant les yeux ces deux respects, dont ie ne passay iamais les bornes. Si vous auez desir de posseder ce que vous desirez, demandez moy à mon pere en mariage. Je croy qu'il ne vous refusera pas pour gendre. Pour moy ie vous en donne ma foy, de n'espouser iamais autre que vous, pour ueu que mon pere y preste son consentement. Syluestre louant l'honneste resolution de sa maistresse, protesta que iamais il n'auoit eu autre dessein que de paruenir par cette voye, à ce qu'il pretendoit: que plustost voudroit-il mourir d'une cruelle mort, que d'attenter à chose, qui peust apporter du preiudice à son honneur, & que puis qu'elle luy auoit déclaré son intention, il mettroit peine de faire l'ouuerture de leur mariage le plustost qu'il luy seroit possible. Apres auoir pris congé de sa maistresse, & l'auoir coniuurée de sa promesse, il s'achemine à Paris, pour y communiquer cette affaire à quelques siens proches parens personnes notables, & qui exerçoient des charges des plus honorables de la Iustice. Ils treuuerent bonne cette alliance, & à la priere de Syluestre, ils allerent à la maison du pere d'Amaranthe, pour rascher à terminer
cette

cette affaire. Il les reçut suivant leur qualité, avec toutes sortes de compliments, & eux l'ayant tiré à part, luy entamerent le propos du mariage de leur parent avec sa fille, & luy mirent deuant les yeux la belle alliance qu'il feroit en cas qu'il voulust entendre à cette recherche. Le pere apres les auoir paisiblement écoulez, leur respondit franchement, que bien que ce luy fust trop d'honneur, qu'un Gentil-homme issu de noble maison desirast d'estre son gendre, toutesfois il ne pouuoit nullement estre induit à cet accord pour la charge que Syluestre auoit prise de nourrir son pere: que ce seul subiect estoit si capable de l'en dégouter, qu'il luy estoit impossible d'y prester son consentement. Il les remercia pourtant de l'honneur qu'ils luy faisoient, & de la peine qu'ils auoient prise, dont il se publieroit toute sa vie leur obligé. Les patens de Syluestre ayans appris sa resolution, & voyans qu'il estoit impossible de l'en destourner, reprindrent leur chemin, & rapporterent à leur homme ce qui s'estoit passé. Luy se voyant ainsi refusé, ne peut proferer à l'heure vne seule parole. Il partit de la ville, & ayât passé le pont de S. Maur des Fossés, il arriva en peu de temps au Chasteau, où il faisoit sa demeure avec son pere. Quand il eut mis pied à terre, il s'enferma tout seul dans vne chambre, où il se mit à maudire le Ciel, les Astres, & ceux qui l'auoient engendré. Faut-il (disoit ce desesperé) que pour un fardeau, que ie me suis moy-mesme imposé sur mon ch. f, ie perde tout le contentement que j'esperois receuoir au monde? Seray-ie dōcques si mal-heureux, que pour le mauuais mesnage de celuy de qui ie deuerois receuoir du support, ie sois reculé de toute fortune? Maudite soit l'heure que ie vins au monde, puis-

qu'ils font cause du mal que i'y souffre, plus cruel que la mort mesme. Ainsi parloit ce desesperé, despirant tantost son pere, & proferant maintenant des propos contre son Createur, indignes d'un Chrestien. Cependant qu'il se rormente, & qu'il se desesperé, Satan qui est tousiours en sentinelle pour attrapper quelqu'un, se fourre parmy les execrables pensées qui naissent dans le cœur de ce miserable. Apres s'estre saisi de son ame, il luy met en teste de perpetrer vn crime horrible & detestable. C'est de se depescher de son pere, estimant par ce moyen paruenir puis apres à son attente, puis que le refus qu'on luy faisoit de luy donner en mariage Amaranthe, n'estoit fondé que sur ce qu'il estoit obligé d'entretenir son pere durant sa vie. O cruel & abominable Patricide! serois-tu bien si dénaturé, que de lauer ton execrable main dans le sang d'une personne que tu deurois racheter au prix du tien propre? Où est la pieté? Où est la religiô? Où est la crainte de Dieu? Mais à qui adresse ie mon discours? A vn Tigre, & à quelque chose encores de plus barbare. Durant qu'il se relout à cette execrable execution, & qu'il en recherche vn moyen plus aisé, il s'aduis de le communiquer à vn sié valet, homme d'aussi bonne farine que luy, & qui auoit merité cent fois le gibet pour plusieurs crimes, dont il estoit atteint. Il luy promet vne bonne somme d'argent, en cas qu'il l'assiste à executer son maudit dessein. Ce valet prompt à obeyr aux commandemens de son Maistre, & attiré de l'esperoir d'une telle recompense, se prepar. à luy seruir de bourreau. La voye la plus courte est, que tandis que tous les domestiques du Chasteau seront aux champs, à la cueillette des bleds. (car c'estoit la saison des moissons) & qu'il n'y aura que son

son pere & eux deux au logis, il luy donnera vn coup de pistolet dans la teste. A c's fins ils prennent iour & heure, pour venir à bout de leur entreprise. Le iour venu, Syluestre se leuë à la pointe du iour, & dit à son pere qu'il va à Paris pour quelques affaires. Il fait semblant de partir avec son valet, & neantmoins ils se cachent en vn petit bois prochain, attendant que l'heure soit venuë de faire leur coup. Ce iour-là tous ceux du Chasteau estoient au travail, lors sur les trois à quatre heures du soir, Syluestre arrive au logis, & y trouuant son pere seul, il luy fait accroire qu'il est de retour de Paris, pour le prier luy-même d'y aller coucher ce soir pour mettre fin aux conclusions de son mariage, en vn lieu qu'il luy designa, où vn nombre de parens d'vn & d'autre costé se deuoient rendre pour cét effect. Le pere croyant aux paioles de ce parricide, se dispose dès l'heure même de partir avec luy, & commande au valet de demeurer au logis pour le garder. Tandis qu'il fait seller vn cheual, & qu'il entre dans l'Ecurie, le valet bande couuertement son pistolet, & en s'approchant de luy, il le delasche, pour luy percer la teste par derriere. Je ne scay si l'horreur de commettre vne telle meschanceté luy fit varier la main, tant y à que le coup luy donna dans vne espatule dont il brisa l'os. Alderan tomba à terre, ietta vn haut cry, & appella son fils au secours. Cét abominable voyant que l'autre auoit failly de le tuer, & craignant d'estre descouuert, met la main à l'espee, & en donne deux ou trois coups dans le ventre de son Pere. Le pauvre vieillard vomit sa vie avec son sang, qui crie vengeance à Dieu, & coniure sa Maïesté, qui void tout, de ne laisser point impunie vne si grande & execrable meschanceté.

Quand l'exécrable veid qu'il estoit expiré, luy & son homme sortent du Chasteau, & se vont recacher au lieu d'où ils estoient venus. Ils reuiennent puis apres le soir au logis, & y treuuent les domestiques bien dolents, & bien effrayez de cette mort. Qui eust veu alors Syluestre lamenter la mort de son pere, il ne l'eust iamais soupçonné d'en estre la cause. O mon pauvre pere (disoit il) qui est le mal-heureux qui a osé en mon absence vous oster la vie. I'ay esté bien mal-heureux de m'en aller auourd'huy hors du logis. Si i'y eusse esté, cét assassin n'eust eu garde d'executer sa cruelle entreprise. Je ne cesseray iusques à tant que i'aye descouuert ce meurtrier, afin de le faire punir comme il a merité. Tenant ce discours, il s'arrachoit les cheueux, & alloit baiser mort celuy qu'il auoit eu en telle horreur durant sa vie. Mais ô merueille! comme il s'approche du corps, les narines & les playes s'ouurent, & iettent contre luy vn ruisseau de sang, dont il est tout souillé au grand estonnement des assistants. Ce n'est pas la premiere fois que ces miracles ont paru. Plusieurs en ont recherché la cause. Les vns s'appuyans sur l'autorité de Moyse, qui escrit que Dieu inspira aux narines de l'homme vne ame viuante, estiment que les meurtriers ayans priué le corps de vie, & forcé l'ame raisonnable & viuante, à quitter son domicile, ils offensent en ce faisant les deux vies de l'homme, l'Ame immortelle, & la sensitive. Le corps de ceux qui ont esté tuéz en rendent tesmoignage, lors que de leurs narines, où Dieu auoit infusé les deux vies humaines, du sang vient à ruisselet. Platon qui n'ignoroit pas les escrits de Moyse, dit que la personne de libre condition forcée à mourir de mort violente, se courrouçoit contre son meur-

trier:

trier : tout ainsi qu'ayant esté fraichement tüée, elle estoit encore remplie de frayeur, pour l'effort qu'elle auoit fait au passage de la mort, elle taschoit aussi d'espouuanter celuy qui l'auoit priuée de son corps, en luy remettant son crime deuant les yeux. Il y a d'autres Philosophes, qui tiennent qu'en vne mort violente & inopinée, le corps n'est pas pourtant du tout dissous & sans sentiment : mais qu'il y reste encores certaines reliques de l'ame, qui s'y sont recueillies & ramassées. La preuue qu'ils en donnent est par les membres coupez d'un corps qu'on void encores palpiter, & principalement par la teste, qui apres auoir esté separée, iette vn regard furieux, & a encores les yeux ouuerts, comme si elle se ressentoit de l'iniure qu'on luy a faiçte. Enfin on lit aussi dans les liures de plusieurs Autheurs cette raison, que i'estime plus probable que la derniere dont nous venons de parler, à sçauoir, que l'impression vehemente que le meurtrier a mise dans le cœur du meurtry, de sa furie & de sa violence, est enclose parmy l'ame sensitiue & apprehensiue, de sorte qu'elle n'en sort pas incontinent. Et quand on presente le meurtrier deuant le corps, elle se delasche & se debonde tout à coup, & émeut les reliques qui sont dans le corps, & alors le sang qui estoit ramassé dedans rejaillit incontinent.

Quoy que ce soit vn miracle Diuin, ou de la Nature, ce mal-heureux parricide, sans trop s'emouuoir du sang de son pere, qui rejaillissoit contre luy, & qui demandoit vengeance, ne laisse pas de songer à pallier sa meschanceté en cette maniere. Son pere auoit eu certaines paroles contre vn maistre Armurier de Paris. Ce differend procedoit de ce que l'Artisan luy auoit baillé de la marchandise, qu'Alderan ne vouloit pas payer.

Comme cét homme n'en peut retirer payement, il le fit actionner au Chastelet, où il dénia la dette, & à faute que l'Armurier n'auoit point de promesse, ny de tesmoins pour verifiet ce qui luy estoit deub, l'autre fut relaxé de la demande. L'Artisan bien fâché de perdre ainsi son bien, dit tout haut, en presence de plusieurs personnes, que puis qu'il n'auoit peu se payer en argent, il se payeroit en chair. Syluestre prenant ceste occasion en main, court dès l'heure mesme vers Paris, aduertir les parens du desastre arriué en sa maison, & assure que c'est l'Armurier qui a tué son pere. Il presente requeste, & a commission de faire informer. Decret de prise de corps est decreté contre cét homme. Il est interrogé s'il ne s'estoit point vanté de ce dont on l'accusoit. Il respond qu'emporté par la iuste douleur de perdre son bien il auoit tenu vn discours: mais que pourtant il n'auoit iamais eu dessein d'executer cét homicide: tant s'en faut qu'il l'eust commis, que dire & faire sont deux choses differentes, & que l'vn nobligeoit pas necessairement l'autre: Au reste, il s'offre à preuuer comme le iour qu'Alderan fut tué, il assista à la nœpce d'un de ses amis, d'où il n'estoit reuenu à son logis qu'à la minuiet avec sa femme. La Iustice luy permet de preuuer sa deffence. Ce qu'il faict par le tesmoignage de cent personnes. On le met hors de Cour, & de procez. Les parens aduertissent Syluestre de rechercher vn autre & que l'Armurier n'estoit nullement celuy qui auoit osé la vie à son pere. Quelques-uns de ses plus-proches se transportent à son Chateau, pour assister à la sepulture du deffonct, mais il ne veulent point qu'on l'enterre, que premierement

mierement Sylvestre n'aye faict mettre la main sur son valet. Ils disent qu'autre que luy ne peut auoir fait le coup, & se fondent sur deux raisons apparentes. La premiere est, qu'ils ont fait recherche de tous les costez du Chasteau, pour y remarquer quelques traces, & qu'ils n'en ont trouué aucunes, horsmies celles des domestiques. La seconde est fondée sur l'argent que le Pere auoit receu freschement d'une terre qu'il auoit vendue, & que sans doute ce valet pour l'emporter auoit esté induit à perpètrer ce meurtre. Raisons fort valables, si ce maudit & execrable fils n'eust point esté le principal coupable. Aussi ne veut-il entendre à leurs raisons, & allegue que ce sont des fausses imaginations qu'ils s'impriment dans la cervelle. Les parens courroucez de voir que cét homme supporroit une telle meschanceté, partirent à l'instant, & retournerēt à Paris. Tandis le parricide donne sepulture au corps en l'Eglise de la Parroisse du lieu : mais son pere n'est pas plustost mis dans la tombe, qu'il se sent picqué d'un remords de conscience. Les furies l'agitēt, il ne peut reposer ny nuit ny iour. Son crime luy represente à tout moment l'image de son pere tout sanglant. Il tasche de se diuertir : mais il ne peut. Il y a une Divinité (disoit un Payen) qui gehenne les consciences des meschans d'une torture insupportable, & qui les agite incessamment. Ce poignant aiguillon les presse iusques au dernier soupir de leur vie. Sylvestre recognoissant son crime, & desesperant de la misericorde de Dieu, prie son valet de charger son pistolet, & de luy en donner dans la teste, & puis de prendre cinq cens escus que son pere auoit laissez de reste de la terre vendue, & de s'enfuyr : Aussi bien (disoit-il) nous

sommes descouverts. Tu seras pris & mis sur vne rouë, & pour moy ie seray condamné à vne plus grieve peine. Mais quelque supplication qu'il sceust faire à son valet, il ne peust iamaïs l'induire à le mettre à mort. Tout ce qu'il fit c'est de prendre deux cent escus, & vn bon courtaud, & de gagner au pied. Sylvestre s'enferme cependant dans vne chambre & se jettant par terre, commence à proferer contre luy-mesme ce discours : *Ha ! maudit execrable parricide, est il bien possible que la iustice du Ciel puisse supporter ton iniquité ? O terre ! ouvre ton sein, & engloutis celuy qui ne merite point de voir la lumiere du Soleil, puis qu'il en a priné celuy qui luy en auoit donné l'usage ; où trouueray ie maintenant de la compassion ? Sera ce entre les hommes, moy qui n'ay rien d'humanité que l'apparence ? Et ce grand Dieu iuste punisseur des execrables, aura-il bien de la misericorde pour celuy qui la deniée à son propre pere. Je ne voy point que ie puisse euer la peine temporelle ny le iugement eternal ! Meurs miserable, & recherche par vn violent trespas quelque repos à ta conscience. Acheuant ce discours, il se leue tout furieux. & tout transporté de l'esprit malin, il prend vn pistolet qu'il charge d'vne balle de plomb, & apres il le porte à son front, pour s'en percer la teste. Comme il le vouloit descharger la main luy varia, la peur de la mort s'offrant deuant luy, de sorte que le coup donna seulement à costé, & luy emporta vn loppin de chair. Voyant qu'il auoit failly son coup, il se mit à crier. *Ha ! cruel bourreau, tu as bien eu le courage d'enfoncer ta main parricide dans le sang innocent, & tu n'as pas le cœur d'en expier le forfait sur toy mesme ? Non, non il faut mourir, & n'espargner non plus ton propre corps, que tu n'as fait le corps de celuy qui t'a-**

uoit donné naissance. Ce disant, il ouure la fenestre de la chambre où il estoit, vne des plus hautes de la maison, & se precipite la teste premiere du haut en bas. Mais Dieu, qui ne vouloit pas que ce parricide mourust sans auoir auparauant déclaré son forfait execrable, permit qu'il cheust dans vn fosé, remply de ronces, où il demeura tout le iour sans en pouuoir sortir. Cependant les domestiques reuenus des champs, & estonnez de ne voir ny maistre ny valet, cherchent de tous costez pour les treuuer. En fin il y eust quelqu'un qui estant monté en la chambre haute, & ayant ouuert la porte, veit sur la table vn pistolet & du sang espandu par la chambre. Il voit encores la fenestre ouuerte, & regardant en bas, il oyt vne voix qui se plaingnoit. Ayant appellé ses compagnons, ils vont vers le lieu, & treuuent que c'estoit leur maistre. Ils le tirent de là, & le portent dans vn liét. Mais il leur tient ce discours. *Pourquoy (mes amis) uisez vous d'un si doux traittement enuers un homme si abominable? C'est moy & non autre, qui ay donné la mort à celuy de qui i'auois receu la vie. De grace que quelqu'un de vous venge sur moy la mort de son maistre. Aussi bien ne puis-je eschapper de mourir, puis que i'ay violé les loix Diuines & humaines.*


Les seruiteurs estonnez d'un tel langage firent soudain aduertir les plus proches parens, qui se treuuerent le lendemain à son Chasteau. Quand il les veid il renforça les cris & ses plaintes. Il maudissoit sa vie en leur presence, & publioit son horrible forfait. Sa conscience, qui ne luy donnoit point de tréue, estoit son iuge, son tesmoin & sa partie. Dieu vouloit qu'il decelast luy mesme son crime, comme fit autresfois Bessus, parricide comme Syluestre. Les parens ne sca-

uoient

uoient que dire oyans la propre confession. Toutes-
 fois ayant consulté l'affaire, & pensé que si la Iustice
 en estoit informée, le bien seroit confisqué, tache-
 rent à le remettre. Ils luy représenterent l'infinité mi-
 sericorde de Dieu qui rend tousiours les bras ou-
 uers à ceux qui recourent à elle: bien que son péché
 soit grand, que la bonté de Dieu est encores plus
 grande. Au reste, ils luy apprennent qu'il n'est pas si
 mal qu'il en puisse mourir: qu'il peut faire telle pe-
 nitence, qu'elle sera capable d'expier son péché, qu'il
 change donc de langage, parce que si la Iustice en a
 le vent, on luy fera souffrir la plus cruelle mort qui
 se puisse imaginer: que le moindre supplice sera
 d'estre tenailé tout vif. Toutes ces raisons eurent
 bien quelque pouuoir de luy refrener vn peu la lan-
 gue: mais non pas de luy ôter l'enuie de mourir. Par
 interualles les furies le faisoient, de sorte que si l'on
 n'eust pris garde à luy, il eust couru les champs, & pu-
 blié son crime. Le Poëte Euripide introduit Mene-
 laüs dans l'vne de ses Tragedies, qui demande à son
 Neveu Oreste, d'où luy procédoit la maladie qui le
 tourmentoit incessamment l'ame & le corps. C'est la
 conscience (répond Oreste) d'auoir perpetré vn mes-
 chant acte. Les Payens croyoient que ceux qui auoient
 commis quelque méchante secret, ou quelque autre
 détestable péché, estoient accompagnés de furies, &
 qu'ils estoient vagabonds par le monde, afin que pour
 le moins s'ils eussent la vengeance des hommes, ils
 ne peussent euitter celle de Dieu. On a souuent veu
 des scelerats, qui à l'heure de leur mort pressés de la
 fureur de leur mal, estoient contraincts de confesser ce
 qu'ils adoint celé toute leur vie. Ils pensoient voir
 tousiours le bourreau qui les traismoit au supplice:

tant

tant le pas effroyable de la mort donne des eslancements de conscience aux coupables, leur mettant en fantaisie la peine qu'ils croyoient auoir meritée. Mais il ne faut pas s'estonner de ces choses, puis que l'éprit de Dieu diffus par toute la machine du monde, est le Iuge droicturier, & le tesmoin irreprochable, qui faict confesser au meurtrier ce qu'il voudroit bien celer. C'est luy qui expose au iour vne accusation, qui n'est point appuyée d'aucuns témoignages oculaires. Luy même la rend si claire, & si bien verifiée, qu'il ne reste plus que la condânation de celuy qui l'a perpetrée. Cét execrable Gentil-homme en sert d'exemple notable. Apres auoir faulsemēt accusé vn innocent, il s'accuse luy-mesme, & le bourreau qui le tourmente nuit & iour le force à decouvrir ce qui estoit caché. Ses parens pour sauuer le bien procederent si prudemment en cette affaire, qu'ils ne l'abandonnerent ny nuit ny iour iusques à la mort, qui fut quelques sept ou huiet iours apres. Quoy que le Prestre luy sceut remonstrier durant ce temps-là, de la misericorde de Dieu, il estoit tousiours neantmoins en doute & deffiance pour son detestable parricide. On l'entera dans vn mesme sepulchre avec son pere, & la leurs deux corps attendent le grand Iour, pour comparoître deuant le Iuge des viuans & des morts : tandis que le pere d'Amaranthe remercie Dieu, de l'auoir inspiré à ne donner point sa fille à cet abominable, & qu'il la pourueut en vn lieu digne de son merite. Le bruiet de cete estrange auanture courut bien-tost par tout le pays. Tout le monde en louë le iuste iugement, & supplie le Ciel de destourner les mal-heurs qui menacent la France, où tels crimes, auantcoureurs de son ire, se commettent.



DE L'AROMINABLE PECHÉ

*que commit vn Cheualier de Malte, assisté
d'un Moine, & de la punition qui
s'en ensuiuit.*

HISTOIRE XII.

L'Ayhonte de publier les horribles & detestables pechés qui se commettent tous les iours au siecle où nous sommes. La posterité ne les croira qu'à peine. Je n'ay entrepris d'escrire en ce volume que des choses qui sont arriuées depuis peu de temps, & dont i'ay veu vne grande partie. Je m'estonne que la Iustice de Dieu n'extermine le monde comme il fit du temps du Deluge vniuersel, puis que le vice y est monté en vn si haut degré, qu'il est impossible que la patience du Ciel le puisse plus longuement supporter. Voicy vn Histoire non moins veritable qu'horrible & execrable. Elle se represente sur le Theatre, au grand des honneur des Chrestiens; parmy lesquels on treuue des monstres qui donnent subject à ma plume de le descrire en ceste sorte.

Vn ieune Gentil-homme de Pologne (de qui ie rais le propre nom; pour les considerations que i'ay cy deuant dites en autre part, & que ie nommeray Eranthe) de fort bonne maison, & d'illustre famille, allumé du desir d'aller en Italie, Prouince rât renommée par toute la terre, & particulierement à Rome, tant pour y voir ces vieux monuments, & ces antiquitez, qui font paroistre encores en leurs ruines la gloire & la pompe de ce peuple, qui fit de l'Vniuers
vne

vne seule le Monarchie, que pour y apprendre toutes sortes d'exercices vertueux, dressa son train, & en vn equipage honneste fit tant qu'il arriua à Florence La beauté de la ville, & la courtoisie qu'il receut à la Cour du grand Duc, fit qu'il s'y arresta plus qu'il n'auoit faiët en toute autre ville, depuis le iour qu'il partit de sa maison. Tantost il y couroit la bague, maintenant il y manioit vn cheual, tantost il alloit à la chasse avec le Prince, & par tout il se monstroit si dispos, & si adroict qu'il estoit le bien receu aux meilleures compagnies de la ville. Sa beauté y seruoit encores de beaucoup. Elle estoit telle qu'il estoit impossible d'en treuuer en vn homme de pareille au monde. Ses yeux estoient verts rians: les cheueux blonds & crespez: la face estoit viue & coulörée, teinte de lys & d'œillers meslez ensemble: la taille belle & bien proportionnée. Au reste il n'auoit pas encores atteint la dixneuüiesme année de son aage. Toutes ses qualitez, beauté, ieunesse, valeur & richesse, le rendoient si recommandable par tout qu'en peu de temps il acquit l'amitié d'une Damoiselle de fort bonne maison, nommée Virginie, douée d'excellente beauté. Et bien qu'ils n'eussent pas la commodité de se voir, à cause de la rigueur qu'on exerce en ce pays enuers le sexe féminin, neantmoins ils se visitoient souuent par lettres. Et ne passoit gueres soir qu'Eranthe ne luy donnast quelque serenade, ny iour qu'il ne dressast quelque partie pour courre la bague deuant son logis. Comme il passoit ainsi les iours & les nuits à entretenir ses amours, vn gouuerneur qu'il auoit avec luy voyant qu'il sejournoit trop long-temps à Florence, & s'apperceuant bien que l'amour l'y retenoit, luy remonstra en fin le tort qu'il faisoit à sa reputation,

de

de n'acheuer pas l'entreprise qu'il auoit resoluë, lors qu'il partit de son pays : qu'à la verité l'amour n'estoit pas defenduë en l'aage où il estoit, mais qu'aussi il ne faut point s'empêtrer si fort dans ce Dedale, qu'on ne reserue tousiours quelque fil pour s'en retirer : qu'il luy conseilloit doncques de quitter pour vn temps ces passions de ieunesse, pour suiure la raison ; & pour cét effect qu'il se disposast de partir bien-tost pour aller à Rome, autrement qu'il s'en plaindroit à ceux qui l'auoient mis sous sa charge. Ce ieune Gentil-homme esueillé comme d'un profond sommeil, recogneut aussi tost que son gouuerneur auoit subiect de se fâcher. L'honneur se representa par mesme moyen incontinēt deuant ses yeux, de sorte qu'il se resolut de prendre congé pour quelque temps de celle qui auoit rauy sa liberté, (encores que ce luy fut vn extreme desplaisir) & d'acheuer son voyage, faisant neantmoins estat qu'à son retour il poursuuiroit le seruice qu'il auoit vouë à ceste beauté, qu'il ne pouuoit oïster de sa memoire. Cette resolution fut presque aussi tost mise en execution que prise. Virginie ayant sçeu son départ par vne lettre qu'il luy escriuit, pésa mourir de regret. Elle maudit mille fois le iour qu'il se separoit d'elle. Ses yeux se changerent en deux torrens de larmes, & sa bouche ouuerte à la douleur, proferoit des plainctes guidées de fureur & de rage. Sans la promesse qu'Erasthe luy faisoit de n'aymer iamais d'autre qu'elle, & sans l'époir qu'elle auoit de son retour, elle se fust donnée mille fois d'un cousteau dans le sein. Tandis qu'elle pleure, son seruiteur n'a pas moins de passion. Le tourment qu'il ressentoit fut si grand qu'un petit accèz de fièvre le prit à vne iournée du lieu d'où il

il estoit parry, de sorte qu'il fut cōtraint de sejourner deux iours au village, où il alla coucher. Durant ce sejour, vn Cavalier de Malte, que nous appellerons Flaminio, & de qui nous tairons le nom, pour le respect que nous portons à l'illustre famille dont il est issu, arriue au logis où Erāte logeoit. Flaminio l'auoit veu à la Cour du grand Duc, & le maudit & execrable amour l'auoit tellement rendu passionné de la beauté de ce ieune Gentil-homme, qu'il en estoit aux peines de la mort. Il ne songeoit qu'au moyen d'en auoir l'infame jouïssance. Peché maudit & detestable, abhorré de Dieu & de nature. Le remercie le Ciel de ce que pour le moins la Frāce n'est pas si encline à ce vice, que beaucoup d'autres nations. Certē abominable passion l'auoit arresté quelque temps à Florence, pour voir si l'occasion s'offriroit, à tel prix que ce fust, d'accomplir ses desirs: mais voyant qu'il tentoit vne chose impossible, il auoit resolu d'en laisser la poursuite. Lors qu'ils sçeut que ce ieune Gentil-homme estoit au logis où il arriua, & qu'il estoit prest de partir le lendemain pour aller à Rome, il treuva vne inuention autant subtile pour l'imagination, que maudite pour l'execution. Il fit semblant de n'auoir iamais veu Erāthe, mais ayant accosté vn de ses domestiques, il s'informa particulieremēt du lieu de son origine: du nom de ses proches parens, & du rang qu'ils tiennent en Pologne. Apres en auoir appris plus qu'il ne demandoit, & qu'il l'eut mis en escript, pour mieux s'en ressouuenir, il partit le lendemain apres Erāthe, le suiuant tousiours pas à pas, pour sçauoir où il logeroit, sans iamais parler à luy, ny se donner à connoistre: Erāthe alla loger aupres de l'Ourse, & ce Cheualier tout contre.

Le Gentil-homme Polonnois ne fut pas plustost arriué à Rome, qu'il commança d'y employer le tēps aux Academies, où les actes vertueux se practiquēt. Sa beauté & son adresse, ioinctes à son humeur fraîche & courtoise, luy acquēroient l'amitié de tout le monde. Flaminio songeoit à tous les moyens qu'il pouuoit pour en faire à sa volonté, soit de gré ou de force: mais plustost par la voye de l'un que de l'autre, car il n'ignoroit pas que iamais Erāthe n'y presteroit son consentement. Le peu d'espoir de paruenir à son dessein, le fit enfin resoudre à partir de Rome pour aller à Naples, lieu de sa demeure, pour s'oster cette execrable fantaisie de la teste, qu'il tenoit si bien secrette, qu'autre que luy n'en auoit la connoissance. Tandis qu'il estoit à Naples en sa maison, & que le temps luy en esteignoit presque le souuenir. Erāthe est à Rome en reputation d'un des plus adroits Gentils-hommes estrangers. Durant son sejour il escrit souuent à sa maistresse, & reçoit responce de sa part. Par ses lettres il luy tesmoigne comme l'absence à bien eule pouuoir de separer loing d'elle son corps, mais non pas son ame qui la luy représente tousiours. Qu'autre beauté n'aura iamais la puissance de le debaucher de son seruice, qu'elle est son Soleil, & que sans elle toute autre lumiere ne luy est qu'une obscurité: qu'il ferme sa paupiere à tous les astres qui pensent l'esclairer, cōme fait la fleur du soucy, lors que la belle splendeur du iour se cache dans les flos de Therhys. Virginie luy escrit d'autre coté que la douleur qu'elle ressent pour son absence, luy fait souffrir incessamment vne mort plus cruelle que la mort même. Le coniure de luy escrire souuēt, afin que ses lettres luy seruēt de consolation, mais bien plus enco-

res d'en estre l luy-mesme le porteur. Qu'il s'assure, que plustost le Tybre retournera vers sa source, auant qu'elle oublie son amour.

Tandis que l'amour entretient leur ardeur par des lettres reciproques, il prend fantesie à Eratthe d'aller à Naples, pour voir cette Cité que l'on surnomme la Genrille. Il fait doncques disposer ses gens à partir avec luy. O miserable & infortuné! où vas tu? Le plus grand affront qui puisse iamais arriuer à vn Gentil-homme de ta sorte, t'y attend. Pleust à Dieu que tu fusses encores en ton pays, sans dessein de passer iamais les Alpes.

Eratthe y arriua durant qu'on y faisoit les feux de joye, & qu'on y celebroit les nopces du Roy des Espagnes. On n'y parloit que de triôphes, de Carrozels, de combats à la barriere, & de courses de bague. Les Espagnols, & les Italienstaschoient à l'enny des vns & des autres d'y faire paroistre leur adresse. Comme ce Gentil-homme Polonnois alloit vn iour à la place, où l'on celebroit la feste, Flaminio l'entreuit, & le reconneut incontinent. L'amour maudite & execrable, que le temps luy auoit vn peu esteincte dans le cœur, cōmença de s'y r'allumer avec plus de violēce qu'auparauant. Quand il eut sçeu où il estoit logé, il l'attendit vn iour en vne rue, où Eratthe deuoit passer. Si-tost qu'il l'apperceut, il descendit de cheual, & courut l'embrasser. Eratthe estonné de cette nouvelle caresse, mit aussi pied à terre, s'excusant du peu de connoissāce qu'il auoit de luy Ha! Monsieur (dit l'autre) si vous ne me connoissez point, ie n'ignore pas qui vous estes. Vostre Pere s'appelloit le Comte de Plest, braue Cavalier, s'il en fut iamais au monde. Il rédit si signalée sa valeur en cette bataille

fameuse, que les Polonnois gaignerent contre ceux de Tartarie, que la memoire en demeurera eternelle. Vous avez vn oncle qu'on nomme le Baron d'Anty. I'ay receu mille courtoisies de luy, du temps que i'estois en Polongne, où i'ay demeuré pres de quatre ans, pour quelques affaires concernans nostre Religion. Enfin ie suis tellement obligé à vostre sang, que ie ne possède rien au monde, qui ne soit à vostre seruice. Eranthe esbahy encôres de cette cōnoissance, & croyant que ce que l'autre luy disoit fust veritable, le remercia de sa bonne volonté, & luy offrit en eschange tout ce qui dependoit de luy. Ce n'est pas tout (dit l'autre) ie ne souffriray iamais que fassiez autre logis que le mien. Vous y serez mieux accommodé & seruy avec plus de deuotion, qu'en celuy où vous estes. I'ay bien receu d'autres plus grandes courtoisies de vos parens. Le Gentil.homme Polonnois continua de le remercier, & s'excusa sur l'offre qu'il luy faisoit d'aller loger chez luy, craignant de l'importuner. Toutesfois l'autre le pressa si fort, qu'il fut contrainct pour ne paroistre inciuil, & mal appris, de luy accorder ce qu'il desiroit. Le voila doncques chez luy logé au plus beau quartier de son Hostel. Flaminio s'efforce de le traicter le plus magnifiquement qu'il luy est possible. Il tasche aussi de luy donner toutes sortes de plaisirs. Il luy fait voir les meilleures compagnies, & toute les singularités de cette ville. Cependant qu'il endort par ses artifices, & par ses feintes caresses Eranthe, ce mal-heureux & detestable ne pouuant plus souffrir l'amour desnaturalée qu'il luy porte, gaigne vn Moyne aussi mal-heureux & detestable que luy.

Cet execrable & abominable Moyne se tenoit
dans

dans vn Conuent qui est situé en vn lieu assez escarté. Ils prennent ensemble resolution, qu'un iour Flaminio y menera Eranthe dans la chambre, & que là il receura de luy tout ce qu'il desire, soit de gré, soit de force. Ha ! pestes abominables, qui faictes seruir à vostre horrible impudicité, vn lieu destiné pour le ieune, pour la pudicité, & pour l'oraison, où est maintenant vostre conscience ? Ignorez vous Dieu, & ne croyez - vous pas que son œil est tout voyant, & qu'il penetre les lieux les plus obscurs & cachez, mieux que l'œil humain ne fait vn verre clair & net. O temps ! ô siecle ! ô mœurs ! que les mortels sont deprauez !

Cette resolution prise, ces mal-heureux l'exécuterent en cette sorte. Flaminio mene vn iour pour mener Eranthe dans son carrosse. Ils sortent hors de la ville, & puis y r'entrét, & le Cheualier de Malte passe expressement aupres du Conuent que nous auons desja dict. Lors qu'il en est proche, il feint d'y auoir quelque affaire d'importance, de sorte qu'il commande à son cocher de s'arrester à la porte. Monsieur (dit-il au Polonnois) vous me permettrez, s'il vous plaist d'entrer leans, & d'y dire vn mot à vn bon pere qui y faict sa demeure. Il n'est pas besoin (respond l'autre) de me demander permission d'une telle chose, ie vous y accompagneray s'il vous plaist. Flaminio faisoit semblant de ne l'en vouloir pas importuner, avec vn refus qui l'y conuioit, plustost qu'il ne l'en destournoit. En fin il sort du carrosse, & entre dans le Conuēt accompagné du Polonnois. Il le mene en vn lieu escarté, où le Moyne les attendoit. Ce Moyne possédé de Sathan, les faict entrer dans vne chambre, où la colatio estoit preparée. Il leur faict poser la cappe & l'es-

pée, & puis il les fait boire d'autant. Quand il eurent goûté, Flaminio s'approche d'Eranthe, & luy tient ce discours.

Seigneur Eranthe, il n'est pas maintenant besoin que j'use de longs discours pour vous apprendre ce qui est de mon intention. Vostre beauté, & vostre bonne grace, m'ont si bien allumé d'amour, qu'il faut que j'obtienne de vous ce que ie desire, ou bien que vous mouriez presently. Faites election de deux choses ou de contenter mes desirs, ou de mourir. Si vous m'accordez de bon gré l'un, vous estes assuré de vostre vie, & d'avoir un amy qui vous sera eternellement acquis. Disposez-vous à me rendre satisfait tout maintenant, ou bien de souffrir cela.

Ce disant, il luy porte à la teste un pistolet prest à le lacher. Le Moyne de l'autre costé s'estoit saisi de son espée, qu'il tenoit toute nue à la main, le menaçant de la mort, s'il ne consentoit à leurs desirs. Ce pauvre Gentil-homme fut bien estonné, se voyant surpris de la sorte, sans espée n'y sans baston. L'image de la mort se presentoit d'un costé deuant ses yeux & de l'autre le peché detestable qu'on vouloit exercer sur luy. Vne fois il estoit resolu de souffrir le trépas, & balançoit tantost d'un costé, & tantost d'un autre. Despeschez-vous (dit Flaminio) autrement vous estes mort. Je vous prie (respond ce Gentil-homme) ayez pitié de moy, & ne me traictez pas si indignement. C'est trop attendu (repart le Moyne) il faut qu'il meure. Ce disant, il feint de le vouloir traverfer d'un coup d'espée, & Flaminio de luy lacher le pistolet. Ha! messieurs, (dit le Polonnois, que la frayeur de la mort avoit saisi) ie feray tout ce que vous voudrez, pourveu que vous me donniez lavie.

N'ayez

N'ayez peur de mourir, respond Flaminio, ie sacrifie rois plustost la mienne pour vous , apres que vous m'aurez accordé ce que ie souhaite. Voila comme la crainte de mourir fit que le Polonnois laissa faire au Cheualier de Malte ce qu'il voulut. Le Moyne en prit aussi sa part. O Ciel où est vostre foudre ? Que n'escez vous ces execrables ?

Lors qu'il eurent acheué c'est belle besonge , il estoient en resolution de le faire mourir, pour mieux celer leur meschaceté, si Eranthe qui se doutoit tousjour de leur dessein, n'eut apres ce mal-heureux acte sauté au col du Cheualier , le baisant & le caressant le mieux qu'il luy estoit possible. l'ay treuue (disoit-il) Monsieur, si doux vos embrassemens, que ie vous supplie de ne vous separer point desormais l'un d'avec l'autre. Je sçay bien que ce que vous avez exercé sur moy, ne procede que de la grande amour que vous me portez; mais si vous m'aimez, croyez que ie vous ayme encores plus. Telles & semblables paroles, douces & flatteuses, jointes à tât de caresses, eurent ce pouuoir que d'empescher la resolution qu'il auoyent prinse de l'enuoyer en l'autre monde. Ils beurent encore ensemble , & le Gentil-homme Polonnois feignoit d'estre le plus content du monde, à fin qu'il peust par cette feintise eschapper de leurs mains. En fin la nuict estant venue, Flaminio & Eranthe prindrent congé du Moyne, sortirent du Conuent, r'entrerent dans le carrosse , & retournent au logis , où le Cheualier pensoit coucher avec le Polonnois. Mais luy sortant du carrosse , fit semblant d'aller au garderobbe, & il s'achemina aussi tost vers la poste. Il demanda vn cheual. & il paya ce qu'il falloit, & sans autre compagnie que d'un postillon , il

courut dès l'heure mesme vers Rome. Il fit vne telle diligence, qu'il y arriua le lendemain de fort bonne heure. Ce iour le Pape Clement VIII. de qui la memoire est celebrée par la bouche des ennemis mesmes de l'Eglise Romaine, donnoit audience publique à tout le monde. Le Gentil-homme Polonnois s'en va au Vatican, entre dans la sale où le saint Pere estoit assis, s'approche & se jette à genoux, & luy demande iustice du plus indigne & execrable affront qu'un homme puissè receuoir. Le bon Pape, voyant un si beau Gentil-homme, si dolent, & si exploré, en eut compassion, s'informe de la cause de son dueil. Helas! saint Pere, (ce dit-il) le sujet de ma douleur est si execrable, que i'ay horreur de vous le reciter. Permettez qu'un autre que moy l'apprenne à vostre Sainteté.

Le Pape esmerueillé de cette nouveauté, commanda incontinent au Secretaire des memoriaux, qui est comme un Maistre des Requestes en France, de s'informer particulièrement de cét affaire. Il le fit & apprit de ce Gentil-homme tout le succez d'un acte indigne des Chrestiens. Il rapporta puis apres au Pape ce que l'autre luy auoit dit. Le bon Pere ayant entendu un tel forfait, en ressentit vne si griefue douleur, qu'il en pleura à chaudes larmes. Cependant il fait depescher un Preuost, avec des Archers, & des parentes, qui s'adressoient au Vice-Roy, luy commandant sur peine d'excommunication de leur prester main forte. Le Preuost arriue en peu de temps à Naples, & la premiere chose qu'il fait, est de surprendre Flaminio, qui auoit pris resolution de desloger le iour mesme, se doutant bien de ce qui en aduiendroit. Apres il va au Conuent, & y entre & mon-

stre

estre les lettres du Pape, & constitué prisonnier le Moyne. Le Vice-Roy vouloit au commencement se formaliser pour la capture de Flaminio, parce qu'il appartenoit à de nobles familles : mais le peuple crioit qu'on ne deuoit point laisser telles meschancetez impunies. En fin il fut arresté avec son complice entre les mains du Preuost, qui les mena à Rome. On les enferma dans la tour de None, où ils ne demurerét gueres. Leur procez leur fut bien-tost fait, & eux ayans confessé le crime, ils furent condamnés : le Cheualier d'auoir la teste tranchée au pont S. Ange, & son corps d'estre bruslé & le Moyne d'y estre pendu, estranglé & bruslé.

Le Vice-Roy s'employa avec plusieurs autres des plus grands d'Italie pour obtenir la grace de Flaminio, mais le saint Pere ne la voulut iamais accorder, quelque instance qu'on luy en fist, sçachant bien que s'il le sauoit, Dieu qui peut seul iuger de ses actions luy en feroit vn iour rendre conçe.

Tandis que ceste execution se faict, le pauvre Eranche est si honteux de l'affront qui luy est arriué, qu'il n'ose sortir de son logis, non pas mesme de sa chambre. Toute compagnie luy desplaist. Il ne fait que se tourmenter & que s'affliger, & se resolut à quitter Rome, & de s'en aller confiner en quelque pays desert, pour y passer le reste de ses iours, ne voulât plus paroistre désormais par deuant les hommes ; sans la peur qu'il a de perdre son âme, il se donneroit cent fois la mort de sa propre main. Helas ! (disoit-il) que ie fus bien coïiard & pusillanime, quand pour crainte d'une chose qu'il faudra que j'épreuue vn iour necessairement, j'ay perdu mon honneur ! Aurois-je bien le courage de me presenter désormais à mes pa-

rens ayant fait vne bresche à mon honneur & reputation? Non, il faut que i'expie par vne austere penitence vn si grand defect, puis que i'ay fait perdre de la gloire qu'avec tant d'ennuys & traualx i'auois recherchée, & l'espoir de reuoir iamais ma Maistresse.

Acheuant ce discours, il se desrobe secrettement de ses gens, & se rend si bien inuisible, que personne depuis n'en à point oy de nouuelles, quelque traual qu'on ait employé à le treuuer. La nouueté de ce fait court cependant par toute l'Italie. Virginie en apprend l'Histoire, & la perte d'Eranthe, qu'on ne treuve point.

Ce fut donc alors que la belle maudit son infortune, qu'elle accuse son destin, & qu'elle veut mourir. Sans vne de ses compagnes elle eust aduancé ses iours, ou par glaiue, ou par poison. Mais la mort de l'ame luy estant représentée deuât les yeux, & la peine des Enfers, qui est preparée aux desesperés, elle arreste la violence de sa main, & se dispose dès l'heure mesme de quitter le monde, & d'entrer dans vne austere Religion. La penitence qu'elle y fit est assez renommée par toute l'Italie. Elle y passa deux ans, exerçant sur son corps toutes sortes de rigueurs pour acquerir l'heritage du Ciel, où son ame s'enuola au bout de cette espace de temps. Dieu nous y vueille receuoir vn iour par sa misericorde.





DE LA CONIVRATION DE
Bajamon Tiepoli, Gensil homme Venitien.
contre sa patrie, & de sa fin
mal-heureuse.

HISTOIRE XII.

EXécrable faim de regner ! à quoy ne pousse-tu le courage des Mortels ? s'il est permis de violer le droit, on le peut faire (dit vn ambitieux ,) pourueu que ce soit pour auoir domination sur les autres. O parole indigne d'un homme de bien , & qui ressent la Tyrannie, quelque espee de douceur qu'on y mesle parmy. Iamais ce Paradoxe n'a esté receu parmy la commune société des hommes, & ceux qui l'on voulu mettre en effect, ont veu bien rarement leur vie paisible. Ils ont le plus souuét terminé leurs iours par vne fin funeste & tragique. Mille exemples, l'antiquité le tesmoignent , & ce moderne confirme la verité de mon dire.

Au temps que Pierre Gradeuigo gouernoit la Seigneurie de Venise, comme quarante & huictiesme Duc en ordre , il y auoit vn ieune homme Venitien nommé Bajamon Tiepoli accompli en rares dons de Nature, si l'ambition ne l'eust possédé. Son pere qui n'auoit que ce fils vnique, & qui l'auoir fait instruire en tout ce qui peut rendre recommandable vn homme de sa sorte , le laissa riche apres son trespas de plus de trente mille escus de reuenu. Je ne
 comprends

comprends point avec cette rente les maisons & les possessions, les vaisseaux & les galeres, dont il le fit possesseur, qui luy rendoient encores par trafic, autant ou plus de commodité. Ce gentil-homme voyant qu'il auoit tant de moyens, & que neantmoins il ne luy estoit point permis de les despeser extraordinairement, suivant les loix de sa patrie, qui pour sa frugalité, a quelque symbole avec l'ancienne Sparte, s'en alloit le plus souuent aux bonnes villes d'Italie, pour y passer le temps, & y paroistre plus qu'à Venise, où il ne pouuoit qu'employer mille escus tous les ans, soit en habits, soit en seruiteurs ou en despesse ordinaire de bouche. Quand il estoit de retour en sa maison, contraint de reprénder le premier train de vie, Il blasmoit en son ame le mesnage de sa cité, & mesprisoit sa Leziue. Considerant neantmoins qu'il falloit y passer sa vie, il entreprit vn dessein autant execrable pour l'entreprise, que mal-aisé pour l'exécution. C'est de se rendre Seigneur Souuerain de la Republique, & par mesme moyen de faire mourir le Duc, la Seigneurie, & tous ceux qui s'y voudroient opposer. Le temps luy estoit alors fort favorable: car les rudes secousses que l'Estat auoit souffertes en deux frêches batailles que les Venitiens auoient perduës, l'vne en Dalmatie, & l'autre au destroit de Galliopi, l'auoient fort esbranlé. La saison doncques, les calamités publiques, & la foiblesse de la ville luy seruants de supports, il fit vn voyage à Rome, où il demeura cinq ou six mois. Quand il fust de retour il commença de pratiquer les artizans qu'il cognoissoit hommes de faction, & dont la plus part auoient porté les armes aux guerres passées. Il achetoit de leurs marchandises encores qu'il n'en eust pas de besoin,

&

& par ce moyen faisant cognoissance avec eux, il disoit à chacun qu'il auoit vne querelle contre vn Gentil-homme Romain, à qui il auoit donné vn soufflet. Que ce Gentil-homme, qui n'auoit peu se ressentir sur le champ de l'affront, estoit resolu (suiuant l'aduis qu'on luy en auoit donné) de venir à Venise en habit dissimulé, & accompagné d'un nombre d'hommes armez pour l'attaquer, & pour l'assassiner. Tenant ce discours, les vns offroient de le secourir, les autres non. A ceux qui faisoient offre de l'assister en ceste feinte querelle, il faisoit deliurer de l'argent pour acheter des armes, tât pour eux que pour leurs valers, & sous main leur donnoit pension. Cependant il les prioit chacun à part de tenir la chose secrète, de peur que le Duc & la Seigneurie aduertis de cecy, suiuant leurs loix rigoureuses, & leurs soupçons ordinaires, ne creussent qu'on vouleust brasser quelque nouveauté contre l'Estat. Cette coniuration fut si bien faicte. & si conuerte, que iamais vn voisin ne reuela à son voisin l'entreprise, pensant tousiours estre tout seul, & qu'il n'y auroit que luy & les liens qui assisteroit Tiepoli, lors qu'il en seroit de besoing. Il attira en cette sorte tant d'hommes à sa cordelle, que le nombre en monta iusques à trois ou quatre mille, qu'il coniuroit toujours par paroles gracieuses, par dons, & par pensions de se ressouvenir de leur promesse, & d'accourir armez au secours lors qu'ils orroient hautement proferer *Tiepoli, Tiepoli*, Tandis il vinoit retiré en sa maison en si bon mesnager, qu'on n'eust iamais cteu qu'il attèstait ce où il aspirait. Son dessein estoit, ruër de premier abord le Duc & la Seigneurie, & puis sous pretexte de liberré, de charger le peuple de daces & d'impôts, & par mesme moyen

yen de se rendre Prince souuerain de l'Estat.

L'on celebre tous les ans à Venise au mois de May vne feste en l'honneur de S. Vito. Ce iour là , le Duc & toute la Seigneurie, accompagnez du reste & de la noblesse de la ville, & generalement du peuple , sortent de saint Marc, en grande pompe , & en grande ceremonie, & cheminent en procession iusques à l'Eglise de sainte Marine pour y rendre graces à Dieu d'vne bataille memorable que les Venitiens gaignerent contre les Turcs. Côme cette feste s'approche , Tiepoli va de ruë, en ruë, de boutique, en boutique, & de maison en maison. Il y sollicite tous ses partiss & les somme de leur promesse , en leur racontant comme il a appris que son ennemy sera bien tost en ville, resolu de luy faire vn affront, & chacun luy promet toute assistance. Et bien que neuf ans se fussent desia escoulez, depuis le commencement de la coniuration , que le long temps en eut fait mourir plusieurs de ceux qu'il auoit pratiquez, toutesfois il en auoit gaigné d'autres à leur place, de la volonté desquels il pouuoit librement disposer. Non content de ces menées, quelques iours auparauant l'execution, il inuita quinze ou vingts Gentils homme de la ville, de ses plus intimes amis, qu'il traicta magnifiquement. Apres auoir fait bonne chere, il commença à leur ouuir vn discours de l'Estat où la Republique estoit alors. Des grâdes foules & impositions que le pauvre peuple estoit contrainct de soustenir, pendât que le Duc & les Seigneurs du Senat s'engraissoient , & comme des sang-suës humoient le sang des Citoyens. Que cette calamité le faisoit souuent soupirer en luy-mesme , & desirer s'il estoit possible, quelque reformation. Quelquesvns de la troupe

pe que la maruoisie, & autres douces liqueurs auoient échauffez sous leur bonnet, plus que de coustume, appreuuant son dire, se mirent à crier tout haut, qu'il seroit bõ d'y employer le remede: & puis tous d'un commun consentement exhorterent Tiepoli d'y mettre la main. Que c'estoit luy qui comme vn Akide estoit destiné du Ciel à repurger leur cité de Monstres, & à y introduire les bonnes mœurs. Tiepoli oyant leur langage, feignit au commencement de n'en estre pas bien aise: mais voyant puis apres comme on le pressoit de le faire, il leur dit en fin, que s'ils vouloient l'assister, le moyen estoit tout ouuert pour venir à bout de cette entreprise. Sur cela il leur apprit ses intelligences, comme il auroit quãd il voudroit, quatre ou cinq mille hommes armez à sa deuotion. Les autres loüant son dessein, luy iurerent tout secours, & luy promirent d'exposer leurs vies, & leurs moyens pour ce subiect, & de n'auoir iamais de respos, iusques à tant qu'il fust absolu dãs la ville. Tiepoli les ayant remerciez, leur fit aussi promesse de donner à l'un la maisou, & les biens de Foscarini, à l'autre d'Andoli, & à l'autre de Troni, & enfin à chacun sa part des autres meilleures maisons.

Voila vne terrible entreprise, & vne temerité la plus grande qui se puisse iimaginer. Iamais celle de Catiline ne luy fut égale, ny maniée avec tant de dextérité: car plusieurs Senateurs assistoient le perfide Romain, & mesme celuy qui fut plus heureux quelque temps apres, à rair la liberté de sa patrie, & encore c'estoit en vn siecle où la licence estoit débordée à Rome, & où le peuple commandoit à baguette. Au lieu que la police si exactement bien réglée à Venise, deuoit faire perdre tout espoir à ce Conjurateur de

de venir à bout de ce qu'il entreprenoit, par vne ruse la plus estrange dont on ayt iamais ouy parler, si long-temps couuée, sans estre descouuerte. Il falloit bien qu'il fust accort, pour tromper si longuement des hommes si oculez, & si prudents entre toutes les nations du monde. Si cét homme se fust appliqué à des choses concernant le bien du public, & non sa ruyne, sans doute il eust réply les Histoires du bruiet de son nom. La conjuration estant ainsi resoluë, Tiepoli ne cessoit tous les iours de voir ceux qu'il auoit pratiquez, pour leur ramenteuoir leurs promesses, iusques à ce que le iour fut venu. Ceux qui n'ont iamais esté à Venise apprendront que la ville est composée de telle façon, que toutes les petites ruës, basties sur les fondemens dans la mer, respondent à certaines grandes places, de mesme que font les lignes paralleles à leur centre. Si tost que le iour de la feste de saint Vito fut arriué, Tiepoly deputa ces quinze ou vingt conijurez pour estre de bon matin, l'vn à la place de Santa Fosca, l'autre à celle de Santi Ioanne, & Paulo, & consecutivement chacun des autres à l'vne des places de la ville, où ces perites ruës aboutissent. leur commandant qu'aussi tost qu'ils iugeroient estre temps qu'ils se missent à crier. *Tiepoli, Tiepoli.* Cependant il se deuoit rendre à vne autre place, où tous les chefs des conijurez viendroient puis apres le treuver avec le peuple qu'ils auroient ramassé, pour executer l'entreprise. Le dessein estoit (comme nous auons desia dit) de tuer le Duc, & la Seigneurie & puis d'aller de maison en maison acheuer le reste de la Noblesse, sous couleur de liberté publique. Cette entreprise estoit grande, & releuée : mais si la plupart des choses se doiuent iuger par l'euene-

ment,

ment, elle fut aussi mal executée, que resoluë. Il faut croire qu'il y a des intelligences celestes qui conservent & maintiennent les États, des Anges gardiens des Provinces, & des Génies tutélaires des Républiques. Quand le changement des dominations temporelles arrive, il faut que le Ciel y consente, autrement les hommes ont beau brasser & entreprendre, ils y perdent leur temps, & leur peine, le vent n'emporte leurs desseins, & leurs résolutions sont inutiles. Le grand Morant de l'Univers, qui a si long-temps maintenu cette République, qu'elle n'a jamais souffert aucune mutation depuis onze siècles, fit bien paroître, que cette conjuration luy estoit desagréable, par les signes évidens qu'il enuoya. Les jours précédens avoient esté sereins, sans trouble & sans nuage: mesme la nuit qui deuant cette sanglante journée, luy fante & claire par la lueur des astres, qui brilloient plus que coutume. Mais toutesfois si tost que le Soleil appelé par la courtiere du jour, eut commencé de monstrier ses cheveux dorz, & de jamber la cime des Apennins, & des Alpes, voylà vn brouillars qui se leue si espais & si noir, qu'on n'y voyoit goutte, Il estoit entremeslé de foudres, d'orages, & d'esclairs si espouvantables, que plusieurs croyoient que la fin du monde estoit venue. Cette tempeste dura deux grosses heures. Elle fut cause que la Seigneurie, n'alla pas en procession de si bonne heure, comme elle avoit accoustumé les mesmes jours. Tandis que les Conjuréz n'auoyent pas laissé de se rendre aux places destinées pour esmonuoir la sedition, & voyant que le temps s'esclaircissoit, l'un d'eux impatient de venir aux mains, & de les tremper aux sang de ses Concitoyens, commença à crier *Tiepoli, Tiepoli*, Au bruit

de ce nom les Conjurez habitans aux ruës aboutissantes à cette place accoururent armez. Les autres oyants le grand bruiet & l'emotion, crient pareillement, *Tiepoli, Tiepoli*, & se voyent à l'instant environnez d'un grand nombre de satellites. Les principaux les menent en la place, ou estoit l'Authcur assemblé avec vne infinité d'autres. Quand Tiepoli void rous les gens rassemblez, & en deuoir de bien faire, il faiet crier, *Libersé, Liberté*, & puis monté sur vn eschafaut qu'il auoit faiet dresser exprés, harangue en cette sorte. *Il est temps (mes amis, & mes bons Citoyens) que vous secouïez le ioug pesant qu'on vous impose. Ce n'est pas le desir de vengeance, ou d'acquiescer quelque puissance sur vous, qui m'a conuié à vous faire prendre les armes. C'est plustost vne enuie de vous voir affranchis de tant d'impositions, dont vous estes surchargez, & que vous recourriez vostre liberté. Souffrirez vous tousiours qu'une iniuste tyrannie, sous pretexte de quitable seigneurie, vous foule aux pieds, & vous rende plus esclaués que les bestes brutes, ô Nation belliqueuse, digne semence de ces grands Romains, qui firent jadis de tout le monde vne seule Monarchie, animez vostre iuste courroux contre ceux qui vous traittent si indignement. Tesmoigniez par des effets genereux & memorables que vous estes yssus de ces grands hommes, que la rage des Gots, & des Vandales ne pût iamais surmonter. Allons (mes chers freres) punir les tyrans comme ils l'ont merité. La gloire qui vous attend, ne sera iamais assez recommandée par des dignes l'ouanges.*

Ayant acheué ce discours, il saute de la Tribune, met la main à l'espée, & s'appreste à son execrable execution. Le peuple affriadé de ce doux nom de franchise, crie avec luy, *Liberté, Liberté*. Chacun le suit les armes

armes à la main vers le Palais de saint Marc. Le Duc qui estoit sur ces entrefaiâtes desia accompagné de bon nombres de personnes de la Seignourie, ayant esté aduertty de cette sedition, tasche par sa prudence d'y apporter vn prompt remede. Il enuoye d'vn costé des personnes honorables qui courent par la ville, & appellent au secours dans le Palais les bons Citoyens qui desirent de conseruer leurs repos, & de secourir leur Prince, & leurs Seigneurs. De l'autre il depute Marc Michel, & Cuy Canal, personnages de qualiré vers Tiepoli, pout luy remôstrer de la part des Superieurs qu'ils ne veuillent rien attenter contre sa patrie, ny contre le repos de ses Citoyens. Mais c'est en vain, ils courent fortune d'estre alïommez, & sauuent leur vie à grande-peine. Le tumulte croist d'vn & d'autre party, car si Tiepoli attire beaucoup de personne, plusieurs autres viennent au secours du Duc. Le palais de S. Marc est bien assailly, mais il est encore mieux defendu. Tous ont cette croyance de combattre pout la commune liberté. C'est ce qui les fait plus librement exposer leurs vies. Sanglante & pitoyable iournée, où les amis meurent de la main de leurs amis, & les proches parens de celle de leurs plus proches. Les assaillis sortent dehors, & en nombre égal attaquent ceux de Tiepoli. La place de S. Marc c'est toute pauée de morts. On n'entend que cris & hutlemens confus & epouuantables. La victoire balance incertaine, tantost vers vn party, tantost vers l'autre. Miserable cité, les sâglântes saignée que tu auois receuës par la perte de deux si funestes batailles, ne t'auoient-elles pas assez affoiblie, sans que toy mesme tu t'en tirasses encor avec si peu de mesure. Iamais cette si fleurissante Republique ne

fut en si grand danger de faire naufrage : si Dieu protecteur des iustes querelles ne l'eust assistée de son secours, & permis qu'en fin la Seigneurie gagnast la victoire. Elle fut néanmoins Cadmeane, & acheptée à grand prix de sang. Tiepoli fit ce jour-là le deuoir d'un vaillant homme, mais sa valeur fut surmontée par le bon droict. Il taschoit de rallier tousjours ses gens, en leur representant la liberté, & quand il vuid que tout estoit perdu, il prit la fuite comme les autres par la rue Merciere, appelé vulgairement, *Fresqueria*, là où il tint encors ferme avec vne troupe des siens, & arresta ses aduersaires. Au bruit qui retentissoit par cette rue vne pauvre femme ouurit vne fenestre pour voir le subject du tumulte, & de frayeur donna vn si grand coup contre vn pot de terre, réply d'œilletz, qu'il romba du haut en bas, & en tombant rencontra la teste de Tiepoli, si rudement qu'il l'assomma. Ainsi mourut le cruel meurtrier de ses freres, par la main d'vne foible femme cōme nous le lisons au liure des Iuge. Vne mesmes aduenture termina les iours de ce grand Pyrrhus Roy des Epirotes, suivant le recit que nous en fait Plutarque. Les autres conintez & seditieux voyans Tiepoli estendu par terre, perdent courage, & prennent la fuite. Ceux qui peuent estre attrapez sont pendus & estranglez sur le champ. Le corps pareillement de Tiepoli est pendu, & puis trainé, & jetté dans la mer comme indigne de sepulture. La sedition estant appaisée, & les autheurs de la coniuration punis comme ils le meritoient, le Duc fait assembler le peuple seditieux, & se contente de le reprendre aigrement, commandant à chacun de s'employer en besongne, & de n'attenter iamais plus

contre

contre l'Estat. Cette douceur luy acquit la bien-
vueillance de tous generalement, & supprima tout
ce qui pouvoit estre resté de faction.

Tandis que les choses passent de la sorte, la fem-
me qui auoit fait tomber le pot d'œilllets, est appel-
lée par deuant le Duc, & la Seigneurie est interrogée
en qu'elle maniere elle auoit si bien sçeu atteindre
Tiepoli que de l'assommer. Cette pauvre femme ré-
pli de simplicité, respondit qu'elle estoit bien mar-
rie d'auoir tué vn homme, & d'auoir perdu son pot.
Que neantmoins elle estoit excusable pour ce meur-
tre, puis qu'elle l'auoit cōmis sans y penser. La Sei-
gneurie luy dit qu'elle n'en deuoit pas estre marrie
puis que c'estoit vn perturbateur du repos public &
vn ennemy de la patrie. S'il est ainsi (repart-elle) ie
ne plains pas mô pot, ny mes œilllets. La Seigneurie
admirant sa simplicité, luy commanda de demander
ce qu'elle voudroit pour la recompēse qu'elle meri-
toit d'auoir fait mourir Tiepoli, & qu'on la luy octro-
yeroit. Mes Seigneurs (dit-elle) i. suis vne pauvre fē-
me veufue, & chargée de beaucoup d'ēfants. Ie ne pos-
sede rien que ce que ie gaigne en traueillant de mes
mains, si biē que j'ay beaucoup de peine à les nour-
rir, toutes fois ie les entretiendrois honnestement
suiuāt leur qualité, s'il ne me falloit mettre en reser-
ué tous les ans vingt ducats, que ie paye pour loua-
ge de la maison où ie demeure. Si vous auez desir de
me faire que quelque bien, ie vous supplie me dōner
vne rente de pareille somme, & ie seray obligé, moy
& mes enfās de prier Dieu pour le soustē de la Re-
publique, & pour vostre prosperité. Le Duc, & les
Seigneurs assemblez entrans en plus grande admira-
tion, pour sa nayfue façon de parler, & de requerir,

la voulurent récompenser dignement, à fin qu'elle seruist d'exemple à la posterité, pour ceux qui desirerent de seruir leur patrie. On luy ordonne mille escus de rente annuelle, payables pour elle, & pour marque eternelle de ce qui estoit arriué, elle voulut que tous les ans au mesme jour de *Saint Vito*, on plantast vn estendart, & qu'on le mist à la fenestre. Cét estandart est de taffetas cramoisy. On y voit peint *S. Marc* patron de la Cité de venise. A genoux est vne femme, & deuant elle vn pot d'œillels. Le Duc avec la Seigneurie, & tout le reste des Citoyens, passent deuant en procession ce mesme iour, & de là l'on va à l'Eglise *S. Vito*. En outre il est ordonné que les armoiries de *Tiepoli*, & de tous les conjurez qui estoient avec luy, seront effacées, ostées, & rompuës, la part où elles seront trouuées, soit en plate peinture, soit en pierre, ou en bois, & que ceux qui les garderont, seront punis corporellement comme complices de son execrable attentat. Que la maison de *Tiepoli*, assise sur *Realto*, sera razée, & qu'en sa place on dreillera vne boucherie publique, afin que cela tesmoigne à la posterité, que le lieu, où le dessein auoit esté pris de respandre le sang innocent des Citoyens, meritoit d'estre destiné pour estre abreuvé du sang des bestes. La Seigneurie veut encor que ceux qui portent le nom soient desormais tenus & declarez incapables de pouuoir monter à la dignité Ducale, comme indignes de la qualité, qu'un de leur race auoit voulu vsurper par la tyrannie. Elle enjoinct aussi qu'ils ayent à changer leurs armes, & qu'au lieu de celles qu'ils porttoient auparauant, ils portent vn escu de gueules, broüillé de sang, à vne queue de scorpion d'argent. Armes di-

gnes de l'auteur d'une si grande & si abominable trahison. L'escu & le sang signifioient la marque perpetuelle, & le dessein desesperé, qu'il auoit pris de respondre rât de sang. Et la queue descorpion le venin de Tiepoli, qui auoit parut sur la fin en la queue de ses actions. Cette queue estoit d'argent, parce que par argent il auoit corrompu les volontés du peuple, & fondé son execrable projet d'vsurper la Republique, au prix du sang & de la mort du Duc, & de la Seigneurie, & de ses Ciroyens. C'est la fin miserable & Tragique de Tiepoli, commune presque à tous ceux qui le laissent emporter si auant à leur ambition, qu'à la mienne volonté que son exemple seruist d'instruction à tous les perturbateurs du repos commun. Tant de mal-heurs qui en succedent tous les iours n'en sanglanteroient pas les publics eschaffauts. De si grands Capitaines & conducteurs d'armées, qui ont rât de fois deffié la mort au milieu des plus sanglâts hazards, n'auroient point finy leur vie par la main d'un infame bourreau. Iem'e sçonne que ceux qui voyent ces spectacles, ou qui les entendent reciter, n'en deuiennent plus sages. Il faut bien dire que l'ambition qui est auetugle, remplit aussi d'auetuglement tous ceux qu'elle possède une fois, ils courent aussi librement à leurs funeraillles, qu'à des nopces, & il n'y a espee de meschanceté qu'ils n'attendent, pourueu qu'ils esperent de dominer.

O Ange rutelaire de la France, qui auiez si longtemps conserué nostre grand Roy, & destourné de son chef les poinctes homicides, & qui pour nos pechez auez souffert, qu'il nous fut rauy, vucilles garder la sage & genereuse Marie. Benissez toutes les

Pour quelques particuliers ie ne veux diffamer plusieurs honnestes familles. Ie me contente de rapporter la verité du subiect, les lieux où les Prouinces où les choses sont arrivées; ensemble le temps à peu près, encores qu'il n'en soit pas trop de besoin, puis qu'il n'y a point icy d'Histoire en ce volume, qui ne soit aduenüe depuis vingt ans. Il n'y a gueres d'auantage de celle que ie vay vous reciter.

Ceux qui sçauent tant soit peu les affaires du monde, n'ignorent point que nous auons veu assis dans la Chaire de S. Pierre, vn Pape sorty de fort bas lieu. Il estoit fils d'un pauvre Conradin, ou paysant, d'un village qui est situé près de Senogalle, en la marche d'Ancone. Deux Cordeliers l'amenerent du lieu de sa demeure à Rome, & là il profita si bien aux bonnes lettres, qu'estant paruenü en âge, son sçauoir le rendit enfin Pere Gardien de leur Couuent. Et comme quelque different touchant la religion fut suruenü en Espagne, il y fut enuoyé par Pie V. en qualité d'Inquisiteur, reformateur, où il s'aquitta si dignement de sa charge, qu'estant de retour à Rome, il y receut le chapeau de Cardinal. Quand il fut paruenü à cette tres-illustre dignité, il commença à faire du bien à ses pauvres parens, & mesmement il retira chez luy vn sien frere, que nous appellerons Altomont. Cét homme, bien que nourry toute sa vie au village, se rendit neantmoins en peu de temps si bien versé aux affaires que l'ont fait en Cour de Rome, qu'on eust dict qu'il n'en auoit iamais bougé. Il auoit vn bon sens qui ayant esté cultivé, meritoit d'estre employé.

Le Cardinal son frere qui estoit vn des grands hommes de nostre siecle, ayant aussi remarqué son iuge-

ment, luy acheta vn office honorable qu'il exerçoit sans reproche. Il passa en l'exercice de cette charge quelques années, sans qu'il luy prist enuie de se marier. Durant ce temps, il y auoit en la ville vne Dame d'honneste famille, fort accorde & fort galante, nous la nommerons Flaminie. Ses parés luy auoient fait apprendre en sa plus tendre ieunesse tout plein d'exercices vertueux. Entre autres elle jouoit si parfaitement du luth, qu'il n'y auoit Maistre en Italie qui oüst s'esgaler à elle. Ses attraiets & ses appas joincts à sa beauté, bonne grace, & autres louïables parties, eurent tant de puissance sur Altomont qu'il en deuint extrémement amoureux. Le Cardinal ayant appris cette nouuelle amour, par l'ouuerture que son frere, luy fit du mariage qu'il pretendoit contracter avec Flaminie, ne vouloit nullement y prester son consentement, soit qu'il presageast le malheur qu'il en succederoit, soit qu'une autre occasion l'en diuertist. Neantmoins vaincu par les larmes, & par les supplications d'Altomont, il s'y accorda en fin, & fist demander cette fille à ses parens. Eux voyants que cet homme auoit des moyens, & vn frere encores colloqué en vn si haut degré d'honneur, de qui il pouuoit retirer beaucoup de commoditez, la luy accorderent fort librement, sans s'informer si elle l'auoit agreable. Faute notable où tombent le plus souvent les peres & les meres, qui ne regardent qu'à ce qui leur semble bon, & expediant, & ne considerent pas que tous les enfans ne sont pas de si bon naturel que de se conformer à leurs volonte. Flaminie est doncques accordée outre son gré à Altomont. Elle n'ose contredire à ses parens, & toutesfois elle ne peut oublier l'amour qu'elle porte au Seigneur

Saluste,

Saluste. C'estoit vn Gentil-homme Romain des plus accomplis de la ville. Il auoit long-temps faict l'amour à cette fille, & par sa perseuerance, & par son merité, acquis ses bonnes graces. Comme il pensoit jouyr du fruiet de ses amours par l'honneste voye du mariage, voila qu'un autre que l'on croit plus riche que luy, est preferé, & luy fraudé de son attente. Quand il sceut que le mariage d'Alcomont & de Flaminié estoit conclud, il se mit à maudire l'Amour & son infortune. Il accusa les astres non coupables de son mal-heur, & proféra tout ce que la rage profere lors qu'elle s'est renduë maistresse de nostre raison! Ha! (disoit-il) cruel Amour, faut-il qu'apres tant de peine & de trauail i'aye battu les buissons, & qu'un autre prenne les oyseaux? Et-cé cecy le salaire que recoiuent ceux qui passent les soirs & les nuits à te scrire. O indigne recompense! ô mal-heureuse fortune! à quoy me reseruois-tu le iour que ie reçois naissance? Et vous astres, cōplices de mon cruel destin, pourquoy ne respōdiez vous toute vostre mauuaise influēce à mōberceau? Si ie fusse mort au point que ie venois de naistre, ie serois bien-heureux & ne ressentirois pas maintenant le plus cruel martyre, que le desespoir faict souffrir.

Tandis que Saluste lamēte la perte de ses amours, Flaminié sospire la sienne. Elle appelle cent fois la mort à son secours & accuse d'injustice ses parens. Quelquesfois elle ēte en un si cruel desespoir, qu'elle veut ouurir son sein d'une dague, ou aualer des charbons ardens comme Percie. Cependant Alcomont la visite, & elle dissimule sa passion, & luy faict assez bon recueil en apparence, pour ne donner point subiet à ses pere, & mere, de se facher contre elle &

de

de l'accuser iustement de desobeyssance. Enfin le mariage s'accomplit, & Altomont recueille la premiere fleur de sa virginité. Toutesfois vn autre en la pensée. Elle ne peut l'arracher de son cœur, quelque soin qu'elle y puisse mettre, tant cette premiere amour y estoit enracinée. Saluste apres s'estre aucunement resolu à cette affectiō, par la visite qu'il faisoit d'autres subjects, & le temps commençoit peu à peu à rendre ce feu languissant, lors qu'il se trouua vn iour aux champs, au mariage d'une sienne parente, où Flamine auoit esté inuitée avec son mary. Ils n'eurent pas plus tost jetté les yeux l'un sur l'autre qu'amour comença de r'allume son estincelle presque esteinte. Si Flaminie eust si bien osé s'approcher de Saluste, comme elle luy lançoit à tous momens des regards doux & pitoyables, elle luy eust bien tost déclaré le mal qui la possedoit. Mais la crainte qu'on ne descourist sa passion, ne luy donnoit point d'autre permission, que l'usage des œillades, qui tesmoignent assez à Saluste ce que sō cœur vouloit dire. Apres dîner le nouveau marié fit apporter vn luth, qu'il mit sur la table, & avec la cōpagnie pria Flaminie d'en vouloir jouer. Son mary même l'en requit. Elle apres quelques excuses se voyât pressée par les prieres d'une si honneste assemblée, prit l'instrument, & l'ayant mis d'accord se mit à le toucher si melodieusement, & à y marier si bien la douceur de sa voix, qu'on eust dit que quelque esprit celeste estoit descédu en terre, pour y faire entendre la douce harmonie du Ciel. Apres plusieurs airs qu'elle acorda sur le luth, elle se mit à jeter vn regard sur Saluste, capable de faire mourir & reuiure à même tēps, & puis chanta ces vers, qu'elle mesme auoit composez en sa langue Italienne. Vn
mien

mien amy me les donna à Rome. Ils commencēt ainsi, *Cruel Amour*. Les ay traduits mot à mot en cette sorte, sans y adiouster ny diminuer,

CHANSON.

*Cruel amour ce je de me poursuivre ;
Ne vois tu pas que mon cœur est à toy ,
Et que tantost si te cesseray de vivre ,
Qu'au rang de constance & de foy ;
Je ne m'en puis, ny ne m'en veux distraire :
Amour a si eu des cœurs trop bien lier ;
Quoy que le Ciel me soit toujours contraire ,
Je ne scaurois son merite oublier.*

Toute l'assemblée ne cessoit de louer les parties & louables qualitez dont cette Dame estoit accomplie, lors que Saluste touché au vif de son amour, raschoit de l'accoster, pour luy declarer l'estat ou il estoit reduit, & pour la requerir d'auoir pieté de son mal. Elle n'estoit pas en moindre peine, & si la crainte de son mary ne l'eust retenuë, elle eust bien tost accompli le desir qu'elle auoit de parler à luy. En fin l'heure de partir estant venuë, la compagnie prit cōgé des nouveaux mariez. Altomont r'amena la fême à son logis, & Saluste s'en retourna aussi accompagné de quelques siens amis, avec le regret de n'auoir pas eu la liberté d'entretenir sa Maistresse. La coustume du pays est semblable à celle de France, où les femmes mariées discoutent avec les hommes.

Les Italiens sont plus jaloux, & tiennent pour maxime, qu'on doit garder & enfermer les femmes aussi bien que les poules, autrement on est en danger de les perdre. Coustume que ie ne scaurois approuuer, puis qu'il est impossible d'empêcher vne femme de mal faire, quand elle en a fait la resolution. Les murailles

railes, ny les tous da'irain, ne sôt pas capables de les tenir. Toutes les hystoires anciennes & modernes le tesmoignent, & cette cy encores vous l'apprendra, si vous prenez la peine d'en voir la suite.

Quâd Flaminie fut arriüée au logis avec son mary, elle feignit de se treuervn peu mal, de sorte qu'elle se retira dans vne chambre escartée pour s'y reposer. Ce fut à l'heure que la violence de son amour ne pouuant plus se contenir, sa bouche proféra ces paroles. *Viuray ie doncques (disoit elle) iouïssours en cette misere sans que ie donne remede à mon mal ? Seray ie comme la biche blefée qui porte le dard qui luy perce le corps & qui au lieu de rechercher le daitame, pour l'enirer, fuit par monts, par valées, & par plaines: sans considerer qu'elle ne s'estloigne point de la cause de sa blefseüre ? porteray ie iouïssours dans mon cœur la cruelle flesche de l'Amour en fuyant la douce Panacée qui l'en peut arracher ? Non, non, il est temps que la guerison s'ensuiue & que ie foule aux pieds tous les vains respects de ceste chimere d'honneur, qui prend naissance du cerueau creux des maris jaloux. Acheuant ce discours, elle prend du papier & de l'ancrè, & puis elle escript à son Saluste cette lettre.*

L'Amour que ie vous porte ne permet pas que ie souffre d'auantage, sans vous en donner vne entiere cognoissance. La facheuse estraincte dont ie suis tée, n'est pas assez forte pour m'empescher de vous voir, si vous auez le courage de vous treuuer demain à l'heure, & au lieu que costé fidelle messagere vous assignera. Si vous m'aimez, comme vous m'auiez autres'ois protesté, vous y treuuerés cel'e qui meure mille fois le iour, pour ne vous voir pas, & qui vit de l'esperoir qu'elle a de bien tost vous voir, Adieu seul espoir de mes desirs.

Ayant

Ayant clos de cette lettre, elle appelle vne sienne fille de chambre nommée Lucie, en qui elle auoit vne entiere confiance, & apres l'auoir coniuée de tenir secretes ses amours, elle la prie de porter cette lettre, & de la donner habilemēt à Saluste. Lucie sçeut si bien faire son message, qu'ayant espié l'occasion que Saluste sortoit de chez luy, elle le tira à part, & luy ayant rédu la lettre luy exposa ce que sa Maistresse luy auoit commandé de luy dire particulièrement & de peur d'estre descouuete, s'en retourna aussi-tost vers elle. Si cette nouuelle fut agreable à nostre amoureux, i'en laisse le iugement à ceux qui desesperez de jouyr du fruit de leurs amours, voyent en vn moment la fortune leur rourner son regard amiable. Quand il eut ouuert la lettre, & lu ce qu'elle contenoit, il benit mille fois l'Amour, de la recōpense qu'il luy donnoit, de tant de travaux qu'il auoit endurez. & ce reste du iour avec la nuit qui suruiēt, lay semblent vn siecle, tant ils retardent (cōme il luy est aduis) leurs courses. *Que ta venue (disoit-il) est longue, ô belle Courrière au iour. Si l'amour a quelquefois possédé ton ame, prens pitié d'un pauvre amoureux, qui attend la recōpense de ses travaux par ton beniuſe arriuée. Helas ie pense que le plaisir que tu reçois à baiser ton Cefale, te retient ainsi dans le lit paresseuse, sans te soucier de la peine des autres.* En fin apres auoir long-temps inuocqué le iour, l'Aurore vint, qui tēd vraycēl l'azur du Firmamēt, & qui chasse les tenebres de la nuit. Nostre amoureux de qui le repos auoit esté inuēt rompu, saute du lit, & de peur de manquer au lieu de l'assignation, & à l'heure que Lucie luy auoit donné, il aime mieux y aller de bonne heure, & y attendre, que d'y estre attendu. C'estoit en vne Eglise au de la En Tybre,

Tybre, où le rendez vous s'estoit donné. Prophanes qui d'un lieu d'Oraison, font vne spelonque d'adultere ! O maudits & desesperiez ! n'avez vous point de honte de vostre vilenie, & ne craignez vous pas que celuy qui void tout, ne vous chasse plus rudement de sa presence, qu'il ne fit ceux qui faisoient autresfois de son temple vne caverne de larcins ? O Dieu ! où est vostre foudre, que vous n'employez la rigueur sur ceux qui commettent ces sacrilleges. Il n'y en a que trop aujourdhuy : & il faut bien dire que vostre patience est infinie, puis qu'elle void, & qu'elle souffre de telles ordures.

Saluste n'eut gueres demeuré dans ce lieu sacré qu'il y veid entrer Flaminie, qui pour contrefaire la deuote, s'en va agenouïller deuant vn Autel & son chappellet entre les mains, marmoter des oraisons. Luy s'approche & s'agenouïlle pareillement aupres d'elle, & fait semblât de prier Dieu : mais en effect, ils commencent à discourir de leurs sales amours, & à se plaindre de ce qu'ils viuoient ainsi separez l'un d'auec l'autre. Ce n'estoient que souspirs & que regrets. En fin Flaminie appréd vn moyen de Saluste pour la venir voir. C'est vne petite porte, qui respondoit à vn jardin par où il pouuoit entrer dans sa chambre, sans estre apperceu de personne. Le logis où Altomont se tenoit, est vn lieu fort escarté, entre sainte Marie Major, & la Trinité du Mont. On l'appelle la vigne du Cardinal son frere. Il n'y a que bien peu de maisons à l'entour, & encores ce sont maisons de plaissance, & qui ne sont pas ordinairement si habitées, que celles du cœur de la ville. Ainsi ayans disposé du moyen de se voir, & de satisfaire à leurs desirs impudiques, ils se separent, de peur de ne donner point de soupçon de leurs

leurs amours à quelqu'un de leur connoissance, qui eust peu suruenir. Saluste ne manque pas le soir mesme tandis qu'Altomont est chez son frere, d'aller reuenir sa Maistresse qui le faisoit attendre par Lucie, à l'huy de ce jardin, où cependant Flaminie se pourmenoit. Quand il fut entré, & qu'ils se veirēt, ils coururent l'un vers l'autre. Ce n'estoient que baisers, & qu'embrassements. A peu pres que leur ame à demy folle de plaisir, ne quitta la demeure de leurs corps. Enfin ayans repris leurs esprits, que le trop grand contentemēt leur auoit presque osté, Flaminie mena dans la chambre son amoureux, là où il commença de souiller le lit d'autrui, & de violer la couche honorable, & sans macule, dont Dieu a fait vn grand Sacrement en son Eglise. Apres auoir assouuy leur voluptré, ils confirmèrent par vne promesse qu'ils se firent reciproque, de s'aymer iusques à la mort. Ils continuèrent en leurs sales passe-temps plusieurs iours, sans que personne s'en apperceust. Mais il n'est rien de si caché, qui ne se descouure à la fin. Il n'est point de feu qui sorte sans fumée; & principalement celui du l'Amour, qu'on ne peut receler que fort difficilement. Tandis qu'ils se voyent presque tous les iours, & qu'ils en ont la commodité, parce qu'Altomont est ordinairement au Vatican ou bien chez son frere, de qui il gouuernoit la maison, il arriue qu'une seruant de logis, natifue du village du mary, eust entrée dans ce jardin, pour y cueillir certaines herbes, s'y endormit si bien, qu'elle y passa tout le iour sous vn arbre, sans que personne s'en apperceust. Comme la nuit fut venue, elle ouurit les yeux bien estonnée d'auoir tant dormy, & comme elle vouloit se leuer, elle entendit des personnes qui parloient ensēble. La curiosité luy

fit tédre l'oreille, de sorte qu'elle ouyt quelques discours amoureux, que Saluste & Flaminie tenoient l'un à l'autre, & entréuit des baisers qu'ils se donnoient, lors qu'il prenoit congé de sa Dame. Cette seruâte ne dit mot, mais elle se leua tout doucemét, & entra dans le logis. Apres ne pouuant supporter l'injure qu'on faisoit à son Maistre, elle luy recita à son retour ce qui se passoit à son desauantage. Altromont fut bien esbahy de ses nouvelles. Il deuint dès l'heure mesme tout pensif, & ne pût bien dissimuler sa passion, que la femme qui estoit la plus fine & la plus accorte de son temps, ne s'apperceust aussitost, qu'il auoit Martel en teste. Et se doitrât bien de ce qui en estoit, elle fit aduertir le lendemain au matin Saluste, de ne reuenir plus à son logis, iusques à tant qu'elle luy mandast, parce qu'elle craignoit que son mary n'eust descouuert quelque chose de leurs amours. Cependant Altromont comméce à prendre plus particulieremét garde sur les deportemens de sa femme. Il met à l'entour d'elle des personnes qui espient ses actions & celles de Lucie, qui ne peut si bien faire ses messages, qu'on ne la descouure, en fin parlant à Saluste. Quand Altromont en eut appris la nouvelle, il fut assuré de ce dont il estoit aucunemét en doute. Il auoit desia sceu comme ce Gentil-homme auoit aimé sa fême d'urant qu'elle estoit fille, de sorte qu'à l'heure mesme qu'il sçeut de la seruâte ce qu'elle auoit apperceu dans le jardin, il eut soubçon de ce qui se passoit entr'eux. Leurs amours ayàs ainsi esté descouuerrés, il cômence à mal traicter sa femme, luy reproche sa faute, la tient enfermée, & chasse Lucie. Le Cardinal sô frere est aduertty de ce mauuais mesnage, & n'en dit autre chose, si n'est que s'il a com-

mis

mis la folie, il faut qu'il la boie. La ville de Rome en est aussi abreuee. Saluste n'ose plus approcher du logis de sa Maistresse. Il lamente, il pleure, non tant pour son mal-heur, que pour la captiuité de celle de qui despéd toute son esperâce. Si la crainte & le chastiment des hommes ne le retenoit, il iroit vn iour rôpre les portes du logis, pour s'en aller avec elle en vne autre contrée. Six mois se passerent en ces tumultes, durât lesquels Flaminie sceut si bien regagner les bonnes graces de son mary par ses allechemens, qu'elle eut plus de liberté qu'au parauant. Elle lui auoit iuré de ne voir iamais Saluste, mais c'estoient des sermens amoureux, dont la miserable croyoit les Dieux ne tenir point de conte, & n'en faire que rire. Soubs cette promesse son mary auoit mis toutes choses sous le pied, & les tenoit comme iamais non arriuees. Mais qu'il est mal-aisé de destourner vne mauuaise ame de sa malice! Flaminie n'eut pas plustost la clef des champs, qu'elle fit pis qu'au parauant. Et au lieu que son Adultere auoit acoustumé de la venir voir à son logis, elle l'alloit treuuer à vn autre, où il l'attendoit aux heures entr'eux assignées. Là ils se mocquoient de la patience & de la sottise d'Altomont, que sa fême scauoit si bien endormir, qu'il n'y voyoit plus goutte. Toutesfois faschez à la parfin de n'auoir pas toute la liberté qu'ils desirerent d'auoir, ils attenterent vne chose horrible & detestable contre la personne du mary. Le project fut de s'en deffaire, & de l'enuoyer en l'autre monde, afin d'auoir puis apres moyen de se marier enséble. Vne fois Flaminie auoit resolu d'y employer le poiso, mais Saluste cragnant quelle ne fut descouuerte, prit sur lui la charge de le depécher. Je vous ay ditcy-dessus, que le lieu où fai-

ueux, et gratignoit son visage, battoit cruellement son sein, & proféroit des regrets pitoyables. O Ciel! (disoit-elle) que t'ay ie fait, que tu me prives de la compagnie d'un si cher espoux? Faut-il que ie perde si tost le meilleur mary qui fut iamais au monde, & encorés par vne aduventure si triste, & si funeste? Cruel, quiconque tu sois, qui as commis vne telle meschanceté, sçaches que si ie la descouure, i'en poursuiuray la vengeance, par les voyes de la iustice, & ne cesseray iusques à tant que i'aye par ta vie appaisé les Mantes. Que si cette voye me manque, assure toy, que moy-mesme ie tréperay mes mains dans ton sang, & t'arracheray le cœur, sans auoir aucune pitié: non plus que tu n'en as point eu de celui qui ne meritoit pas de ressentir vne telle cruauté. O mort auancé la fin de mes iours, puis que i'ay perdu tout mon repos, & mets dans le tombeau ceux qui n'auoient qu'un mesme cœur, & qu'une mesme volonté. Finissant ces regrets, elle s'alloit jettant sur le corps mort de son mary, qu'elle baisoit & embrassoit estroittement & sembloit qu'elle y vouloit laisser la vie. Les domestiques auoient bien de la peine à l'en retirer, & à la consoler. Tandis le logis du Cardinal est abreuvé de ces tristes nouvelles, il dormoit desia de son premier sommeil, lors que son valet de chambre l'éueillâ, & l'aduertit du meurtre de son frere. Luy comme vn homme dissimulé, s'il en fut iamais au monde, ne s'en émeut autrement en apparence, mais il ne laissa pas pourtant d'en ressentir vne extreme douleur: car il l'aymoit à l'egal de luy mesme. Il croit dans son ame aussi tost, que Saluste & Flaminius ont perpetré cet acte, & le iuge, parce que son frere estoit vn homme paisible, qui s'acqueroit tout

le monde pour amy, & qui n'offençoit iamais personne. Or il auoit cognoissance de leurs amours, & da different qui estoit interuenu pour ce subiect autresfois, entre le mary & la femme. Mais ce qui le confirma encores plus au iugement qu'il en faisoit, ce fut quand on luy rapporta les plaintes & les regrets de Flaminie, qu'elle proferoit avec tant de passion, qu'on croyoit qu'elle en deuoit mourir. *Mes-
chante, louue* (disoit ce indicieux Cardinal à part luy) *ses souspirs sont des souspirs de Musique, Ils pa-
rent de ta bouche, & non pas de ton cœur. Tes larmes
ressemblent a celles du Crocodile, qui pleure pour attrap-
per quelque passent au riuage du Nil, Dieu me face la
grace de me venger de vostre meschanceté, que ie diffimu-
leray pour encores, attendant que ie vous puisse donner à
vous deux le payement que vous meritez.* Ruminant ce discours dās son ame, il monstroit en apparence au-
tre chose qu'il n'auoit dans le cœur & proferoit tout
haut ces paroles: *Dieu soit loué du bien & du mal qu'il
me donne : Dieu vneille pardonner à ceux qui ont per-
pétré cét acte indigne & mal-heureux.* Quand le soir
fut arriué toute la ville de Rome fut remplie de la
nouuelle de cét assassinat. Tout le monde regret-
toit ce mary, qui estoit en estime d'estre vn fort hō-
me de bien. Plusieurs faisoient diuers iugements de
cette mort, & presque tous se raporttoient à Salu-
ste, & à Flaminie, dont l'on sçauoit les anciennes
fréquentations. Si le Cardinal eust voulu, il les eust
faict saisir tous deux & constituer prisonniers, & par
des indices qui n'estoient que trop grands, joinctz à
son auctorité, il estoit capable par vne question de
tirer la verité du faict. Mais il consideroit que s'il en
comméçoit vne fois la poursuite, son honneur l'o-
bligeroit

bligeroit d'en voir vne fin à son aduantage, & par même moyen il acquerroit force ennemis, parce que ces adulteres, & principalement Saluste, auoient pour parens les principaux de la ville, & appartenoint à tout plein de Prelars, & de Cardinaux. Cette consideration le retient. le croy fermement qu'il aspireroit au Papat, il rugoit qu'on ne paruenoit pas en ce supreme sommet d'honneur, en faisant des ennemis. Quelques fois vn petit compagnon en peut destourner la fortune. Les exemples en sont ordinaires. Ce Cardinal doncques supporte cette perte constamment : pendant que tout le peuple admire sa douceur & sa patience. Flamme qui faisoit tant l'exploree, voyant qu'apres que son mary fut mis dans le tombeau, on n'en faisoit non plus de bruit que de chose non iamais aduenue : commence à prendre courage apres s'estre retirée en la maison de son pere. Tandis Saluste apres cet assassinat, ayant appris que le peuple murmuroit contre luy, & qu'il l'en croyoit estre l'autheur, pour se purger de ce soupçon, va treuuer le Cardinal en son logis, qui le reçoit fort humainement & avec des feintes embrassades. Saluste luy dit, qu'il vient pour luy rendre raison d'un mauuais bruit qu'on publie par la ville, qu'il estoit l'assassin de son frere. Que c'estoit la plus grande calomnie qui fut iamais inuentée contre vn homme de bien. Qu'il auoit tousiours fait profession de l'honneur du monde, & plus encor de celuy de Dieu : que iamais vne si detestable pensée n'estoit entrée dans son ame, & qu'auant que de perpetrer vn acte tant indigne d'un Cavalier, il voudroit souffrir mille morts. Qu'à ces fins, il supplioit son Illustrissime Seigneurie de n'auoir pas cette croyance, que

ses ennemis t'aschoient d'imprimer par tout, afin de le rendre odieux: mais de le tenir au rang de ses plus humbles seruiteurs pendant que le temps descouvroit la verité du fait. Le Cardinal dissimulant tousiours tout ce qu'il en pensoit, luy respondit qu'il pouuoit dormir en assurance de ce costé-là: que iamais il n'auoit creu qu'un gentil homme d'honneur & de reputation, comme il estoit, eust voulu cōmettre vne chose si esloignée de ceux qui portent le til-tre de Nobles. Je vous estime (disoit-il) Seigneur Saluste, trop homme de bien & d'honneur. Je fais trop de cas de vostre merite, & de la franchise de vostre ame. Et pour prēuue que ie n'adjoſte point de foy à ces medisances, vous me ferez plaisir de me visiter souuent comme bon amy. Ie n'ay rien qui ne soit à vostre seruice. Voilà comme ce fin vieillard endormoit Saluste. Il en faisoit autant à Flaminie qui l'aloit voir ordinairement. Ainsi nos amoneux croyans que tout estoit calme, jouyssoient librement de leurs amours, attendant que l'an du dueil estant expiré ils peussent s'espouser ouuertement. Toutesfoiſ comme ceux qui ont commis de telles meschancetez, sont tousiours en peur, ils delibererent à entasser crime sur crime.

Le valer qui auoit assisté Saluste en son assassinat, estant seul qui les pouuoit descouvrir, ils resoluſent de l'enuoyet tenir compagnie à Altomont. Ce qu'ils firent par le moyen du bouchon qu'ils luy donnerent. Iuste punition de Dieu, qui punit les meschans par les meschans. C'est le fruit du peché. On est contrainct de le goustier tost ou tard. Nos adulteres en scauront que dire, sur la fin de certe Tragedie.

Les voilà doncques delinrez (comme ils estimēt)
de

de toute crainte. La fortune leur rit. Il semble que tout contribuë à leurs meschancetez. La feinte bonté du Cardinal les endort. Ils croient que c'est vn homme qui ne pense qu'aux choses de l'autre vie, & que celles de ce siecle luy sont toutes indifferentes. Ce iugement qu'ils en font est cause, qu'apres que l'an & ie iour est passé depuis la mort d'Altomont, Saluste espouse impudemment Flaminie. C'est à l'heure que toute Rome vid à l'œil que ce qu'on auoit soubçonné n'estoit que trop veritable. Les amis & les parés du premier mary en crient tout haut. Sa sœur, mere d'un grand & renommé Cardinal qui vit à present, les mettoit en iustice, si son frere ne luy commandoit de se taire. En effect il ne vouloit pas perdre si temerairement le souuerain degré où il alpiroit. Tout vn téps on ne parloit que de ce mariage: mais en fin quelque autre subiect estant suruenu, cestuy-cy vint à s'esteindre, de sorte qu'on ne s'en souuenoit plus. Ioinct que le Cardinal passât en carrosse deuant le logis des nouueaux mariez s'y arrestoit bien souuent, & les visitoit: comme pareillement aussi eux luy rendoyent sa visite. En apparence Saluste estoit vn des meilleurs amis de ce Cardinal, au grand contêtement de ceux qui voyent ces choses, & qui auoient appris le meurtre de son frere, & les iustes ressentiments qu'il en deuoit auoir.

Côme cecy passe de la sorte, il arriue que le bon Pape, qui tenoit alors les clefs de saint Pierre, vint à deceder, Dieu mette en paix son ame. Toute la Chrestienté luy est grandement obligée, tant pour la reformation qu'il fit du Calendrier, que pour celle du Clergé. On ne dira iamais de luy qu'il soit entre au Pontificat comme vn Renard, qu'il y ait regne

comme vn Lyon , & qu'il y soit mort comme vn Chien. Ses vertueux deportemens ont tousiours témoigné la sincerité de son ame , qui sans doute recueille maintenant au Ciel le fruit de ses travaux. Mais pour reuenir à nostre Histoire, dont ie m'estois destourné par la memoire d'un si grand Pasteur de l'Eglise, les Cardinaux s'assemblerent au Conclau pour proceder à l'eslection d'un nouveau Pape. On eut bien de la peine en cette eslection. Il y auoit tant de brigues, que quand on pensoit auoir acheué, tout estoit à recommencer.

En fin par l'inspiration du S. Esprit , & par l'entremise de ce grand Cardinal Farneze, dont le souuenir vit encores dans Rome , & y viura eternellement , pour tant d'obligations que les Cytoyens luy ont, le Cardinal frere d'Altomont est crée Pape contre l'opinion de tout le monde , & contre l'espoir de plusieurs. Apres les ceremonies acheuées , il est assis en la chaire de saint Pierre. Ses amis le viennent feliciter. Ce ne sont que recompenses, & que biens faicts, qu'il distribuë enuers ceux qu'il chérit. Iamais il n'y eût Pape si recognoissant. Saluste & Flaminie furent bien estonnez du succez de la souueraine grandeur. Ils pensent alors à leurs consciences , & leur sēble desia qu'ils reçoient de la main d'un bourreau le chastimēt qu'ils ont meritē. Ils s'en fussent fuis dès l'heure mesme n'eust esté que la douceur que tout le monde attribuoit à l'ame du Pere , & qu'il leur auoir tousiours tesmoignée en aparence, fit que Saluste delibera de luy aller baiser les pieds, comme les autres, & de le feliciter. Il y fut en compagnie de certains, ses parés, & ses amis. Le Pape le receut assez courtoisement, & apres luy auoir rendu l'honneur accoustumé,

coustumé, supplia sa Saincteté de se ressouvenir du tesmoignage qu'elle luy auoit tousiours rendu, de n'adiouster point de foy aux calomnies qu'on luy auoit imposées, touchât le meurtre de son frere, dôt il n'estoit nullement coupable: qu'il estoit prest de luy porter tousiours sa teste, en cas qu'il en fust cōuaincu. Non (respōd le Pape) ie ne croy pas que cela soit & quand cela seroit, ie vous pardonne, à la charge que desormais vous soyez sage, & que ie n'aya nulle reproche de vous en quelque chose que ce soit. Le vous le cōmande expressement. Retirez-vous, & que ie n'en oye plus parler. Saluste ayāt receu cette respōse, apres l'auoir remercié, retourna à son logis, où il communiqua à sa femme ce que le Pape luy auoit dit. Elle fine & rusée comme nous auons dit, interprera aussi-tost en mal cette response. L'exēple de Semei fils de Bocrī se representa soudain deuant ses yeux. C'estoit vn homme qui fit mille indignitez à Dauid, du tēps qu'il fuyoit la persecucion d'Absalon. Lors que Salomō fut assis au trosne de son pere, Semei vint implorer sa grace. Le Roy luy pardonna, mais à condition qu'il ne sortiroit iamais hors de Ierusalem sans cōgō. Le succez qui en arriua est escript en l'histoire des Roys. Ce Pape imitant Salomon en ce faict icy, Saluste & Flaminie ne voulurent pas attendre qu'on leur suscitast quelque aculation. *le voy bien (disoit-elle) mon amy, que si nous ne pensons à nos affaires nous sommes perdus. Ce n'estoit que dissimulation tout ce que ce Pape à praiqué en nostre endroit, afin de ne treuuer point d'obstacle pour paruenir au Sainct Siege, maintenant qu'il y est assis, & qu'il ne craint plus personne, comme celuy qui peut iuger tout le monde, & n'estre iugé d'autre que de Dieu, il exercera toute la cruauté qu'il pourra*

pourra s'imaginer à l'encontre de nous. Fuyons ie vous prie son iuste courroux, & allons desormais passer le reste de nos iours en quelque lieu où sa main vengeresse ne s'estende point. Je ne me soucie pas tât de ma vie (respôd Saluste) que ie suis en peine de l'incommodité que vous allez recevoir. Pleust à Dieu que ie vous en peusse retirer par ma mort. Je vous tesmoignerois bien-tost que ie n'ay rien de plus cher que vostre repos. Helas! (dit elle) vous me faictes mourir d'une mort plus cruelle que la mort mesme, de parler à moy de ces choses. Ma vie ne depend que de la vostre. Si elle estoit esteinte, la mienne finiroit aussi-tost. Je vous prie laissons ce discours, & pensons où nous nous pourrions retirer promptement, pour euitier l'orage qui se lève pour nous perdre. Il me semble (repart Saluste) que Venise est la ville la plus propre pour nous y confiner. I'y ay des parens & des amys, qui nous y assisteront en vn besoin: joint que c'est vne ville de franchise où les Estrangers sont bien recueillis. Cette resolution semble fort bone à Flaminie, de sorte que le iour mesme ils commencerent à plier le bagage, & à prendre les choses plus precieuses qu'ils auoient, & à vendre les meubles qu'ils peurent, & puis le lendemain ils sortirent de Rome deguisez, avec Lucie que Flaminie auoit retirée chez elle, & firent tant qu'ils arriuerent à Ancone, où ils s'embarquerent, & de la à Venise. Le Pape ayant appris leur fuite, fut bien fâché de ne les auoir pas punis comme ils meritoient. C'estoit vn homme qu'on estoimoit auât qu'il fust assis en la chaire de S. Pierre, plus doux qu'un Agneau, mais l'effet fit bien paroistre puis apres le contraire. Il estoit seuer en ses iugemens, grand ennemy de la Noblesse, à qui il roignoit

gnoit tous les iours les aïsses, & la contenoit si bien en son deuoir, qu'elle n'osoit respirer. Il sçauoit commander, & se faire obeyr en temps & lieu, & punissoit griefuement les rebelles & les coupables. On disoit communement de luy, qu'il n'eust point pardonné à **IESVS-CHRIST**. Ce fut luy qui autorisa la ligue, qui sous le zele de Religion donna tant de trauerses à nostre grand Roy S'il fit bien ou mal, i'en laisse le iugement à la posterité. En fin ce fut vn grand Pape, qui a fort embelly la ville de Rome, & presque mise au lustre où nous la voyons maintenât, & quād il n'auroit faict que la digne action d'exterminer les bannis d'Italie, sa memoire doit estre celebrée à iamais. On ne luy peut reprocher que sa trop grande rigueur qu'il exerçoit, principalement sur ceux qui l'auoient offensé: mais en recompense, il recognoissoit, ainsi que nous auons desia dict, ceux qui luy faisoient seruice.

Les hommes qu'il esleua en de si haults & de si dignes degrez d'honneur, outre leur attente, tesmoignent ce que ie dis: Saluste & Flaminie firent bien pour eux de fuyr sa presence; mais ils eussēt encores mieux faict, s'ils eussent peu, de fuyr celle de Dieu, de qui la iustice regne par tout l'Vniuers. Mais il n'y a lieu de franchise qui soit exēpt d'vne main si equitable. Comme ils croyent estre en vn port exempt de toute tempeste, il faut qu'ils rendent compte de leur vie passée. La compagnie qu'ils ont ordinairement chez eux, n'empesche pas que leurs iours ne soient fauchez en herbe. L'homme de sang, & principalement le perfide ne void iamais toutes les années que la Nature luy pourroit donner. Car Saluste est bien tramé de la vie en la fleur de ses iours, apres
l'auoit

l'auoir miserablement fait languir quelques mois , sans que la charge que les Venitiens luy donnerent de General de leur armée, luy puisse seruir de garent, ainsi que vous verrez tout maintenant. Et Flaminie meurt de pareille mort qu'elle fit mourir l'innocent Altomont. Mort encores trop douce & trop honorable pour elle. Il falloit qu'un bourreau y mist publiquement la main , pour seruir d'exemple à ceux qui violent ainsi le droit Diuin, & humain. Il n'y en a que trop au monde. Ce siecle ne produict que trop de ces monstres abominables, indignes de porter nô seulement le nom de Chrestiens: mais encores de couerser parmy les Canibales, & parmy les Tygres , & les Ours , puis qu'on n'y pratique point ces execrables meschancetez. O cruel siecle ! le Ciel ne luiect qu'à grand tort sur nous , puis que tu es tout plein de Tiestes, des Taptales, & d'Attrées.

Ces homicides passerent quelques mois à Venise avec assez d'honneur & de contentement, portans neantmoins tousiours dans leur ame le ver de la conscience, qui les rongeoit sans cesse. Saluste qui estoit à la verité vn braue & vaillant Cavalier, & digne d'honneur s'il ne l'eust souillé d'une tache, qu'il ne pouuoit laner, fut esleu des Venitiens qui reconnoissoient la valeur, & l'experience qu'il auoit aux exploits de la guerre, pour General de leurs armées. Comme il croit estre à l'abry & hors de tout orage, sous la protection du Lyon Marin, il faict ordinairement sa demeure à Padoüe en vn beau Palais situé aux bords de cette delicieuse riuiera, que les Anciës nommoient Anasse, ou Medoasse, si ie ne me trompe. C'est là que Flaminie pour estre bien discrete, & pour joüer parfaitement du luth, comme nous

auons

auons desia dit, est visité d'une infinité de Cavaliers. Sa maison est comme vne Academie où la ieune Noblesse apprend rousiours quelque chose. Et sur tout les François, attirez du bruiet qu'elle auoit d'estre la plus galante Dame d'Italie, y passent les heures destinées aux honnestes loirs. Et elle ne manquoit point de charmes, & d'artifices à fin de gaigner l'amitié d'un chacun, pour s'en seruir, si la necessité l'y contraignoit. Durant que la Lombardie ne parle que de ses rarez qualitez, vn ieune Seigneur que nous nommerons Timante, neveu de Saluste deuient amoureux de Flaminie. Cette amour illicite, qu'il tasche au commencement de bannir, prend vne telle possession de son ame, qu'elle en chasse le iugement & la raison. En fin ne pouuant la supporter dauantage sans mourir, il la descouure à sa Tante. Encores que la beaulté, la ieunesse, la bonne grace & la Noblesse de ce Gentil-homme jointes à tant de belles paroles, accompagnées de soupirs & de larmes fussent capables d'émouuoit vn roc; elles ne sont pas neantmoins suffisantes d'induire Flaminie à le contenter. Soit qu'elle se repretentast l'enormite du crime, soit qu'elle creust que Timante le fit à dessein pour la ruiner enuers son Oncle; toutes ces recherches ne moissonnerent que du vent. Comme il est aux peines d'un cruel desespoir, voilà que la fortune sèble de la fauoriser, & luy ouurit vne voye pour paruenir à l'accomplissement de sa passion. Vne fièvre lente qui s'estoit insensiblement coulée dans l'Estomach de Saluste, commence à le miner si bien peu à peu, qu'en fin apres beaucoup de langueurs, il est contrainct de comparoistre deuant le throsne de celui qui iuge en dernier ressort.

Après

Après que Flaminie eut versé vn torrent de pleurs sur le corps de son mary, qu'elle eut outragé son sein, & son visage, & en arrachant ses beaux cheveux, appelé par plusieurs fois la mort, recours des misérables, le temps qui est le medecin de tous maux, adoucit peu à peu la douleur, la maison ne laissoit pas d'estre comme auparauant ouuerte aux bonnes compagnies, pendant que Timante, qui pour lors auoit succédé aux charges de son Oncle, tasche de se rendre son successeur en la possession de cette femme.

Il y auoit pour lors à Padouë vn ieune Gentilhomme de la Marque d'Ancone, doué d'vne excellente beauté, & accompli en toutes les plus rares perfections, qui peuuent rendre recommandable vn mortel. Ce Gentilhomme nommé Adonio estoit veu de bon œil de Flaminie, avec vn desplaisir si grand de Timante, qui prenoit garde aux contenance, comme font ordinairement les Amoureux, qu'en fin la peste de la jalousie s'emparant de son ame, son amour se change en vne rage desesperée.

Les desdains, le refus, & en fin tous les martyres de l'Amour, sont consoléz de l'esperoir qui flatte tousiours, & qui promet de l'allegement. Mais la jalousie est vne infection de si estrange & insupportable guérison, que mesme la jouissance n'est pas assez capable de la bannir.

Sera il dit (disoit Timante tout transporté de cette fureur) que ie recherche vne ingrante qui me fuit, & qui se cache de moy ? Dois- ie priser vne meschante, qui me desprise : priuray ie tousiours vne cruelle, qui ne respond iamais, & qui neanmoins ne cesse de prier vn autre qui possede moins de merite ? Souffriray- ie que

*mon ame. vne esclave d'une qui m'a en hayne? Non, non, ie luy veux monstres, que si iusques icy i'ay commis vn si grand crime qu'de l'aymer, puis qu'elle en estoit tant indigne, ie veux expier cette erreur par la punition que s'exerceray sur un cœur qui s'ouvre pour tous le monde, hormis pour moy. Acheuant ce discours, il prent la resolution d'vn desesperé. Avec vingt autres de ses amis, il entre vn iour dedans la maison de Flaminie. Le temps estoit desia venu, qu'il falloit qu'elle rendist compte de la mort de son mary. Mais Lucie, qui auoit manié ses folles amours, fut la premiere executée. Timante qui croyoit quelle maniait encor les secondes passions, de sa Maistresse, luy donna dans l'estomach deux ou trois coups d'vne petite dague quatrée qu'il tenoit à la main. La malheureuse estant atteinte mortellement, jette vn grand cry. Flaminie auoit vn frere qui voulut faire quelque resistance, quād il aperçeut cette violence: mais il fust bien tost porté à terre, & priué de vie. Elle sortit cependant de son cabinet, ayant ouy la rumeur, & alors Timante en l'embrassant du bras gauche, commença à la caresser à coups de dague qu'il enfonçoit dans son sein, & en poussant ce petit poignard, il tenoit ce discours: *C'est maintenant Madame, qu'avec ceste pointte ie vous touche ce cœur que la pitié ne peut oncques toucher. C'est ores que ie la treuve sensible.* La miserable jett vn grand cry, & avec son sang vomit son ame malheureuse.*

Lors que cette execution est faicte, Timante sort froidement de ce logis avec tous les compagnons & se retire au sien. Ses charges, son courage, & la grâdeur de sa maison, le rendent si bien assuré qu'il mesprise & reiette le conseil que quelques vns de


ses amis luy donnent , de sortir de la ville. Il croit qu'il n'y a nul qui l'osast regarder de trauers , tant s'en faut qu'on eust la hardiesse d'informer à l'encontre de luy.

Mais cependant Padoüe est toute remplie d'une grãde rumeur. Le peuple tout scandalisé de cét acte extraordinaire , crie tout haut qu'on ne doit point laisser impuni vn tel excès. Qu'il y va de l'honneur, du bien & aussi de l'autorité du public:& que si l'on souffre cette meschanceté, ce sera tracer vne voye à toutes sortes d'excès & de desordres.

La Seigneurie de Venise aduertie de cette cruauté, assemble le Conseil, & decerne vn adjournement personnel à Timante. Quand on le luy intime, il ne fait que rire, & se moquer des Ministres de la Justice, & les menace de les assommer: à faute de pouruoir comparoistre vn Decret de prise de corps, il est laxé. Commandement est fait à la Justice ordinaire de Padoüe, & aussi à tous autres Officiers de prestet main forte, de se saisir, & d'amener ce Gentil-homme deuers la Seigneurie. Comme doncques les Magistrats & les Preuosts le veulent prendre, il se retire dans son logis, avec trente ou quarante mauuais garçons. On talche de les forcer: mais ceux qui sont plus prompts que les autres à commencer l'assaut, y refroidissent bien-tost leur chaleur. Timante & aussi tous ses compagnons rendent des preuues admirables de leur valeur, & auant que le jeu cesse, ils en tuent plus de cent. On n'entend que cris & que lamentations par la ville. Quand on voit qu'il ne peut estre forcé, on informe tout incontinent la Seigneurie de tout ce qui se passe: de sorte qu'elle iustement courroucée, & treuuant qu'il y alloit trop de son

son autorité (si elle ne chastioit vne si grande insolence) commande qu'on mene le Canon, & qu'on foudroye le logis de Timante, s'il ne se veut rendre. L'artillerie commence doncques à iouer avec tant de violence, que Timante en fin se rend apres auoir perdu la plus grande partie de ceux qui l'assistoient, & faict mourir vne infinité de personnes. On pendit tous ceux qui resisterent, & pour luy à cause de la noblesse de sa race, on le fit mourir en prison.

C'est la fin tragique & funeste de Flaminie, que le Ciel auoit doiïée de beaucoup de perfectiōs. Elle en abusa follement par son impudicité, & encores plus par le meurtre qu'elle fit cōmettre en la personne de son mary. Dieu qui iuge, & qui retribue à chacun selon ses œuures, vueille que la cruauté exercé sur son corps soit l'expiation du vice de son ame.



DES HORRIBLES EXCEZ
*commis par vne ieune Religieuse, à
 l'instigation du Diable.*

HISTOIRE X V.

Vis que i'exerce ma plume à descrire les choses funestes & tragiques arriuees en nos iours, ie ne veux point en oubliet vne qui merite d'estre publié à la posterité: pour seruir d'exéple à plusieurs personnes, encores qu'elle soit aduenue en vne estrange Prouince, & bien esloignée de nos contrées, toutesfois puis qu'elle est nouuelle i'ay entrepris de

la donner au public, afin que par le mal-heur d'autrui l'on apprenne à fuir ce qui peut faire tóber aux dangers euidens qui en procedent. L'Histoire que ie raconte est doncques arriué en cette sorte.

Au pays des Troglodytes est vne Isle qu'on appelle Meroé, que le renomé fleuve du Nil rend celebre. C'est vne terre la plus douce, & la plus fertile, qu'autre qui soit en tout le reste de l'Vniuers. Ceux qui y font leur demeure sont tous Chrestiens, & fort deuots. Mais particulièrement il y a vne noble maison que l'on nomme d'Abila, fort prisée pour la profession qu'elle à tousiours faicte de la Religion Catholique, sans iamais auoit esté entaschée des heresies des Abyssins. Or il n'y a pas long-temps que le chef de cette maison, braue, & religieux Cavalier, s'il y en a en toutes les Prouinces du Midy, espoula vne belle, & sage Dame, yssué de l'Illustre famille de Merala. Ce Seigneur se nommoit Nicandre, & cette Dame Gallice. De leur legitime mariage ils eurent six fils & dix filles. L'aînée que l'on appelloit Melisse, fust douée d'une si grande beauté, qu'elle rauissoit les yeux de tous ceux qui la regardoient. La Nature l'auoit renduë accomplie de tant de dons extérieurs, qu'à peine ayant atteint l'aage de douze ans, elle estoit recherchée en mariage d'une infinité de Gétill-hommes, yssus des meilleures maisons de la cōtrée. La mere presta l'oreille, particulièrement à la poursuite d'un braue Cavalier, dont le nom estoit assez cogneu en ce pays, & auquel elle auoit de l'inclination. Elle fit tant, qu'elle disposa son Espoux à luy donner leur fille en mariage. Les Noces en furent celebrées avec toute la pōpe qui s'observe parmy des personnes de cette qualité : & le nouveau marié se
retira

tira dans peu de iours en vne maison de plaifance, qu'il auoit aupres de Syenne. Mais la fortune, qui trauerse ordinairement les plus grandes felicitez du Monde, ne permit pas à Melisse de iouyr longuement des embrassemens de son mary. Il fut tué à la chasse par vne auanture estrange, qu'il n'est pas besoin de raconter. Quand Nicandre eut appris la mort lamentable de son gendre, il retira sa fille, laquelle n'auoit pour lors que treize à quatorze ans. Cette ieune vefue, croissant en âge, croissoit tousiours en beauté, de sorte qu'en peu de iours on parla de la remarier. Toutesfois le Pere, qui se voyoit chargé de beaucoup d'enfans, estoit desia resolu, afin de conseruer sa maison illustre, de la mettre en Religion, ensemble quatre autres de ses sœurs, & trois de ses fils. Il se representoit que si son bien estoit partagé également entre ses enfans, suiuant les loix des Abyssins, l'aîné, qui doit conseruer le nom, & les armes, seroit bien peu de chose. C'est pourquoy poussé de ces humaines considerations, il contraignit la ieune vefue d'entrer dans vne Abbaye de Dames, nommée de Roche-perse, fondée par la Princesse Dorothé, de la maison Royale de Sitim, & femme du vaillant Prince du Saba. Cette Abbaye, soit qu'on regardast la grandeur des bastimens, & la structure de l'Eglise, soit que l'on considerat les fondations, & les reuenus, ressenoit fort la magnificence du Fondateur. La ieune vefue Melisse n'auoit pas encores quatorze ans, lors qu'elle y fut conduicte, neantmoins elle qui auoit desia gousté du monde, & auoit plus d'inclination à la terre qu'au Ciel, elle aymoit à se paser, & à se rendre propre. Ses yeux iettoient des regards vagues par tout, & à la conte-

nancel'on iugeoit incontinent qu'une vie esloignée de la compagnie des hommes ne luy plaisoit guerres. Toutesfois il faut qu'elle se delibere de quitter routes conuersations, hormis celles que l'on pratique dans l'austerité. O peres & meres ! apprenez à ne forcer point leur volonté de vos enfans, & principalement en vne chose, où y va du salut de de l'ame. Quand il est question de les enfermer dans vn Monastere, il faut qu'ils y soient appellé de Dieu, & que leur perseuerance, leur capacité, & leur âge suffisant, fassét paroistre cette vocation. Melisse n'estoit ny assez aagée, ny assez capable de viure sous les reigles d'un Couuent. Sa volonté y estoit encores moins portée. Et de là procedent tant de mal-heurs, de là tant de larmes. Quand on la fit Religieuse, elle ne faisoit que pleurer & que soupirer. Elle accusoit la cruauté de son pere, & de sa mere, qui la forçoient à vne vie si contraire à son desir. Apres y auoir passé deux ou trois ans, sans vouloir apprédre, ny à lire, ny à escrire, voila quelle se vient à représenter la douceur passée du monde. L'amour impudique commence de s'introduire dās son ame. Son imaginatiō est portée à la concupiscence. Si elle auoit le moyen de contenter ses desirs, elle les accompliroit sans respect de la maison dont elle est issuë, ny sans consideration de son honneur.

Le Diable qui est tousiours en aguer, & qui comme vn Lyon fugissant, nous enuironne de tous costez pour nous deuorer, la voyant encline aux desirs charnels, luy accroit cette ardeur de telle sorte, qu'au lieu de prier Dieu, elle n'a d'autre pensée qu'à l'amour. Et comme cette passion continuë, & qu'elle exerce plusieurs pollutions sur son corps, tantost en dormant

dormant, tantost en veillâr. Sathan luy apparoiſt vn iour, comme elle eſtoit retirée toute ſeule dans ſa chambre, pour mieux entretenir ſes plaiſirs impudiques. Ce malin eſprit par la permiſſion de Dieu, s'eſtoit déguisé en Ange de lumiere. Il auoit vn accouſtrement blanc comme de la neige. *Bien vous ſoit, Belle Meliſſe* (dit cét aduerſaire) *il y a long-temps que la compaſſion de voſtre mal m'a touché de pitié, le corage, & que voſtre beauté m'a rany la cœur. Je ſuis venu vers vous à cette intention, pour contenter voſtre deſir? & pour vous ſeruir deſormais, ſi vous voulez m'auoir pour voſtre ſeruiteur.* Meliſſe toute eſtonnée au commencement de cette apparition, eut vne grande frayeur: toutesſois s'eſtât vn peu r'affeurée, elle demanda à cét eſprit, qui auoit apparence d'homme qui il eſtoit.

Sathan qui ne peut ſe deſguiſer, quand on l'interroge de ſon nom, reſpondit en ces termes: *Je ſuis le Roy de l'Air, & de toute la Terre. Tout ce qu'on vous raconte de moy, n'eſt pas croyable: Je ſuis plus doux que vous ne penſez pas. Demandez moy tout ce que vous voudrez, & ie vous l'oſcroyeray.* Cette mal-heureuſe preſtant l'oreille à cette Syrene trompeteſſe, ſe laiſſe piper aux amorces de ſon chant, de ſorte qu'après quelques conteſtations, que ie ne veux point eſcrire, elle paſſe des accords avec le Diable, & entr'autres, elle voulut eſtre la plus ſçauante, & la mieux diſante de toutes les Religieuſes, & chanter mieux qu'aucune autre. Voila comme le malin eſprit en la forme que nous auons dicté, habita charnellemēt avec elle & ne ceſſoit tous les iours depuis de la voir, tantost en la même figure, & maintenant en celle d'un cochon, & en autres formes deteſtables. Ses Comp

gnes furent estonnées de remarquer en elle vn si merueilleux changemēt. Celle qui ne sçauoit ny lire ny escrire, huit iours auparauant, estoit deuenue en vn instant bien lisante, bien escriuante, & bien parlante de toutes sortes d'Histoires. On admire son esprit, & on le tient à miracle. Cependant on la voit tousiours parée & attifée, plus que la Religion ne le permet. Ses discours sont remplis de vanité de propos mondains, & traicts lascif. Au lieu de ses Heures, elle a tousiours entre les mains quelque Amadis de Gaule, ou quelque autre liure traitant de l'Amour desordonné.

Quelques bonnes Religieuses l'en reprennent, & luy remōstrent que cela est indigne de sa profession. Mais elle ne fait que s'en rire & que s'en moquer. Lors qu'elle est avec celles qui sont les plus familières, on n'entend de sa bouche que propos dissolus. Elle se vante d'auoir acquis depuis peu de iours vn amantoux, qui la vient voir toutes les nuits, & qui luy apprend l'art de bien parler. On en fait le rapport à l'Abbesse, qui ne pouuant comprendre ce qu'elle vouloit dire, fait neantmoins prendre garde à ses actions, & la fait coucher accompagnée. Comme elle se voit tenuë de court, elle fait les plaintes à son amoureux, qui l'induit à se venger, & à mettre le feu dans le Couuens: L'ennemy luy donne luy mesme le feu, & l'incite à commencer par le plus beau corps de logis de l'Abbaye. Le feu s'espend, & sans qu'on le puisse esteindre, il s'eslance de chambre en chambre, & sauageant ce bel edifice, qui auoit tant cousté, il court iusqu'au Temple où toutes les Religieuses s'estoient retirées comme à vn saint Azyle. Mais ô cas deplorable! si tost que c'est incendiare sortoit d'vn coing,

coing, la flamme y estoit portée avec tant de violence, qu'en moins de rien ce beau & superbe Vaisseau, avec ses Cloistres, les Chapitres, les Refectoirs & ses Dorroirs, reduit en cendre.

Les pauvres Religieuses furent contraintes pour se sauver d'abandonner tout à la mercy des flammes. Elles sont depuis esparles de costé & d'autre, & vont querant de toutes parts, pour la restauration de leur edifice, qui ne sera jamais tel qu'il estoit, si quelque main Royale ny répand ses liberalitez.

Après que cette enragée eut assouuy ce desir de vengeance, les paréns l'enfermerent dans vn autre Monastere, plein de pieté, & de religion. Son insolence accoustumée, ses paroles desbordées, & la lecture qu'elle faisoit ordinairement des liures lascifs, forcerent quelques deuotes Religieuses de ce Conuent à la reprendre de ses deportemens. Elles luy remonstroient à toute heure sa vanité, & luy mettoient devant les yeux la crainte de Dieu, & l'obeyssance. Mais c'estoit perdre sa peine. Au lieu de leur sçauoir bon gré de ces bons & saints conseils, elle fit mourir par le moyen du Demon qui couchoit avec elle, trois de ces bonnes Religieuses d'une mort soudaine. Toutes les autres estonnées de ceste mort, & craignans vn mesme danger, presenterent requeste au Prince souuerain de Meroé, & le firent prier instamment, de les deliurer de cette peste. Le Roy ayant appris les deportemens de cette fille, commanda qu'on la renuoyast à Abyla chez ses pere & mere, qui ne pouuoient croire ce qu'on publioit de leur fille, & qui en ressentoient dans leur ame vn grand creue-cœur. Ils la tindrent quelque temps chez eux & l'y eussent retenué dauantage, n'estoit

que ces personnages craignans Dieu , faisans conscience de retenir au monde vne personne professe, se resolurent de faire bastir & fonder en l'vne de de leurs terres vne petite Abbaye , pour y enfermer Melisse. Sa Majesté mesme promit de contribuër à l'augmentation du dot de cette Abbaye, mille liures parisis, qui font quelques sixcents liures tournoises, on enuiron. Tandis qu'on bastit ce Monastere, le Seigneur, & la Dame d'Abila , prennent garde de plus près à leur fille. Ils font coucher en vne chambre proche de la leur, & luy donnent quelques Damoiselles d'aage, & de bonnes mœurs, pour l'accompagner. La meschante les chassoit de la chambre avec iniures, & disoit, qu'il luy estoit impossible de reposer, si elle n'estoit seule. Ceux qui auoiët l'oreille tenduë vers ses actions, l'oyoiët les nuicts parler, sans sçauoir à qui. Vne voix mal articulée luy respondoit, & luy donnoit l'intelligence de ce qu'elle luy demandoit. Cecy est rapporté à son pere, & à sa mere , qui ne pouuans encore adiouster foy à ces discours, entrent vn iour à l'impourueuë dans la chambre, afin de la surprendre. Mais ô cas hideux, espouuantable ! ils apperçurent à l'instant vn petit pourceau, qui se veautroit sur le ventre de leur execrable fille. Mon intention n'est pas icy d'escire, si cette vision estoit veritable ou illusoire. J'ay des-ja traicté cette matiere dās ce volume en autre part. Le Seigneur d'Abila mit la main dessus pour le chasser lors que ce mōstre gissoit vers l'vn & l'autre flanc de Melisse , en fin il disparut au grand estonnement de assistans, & au grād creue-cœur du pere ; mais particulièrement de la mere, qui perdant toute patience, & pleurant à chaudes larmes, se mit à
proferer

proferet ces pitoybles paroles: *Ha ! maudit & execrable geniture , faut-il qu'une maison si illustre , & si renommée de tous temps pour sa pieté , soit maintenant des-honorée par tes horribles meschancetez ; O bon Dieu ! est-ce cecy l'instruction que ie t'ay donnée en ta tendre ieunesse , que tu ayes accointance avec l'ennemy de nostre salut ; Quand tu fis profession & que tu t'enfermas dans un Cloistre, ne renoncas-tu point au Monde , au Diable , & à la Chair, & n'espousas-tu pas celuy , qui respendit son sang precieux en l'arbre de la Croix , pour nous rachepier de la mort eternelle ; Et maintenant rompant tes vœux, & faussant la foy que tu dois à ton Espoux, tu prens accointance avec le Prince des tenebres ; Sera-il dit que mon ventre ayt porté une sorciere ? Ha ! plustost la mort termine mes iours , auant que i'oye parler de tel scandale: Recommande-toy à ton Dieu , miserable que tu es , supplie sa bonté qu'elle te deliure de ce malin , & use souuent des Sacriemens qu'il a instituez en son Eglise, vrayes armes pour chasser cét ennemy du genre humain. Ainsi le Fils de Dieu rassistera, & te receura en sa grace. Telles & semblables plaintes & remonstrances sortoient de la bouche de cette vertueuse, & nō iamais assez louée Dame d'Abila, lors que son abominable fille, entierement possedée de Sathan, ne faisoit que rire , & que se moquer de ses paroles. Et quoy (respondoit-elle) est-ce vn si grand cas que de voir vn Demon amoureux d'une Damoiselle ? Est-ce vne chose si rare, qu'elle ne soit iamais arriüée au monde ; Faut-il conclure que pour parler à vn Esprit ie me sois donné à luy ? Socrates qui a esté le plus grand homme des siecles passez, & qui par le tesmoignage de l'oracle, fust estimé tres sage , n'auoit-il pas vn Demon qui le conseilloit*

seilloit ! Estoit-il pourtant Sorcier , ou Magicien ;
 Je ne sçay pourquoy vous faictes vn si grand bruit ,
 pour vne chose si commune. Et que diriez - vous si
 i'estois de ces femmes, dont le nombre est infiny, qui
 font hommage en la partie plus sale d'vn bouc puât
 & infect ? Non , non , Sathan n'a point de pouuoir
 sur moy. L'Esprit qui me visite toutes les nuicts est
 vn bon Demon , qui me conseille ce que ie dois fai-
 re. Si vous l'irritez vous ressentirez bien - tost son
 ire, & sa vengeance. Le pere & la mere , apres luy
 auoit fait d'autres remonstrances, voyans à leur grâd
 regret, qu'ils perdoient leur peine , la menacerent
 de l'enfermer dans vn cachot, si elle ne viuoit d'au-
 tre sorte, & de la faite mourir miserablement. Cepen-
 dant ils la tindrent encores plus de court que de
 coustume , dont elle grommeloit de despit, & disoit
 tout haut aux Damoiselles qui estoient à l'entour
 d'elle, qu'en brieuf l'on verroit de terribles merueil-
 les. Il arriva sur ces entrefaictes que le Seigneur d'A-
 bila fit vn voyage à Syenne pour quelques affaires
 qui conceruoient son gouuernement de la ville de
 Macua. Il pensoit ne faire qu'aller & reuenir aussi-
 tost, à fin de mettre ordre au mal qu'il voyoit naistre
 en sa maison. Quand il fut party , la bonne & ver-
 tueuse Dame de mere, estoit tousiours proche de sa
 fille. Elle luy representoit sans cesse la crainte & l'a-
 mour de DIEU, l'incitoit à se confesser de ses pe-
 chez, & à crier mercy de ses fautes: tandis que cette
 execrable suportoit avec impatience ces saintes ad-
 monitions: mais plus encores la garde qu'on faisoit
 d'elle la nuict, qui l'empeschoit de pouuoir libremēt
 iouyr de son amoureux. En fin ne pouuāt plus souf-
 frir les saints discours de cette Dame douée de pie-
 ré

ré&de religion: sans auoir égard au respect que l'on doit à ceux qui nous ont mis au monde, la detestable fille à l'instigation de Sathan, qui auoit desia acquis sur elle vne entiere possession, attenta le plus horrible meschanceté qu'on puisse imaginer, & contre qui le grand Legislatteur Solon ne voulut point establir de peine, parce qu'il ne pouuoit se persuader qu'un tel crime se commist parmy les hommes. C'estoit enuiron sur les onze heures de la nuict, lors que les tenebres amenant par tout le silence, que cette fureur infernale se leua du liét où elle couchoit, & sortant de sa chambre entra dans celle de sa mere, qui dormoit d'un paisible sommeil dans sa chaste couche. Le plus ieune de ses fils, de l'aage de cinq à six ans, estoit à ses costez. La paricide avec un grand & large cousteau, s'approche du liét, en donne si promptement dans la gorge de celle qui luy auoit donné naissance, qu'à peine la pauvre Dame peut jetter un cry. Vne Damoiselle d'aage couchoit tout aupres, qui ayant sauté du liét, accourut promptement, & treuuant sa Maistresse qui versoit vne source de sang, ouurit la fenestre de la chambre, & se mit à crier au secours.

Les Domestiques du Chasteau vindrent promptement pour voir que c'estoit, & entr'autres le puisné de la maison, qui ayant apperceu ce triste & sanglant spectacle, cheut à terre tout éuanouy. Ayant repris ses sentimens, il courut à vne chambre prochaine, & y prit vne espée pour véger sur cette maudite, la mort d'une si bonne mere. L'effect s'en fust ensuiuy, s'il n'eüst esté retenu par les assistans, qui luy remonstre-
rent qu'il falloit proceder en vne affaire de telle consequence, par les voyes ordinaires de la Iustice, & qui
luy

luy ostèrent l'espée des mains. Neantmoins la douleur qu'il ressenoit de la perte qu'il venoit de recevoir par les mains de cette patricide, luy faisoit vomir tant d'iniures contre elle, & le pouffoit si vivement à vengeance, qu'on ne le peut si bien tenir qu'il ne l'empoignast vne fois & ne la défigurast toute à belles ongles. Si on ne la luy eust ostée, il l'eust estrablée. Cette maudite fust en fermée sous vne seule garde, attendant la venue du miserable Pere, qui vint trois iours apres.

Mais qui peut dignemēt exprimer sa ctuelle douleur ? Treuver vne si chere compagne, avec qui'il auoit vescu si long-temps en paix, & en concorde, priuée de vie, par celle à qui elle l'auoit donnée, O Dieu ! (disoit ce dolent Gentil-homme) *il faut bien que ie vous aye griefuement offensé, puis que vous permettez que tant de malheur arrine en ma maison. Je vous supplie (Seigneur) d'appaiser vostre courroux, ou bien d'exercer vostre ire sur mon coupable chef. Ha ! ma pauvre femme, comment est-ce que i'eus si peu de prudence que de vous laisser ainsi seule, sans premierement m'aduiser des cruels desseins de ceste furie. Si ieusse esté icy, parauenture ceste execrable eust tourné sa main sur moy & ma mort eut guaranty vostre vie, pour qui i'eusse exposé mille fois la mienne cruelle vipere, qu'elle punition peut-on imaginer, qui soit capable de se punir selon son merite.*

Ainsi se lamentoit ce bon Gentil - homme, sans toutesfois en vne si grandre perte, sortir hor de bornes de la patience. Il ressembloit le iuste Iob, qui parmy les cruelles & extremes afflictions, ne maudit iamais son Createur, ny ne murmura point contre le Ciel. Aussi les vrayz seruiteurs de Dieu reçoient les

les auderfitez qui leur sont enuoyées de la meſme main dont il recueillent les proſperitez. Cependant il fait mettre entre quatre murailles ſon execrable fille, & informer du crime horrible & execrable par elle perpetré. Le procez fait, il eſt enuoyé au Roy de Meroé & à ſon Conſeil, pour en ordonner ſelon l'eſquité. Sa Maieſté ayant meuremēt delibéré ſur cette affaire, & treuuant que le fer, le feu & tout autre ſupplice, n'eſtoit que trop leger pour la punition d'un tel crime, condamne cette parricide à tel genre de mort que le Pere voudroit exercer, luy donnant pouuoir d'augmenter, ou diminuer la peine, ſelon qu'il luy plairoit.

Si-toſt qu'elle fut condamnée, le Demon l'en aduertit, de ſorte quelle ne vouloit ny manger, ny boire, que premierement ceux qui luy apportoienc ce qui luy eſtoit neceſſaire, n'en fiſſent l'eſſay. Et perſiſtant touſiours en ſon abominable opiniaſtrēté, elle diſoit tout haut : *Je ne veux point mourir, que ie n'aye acheuē la Tragedie. Il faut auparauant que mon Pere & mon frere aîné meurent de mes mains.* Pluſieurs bons Religieux venoient pour l'admonēſter. & pour la reduire, mais ils n'y gaignoient rien. Elle vomifſoit contre eux toutes ſortes d'iniures. I's auoient beau oppoſer à ſa rage de ſaincts remonſtrances tirées des ſacrées Eſcritures. Elle n'en vouloit ouyr parler. Quand on luy diſoit, qu'elle eſtoit poſſedée du malin Eſprit, reſpondoit qu'ils mentoient, & qu'elle n'en eſtoit qu'accedée. C'eſt le mot dont elle uſoit pour exprimer les violens accez qui la tranſportoient d'heure à autre, comme vne Pithoneſſe. O quel regret auoir ce bon Seigneur du Pere, reſſentant avec la perte de ſa chere Eſpouſe, celle qu'il vo-

yoit de l'ame de cette miserable ? qui s'en alloit estre la proye de Sathan. Cette iuste douleur digne d'un bon Pere, & d'un bon Chrestien le forçoit à dilayer le châtimēt qu'elle meritoit pour la ranger au train de salut. Il n'espargnoit de rechercher tous les iours les plus saincts Religieux, qu'il appelloit de tous costez pour cēt effect. Celuy qui eut tant de graces de Dieu que de faire confesser à cette execrable l'horreur de son crime, fut vn de ces bons Archimandrites qui se tiennent en la Thebayde : mais toutesfoiſ avec beaucoup de peine. Ce fut alors que le diable voyant qu'on luy vouloit rautir ce qu'il pensoit luy estre acquis, desploya toutes les ruses, & toutes les finesses. Il luy disoit à l'oreille, qu'aussi-tost qu'elle addoüieroit sa faute, on la feroit cruellement mourir, & qu'il ne falloit pas qu'elle eust peur quil ne l'aydat cōtre la peine qu'on luy vouloit faire souffrir, pouruē qu'elle fust ferme, luy promettant au reste de la transporter en vn pays estranger, où elle receuroit toute sorte de contentemens. En fin par la permission de celuy qui tient la bride à cēt Aduersaire, elle presta l'oreille auſaincts discours du Religieux. Lors qu'il le vit chanceler, ce fut à l'heure qu'il commenca le discours de la creation des hommes. Le peché introduict par le Prince des Tenebres : l'Enfert préparé pour ce subject aux mortels : l'antidote de nostre Redemption, par l'entremise du Verbe Fils de Dieu, seconde personne de la Trinité, qui a pris nostre chair humaine : & souffert vne cruelle mort, pour expier la coulpe de nos premiers parens : & les bras tendus & ouuerts, qu'il presente à ceux qui se repentent de l'auoir offensé. Ces remonſtrances proferées d'un zele ardent, & guidées de l'esprit de

de Dieu , eurent tant de pouuoir , qu'elle tiraient
premierement des larmes des yeux de cette mise-
rable.

Après ayant nauré son cœur , la bouche proféra
ces paroles. *Ha miserable que ie suis, pourquoy est ce
que la terre ne s'ouure pour m'engloutir. Je ne suis pas
digne que la lumiere du Soleil m'esclaire , mais qu'une
eternelle nuit me couure de ses ombres obscures , puis que
j'ay rompu l'union que ie fis avec mon Dieu , lors que ie
receus le saint Sacrement du Baptisme, & l'accord pas-
sé avec le Fils de Dieu , pour m'allier avec l'Esprit de
perdition. Non contente de ce crime , j'ay bruslé yn des
beaux edifices de se pays, & faict mourir trois Religieu-
ses, & commis vne autre infinité d'horribles meschance-
tés, j'ay coupé la gorge à ma propre mere. O Cruel! vous
auez veu toutes ces meschancetez, & ne les auez pas pu-
nis. Pardon Seigneur (poursuit-elle en s'agenouil-
lant & esteuant les yeux en haut) ne traictiez pas
mon ame d'un aussi rigoureux supplice , que mon corps
l'a merité. O Fils de Dieu ! ne me refusez pas vne goutte
de ce sang precieux , qui est capable de laver tous les
plus abominables pechez du monde. Arriere de moy , Sa-
than, ie renonce à son alliance, & implore desormais la
misericorde de celuy qui ne la refuse iamais à ceux qui
se repentent de leurs transgressions.*

Tenant ce discours, elle baisoit la terre , en signe
d'humilité, & de contrition. Le Religieux iugeant
que Dieu l'auoit touchée , luy demanda si elle ne
vouloit point receuoir le Sacrement de Confession
auriculaire. Elle luy respondit que c'estoit non seule-
ment son desir, mais encores de publier ses pechez
deuant Dieu & les hommes. S'estant confessée , elle
dit tout haut deuant tous, comme depuis l'age de

quinze ans le Diable auoit abusé de son corps charnellement, sous diuerses & horribles formes, & particulièrement sous la figure d'un petit pourceau. Que parce que les Religieuses du Cōuent où l'o l'auoit mise, la reprenoient de sa vanité, il l'auoit induite à brusler le Monastere. Que ce mauuais Esprit l'incitoit à la vengeance, luy promettant qu'elle sortiroit de Religion pour viure au monde suyuant ses plaisirs. Qu'en suite elle auoit faict mourir les Religieuses, dont nous auons parlé cy-dessus, & depuis fâchée des remonstrances que sa mère luy faisoit tous les iours, elle luy auoit coupé la gorge. Qu'elle estoit deliberée d'en faire autant à son pere, & à son frere aîné. Desquelles horribles & espouuantes meschancetez, elle requeroit humblement pardon & misericorde à Dieu, & à tous ceux qu'elle auoit offensez, & supplioit qu'on ne luy deniast point le Sacrement de penitence. L'horreur des crimes qu'elle publioit deuant vn grand nombre d'assistans, faisoit dresser les cheveux. Apres qu'elle eut confessé ses pechez de la sorte que nous le venons de raconter, on l'enferma entre les quatre murailles, où elle estoit auparauant, & quelques iours apres on la treuua expirée, les bras en croix. On ne sçeut point asseurement le genre de sa mort. Les vns croient que ce fut de la grande douleur, & du ressentiment qu'elle auoit de ses abominables pechez. Les autres pensent que ce fut par faute d'aliments ordinaires, dont elle n'auoit pas à suffisance, ou bien qu'on la prina de vie par poison, ou par odeurs d'artifice. Quelques vns croyer qu'on la susoqua par vn licol. Il n'y a que ceux qui l'auoient sous leur garde qui en peuuent rendre raison asseurée. C'est la fin tragique

tragique de cette mal-heureuse Damaïfelle, qui doit
feruir d'exemple à ceux, & à celles qui eſpouſent vn
Cloiſtre, auant que d'eſpreuuer ſ'ils ſont aſſez forts
pour reſiſter au Prince de ce monde, & pour ſurmon-
ter les tentations de la chair.



DE LA MORT PITOYABLE DV
valeureux Lyſis.

HISTOIRE XVI.

O Cruels deſtin ! qui ordonnez de nos iours
comme il vous plait, pourquoy permettez-
vous que la nature produiſe de ſi dignes fruits,
puis qu'ils ſont de ſi peu de durée ? Eſt-ce point
que vous auez ordonné du monde en cette ſorte,
que les plus belles choſes paſſent toujours légè-
rement, & qu'un matin voit naiſtre & mourir les plus
belles fleurs ? Cette Hiſtoire rend teſmoignage de
la Juſtice de ma plainte, ſe ne puis l'eſcrire ſans lar-
mes, voyant toute la valeur, & tout le mérite de la
terre perdre ſi-toſt leur lumière, au point de leur
Orient.

Lyſis que le Ciel auoit produit au monde pour le
plus beau chef-d'œuvre des mortel, eſtoit iſſu d'une
des plus nobles & des plus renommées Maisons de
Frâce. A peine auoit-il atteint l'âge de dix-ſept ans
qu'il ſe paroiſſoit ſat de courage & de valeur en deux
ſanglantes iournées, qu'au iugement des plus vail-
lants & ſages Capitaines qui commandoient en l'ar-
mée où il combattoit, il acquit le prix par deſſus les

plus valeureux Cavaliers. Depuis il se treuva en tant d'affairs, en tant de rencontres, & en tant de soutennemens de places, que son renom s'estendit par toute l'Europe. Iamais la France (depuis le valeureux Roland) ne porta vn tel Palladin. Si les Dieux luy eussent accordé plus de iours, il eust effacé la gloire du Cheualier Bayard. Au reste, ce n'estoit que grace, que beauté, & que courtoisie. Apres que nos fureurs lassées, mais non pas assouuies d'exercer les armes ciuiles, eurent donné quelque repit à la plus florissante Monarchie de l'Europe, il vint à la Cour du Prince, qui venoit de quitter vne Couronne estrange, pour receuoir celle qui luy appartenoit par les droits de la loy Salique. Il n'y eut guerres de menré qu'il y acquit le surnom de Cavalier sans pair. Il y estoit également chery, & reueré : les plus mauvais garçons qui font estat de prendre tous les iours des querelles, pour faire parler de leur vie, n'auoient pas sujet de se vanter en l'attaquant. Il les chastioit si bien qu'il n'auoient iamais plus enuie d'espreuuer la force de son bras. Et ceux qui le cherchoient d'amitié, treuuoient tant de franchise, & tant de douceur en cette belle ame, qu'ils en estoient aussi-tost entierement contents & satisfaits. Les rares dons dont il estoit accomply luy acquirent tant de part aux bonnes graces du premier Prince du sang Royal, qu'il estoit toujours aupres de luy. Il le voyoit de si bon œil, & faisoit tant d'estime de son merite, que nul autre n'estoit rien à sa comparaiſon.

Mais l'enuie qui s'attache toujours à la vertu, comme font les cantharides aux plus belles fleurs, ne pouuait supporter la splendeur de sa gloire, cherchoit cependant de le ruiner. Tous les iours elle faisoit de
mauvais

meuuais rapports à la Majesté de Lyfis, de sorte qu'elle le voyoit d'aussi mauuais œil, que l'autre Prince son proche parer, faisois conte de sa prouesse. Lyfis se comportoit néanmoins avec rât d'honneur & la fortune luy estoit si fauorable en tous ses desseins, que ses ennemis, quelque faueur qu'ils eussent du Roy ne pouuoient gagner sur luy, ny couuersement, ny ouuersement. Plusieurs fois on tascha de l'assassiner: mais il eschappe tousiours des embuches des ses aduersaires, & en mit à mort vñ si grand nombre, que desormais on le tint comme vn homme qui ne pouuoit mourir. Durant que les choses passent de la sorte, ce braue Cavalier ne laisse pas d'estre plus souvent à la Cour, & d'y viure avec tant de reputation, qu'elle obscurcit celle de tous les plus braues. Bien souvent aussi il va visiter les villes de son gouuernement. L'Amour n'auoit encores rien peu gaigné sur sa liberté. Toutes les beantez du monde luy estoient indifferentes. Il passoit ses iours sans estre tourmenté dans les flots de ce petit Dieu, où les pilotes les plus experts descouurent tous les iours quelques nouveaux escueils, lors que les beaux yeux d'vne Dame luy firent perdre le titre d'invincible, en vne assemblée qui se fit dans la maison d'vn Iuge, en l'vne des villes dont il estoit le Gouverneur.

Celuy qui n'auoit iamais trouué de hazard assez difficile pour arrester son genereux courage, & qui auoit desmé mille fois la mort toute teinte de sang & d'horreur au milieu de tant de perils, recogneu en vn instant l'effort d'vne beauté, qui par ses charmes eut la gloire de le surmonter. Il s'efforçoit au commencement d'y faire resistance: mais s'il eust eu ce

pouoir, il eust fait plus que tous les Heros tant
 vantez par l'Antiquité. Cette Beauté pour le respect
 que ie dois à ceux à qui elle appartenoit, sera nom-
 mée Syluie. Si Lysis est si viuement atteint de son
 amour, elle n'est pas moins amoureuse de son mé-
 rite, non pas toutesfois pour s'abandonner à luy, puis-
 qu'elle a tousiours fait trop de profession de l'hon-
 neur, quelque chose que la calomnie en ait semé par
 tout: mais seulement vne amitié louable, si elle eust
 esté indifferente, veut auoir la gloire d'auoir domp-
 té celuy qu'on croyoit indomptable: si bien qu'elle
 tâche de l'arrester du tout à elle, & joignant les ar-
 tifices à sa beauté, l'empêcher de n'en aymer point
 d'autre. L'amour est vne belle chose, pourueu qu'il
 ne passé point les bornes de la railô; il est impossi-
 ble aux braues & gétils courages de viure & de n'ay-
 mer point, à la charge que les Loix du Ciel, & de
 l'Eglise, ne soient point violées. Cette amitié que ie
 veux descrire, estoit illicite & ne se pouoit prati-
 quer sans scandale des hommes, encores que DIEU
 n'y fust point offensé. Il n'est point permis à vne
 femme mariée de quelque condition qu'elle soit de
 diuiser son cœur, qu'en presence de IESVS-CHRIST
 & de s^{on} Eglise, elle a donné à son Espoux, ny de don-
 ner tant de priuetez à vn autre. Cette Dame dont ie
 vous parle, estoit mariée avec vn grãd Seigneur, ieune,
 vaillant, sage, discret & courtois, s'il y en a au mon-
 de, de sorte qu'auoir de l'amitié ou de l'amour pour
 autre, c'est vne chose digne de blasme. Qu'elle ne
 m'alegue point le merite de Lysis, capable d'allumer
 d'amour impudique les plus pudiques. Ce sont de
 foibles raisons, qui ne doiuent iamais estre receuës
 des Chrestiens. Lysis à la verité eut tort de jeter les
 yeux,

yeux, & de se laisser prendre par vne personne qui estoit liée à vne autre. Il ne faut jamais faire à autruy ce que nous ne voudrions qui nous fust fait. Mais toutes ces considerations n'ont plus de lieu au siecle où nous sommes (& principalement parmy ceux qui ont esté nourris à la Cour,) où le vice est assis au trône de la vertu. Apres que Lysis se fut follement embarqué en cét amour, où les apparences luy promettoient ce qu'il n'obtiendra jamais, il fit entendre à Syluie le tourment qu'il souffroit pour sa beauté, & elle luy donnoit de petites priuantez, sans neantmoins luy accorder ce qu'il desiroit avec tant de passion. Elle le caressoit de la sorte, & en partie pour le bien qu'elle luy vouloit, & en partie pour l'ébrazer d'auantage à son amour, & pour le rendre plus terme à sa recherche. Aussi il n'y a point de doute, que riē ne cōserue mieux la flamme de l'amour que ces priuauté sās jouissance: puis que le chasseur poursuit le lièvre au froid, au chaud, par montaignes, & par plaines, & qu'il n'en fait plus de conte, lors qu'il en a fait sa prise: qu'il se faut donner de garde de ces ieunes mignons qui en vn aage si tendre, ont vn visage si delicat, & d'ont l'ardeur est vn feu de paille, qui se consomme aussi-tost qu'elle prend naissance. C'est pourquoy ces petits refus, & toutesfois accompagnés d'un ie ne sçay quoy qui inuitoit à la poursuite, l'engagerent tellement, que depuis il n'eut point de repos. Il passoit les iours & les nuits à soupirer son ardeur. O Dieux! (disoit-il) d'où me peut proceder ce nouveau trouble: ô Lysis! où est ton courrage; Faut-il que tu te laisses domper par les foibles puissances d'un enfant, toy qui n'as peu estre surmonté d'aucun autre pouuoir? O doux regards!

vous m'estes cherement vendus. Mais s'il se tourmente d'un costé. Syluie n'a pas moins de passion, quoy qu'elle la dissimule.

Toutesfois elle est autre que celle de son Amoureux: car encorcs qu'elle ne refusast iamais de verser son propre sang pour luy: si est-ce pourtant qu'elle mourroit plustost de mille morts, que d'offenser en effect son honneur, qu'il noircissoit en apparence. Lylis cependant la voyoit tous les iours, & leurs regards se confondent, & se meslent dans leurs ames. En fin ce Cavalier ne pouuant plus supporter tant de passion, se delibere de luy ecrire. La teneur de la lettre estoit telle.

S*I vous auez aussi bien cognoissance de ma douleur, comme vostre beauté est recognüe en mon ame, pour la premiere de toutes les autres beautez du monde, ie suis assenré (belle Syluie) que vostre cœur de rocher seroit touché de quelque pitié en mon endroit: mais mon mal-heur est si grand que vous vous figurez que mes recherches sont feintes, & que mon amour est sujet au changement. Bannissez, ie vous supplie cette folle croyance de vostre belle ame, & prenez desormais compassion de celuy à qui la Parque auancera bien tost la trame de ses iours, si vous ne luy vôtroyez ce que sa foy & sa perséuerance merite. J'attends avec impatience l'arrest de ma vie ou celuy de ma mort, par la responce que vostre courtoisie ne peut iustement denier, puis que par elle vous serez deliurée de mon importunité, ou par la gloire que j'en receuray, ou par la fin de ma vie.*

Cette lettre ayant esté fermée, il la configna entre les mains de ce Iuge, que Lylis auoit gagné pour luy seruir de truchement. Cét homme de Iustice, ingrât s'il en fut oncque, comme qui tenoit tout son

son bien & tout son honneur de la maison du genereux Lyfandre, mary de Syluie, s'estant rendu le corratier de ces amours, rendit la lettre à cette Dame. Apres l'auoir leuë, eile ne sçauoit si elle y deuoit respondre, ou bien n'y respondre pas. D'un costé elle se representoit que si elle respondoit à sa lettre, ce seroit rendre trop content Lysis, qu'elle vouloit tenir en attente, D'autre part, la bien-vueillance qu'elle luy porte ne permet pas qu'elle ne soulage son mal, pour le moins par vn espoir menteur. Ainsi balançant entre deux extremitez, elle se resolut à faire vne responce autant irresoluë que son ame. Quelqu'un pensera peut-estre que ces deux lettres sont de mon inuention : mais il faut qu'il croye autrement. Toutes les lettres qu'on escrit à la Cour se voyent, tant la vanité des Courtisans est grande. Je les ay recourrées d'un de mes amis, qui en a fait vn fidelle ramas de plusieurs autres, & qui à esté curieux de sçauoir le nom des personnes qui les ont escrites. Cette responce estoit doncques telle.

Si les hommes de ce siecle estoient aussi fidelles en effect qu'ils le sont en apparence, i'aurois occasion de viure heureuse, & contente, assés d'auoir faict acquisition d'un si digne Cavalier. Mais les exemples de leur inconstance sont si communs, que ie suis plustost tournée à forcer ma volonté & mon inclination, qu'à contenter vostre desir. Quand vous m'aurez rendu des preuues de vostre fidelité, ie me resoudray à ce que ie dois faire. Peut estre qu'alors ceste perséuerance me fera recognoistre vostre merite.

Si Lysis eust sujet de se plaindre, après en auoir faict entierement la lecture, ie le laisse imaginer à ceux qui ne viuert que de l'espoir de l'accomplisse.

ment de leurs desirs insensés. Helas ! Madame) disoit-il tout seul retiré dans sa chambre,) qu'elles marques d'infidélité avez-vous recogneues pour différer si longuement la récompense que mon amour extreme a meritée ; Voulez vous que j'escriue de mon propre sang la promesse que j'ay faicte de n'aymer autre que vous ; Il n'y a veine en tout mon corps que ie n'épuise pour ce sujet. Helas ! si vous tardez plus lon-temps à me secourir, vous perdez le plus fidel des mortels. Pleust à Dieu ! que vous peussiez aussi bien voir le fond de mon cœur, comme je ressens la blessure que vos beaux yeux y ont faicte : vous me iugeriez aussi tost digne de vostre bonne grace. Tandis que Lysis se tourmente, & accuse son cruel destin, & sa mauuaise fortune, sa Maistresse a bien de la peine à surmonter d'autre part les assauts que tant de rares dons du Ciel liurent contre son honneur, assistez de l'inclination qu'elle a d'aymer Lysis. Toutesfois elle demene tousiours ferme comme vn rocher au milieu des vagues pour ce regard : bien qu'en apparence il n'y ait nul qui ne croye qu'il y a entre eux d'autres plus estroits liés. Caselle donne le vray moyen à Lysis de la voir sans se soucier qu'on en parle, pourueu que sa conscience la deffende. Et particulièrement ce fut en vn jardin qui est à l'vn des faux-bourgs de la ville. Ce lieu fut le tesmoing des plainctes que Lysis fit à sa Maistresse, capables d'arrester de pitié la course du Soleil : mais il n'en retire pourtant que de simples baisers, & de semblables faveurs qui ne font qu'aigrit le mal de l'Amour, au lieu de le soulager : Tandis qu'ils continuent à se voir dans ce Paradis, plusieurs qui croient les actions des hommes aortes qu'elles

qu'elles ne sont, y prennent garde, & en font vn mauvais iugement. Lylis qui comme nous auons desia dit, auoit beaucoup d'enueux de sa gloire, ne peut pas si secrettement poursuiure l'accomplissement de cette amour, que ceux qui veillent sur ses actions ne descouurent quelque fumée de son ardeur. Ils en parlent sordement, & beaucoup de ceux qui ont plus de credit à la Court, & plus de faueur de leur Prince en donnent secrettement des aduis à Lysandre. Ce Seigneur est neantmoins si assuré de la fidelité de son épouse, qu'il a reconnuë en d'autres occasions, qu'il croit que ce sôt des impostures. Et puis il s'assente que Lylis l'aymoit trop, pour luy tramer vn tel des-honneur. Toutesfois pour oster tout sujet aux hommes de parler de luy, il prend vn iour sa femme, & se retire en vne sienne maison, qu'il a non gueres esloignée de la ville. Qui pourra dignement exprimer la douleur de ces deux Amârs, lors qu'une absence les priua du plaisir de se voir? Lylis se plaint & sospire, & dict en luy-mesme qu'il falloit bien que son cœur fut vne roche dure, lors que sa Maistresse le quitte, puis qu'il ne mourut point à ce départ. Il ne reposa ny iour ny nuit. Le souuenir de ses larmes passées l'importune incessamment, & ne luy donne point de trêue. Lors que le Soleil se leue, il souhaite la nuit, & desire la clarté du iour durant les tenebres. Syluie qui sent vn pareil déplaisir, accuse cependant la cruauté de son mary, & maudit la rigueur de la loy, qui assujettit les femmes aux loix des hommes. Lors que son amitié luy représente la beauté, la courtoisie, & la valeur de son Lylis, elle dict que l'amour luy auoit fait goustier tant de fruits délicieux, non pour la pitié qu'il eut de sa souffrance,

ce : mais pour la traiter plus cruellement, par la memoire d'une si grande perte. En fin leur étant interdit de se voir ils se visitent par lettres qu'ils donnent à de fidelles Messagers, attendans que la fortune leur donne le moyen de reprendre les attemens de leurs plaisirs. Ils ne tarderent gueres d'accôplir leurs violens desirs. Un voyage que Lyfandre fit, leur en ouvrit le chemin. Ce Seigneur avoit des affaires hors de la Prouince, où il faisoit pour lors sa demeure, pour les terminer il s'y achemine au grand contentement de Sylvie, qui neantmoins contrefaisoit la dolente à son depart, & le sommoit de reuenir le plustost qu'il luy seroit possible, tandis que dans son ame elle prioit à Dieu que son voyage fut aussi long que celui d'Ulyssé. Si tost qu'il fut party, Sylvie ne manque pas d'en aduertir Lysis, & de luy faire sçauoir, qu'il la vienne voir le plustost qu'il pourra. Lysis qui mouroit d'amour & d'absence, baise cent fois le messager qui luy apporte de si bonnes nouuelles. Lors qu'il arriue au Chasteau, où la Belle fait sa demeure, ceux qui ont la charge de le recevoir, & en qui Sylvie a deposé le plus secret de ses affaires; l'introduisent à sa chambre, ils se baissent & s'embrassent estroictement à cette nouvelle venue. Leurs amies affollées de plaisir, se meslent par leur bouche, & à peu près qu'elles ne quittent la demeure de leurs corps. Toutesfois Lysis ne peut recueillir le fruit qu'il desire : car l'honneur ne laisse pas d'estre tousiours le rempart qui deffend toutes les attaques. Merueille la plus grand qui se lira iamais, qu'une Dame parmy tant de bien-vueillance n'ait iamais succombé à tant de violens assauts. Toutesfois esté le dernier point, il possède routes les plus douces

douces fleurs du jardin des Amours. Mais que ces roses produiroient d'espines ! Apres que Lysis a demeuré deux ou trois iours en cette douce vie, il préd congé de Syluie pour retourner à la Cour, avec promesse de la reuoir bien souuent. Mais son cruel destin qui veut bien-tost trancher le fil de ses iours, luy suscite vne grande querelle, Sa valeur, sa beauté, & son courage, luy auoient acquis (comme nous auons desja dict) les bonnes grâces du premier Prince du sang, qui n'estoit pas de trop bonne intelligence avec le Roy. Ceux qui gouvernoient la Majesté, & qui redoutoient l'épée de Lysis, entretenoyent tous les iours nostre Monarque de l'ambition de ce Cavalier, & luy donnoient à entendre qu'il estoit cause du mauuais mesnage, qui estoit a desia cy-deuant entre luy & le Prince. Que la Majesté y deuoit pour- uoir de bonne heure, autrement que son insolence monteroit à telle extrémité, qu'elle pourroit at- tacher à des choses de plus grande importance. Le Roy encores qu'il eust aillez de sujet de se défier, voyant tant de partis contraires à sa Cour, ne vouloit pas neantmoins traicter indignement Lysis. Bien qu'on luy donnast de mauuaises impressions, toutesfois sa douceur accoustumée ne pouuoit se résoudre à la perte d'un si braue Cavalier. Ces mignons n'eurent pas toutes ces considerations : mais dès l'heure mes- me, ils coniurerent à luy oster la vie, de sorte qu'un soir comme Lysis se retiroit, sept ou huit mauuais garçons l'attaquerent : toutesfois il se deffendit si bien, qu'avec l'assistance qu'il receut d'un valeureux Marechal de camp, quatre demurerent sur la place, & les autres gagnerent au pied. Lors que ses aduer- saires virent qu'il n'y auoit moyen de le faire mourir
de

de vive force, ils eurent recours à d'autres artifice. Ils scauoient desia les amours, de sorte qu'ils firent c& de faux rapports, & d&ner&nt tant de sinistres impressions à la Majesté, qu'à leur importunité elle proceda contre Lysis de la sorte que nous l'allons escrire.

Tandis qu'on ne parle à la Cour que de querelles, & de dissensions, & que le Monstre à tant de restes, qui parut bien tost apres, se forme. Lyandre arrive de son voyage, Syluie le reçoit à l'accoustumée avec mille caresses. Apres auoir seiourné quelques iour à la maison, il va à la Cour : comme il salu& la Majesté, elle qui estoit desia induite à rendre vn mauvais office à Lysis, vid Lyandre de mauvais œil, & le tirant à part, luy tint ce langage.

Infame que tu es, est-il possible qu'estant issu de si noble extraction, tu souffres la honte de ta maison à luga en qu'elle estime ia peux auoir ton courage, qui n'ose témoigner le iuste ressentiment qu'on doit auoir d'un tel affront. Pendant que tu es absent, Lysis souille ta couche, & tu le sçais, & tu l'endures. Va & ne te represente iamais deuant ma face que tu n'ayes vengé v& telle iniure. Mes yeux ne scauroient voir vn homme qui est la fable & la risée de ma Cour.

Lyandre fust bien eslonné de ces paroles. Il ressemble à celuy qui est comme perclus lors que le foudre qui tombe à ses pieds tue quelque personne qui estoit proche de luy, ou qu'il brise vn grand arbre contre lequel ils'appuyoit : il demeure de me&me tout confus, & ne peut respondre vn seul mot. La h&te qu'il vi& de receuoir de son Prince, le touche si vioement, que lors qu'il a repris ses sentimens égar&z, il part tout morne, & tout pensif, & va vers la maison pour y executer v& c&tuelle resolution. Il

y caresse plus que d'ordinaire sa femme, afin qu'elle n'entre point en quelque deffiance. Cependant il recouvre vn poison le plus violent qui le puisse trouuer, & l'ayant detrempé dans vn verre avec de l'eau, il va treuuer sa femme qui se reposoit encore dans sa chambre. Il commanda aux domestiques qui y estoient d'en sortir. Lors qu'il s'y voit seul, il ferme la porte, & ouurant les vitres, il esueille sa femme, apres il met vne escrutoire & du papier sur la table & tenant de la main gauche le poison, & de la main droite vn poignard tout nud, il luy tient ce discours. *Encores (dit-il) que ton impudicité me deust forcer à n'auoir aucune compassion de toy, neanmoins ie te veux monstrier que ie suis plus soigneux de ta conuersion, que tu n'es de mon bonheur, ny du tien. Fais eslection de l'vne de ses trois choses, d'aualer ce poison, ou de mourir par ce fer, ou bien d'escrire tout presentement à Lysis, que ie suis absent & que tu le coniuures par l'amour qu'il te porte de te venir voir.*

Jamais la belle Cypris ne fut plus honteuse lors que son mary l'exposa toute nue avec Mars son amoureux, aux yeux des immortels. Mais les extrémité où elle se void reduite de mourir, ou de trahir celuy qu'elle ayme à la verité, & qui neantmoins ne se peut vâter d'auoir reçu d'elle que des priuetez plus estroites en apparence qu'en effect, la rendoient bien plus confuse. D'vn costé l'image de la mort, qui est communement plus horrible au sexe féminin qu'aux hommes, s'offre deuant ses yeux & d'autre costé elle void bien que si elle escrit la lettre, Lysis ne peut eschapper de mourir. Helas ! Monsieur (dit en fin cette dolente) d'où vous peut venir vn si cruel dessein, de donner la mort à l'innocence ? Auez-vous
jamais

iamais reconnu en moy tant d'impudicité, que vous me reduisiez à vn tel precipice ? Voulez vous que i'escriue à Lysis vne chose qui n'est pas, & qui ne sera iamais, & que i'aduouë vn crime que ie n'ay point commis ? Que ie meure plustost de vostre main, ou que i'auale ce cruel breuage: Je voy bien (respond Lysandre) vous raschez à me tromper encores par vos belles paroles: mais par le Dieu viuant, vous boitez tout presentement ce poison, ou mourrez de ma main, si mieux vous n'aymez escrire ce que ie desire. Acheuant ces mots, il luy porte la dague près de son sein, & faict semblant de la vouloir plonger dedans. Helas ! Monsieur (poursuit-elle) ie vous crie mercy. Attédez, & ie feray ce que vous voudrez. Depeschez vous (dit le mary) autrement vous mourrez. Syluie qui estoit desja morte de la frayeur qu'elle auoit de mourir, prend la plume, & le papier, & puis escrit ces paroles que son mary luy dicté.

Si vous m'aimez (mon cher Lysis) comme vous m'en sauez, tousiours donné des preuues, vous ne manquerez point de venir demain consoler vne amante affligée, qui meurt de desir de vous voir. L'absence de Lysandre vous y doit semandre. Il ne reuendra point de quelques iours. Je vous attends avec autant d'impatience, que vous possédez de merites: Bon iour ma chere vie, ne differez point nostre commun contentement.

Je m'estonne que cette passionnée ne mourut de regret en escriuant cette lettre, & comme elle eut le pouuoir de l'acheuer. Les larmes quiomboient dessus, & les souspirs qu'elle tiroit à peine de son estomach, rendoient assez de tesmoignage de la douleur qu'elle en ressentoit. Quand elle fut écrite, Lysandre la prend, & puis la baille à vn ieune garçon, qu'il

qu'il auoit instruit à iouer son personnage. Le la-
quay part, & treuue Lylis qui ioyeux de receuoir
des nouuelles de sa Maistresse, que l'arriuée de Li-
sandre luy defendoit de voir, & croyant en fin de
receuoir d'elle apres tant de faueurs ordinaires, ce
que tous les Amoureux recherchent avec tant de
passion, se dispose à l'instant de partir accompagné
de ce messager. Il se met en chemin, & faict tant
qu'il arrive près du Chasteau de Lysandre. Ha! mal-
heureux, tu cours trop volontairement à la fin de
tes iours. Retourne au lieu d'où tu es party. Ta va-
leur qui iusques icy n'a treuue rien d'inuincible sera
contraincte de succomber aux pieges que l'on te
rend. Ainsi parloit vn bon Ange (ce dit-on) à l'o-
reille de Lylis lors qu'il estoit prest d'entrer dans ce
Chasteau. Luy qui n'auoit iamais veu la peur, que
sur le front de ses ennemis, commença d'entrer en
quelque aprehensio, de sorte qu'une fois ils s'arre-
sta tout court à la porte. Allons Monsieur (disoit
celuy qui le menoit) Madame receura vn extreme
contentement, lors qu'elle sçaura vostre venue. Mō
amy (respond Lylis) ie ne sçay que i'ay; quelque
chose me dit que ie differe de la voir à vn autre iour.
Ie me doute de quelque trahison. Comment Mon-
sieur (repart l'autre) il semble que vous ayez peur,
allons seulement en assurance. Qu'il soit dit que
i'aye eu peur (dit Lylis) plustost souffrirois-ie mil-
le morts, auant qu'on eust cette opinion de moy.
Ce disant, il pousse son cheual, & entre dans la cour
du Chasteau. Si tost qu'il y fut entré, ceux qui auoient
de coustume de l'y receuoir, luy viennent à l'encon-
tre. L'on luy prend son cheual: l'autre son manteau,
l'autre son espee. Ie ne sçay pas comme il la quitta

S'il l'eust eue, il eust bien vengé la mort d'autre façon qu'il ne fit. C'estoit en la saison de Iuillet, lors que les chaleurs sont plus violentes. Il monte vers la chambre de sa Maistresse, comme il auoit de coutume. Si tost qu'elle le vit elle ietta vn haut cry, & tomba sus son liét palmée. Luy estonné de cette aduanture, veut s'approcher pour luy demander le sujet de son mal, mais à l'instant il se void entourné d'vne douzaine d'hommes armez, qui de pistolets, qui d'espées nuës, & qui de hallebardes. Leandre est parmy eux, qui luy crie. C'est maintenant que tu recevras le salaire de la honte que tu as faite à ma maison : Ce disant, il lasche vn pistolet & luy perce vn bras. Les autres le chargent avec leurs hallebardes & avec leurs espées. Qui a veu quelquesfois vn puissant sanglier entourné de dogues, & de veneurs, ou bié quelque toureau indōpté à qui l'on met les chiens à la queue dās quelque parc si par fortune les barrières viennent à se rompre, ce puissant animal se lance sur la foule du peuple, & en prend vn, & puis vn autre avec ses cornes, & escarte tout le monde. Qu'il s'imagine de voir le valeureux Lysis, qui avec vn escabeau qu'il tient en main, donne si rudement sur la teste de l'vn de ses aduersaires, qu'il en fait sortir la ceruelle. Il en assomme encotes deux autres : mais que peut-il faire contre tant de gens, & ainsi desarmé qu'il est ? Son corps percé comme vn crible, verse vn grand ruisseau de sang. En fin il se jette sur Lyandre, & bien que par derriere on luy baille cent coups de poignards, il le prend, & le soulève, prest à le jeter du haut en bas d'vne fenestre, si tous les autres ensemble en se jettant sur luy, ne l'en eussent empesché. Il les escarte encotes à coups de poings.

poings, & neantmoins il se sent toujours percer de part en part. Voyant qu'il ne pouuoit eschapper la mort ils s'approche de la fenestre, & puis tout sanglant qu'il est, il saute legerement en bas. Mais ô mal-heut ! il portoit vn accoustrement decouppé, qui est arresté par le fer d'un treillis. Ses aduersaires le voyant ainsi empestre comme vn autre Absalon, luy donnent tant de coups de halebardes, qu'à la fin ils priuent le monde du plus grand courage, & de la plus grande valeur du siecle. O valeureux Lysis ! que ie plains l'injustice de ton sort. Tu denois mourir à la teste de quelque armée, pour la Foy, pour ton Roy & pour ta patrie. Le bruit de cette mort pitoyable fut bien-tost espandu par toute la France. Les vns blasmoient la cruauté de Lyfandre, les autres louoient son iuste ressentiment. Sa mort a esté neantmoins depuis cher vendue. Elle en a attiré plusieurs autres, & en attire tous les iours. Son corps est rédu à ses parens, qui l'inhument au sepulchre de ces Ancestres. Ils veulent poursuiure par les voyes de la Justice Lyfandre : mais sa Majesté luy donne sa remission qu'il fait interiner. Tandis que ses parens, & ses amis le pleurent, ceux qui le redoutoient à la Cour, en font des feux de ioye. L'on dit qu'à l'heure qu'on l'assassinoit, vne grande Dame qui l'aymoit fut esueillée par la vision qu'elle eut de sa mort. L'on en fit des vers sur ce sujet, qui sont assez communs, & assez passables pour le temps d'alors. Je les inferc icy, parce qu'il est à propos, pour apprendre à beaucoup qui les approprient à feu

Monfieur de Guise, qu'ils se
trompent grandement.

* *

L'ESPRIT DE LYSIS

parlant à Flore.

STANCES

SVR le point que la nuit pliant son noir manteau,
 Pour faire place au jour r'appelle ses lumieres.
 Et qu'un profond sommeil arrosé de son eau,
 Charme de nos ennuis les humides paupieres,
 Tentens près de mon liét une dolente voix,
 Elle estoit à la voix de mon Lysis pareille:
 Je sens des bras plus froids que marbre mille fois,
 Dont l'un en me poussait, l'autre en sursaie m'esueillé
 Vn ieune homme couuert de playes, & de sang,
 Se prosterne à mes pieds, ma poitrine me glace,
 Mon cœur saisi deffroy, pantele dans mon flanc,
 Et à ce triste obiet ie tombe sur ma face.
 Madame (dit il lors) assurez vostre peur,
 Je suis vostre Lysis, qui deuant que descendre
 Dans le val tenebreux de l'infemale horreur,
 Ce funebre deuoir ie vous suis venu rendre.
 Je reconnois sa voix en ouurant mes deux yeux,
 Je reconnois mainis traits de sa beauté premierée
 Lysis (dis-je en pleurant) qu'elle fureur des Dieux
 Ta fait si tost quitter nostre belle lumiere?
 Les Dieux ne sont Autheurs du massacre inhumain,
 Vn cruel ennemy par vne fausse lettre,
 Dans sa propre maison l'a commis de sa main,
 Avec plusieurs bourreaux cōpagnons de leur Maître
 Quoy tant de riche dons dont le Ciel t'honoroit,
 Ta force, ta valeur, ta grâce, ta faconde:
 Et tant d'exploits guerriers que la France admiroit,
 Ne se deuient-il pas rendre amy tout le monde?
 Flore vous vous trompoz, l'esclat de ma verue

Est l'inique venin qui m'a priné de vie.
 C'est le foudre cruel dont ie suis abbatu,
 Le rocher de ma nef, la butte de l'ennie.
 Ceux qu'on voit à la Cour le premier rang tenir,
 Rodomonts de piaffe, & garces de courage,
 Ne pouuans de mon los le renom soustenir,
 Ont acheué ma mort pour assouuir leur rage,
 O detestables mœurs ! ô siecle rigoureux !
 Forge de trahison, escole d'iniustice,
 Des siecles le dernier, & le plus mal-heureux,
 Tu esteins la vertu pour allumer le vice.
 Lysis mon bien, mon tout, mille & mille trespas,
 Me feront chaque iour voir d'Acheron la riuë,
 Si par tant de mal-heurs ton ombre suis la bas,
 La gloire de tes faits restera tousiours viue,
 I'eusse bien désiré mourir au liét d'honneur,
 Mettant un champ en route, ou forçant une place,
 Mais be qui plus helas ! augmente ma douleur,
 C'est que mourant ie perds les raiZ de vostre face.
 Le genre de ta mort tesmoigne ta valeur,
 Et de tes ennemis la couardise infame:
 Tant qu'en moy restera de vie & de chaleur,
 Tousiours mon cher Lysis, tu viuras en mon ame.
 Tousiours ie garderay deffous l'obscur tombeau
 Ta grace, ta vertu dedans mon ame empreinte:
 Et le Lethe oublicux abbreuuant de son eau,
 Ne fera que s'oblir une amitié si sainte.
 L'excessiue douleur ne me permettra pas
 De suruiure apres toy: les maux qu'amour me l'iure,
 Sont beaucoup plus cruels que le cruel trespas.
 Tu m'emportes le cœur sans qui l'on ne peut viure.
 Quiconque veut guerir est ja sain à demy.
 Madame au moins tenez nostre douleur comierte,


*Que si vous ne pouuez oublier vostre amy,
 Songez au bien passé, & non pas à la perte.
 Puis que la vertu seule en ayment ie poursuis,
 Peu me chaut que chacun fonde en larmes me voye,
 Me souuenir de l'un, de l'autre ie ne puis,
 Le deuil entre en nos cœurs plus auant que la joye.
 Adieu Madame, Adieu, le Messager des Dieux
 Pour passer le noir fleuve incessamment m'appelle;
 Adieu beaux yeux, plus clairs que les flammes des
 Cieux,
 D'un eternal adieu, adieu Flore la Belle.
 Lors ie saute du liét pour sa fuite arrester.
 Mais pensant l'embrasser, rien que vent ie n'embrasse
 Adieu mon cher Lysis, l'eternel Iupiter
 Guerdonnant tes vertus, te recoiue en sa grace.*

C'est la fin tragique du braue Lysis, de qui la valeur
 estoit incomparable, iamais le Ciel ne mit dans vn
 corps tāt de beauté, de grace & d'adresse, ny vn cou-
 rage si franc & si genereux. Si ce cruel mal-heur ne
 l'eust si tost rauy d'entre les mortels, la France se
 pourroit maintenant vanter d'auoir vn
 Mars aussi bié q; la Thrace. Les Lau-
 riers, & les Palmes puissent
 naistre sur sa tombe.



♦
 D E L A C R V A V T E' D' V N E
 Femme, exercée sur son Mary: de sa
 fin mal-heureuse, & de celle
 de son Amoureux.

HISTOIRE XVII.

 St-il douceur au monde qui soit comparable
 au contentement que reçoit vn amoureux,
 lors qu'il possède le bien pour qui il a versé tant
 de larmes; Mais y a-il martyre égal à la crainte ou
 soupçon, & au mal tel que donne cette fureur, que
 l'on nomme Jalousie? Les dédain, les rigueurs &
 les refus, & en fin toutes les peines de l'Amour sont
 agreables, puis qu'on se console de l'esper de la
 jouissance. Au contraire si cette peste d'Enfer gaigne
 vne fois nostre ame, l'allegresse en est pour jamais
 bannie, quelque plaisir qui arrive. Et de là sortent
 puis apres les desiances, & les cruelles resolutions
 dont les effets sanglants remplissent les Theatres,
 de meurtre & d'infamie, L'Histoire que ie me pre-
 pare de vous raconter telmoigne que mō dire est ve-
 ritable. Elle est si bien arrivée en nostre siecle, que
 mille & mille personnes la sçavent peut-estre mieux
 que moy. Orquoy qu'elle soit si connue, ie ne lais-
 seray pas de l'escrire en cette sorte.

Les Orages qui auoient battu continuellemēt la
 Frâce l'espace de tant de lustres, cedoient à la bon-
 ce que le Ciel luy enuoyoit. Henry le Grand, de qui
 les mal-heurs ont esleué la gloire au plus hault

chroïne de la vertu, venoit de receuoir de son peuple de Paris autāt de tesmoignages de fidelité, qu'il auoit receu de marques de rebellion, quand vn zele inconsideré que les boutes-feux allumoier en l'ame de toutes sortes de persōnes, emportoit mesme vne infinité de gens de bien à la felonnie. Apres (dis-je) tant de confusion que les guerres ciuiles auoient causées, il y auoit en la premiere des Citez de l'Europe, vn homme que ie veux nommer Corneille. Il épousa vne des plus belles femmes que la Nature ayt iamais produicte. Vn Peintre industrieux qui voudroit represēter pour plaisir quelque rare beauté, ne sçauroit en titer vne plus excellente. Ses cheveux estoient blonds, crespez, & plus luisans que fin or. Sa face estoit d'vne couleur meslée de lys & de roses, & son frōt estoit vne large table d'yuoire bien poly. Soups deux arcs d'hebene on voyoit deux yeux noirs; mais plustost deux clairs Soleils, doux à les voir, & auares de leurs regards. Il sembloit que l'Amour voloit tout à l'entour, & que la vuidant toute sa trouffe, il en deroboit visiblement tous les cœurs. En fin elle estoit si belle, que l'enuie mesme n'eust sçeu qu'y reprendre. Son nom estoit Calamite. Corneille s'estimoit le plus heureux & le plus content homme du mōde, en la possession d'vne si rare chose. Il n'auoit pas trop de moyens lors qu'il l'épousa: mais il fut si heureux dès la premiere année de son mariage, qu'ayant remply plusieurs magazins de pieces de vin, il y gaigna en vne grande cherté qui suruint, vne notable somme d'argent, & puis il sçeu si bien augmenter son lucre, que dans deux ans il se treuua riche de cēt mille escus. Se voyant ainsi à son ayse, il quitta le train de la marchandise,

disse, & se mit à viure en Bourgeois de ses rentes, & de ses commoditez quela fortune luy auoit données. Calamite qui auoit de la vanité, comme ont ordinairement toutes les belles femmes, fut celle qui le fit resoudre à passer ses iours, sans auoir autre soucy que de faire bonne chere, puis qu'ils en auoient le moyen. Cependât elle commença à leuer le front & à s'habiller plus pōpousement que de coustume. Ce n'estoient que perles & que brillans qui paroient sa gorge & ses cheueux. Ses robes estoient d'une Princesse, & tant d'orgueil aux habits, ioinct à tant de beauté, attiroient les yeux de plusieurs personnes, de qui elle captiuoit insensiblement les ames. Il y eut plusieurs grands de la Cour, qui estans abbreuez du bruiet de ses perfections, se sentoient arracher le cœur par cette Calamite, de mesme que le fer est attiré par la Pierre d'Aymant. Mais parmy tant d'Amoureux qui soupiroient pour elle, il n'y en eut pas vn qui se peust vanter d'auoir receu quelque faueur extraordinaire.

Tandis que cette Bourgeoise a la reputation d'estre la plus belle de toutes les plus rares beautez de la ville, & qu'elle n'a d'autre contentement que de plaire aux yeux de son mary, sans se soucier des plaintes, ny des larmes de ceux qui perdent inutilement le temps à gaigner les bones graces, vn ieune homme de Gascogne vint à Paris, à fin de poursuire quelques affaires au Conseil. Sa fortune, ou plustost son mal-heur le fait loger aupres du logis de Calamite, & le rend aussi tost espris de ses perfections. Il le nommoit Cilandre, homme aagé de vingt-deux à vingt troisans. Soudain qu'il appesceu ce beau visage qui n'auoit point de pareil en toute cette

grande & peuplée Cité, l'Archer qui a des aïsses cō-
 mença à le bruler, & à croistre de iour en iour son
 feu. Il quitte bien-tost toutes affaires, & n'a d'autre
 soing que de penser à la guérison de son mal. La veue
 de celle qui la blesé, luy est neantmoins si chere,
 qu'il ne cesse de la cōtempler par tous les lieux où
 il a le plaisir de la regarder. Mais en la considérant il
 s'aveugle en la lumiere de ses beaux yeux, & sa bles-
 sure s'ouure, & s'envenime d'autant plus qu'il jette
 sur elle ses regards qui demandent mercy. Calamité
 n'y prenoit pas garde au commencement; ou si elle
 s'en apperceuoit, elle n'en faisoit non plus de conte
 que de tant d'autres, qui luy estoient tous indifferēs.
 Or yn iour comme elle oyoit la grande Messe en la
 paroisse, Cilandre s'alla agenouïller deuant elle, & au
 lieu de prier *Dei*, il se mit à jetter ses regards lâ-
 guissans & mourans, capables d'amollir les rochers,
 sur cette Beauté qui estoit composée d'une matiere
 plus fragile & plus molle. Elle qui veid vn ieune hō-
 me qui auoit des cheveux frisez & dorez, des yeux
 noirs & brillants, & des ioües qui ne faisoient que
 commencer à pousser vn premier cotton, & qui
 estoient pareilles à la couleur de la roze qui sort du
 bouton, & qui croist avec le Soleil leuant, & au reste
 fort bien vestu, prit plaisir, contre sa cōstume, à le
 considerer reciproquement, & au mesme instant le
 rempart de son ame gardé si longuement pour son
 bon mary, sentit vne cruelle brèche. Elle n'en fit
 pourtant gueres de semblant, & toutesfois elle ne
 sceut si bien se cōtenir, que Cilandre ne l'eust en ses
 yeux de la bien-vueillance. Si tost qu'elle fut à son
 logis, au lieu de ses occupations ordinaires, les pen-
 sées, & les desirs viennent troubler l'aïse de sa vie. Si
 elle

elle veille, l'amour luy represente la beauté, & la bonne grace de ce ieune homme? & si elle dort, les songes images vaines des choses que l'on a veuës, & que l'on souhaite, ne luy figuroient pas moins le sujet de sa passion. Elle s'efforça au commencement d'y resister, mais tout cét effort estoit trop languissant. En telles attaques il faut implorer l'assistance d'en haut, qui ne refuse iamais grace à ceux qui la requierēt comme on droit. La pluspart des rigueurs & des resistances des Dames de ce siecle, sont suivies de leur consentement, quelque excuse qu'elles puissent alleguer, en reiettant la coulpe sur l'Amour ou sur le destin. Quoy que ce soit, Calamite commence d'ouvir son cœur aux tentations, & ne se souvient plus de la promesse solennelle qu'elle a faite en vn Sacrement à qui l'Apostre donne le surnom de grand. Or comme elle resue sur sa passion, elle ouvre vn iour vne fenestre de sa chambre, & aperçoit Cilandre en vne maison prochaine à vne autre fenestre. Si tost que ce ieune homme la descouvre, & qu'il void qu'elle prend plaisir de le regarder, il luy fait vne grande reuerence, & elle luy rend vn pareil honneur, & en luy iettant de regards capables de faire à mesme tēps moutir, & reniure, elle referme sa fenestre. Ce fut alors que l'Amour qui ne commençoit que de naistre dans l'ame de Cilandre, s'épandit par toutes ses moüelles; ce fut alors que mille pensers amis & ennemis le flatterent, & l'agiterent. Les vns en luy representant cét objet si desirable, enyuroient son ame du contentement qu'il venoit de receuoir de ces diuins regards. Et les autres le faisant songer à vne perte qui l'auoit priué de son heur, aussi soudain qu'un esclat, il estoit con-

trains

de soupirer, & de tenir ce langage. Ou fuyez vous (disoit-il) doux suiez de mes vœux; Pourquoy me cachez-vous cette agreable lumiere, dont la priuation me rend tout conuert de tenebres & tout remplis de soucy; Ne voyez-vous pas que ie suis moy mesme vn vray soucy, qui ne fais que mourir & que languir, si vous qui estes mon seul Soleil, ne daignez l'entretenir de vos rayons; le me ferme à toute autre clarié, & ma paupiere ne scauroit supporter la vuë d'un autre Astre. Si ie vouldois reciter toutes les paroles & toutes les plaintes que faisoit Cilandre, il me faudroit resoudre à faire vn discours aussi long que ces liures d'Amour qui parent la boutique des Libraires du Palais, & dont Galimatias perpetuel fait donner le plus souvent des pensions à ses Auteurs, par la recomandation des personnes qui priët ce que l'on n'entend pas, pendant que les beaux esprits qui peuuent arracher des mains des Parques, & de l'eternel oubly ce nō de ceux que la Nature l'a eleuez au dessus des autres, sont miserablemēt reculés. Mais pour reprendre le fil de nôtre histoire, ie dis qu'apres que nos amoureux furent plusieurs iours entretenus avec des regards mutuels, & que Cilandre eut reconnu que Calamite le voyoit de bon œil, il s'enhardit de luy escrire cette lettre, qu'il insere icy mot à mot, suivant que ie l'ay recourée,

IE ne doute point que vous ne blasmiiez ma temerité, & que vous ne me ingiez digne de chastimēt, si tost que vous receurez cette lettre. Toutesfois si vous regardez aux perfections dont vous estes accomplie: i'espere (Madame) que vous excuserez mon crime, & aduouerez qu'il est impossible de vous voir sans vous aimer. Le doux espoir qui me console en mon martyre, & qui me promet

promet que vostre beau iugement loüera plüost mon election qu'il condamnera ma passion, me fait auoir recours à vostre grace, sans laquelle il m'est autant possible de viure qu'il est aisé de conseruer sa liberté deuant la plus belle chose du monde. Ma mort, & ma vie ne dependant que de vous.

Cilandre eust moyen de faire tenir cette lettre à sa Maistresse, par le moyen de son Hostesse à qui il auoit desia descouuert sa passion, & laquelle comme voisine, cognoissoit non seulement Calamire; mais parloit souuent à elle familièrement. Cette belle Bourgeoise, se rendoit au commencement difficile aux assauts de cét Amoureux; afin de l'allumer d'auantage de son amour; & cependant elle mesme brusloit route dans son ame. Enfin apres beaucoup de messages & de paroles que les bornes de mon Histoire ne scauroient contenir, les deux Amants se voyent & cueillent les fruiçts de leurs desirs. Ces fruiçts leur sont en commencement si délicieux, que pour eux ils ne se souciēt desormais de la gloire du Ciel, qu'ils iugent estre moindre que leur folies. Mais comme telles douceurs ne sont iamaïs sans amertume, tandis qu'ils se perdēt en leurs folies. Corneille prend garde aux priuautez que sa femme donne à ce ieune homme. Il le treuve souuent chez luy, & neantmoins la liberté de la France le voisinage, & la fidélité que sa fême luy auoit tousiours auparauant gardée, ne le portent pas du tout à la ialousie. Si est ce qu'apres auoir long-temps supporté toutes ces façons de faire, il croit qu'il y va de son honneur, que cét homme parle à toute hente avec sa femme, qu'il la meine sous le bras à la pourmenade, & qu'elle le reçoine avec tant de familiarité

liarité. C'est pourquoy il luy en fait vne petite reprimende, la presche de bonne renommée, & la conuince de viure d'autre sorte. Elle qui voit son mary prendre de l'ombrage, contre son naturel, se met en colere, & en pleurant luy tient ce discours: D'où vous vient (dit-elle) ce soudain caprice? M'auz-vous doncques en reputation d'une femme desbauchée? N'estes vous pas vous mesmes celuy qui m'auz tousiours permis de voir toutes sortes d'honnestes compagnies? Auez vous remarqué iamais en moy aucun traitt qui vous doine iustement pousser à faire vn mauvais ingement de moy? Ne sçauz vous pas que si i'eusse voulu fouler aux pieds mon honneur, i'auois moyen de passer mon temps avec tellez personnes que pour leur grandeur vous ne m'auriez osé regarder, tant s'en faut que vous eussiez usé a'un tel langage? Ostez, ie vous supplie de vostre teste ces nouuelles impressions, & croyez que toutes les priuantez que les hommes ont avec moy, sont autant de rempars pour vous en conseruer tousiours ce que la Loy de Dieu ne permet pas que ie viole. Ainsi parloit Calamite à son mary, qui ne sçeut pour lors que respôdre à ces belles raisons. Il se resolut à passer deormais le reste de ses iours, sans se mettre plus en peine de la maniere de viure de sa femme. Aussi ces Adulteres voguerent quelques mois depuis sur vne mer sans orage. Si leur impudence n'eust esté extreme, iamais ce mary n'eust troublé le calme de leurs folles amours. Mais ils passerent tellement les limites de la modestie, que dès lors ils faisoient à porte ouuerte. Tout le monde s'en scandalizoit, & chacun s'estonnoit de la patience d'un si bon homme. Tandis que ces des-honnestes fréquentations continuënt, il arriva vn iour que Corneille en reuenant

de la ville, & entrant dans son logis surprend Cilandre, qui suçoit avec ses leures le miel de la bouche de sa femme assise en vne chaire à la basse-cour de son logis. Ce fut lors que la ialousie commença de s'allumer plus que iamais, & qu'il entra en vn excès de colere. Il s'approcha de sa femme, & en presence de Cilandre luy bailla vn grâd soufflet. Apres il s'adressa à l'adultere, & luy dit qu'il voidast promptement de sa maison, & luy deffendit s'il estoit sage, de n'y mettre plus de sa vie le pied. Ceux qui se plongent ordinairement dans des pareilles delices & qui tout à coup en sont prinex, iugeront de l'enuy que cette defence leur apporta. Elle fut encore plus fascheuse à Calamite, laquelle se voyant bannie de ses folles amours, se representant à toute heure le coup qu'elle auoit receu, estoit toute transportée de rage. Ce n'estoient que souspirs, que larmes, & qu'iniures qu'elle vomissoit contre son mary. Donques (disoit-elle) etuel que tu es, as-tu bien le courage de me traicter avec tant d'indignité ; Tu me veux donques forcer à viure en Capucine, toy qui m'as ouuert autres-fois le chemin de la libarré ? N'est-ce pas le vray moyen de deuenir en effet ce que tu es de nom, si i'estois moins soigneuse de la crainte de D I E U, que tu n'es de ton honneur ; Plusieurs semblables discours proferoit cette belle & fausse femme, capables de renuerfer toute la coulpe sur son mary, s'il n'eust des-jà reconnu que ses actions estoient plus frauduleuses que celles d'un vieil Renard. Aussi il luy coupa court, & luy dit, que si iamais elle parloit ny en bien ny eu mal à cét homme, il luy apprendroit le pouuoir qu'il auoit sur elle.

Cependant que ces amoureux n'ont pas la licen-

ce de se voir avec tant de priuauté qu'auparauant ils se visitent par lettres, & se donnent des assignations, où ils se rendēt sans estre apperceus, quelques épies que le mary mette en cāpagne. C'est vn abus que de s'ingerer de garder des femmes qui ont enuie de mal faire. Quand leurs maris auroient autant d'yeux que de cheueux, ils ne scauroient pourtant éviter leur trahison. Calamite trompe si bien tous les aguets de Corneille, qu'elle void Cilandre, & se mocque de tous ses soins, & de toutes ses veilles: neanmoins elle ne laisse pourtant de se plaindre de cette contrainte à son amy, qui prenant l'occasion aux cheueux, & ayant desia pensé au moyen d'exécuter vne sanglante & detestable resolution qu'il auoit prise, commence de représenter à Calamite l'amour extreme qu'il luy porte. Accuse le Ciel, de ce qu'un autre a la possēsiō entiere d'une chose que son destin luy auoit acquise, s'il eust esté si heureux, que d'en auoir eu plustost la connoissāce. Il luy met encores deuant les yeux la profession qu'il fait, & comme il est prest d'auoir vn office en la Chambre des Comptes. Au contraire il luy depeint la rigueur de son mary, sa basse condition, & le peu d'experience qu'il auoit aux affaires du monde, qui le rendēt toujours indigne d'une charge honorable, qu'elque moyens qu'il possède. Et enfin il luy dit qu'elle n'aura iamais d'honneur avec vn tel homme, puis qu'il ne peut estre plus qu'il est, ny contentement, puis que la ialousie a perdu sa raison. Calamite charouillée de toutes ces belles paroles, respond à son Amoureux, qu'elle est bien fāschée de sa mauuaise fortune. Qu'elle n'en accuse pas moins à toute heure les Astres, comme complices de son mal-heur: & que

que s'il y auoit moyé de délier vne si fascheuse chaîne, tout son souhait ne seroit iamais autre, que de viure & de mourir avec luy. Cilandre luy repart, que cela estoit si aisé, pourueu qu'elle s'y voulut resoudre, qu'il ne trouuoit rien de plus facile. Sur cela apres auoir premierement soupiré pour la captiuité où elle estoit detenuë, afin de l'induire mieux au consentement d'une execrable meschanceté, il luy ouvrit la voye pour faire mourir son mary: & luy allegua que le plaisir & la felicité de leur vie, ne dependroit que de la fin de son Espoux. Calamite auoit au commencement de l'horreur à se resoudre à cette sanglante procedure: mais l'excés de son amour, la ialousie de son mary, & l'imagination d'une plus que vaine, & plus que folle vanité, eurent tant de force, que cette mauuaise femme se laisse emporter, & seduire à ces allechemens. Vne fois ils vouloient que le poison en fit l'office, mais puis apres Cilandre prit vn autre dessein, dont il vint à bout, comme ie vous reciteray maintenant.

Après que cét execrable ieune homme non content de souiller la couche d'autrui, eut pris congé de sa Maistresse, pour venir à bout d'un forfait que Dieu ne laisse iamais impuny, suiuant que les exemples ordinaires le tesmoignent: il eut moyen de parler à deux soldats qui alloient en Flandre, où pour lors le valeureux Comte Maurice bernoit & atrestoit la fortune de ceux qui donnerent tant de trauerses à nostre grand Roy. Et comme on ne manque iamais d'Arfacides & de desesperes, il ne fut gueres malaisé à Cilandre de les gaigner par argent, & de les induire à mettre à mort Corneille. Il auoit accoustumé de s'aller souuent promener sur vn petit cheual en vne

sienne maison, esloignée de quelques deux petites lieues de la ville. Et tousiours quād il y alloit, il parroit de bon matin, & puis reuenoit sur le soir. Ces deux meurtriers acompagnez du cruel Cilandre, qui auoit eu aduis de Calamite, que son mary iroit le lendemain aux champs, se cachèrent en vn estroit passage, & ne manquerent pas de donner la mort au mal-heureux Corneille. Apres qu'ils eurent respandu le sang de l'innocence qui crie desia vengeance, & de qui le Ciel sçaura bien faire rendre cōpte, à ceux qui en ont empourpré la terre, ils prindrent le corps, & le traînerent hors du chemin dans vn fossé, & puis firent payer incontinent à Cilandre cinquante escus, qu'il leur auoit promis. Ayant touché cette somme, ils luy demanderent, où est-ce qu'il faisoit dessein d'aller. Cilandre leur dit qu'il vouloit retourner à Paris: Et nous (repart l'vn des autres) all'ons gagner le Pays bas, tādīs que vous tāschez de monter sur vn échaffaut. Ce disant luy & son compagnon s'escartent legerement, pendant que Cilandre prend vn autre chemin, & reuiet à la ville.

Ce meurtre ne demeura gueres sans estre descouuert. Quelques vns ayant apperceu du sang en ce passage, & regardé d'vn costé & d'autre, & treuvé encores des traces rouges, firent vne si soigneuse recherche, qu'en fin ils treuuent vn corps tout souillé de sang & de poussiere, & priué de vie. Le bruiēt vole promptement par routes les demeures prochaines. Entre plusieurs personnes qui s'assemblent à l'entour de ce corps, vn homme le recognoist Soudain il court à Paris, & en porte la nouuelle à sa femme, qui se iette incontinent à terre, atrache ses blonds cheueux, outrage son beau visage, & plōbe
de

de coups son sein d'yuoire: O DIEU ! (disoit-elle) mon cher Corneille, qu'elle influence mal-heureuse me vient prier d'un si bon mary & si cher mary? Quel pe he ay ie con mis qui mette vne telle rigueur? Heras ! que dois-je faire desormais ou plus-tost que puis ie faire, ayant perdu celuy sàs lequel il m'est impossible de vivre? Si au moins j'auois ce contentement d'apprendre ton meurrier, la vengeance que ie ferois exercer sur son corps allegeroit peut-estre le coup que ie viens de recevoir pour vn tel desastre, & ie m'en irois plus contente te trouuer en l'autre monde, soit que tu fasses desia ta demeure dans le Ciel, ou aux campagnes Elizées. Ha ! Par-que inique & cruelle, qui me ravis tout mon bien, pourquoy n'as-tu permis que le cruel Assassin de mon repos, n'ayt acheué entierement l'homicide? Ne sçauo-s-tu pas que nos iours estoiet indiuissibles, & qu'il failloit couper égall-ment la trame de l'un & de l'autre? Mais si tu l'as fait pour me dōner plus de tourmēt, par le moyē de la mal-heureuse vie que tu me laisses: tu te trompes bien fort, puis qu'un iour, qu'une heure, ny vn moment, ne sont pas capables de me retenir en cette misere.

Acheuant ses plaintes, l'on eust dict qu'elle estoit pousée de tant de fureur & de rage, qu'elle se vouloit donner à vn cousseau au trauers du corps. Tous ses domestiques la retiennent, & les voisins qui arriuent au secours, ont bien de la peine à la coucher dans le liēt, où elle contrefait si bien la dolente, qu'à la voir cette action, on l'eust prise pour l'image de l'ennuy mesme. Mais cependant toutes ces larmes de Crocodile ne sont pas suffisantes de tromper le Lieutenant Criminel, qui se transporte en son lo-

gis. Ce Magistrat, sage, prudent, & bien aduisé, s'il y en eut iamais au monde, ayant desia sourdement appris quelque chose de ses amours de Calamite & de Cilandre, & puis considerant tant de façons de faire & tant de larmes, & oyant tant de plaintes, & tant de regrets inutiles, ne doute nullement qu'elle & son Amoureux n'ayent commis ce meurtre. Cependant pour le decouvrir aisément, il s'approche du liect de Calamite, & s'estant assis en vne chaire il luy tint le langage. Madame, la compassion que i'ay de vostre mal-heur, m'a faict venir icy. Je ne viens pas afin de vous consoler sur la mort de vostre mary: mais plustost pour vous assister de mon conseil, sur vne accusation que le Procureur du Roy va former contre vous. L'on vous accuse d'auoir vous-mesmes esté l'Autheur du meurtre, en y sollicitent ceux qui l'on executé. Pensez de bonne heure à vos affaires, & si vous estes vn des complices, regardés promptement à ce que vous voulez que ie fasse pour vous le porter vn regret eternal dans mon ame, si vne telle Baudé receuoit vn affront.

Qui eust consideré alors Calamite, eust bié remarqué des mouuemens contraire en son ame, par les signes differens qui paroissoient en son visage. Elle pallissoit maintenant, & puis rougissoit à l'instant mesme. La parole qu'elle vouloit proferer pour respondre se confondoit dans la bouche, & ne pouoit nullement estre exprimée. Toutesfois elle commença à crier, & à se plaindre plus haut qu'elle n'auoit point encor fait, & à contrefaire la plus affligée personne qui fust iamais. On eust peu la comparer à la forcenée Hecube, qui fut changée en rage, lors qu'elle apperçeut sur les bords de la mer, le corps de son
fils

filz Polydore. Ces plainctes, ny les cris n'abusent pas pourtant ce sage Magistrat. Quand il voit les mouuements de cette femme, il poursuit son discours en ces termes : l'employe tout ce que ie puis pour vous sauuer & vous ne taschez qu'à vous perdre. Je m'efforce de vous tirer en vn port de salut, & vous mettez le voile au vent contraire qui vous menace de naufrage. Je plains vostre condition, indigne d'une si rare, & si parfaicte creature. Le Ciel vous deuoit estre plus fauorable en l'election que vous auez faite d'vne personne qui sera le sujet de vostre perte, si vous n'y prenez garde. Enfin pour vous le dire en vn mot i'ay pris Cilandre, sur vn aduis qu'on m'a donné. A peine a-il comparu deuant moy, qu'il s'est jeté à genoux, m'a conté l'histoire de vos amours, & m'a appris que vous auez fait tuër vostre mary, par des hommes que vous auez pratiquez pour en faire l'execution. Vous sçauiez ce qui est du deuoir de ma charge Je seray contrainct de me saisir de vostre personne, & de vous mener dans vn lieu d'ou l'on ne sort pas en telles preuentions, quand on veur. Songés doncques, vous dis ie encore à vos affaires, pendant qu'on y peut apporter du remede. Lors que le mal se sera rendu incurable, il ne sera pas temps de recourir au Medecin.

Comme les neiges & les torrens glacez se fondent soudainement aux vents tiedes du Midy, ainsi le cœur de Calamite obstiné en sa dissimulation, commença de s'ouurir & de se fondre si tost que le Lieutenant Criminel eut proferé ces dernieres paroles. Et-il possible (dit alors l'imprudente) que ce mal-heureux ayt tenu vn tel discours; Ha le meschant ! cest luy-mesme, qui non content de m'auoir

le duit par ses doctes paroles, a calché encores de m'induire de consentir à la mort de mon mary. L'ay fait tout ce que j'ay pû pour le distraire de ce dessein & il n'a jamais voulu croire aux persuasiōs que j'employois pour l'en desloigner. L'ay toujours en moy-mesme (repart le Magistrat) fait ce iugement de vous : ie n'ay jamais creu qu'une Beauté si rare fust accompagnée de tant de cruauté. Neantmoins habillez-vous Madame. Il faut que vous sousteniez à Cilandre ce que vous venez de dire, afin que vous soyez deschargée de ce crime, que l'on vous pourroit autrement imputer. Voilà comme Calamite se pait elle-mesme par ses propres paroles. Vn Greffier ecriuit cependant toute cette procedure, & les discours qu'elle auoit laschez luy seruirēt de sia de condānation. Tandis le Lieutenant Criminel, qui auoit desia posé en sentinelle des Sergens au deuant du logis de Cilandre, où il estoit pour lors, depesche vn des siens, avec commandement de le prendre, & de le mettre dans le Castel. Et au lieu de mener Calamite en son logis, ainsi qu'il luy auoit promis, il la fit pareillement enfermer dans vne prison obscure, où nous la laisserons penser à ses pechez, & à pleurer son crime detestable, & reciterons ce qu'on fit de son Adultere.

Le bruit de la mort de Corneille s'estant épan-
du par la ville, ensemble de la capture des deux coul-
pables, tout le monde crioit qu'on en deuoit faire
vne punition exemplaire. Ce mary estoit si homme
de bien, qu'il estoit aymé de chacun, & l'ingrati-
tude de cette femme se representant aux yeux du
peuple, il eust sans doute bien-toit practiqué sur elle
la Loy de Moyse, s'il l'eust eue en son pouuoir, sans
attendre

attendre qu'en Bourreau y mist la main. Cilandre est cependant ouy, & puis confronté à Calamite, qui s'estant desia auisée qu'elle auoit trop legerement parlé, vouloit se dedire de ce qu'elle auoit aduoué. Mais Cilandre d'autre part, sans attendre par la voye de la question ordinaire, ou extraordinaire d'estre forcé à confesser le delict, publia deuât tous son crime detestable : & protesta que luy sul auoit premedité, & executé, & que Calamite n'en estoit aucunement coupable : si bien que c'estoit sur luy que la Iustice deuoit exercer sa rigueur, & qu'elle deuoit estre eslargie. Comme cette femme l'ouyt parler de la sorte, & autrement que le Lieuteuant Criminel ne luy auoit figuré; alors cognoissant qu'elle auoit esté surprise, elle se mit à l'interrompre, & à tenir ce langage : *Ce mal-heureux (disoit-elle) pour me sauuer, veut perdre la vie. Que l'on n'adiouste point de foy à ses paroles, elles sont toutes fausses & mensongeres. C'est moy mesme, qui ay induit deux scldats à couper la gorge à mon mary, parce qu'il me traitoit indignement. Si s'ay mal fait, c'est de moy seule que la punitiõ se doit faire non de ce ieune homme, qui pousé de quelque bien vueil lance qu'il me porte, ne se soucie de perdre l'honneur, la vie, & son ame propre, en auõnant vn crime que i'ay commis.* Elle vouloit poursuiure : mais elle estoit pareillement interrompuë de son Amoureux, qui supplioit les Iuges de ne vouloir point auoir egard à vne femme priuée de bon sens : *Que l'alteration de son ame pouuoit clairement patoistre à son visage ? Et puis (disoit-il) l'apprehension de se voir icy deuant des Iuges, rencontrât vn cerueau leger n'est que trop capable pour luy broüiller la ceruelle.*

Jamais Oreste & Pilade, ne souhaitterent avec

tant de passion de mourir, pourueu que chacun peust sauuer la vie à son amy, que ces deux personnes complices. Mais la Cour de ce grand, de ce iuste, & de cét auisé Parlement, qui auoit voulu prendre la cognoissance d'un fait si extraordinaire, n'eut pas tant de peine à iuger de cette cause, qu'eust le Roy Thoas à cognoistre qui des deux estoit Oreste. Cét Auguste Senat ayant rendu plus claires que le iour toutes ces fuytes, & ces deguifemens, il condamna Cilandre à estre rompu tout vif sur vne rouë, & Calamite à estre pendue & estranglée. Iuste iustement, puis qu'il estoit raisonnable que celuy qui auoit brisé toutes les Loix Diuines & humaines, & qui non content d'abuser de la femme de son prochain, & d'aller braue à ses dépens, luy auoit encores fait perdre la vie, par la plus detestable trahison que l'on puisse imaginer, fust brisé, & rompu luy-mesme à la veüe de tant de peuple qu'il auoit scandalisé. La raison vouloit aussi que cette belle cause qui produisoit tant d'effets vilains & abominables, fust flestrée par vn infame spectacle, auant mesmes que l'air luy seruist de mouuement & qu'une corde la rendist le jouet des vents & de la pluye.

Il y eut plusieurs Grands de la Cour, qui oserent importuner sa Majesté, pour le salut de la vie de cette femme, non moins belle qu'execrable : mais nostre grand Monarque, à qui les homicides commis en trahison estoient mortellement odieux, ne voulut iamais prester l'oreille à cette grace. Ce fut à la place Maubert, où l'exécution en fut faite. Iamais on ne veid vne telle foule de toutes sortes de personnes. La beauré de Calamite, & la curiosité de voir quelle fin cette Belle tesmoigneroit, y attiroit tout le monde

Toute

Toute la place estoit pleine de gens. Mille échaffaux en estoient réplis, & les fenestres & les couuertures des maisons n'estoient pas capables de contenir tant de personnes. Les deux Criminels furent menez dans vne mesme charrette, l'un d'un costé, & l'autre de l'autre. Calamite fut la premiere qui fut trainée au supplice. Les regrets que faisoit retentir cette folle eussent esté capables d'esmouuoir les Ours, les Lyons, & les Tigres, & d'arrester de pitié la course du Soleil, s'ils eussent esté employez pour vne iuste cause. Je les inferois icy, s'ils meritoient d'y estre: Mais puis que toutes ses plaintes n'estoient fondée que sur la folie de ses amours, que j'accuse, & que je ne deffends pas, ie les passe sous silence. Lors qu'elle eut finy miserablemēt ses iours par vne infame licol, son Amoureux monta sur le Theatre, où il fit paroistre beaucoup de contrition & de repentance. Apres auoir esté brisé bras & iambes, on le laissa viure tout ce qui restoit de iour, & sur la minuit on l'estrangla. Or comme il y a des esprits d'estrange humeur, & des hommes qui se plaisent à flatter le vice, & faire honte à la vertu, il y eut quelqu'un qui fit à la verité de beaux vers: mais neātmoins indignes de voir la lumiere du iour, puis qu'ils sont composez à la louange de ces 2. cruels Adulteres, & à la gloire de leurs amours abominables. Vn autre y fit responce, & parce qu'ils sont assez bons, & remplis de pieté, j'ay iugé qu'il estoit fort à propos de les donner à la posterité

* *

Y s L A

LA CALAMITE DE
Calamite.

STANCES.

CEn'est pas une Muse, ains une maquerelle,
 Qui deplore le sort des funestes Amans.
 Dont les crimes punis par une main bourrelle,
 Ont bien plus merité que receu de tourmens.
 Il ne suffisoit pas à ces ames perfides,
 De violer d'Hymen le serment & le liêt,
 Si pour gagner encor le tiltre d'homicides,
 Elles n'eussent comblé d'un meurtre ce deliêt.
 Mal-heureux nostre siecle, où les diables sont Anges
 Falloit-il que le vice en vertu se tournast,
 Les falloit-il nommer par excès de loüanges,
 Martyrs de l'Adultere, & de l'assassinat ?
 Doit-on nommer d'Amour les furieuses rages,
 Qui sur tels fondemens bastissent leur bon-heur,
 Quand l'aveugle desir qui pousse leurs courages,
 Leur fait aymer la honte & irahir leur honneur ?
 Croyons plustost qu'Amour dont la sainte puissance,
 Concilia iadis les Elemens diuers,
 S'offence extremement quand il a cognoissance,
 Q'on prophane son nom, que l'on donne aux peüers,
 Que vains sont les regrets de cette beauté vaine.
 Qui mesme se flestrit auant que le cordeau
 Eust fermé le passage au vent de son haleine,
 Et que l'air luy seruißt seulement de tombeau.
 Car estant viue encor il estoit raisonnable,
 Que pour mieux expier les maux qu'elle auoit faits,
 Elle vied effacer la cause abominable,
 Qui belle produisoit tant de sales effets.
 Et celuy qui honnit la couche coningale

D'un

D'un qui iusqu'à la mort il a fait aguetter,
 Devoit estre brisé puis que fier Camb. le
 Il brisa tant de loix qu'il devoit respecter.
 Le Soleil ennuyé de prêter sa lumière,
 A des corps si pollus, s'eclipsant tristement,
 Ne vouloit redonner sa clarté coutumière,
 Que pour nous faire voir leur iuste chastiment.
 Toy, qui pour les priser on astres les transforme,
 Engouffre-les plustost dans le fleuve oulieux,
 Car voulant releuer leurs crimes plus enormes,
 Tu es vas entraînant au supplice odieux;
 Et souhaite en ton cœur qu'en son trosne supreme,
 Le Iuge Souuerain des vivans, & des morts,
 En changeant sa Iustice en sa Clemence extreme:
 Traite plus doucement leur ame que leurs corps.

L'acheuons cette Histoire, lors que le bruit de la guerre remplissoit des frayeur les plus gens de bien qui apprehendoient les horreurs de nos calamitez palsees. La Sage Marie, de qui les actions ont toujours le Soleil pour tesmoin, & à qui la France est non moins obligée de sa conuersation, que sa Majesté est redeuable au Ciel qui l'a renduë la plus belle & la plus vertueuse Princeesse du monde, taschoit par toutes sortes d'accords d'esteindre les estincelles d'un si dangereux embrasement.

Toutes ces rumeurs, toutes ces allumettes de seditiō & tous ces escrits pernicious & dignes de chastimēt que l'on publoit, debaucherent ma plume, & amuserent mon esprit assez curieux de luy-mesme à lire les raisons des vns & des autres. Je croyois au commencement que le discours estoit conforme au tiltre: mais ayant veu que la plus part de ces libelles ne tendent qu'à la sedition, ie supplie celuy qui main-

tient

tient les puissances souveraines qu'il destourne de nostre chef les mal-heurs qui nous menacent : & que si ie dois continuër cec ouurage , les funestes auantures du passé m'en fournissent la matiere, & non celles qui pourroient bien tost succeder, si nous sortons des bornes que le deuoir & la raison nous ont prescrites.



L A F A V S S E T R A H I S O N

commise contre vn Marchand nommé Beliard, son innocence recognüe, sa deliurance du supplice, & la punition de l'accusateur, & des faux tesmoings.

HISTOIRE XVII.

IL est impossible qu'entre les plus barbarez peuples de la terre, on puisse treuuer, qu'il se soit iamais inuenté vne plus detestable meschance-té, ny pernicieuse trahison, que celle dont ie vais maintenant descrire les particularitez, bien qu'il fue plus seant d'en taire le recit, que de le faire voir aux mortels.

La ville de Marseille, qu'vn chacun sçait estre vne des plus riches & marchâdes du fleurissant Royaume de France, c'est la premiere & plus renommée du pays de Prouence, pour le grand trafic qu'elle fait d'ordinaire aux terres estrangeres, qui fait qu'on y treuve grande quantité de Marchands, desquels les richesses sont comme sans nombre, tant en argent,

comme

comme en marchandises qu'ils debitent par toutes les parties de la terre.

En icelle il y eut n'y a pas long-temps vn riche Marchand, nommé Iean Beliard, qui ne cedit à nul autre, tant en richesses d'argēt monnoyé, qu'en obligations & biens terriens.

Orentre ceux qui se treuuerēt estre de ses debiteurs il y eut vn ieune hōme nommé Gregoire Melue, habitāt de sainte Tulle, lequel se trouuāt en necessité d'argent, s'adressa audit Ien Beliard, qui luy fit prest de la somme de cinq cens escus, sous la caution d'vn sien Oncle nommé Esprit Vétier, habitāt de Manosque & Notaire Royal en ladicte ville, hōme de moyés & de cōmoditez, s'il y en auoit en tout le pays.

Deux ans estoient desia passez depuis le prest de cinq cens escus, sans que Beliard eust faict aucune poursuite, ny demande de son argent (qu'il n'auoit presté que pour le terme d'vn an,) lors que desirant de faire vn voyage au Leuant, il se transporta vers son principal debiteur Gregoire Melue, lequel comme amy il sollicita de luy payer ce dont il luy estoit redevable. Melue luy respondit, que pour le present il ne le pouuoit contenter: mais que s'il pouuoit prendre la peine d'aller avec luy iusques à Manosque vers son Oncle Ventier, il tascheroit de le rendre satisfait. Beliard luy accorde librement d'y aller, sans penser au mal-heur qui luy deuoit bien-tost arriuer. Mais quoy, il est impossible de fuir le mal-heur de nostre destinée, ny d'epescher ce que le Ciel a resolu. Estans arriuez à Manosque au logis de Ventier, ils furent receus avec toutes sortes de courtoisie. Et estant desia le Soleil plongé dans l'Occident, & la nuit commençant à estendre son noir manteau sur
la

la face de la terre. Beliard fut prie par Ventier de ne prendre point d'autre logis pour ceste nuit que le sien, ce qu'il luy accorda apres beaucoup d'importunité, & cependant qu'on faisoit les apprests de soupper. Ventier les mena promener dans vn beau jardin qu'il auoit au derriere de sa maison; auquel estant arriuez, Melue recita à son Oncle le suiet de son voyage, & que Beliard n'estoit venu avec luy pour autre suiet, que pour receuoir la somme dont il luy estoit caution.

Ventier auquel on ne pouuoit faire plus grand déplaixir que luy demâder d'argêt. respondit qu'il n'auoit moyen de contenter ledict Beliard pour lors; mais que s'il le vouloit croire, il treuueroit vn bon expedient pour se faire bailier encore du terme, & que s'il ne le vouloit faire, il auoit moyen de l'en faire repentir. Le miserable dès lors commença à inuenter la plus horrible & inouye metchanceté dont les Histoires ayent iamais faict mention. Apres qu'il eurent faict leur complot, ils s'en retournerent treuuer leur homme qui les attendoit en se promenant le long du iardin, & apres s'estre exultez de l'auoir tant faict attredre, ils reprindrent le chemin du logis, où ayans treuue le souppé prest, se mirent à table; & entre plusieurs discours qu'ils tindrent, ils se dellecterent plus à raconter des voyages que ledit Beliard auoit faict aux terres estrangeres. Apres le souppé, Ventier dit à Beliard qu'il scauoit bien le suiet de son voyage, lequel il auoit appris de son Neveu; estant bien marry que pour l'heure, il n'auoit la commodité de le rendre content; qu'il le supplioit d'attendre encor vn peu de temps, & que cependant il trouueroit le moyen de le rendre satisfait, le supplia que
pour

pour vne petite somme, il ne fist desplaisir à son Neveu, ny à luy, s'il ne s'en vouloit repentir. Beliard entendant ce discours bien esloigné de son attente, voyant qu'on le menaçoit en demandant son biau, luy respondit comme en colere, que ce n'estoit pas ainsi qu'il le falloit remercier apres leur auoir fait du plaisir, & qu'il n'estoit pas resolu de s'en retourner sans auoir argent, & que pour leurs menaces il ne s'en formalisoit pas beaucoup.

Ce fut alors que Ventier prit entiere resolution de faire voir à qui il auoit affaire, & dissimulant ce qu'il en pensoit, luy donna le bon soir, luy disant que lendemain il feroit moyen de le rendre content. Cependant que Beliard se retire dans sa chambre, sans songer au desieuner qu'on luy apprestoit, la nuit Ventier en presence de son Neveu & de ses deux fils qu'il faisoit tesmoins de sa meschance-
té, commence de penser le moyen, comment ils pourroient mettre leur homme entre les mains de la Iustice pour luy faire cognoistre à quelles gens il auoit affaire, ils prennent ensemble plusieurs resolutions sans qu'ils en pussent treuuer aucune plus propre à leur damnable entreprise, que celle qui machinerent sur l'heure, qui fut que le lendemain sur les huit heures du matin, Vétier luy feroit accroire qu'il auoit treuvé vn homme qui luy auoit promis de luy prester les cinq cens escus dont son Neveu luy estoit redevable, & par ce moyé il le meneroit en vne maison de la ville, où il accosteroit trois ou quatre tesmoins qui soustiédroient audit Beliard, qu'il auoit proferé des paroles execrables & crimes d'impieté contre DIEU, la Vierge, & les saincts, & cōtre l'autorité du Roy, qu'au mesme instant l'ayant mis en-
tre

tre les mains de la Iustice, il se porteroit pour partie, comme zelé & affectionné au seruice de DIEU, & ialoux de son honneur & de celui de son Roy, & scandalisé de l'horreur d'un tel blasme, estant asseuré que la Iustice ne manqueroit d'en faire vne punition exemplaire, & que le moins qu'ils pouuoient auoir de recompence seroit la moitié du bien de l'accusé, qu'ils departiroient entre eux par égale portion.

Impie & plus que detestable trahison! O monstres d'Enfer! ô furies infernales! comment osez vous faire un tel complot deuant la face de DIEU, qui ne laisse aucune meschanceté impunie, & qui veille tousiours pour la conseruation de l'innocent? Est-il possible que la terre puisse suporter de si detestables cloaques de meschancetez, sans les engloutir au plus profond de ses entrailles.

En quelle Histoire a t'on iamais leu vne plus perverse & diabolique tromperie que celle dont s'aduise encores Iudas d'obstination; Quel peuple, fust-il le plus barbare de la terre, ayant entendu le récit d'une Histoire si lamentable n'en aura horreur, & ne blâmera la misere de nostre siecle. Pleust à DIEU, qu'une telle aduanture fust arriuée en quelque pays ou Royaume estrange, ou les hommes ignorent la cognoissance de DIEU, ou en quelque climat esloigné de nous, à fin que i'eusse plus de sujet d'en d'escrite les particularitez sans y espargner le labeur ny la peine: mais puis que c'est le France qui a engendré & produict de tels monstres, que c'est en icelle qu'une si pitoyable Histoire est arriuée, ie me contenteray d'en escrire au bref la verité, pour seruir d'exemple à la posterité du iugement de DIEU, & de la grandeur de sa misericorde enuers ceux qui esperent en sa bonté.

Après

Après que ce barbare , plus cruel & sanguinaire que les Canibales, ou Antropophages eut proposé le sujet de sa trahison , & que les coadiuteurs de sa meschanceté en eurent dit leurs aduis , ils n'eurent pas grand peine d'en treuver , puis que Ventier en auoit de tous faits & dressez à tels badinages, aussi n'estoit-ce pas la premiere trahison que ce miserable instrument de Sathan auoit mis en pratique, ainsi que luy mesme declara, estât prest de receuoir le digne chastiment de ses meschancetez.

Ceux desquels il fit eslection pour luy seruir de faux tesmôigs, furent Pierre Lardayret Notaire Royal, Pierre Bremôd Practicien, Jean Odul aussi Practicien, & Jean Roland vigneron, lesquels il enuoya querir par vn de ces deux fils , & cependant il les attendoit en vne chambre basse du logis, où personne ne les attendoit en vne chambre basse du logis, où personne ne les pouuoit entendre , ny apperceuoir. Et afin qu'ils ne fussent apperceus de personne il les fit entrer par derriere de la maison , où nul ne passoit. Estans arriuez dans la chambre où il les attendoit. Après leur auoir donné le bon soir, il leur dit: Que s'ils vouloient croire son conseil, il auoit treuvé vne bonne occasion pour se faire tous riches: mais que c'estoit vne affaire en laquelle il se falloit gouuerner sagement , afin de n'estre descouverts: & que s'il luy vouloient promettre de faire ce qu'il leur diroit, il leur descouuriroit son entreprise. Eux qui ne demandoient autre chose que quelque sujet pour mettre en pratique leur ordinaire malice, luy respondirent d'un commun consentement que ce n'estoit pas la premiere fois qu'il leur auoit descouvert ses secrets, & s'estoit seruy d'eux pour l'execu-

tion de ses desseins, & que maintenant il ne donnât de leur raconter tout son affaire, luy promettant au reste d'employer tout leur pouuoir pour le rendre content. Luy se voyant assuré de leur bonne volonté, leur descourut premierement comme Beliard estoit venu en sa maison pour receuoir vne certaine somme d'argent, dont il luy auoit respondu pour son nepueu là present, & que l'ayant supplié d'attendre encores vn peu, il n'en auoit rien voulu faire disant qu'il y auoit assez long-temps, & que meisme le terme entr'eux contenu estoit échu depuis vn an. Apres il leur recita de poinct en poinct toute la trahison qu'il auoit conclud contre luy, ses richesses, & le grâd profit qu'ils pourroient faire, s'ils venoient au dessus de leur entreprise, & pour leur bailler meilleur courage leur fit promesse de leur donner à chacun la somme de dix escus qu'il vouloit aduancer de ses propres deniers. Iamais les Syrenes que les Poëtes feignent faire leur demeurance au destroit de la mer Elefpontique, ne charmerent si bien les oreilles des mariniers, que la seule promesse de gagner de l'argent charma celles de ces miserables, qui ayans entendu ce qu'il leur falloit faire pour l'exécution de leur entreprise, & receu chacun dans vn papier l'instruction comme il se falloit gouverner tant en leur depolition qu'en tout le reste de l'affaire, afin de se conduire si couuertement, que personne se doutast de leur trahison.

Apres leur auoir recommandé le silence, & de n'en dire mot à personne, il ht sortir par le mesme lieu qu'ils estoient entrez iusques au lendemain sur les sept heures du matin qu'il leur bailla pour assignation de le venir trouuer dans son logis, & de se gouverner

uerner selon le billet qu'un chacun auoit receu en particulier, le lendemain ils ne manquerent de venir à son logis, où ils le trouuerent parlât avec Beliard; le traistre les ayant apperceu, faisant semblant de ne sçauoir rien de leur venue, s'enquit d'eux quel bon vent les conduisoit là si matin: Lardayret luy respondit que c'estoit Pierre Bremond, & Jean Hodoul qui auoient ce matin fait eschange de terre ensemble, & qu'il y auoit vn escu de bon, & n'estoient venus la pour autre suiet que pour le coniuier d'en aller manger sa part; qu'ils faisoient apprestet le d'jeuner en la maison de Ianne Perronet. Le traistre Iudas voyant vn si bon commencement en la conspiration leur dit, qu'il ne le refusoit pas, qu'il semissent deuant, & qu'il y ieroit aussi tost comme eux avec Monsieur Beliard que voila, dit-il alors à eux qui l'auoient conuié) qui nous fera l'honneur d'estre de la partie. Si-tost qu'ils furent sortis, Ventler pria ledit Beliard de luy faire l'honneur de l'accompagner. & quapres auoir desuiné, il ne faudroit à le contenter, pour ne luy faire retarder son voyage. Par ces belles paroles, ce mal-heureux d'issimulé conduisoit ce pauvre Agneau à la boucherie, sans qu'il se doutat nullemēt d'une telle trahison. Estās arriuez au logis où les autres les attédoient, ils trouuerent que tout estoit prest, & qu'on n'attendoit plus que leur venue. Lardayret leur vint au deuant leur disant qu'ils estoient les bien venus, & leurs ayant fait poser les manteaux, & lauer les mains, ils s'assirent à table. Et à fin qu'il n'y eust personne dans le logis qui leur empeschast de paracheuer le complot qu'ils auoient commencé. Bremond enuoya la maistresse de la maison pour querir vne bouteille de vin.

à son logis, disant que c'estoit le meilleur qui fut en toute la ville. Et lors qu'ils virent que persone ne pouuoit descouurir leur impie meschanceté, s'estant fait vn signe qui leur deuoit seruir de mort pour se saisir de Beliard, & luy imposer des faux crimes. Apres le mort, ils se iettent d'un coup sur le pauvre innocent. L'un l'appellât blasphemateur execrable. L'autre Antechrist, ainsi chacun luy disant sa rabelée, ils le lierent, comme si c'eust esté quelque voleur, sans qu'aucunes de ses excuses luy peussent seruir de iustificacion. Le pauvre affligé se voyant reduit en telle extremité, & ne trouuant aucune douceur entre ces barbares, tournant sa parole vers Ventier, qui faisant l'estonné, ne s'estoit encor levé de sa place, auquel il dit : Et quoy Monsieur, permettez vous que ces gens icy me traittent si rudement en vostre compagnie, mesme voyant que c'est vne trahison faite exprés, & de laquelle ie ne suis nullement coupable, le maudit desloyal luy respondit, tirant vn triste soupir de l'estomach : Et qui eust iamais pensé (dir-il) Monsieur Beliard, que de la bouche d'un si homme de bien, comme vous auez tousiours esté estimé, fussent sorties des paroles si impies & execrables que celles que vous venez tout presentement de proferer. I'en tremble, & ne peux croire ce que ie viens d'entendre. Si c'estoit autre crime que celuy dont vous estes coupable, ie rascherois de vous secourir selon mon possible : mais si ie m'employois pour vous en vne affaire si digne de punitiõ, ie craindrois que Dieu ne m'en punist tout le premier, pour auoir soustenu l'horreur d'une telle meschanceté. Le pauvre Beliard entendât les paroles si fausses & calomnieuses, veid bien que cestoit l'accomplissement de la menace que

Ventier

Ventier luy auoit fait le iour auparauant dans la maison , & que les cinq cens escus estoient cause de sa perte, ne trouuât aucune pitié parmy ces traistres barbares, se mit du tout entré les mains de Dieu , le le suppliât ne vouloir soustenir le droit de son innocence , puis que les hommes la vouloient conuertir en crime. Ie ne sçay si l'antiquité nous pourra produire vn acte si execrable, & digne de punition que celuy que ces partisans de Satan forgerent contre l'innocence d'vn homme , dont la vie auoit esté vrayement Chrestienne & sans reproche. Apres qu'ils l'eurent assez iniurié & mocqué , ils le conduirent en la prison de ladite ville, & au mesme instant vont faire leurs plaintes aux Iuges ordinaires du lieu , & ayans dressé leurs acufations criminelles cõtre l'accusé, les pieces du procez furēt mises entre les mains du Greffier criminel du Senechal , Ventier s'estant porté partie contre Beliard. Pendant que ces choses se passent à Manosque , le vent porte les nouuelles à Marseille d'vne si triste aduenture. Tout le monde plaint le desastre & infortune de ce pauvre homme. Quelques vns qui estoient plus iudicieux que le commun n'estoit pas , se doubterent bien que c'estoit vne fourbe pour perdre ce pauvre infortuné. Ses parens se transporterent avec diligence à Aix, obriennent vne commission pour faire conduire le prisonnier aux prisons de la Conciergerie du Palais , & deffences expressement faites à la Iustice de Manosque, de ne poursuiure en aucune façon le procez : & luy fait commandement de transporter les pieces d'iceluy entre les mains du Greffier Criminel de la Cour, vn Commissaire est député du Parlement, pour entendre la deposition des tesmoins

& de l'accusée, lequel est conduit aux prisons d'Aix sous bonne & seure garde & mis aux profonds cachots d'icelle. La Cour deputa vn autre Cômmissaire à Marseille, pour s'enquerir de la vie de l'accusé. Y estant arriué, il n'entend autres choses que plaintes lamantables que font les habitans de la ville sur la mal-heureuse infortune de leur pauvre cōcitoyé, il est contraint de s'en retourner à Aix, sans auoir pû decouurir la moindre maluerfation en la vie du prisonnier; au contraire vn chacun le tient pour vn homme de bonne vie, & qui n'auoit iamais porté aucun dommage à personne. Cependant qu'on s'enquiert de sa vie à Marseille, il est ouy & confronté avec la deposition des tesmoins, contre lesquels il ne se peut deffendre qu'avec les larmes & souspirs qui consecutiuellement les vns apres les autres sortoient en abondance de sa bouche, & de ses yeux.

La Cour considerant l'horrible impieté & heresie contenuë es paroles dont il estoit accusé, voyant que c'estoit vn crime dont les hommes, ny mesmes les Roys ne pouuoient octroyer aucune grace ny pardon, s'assemblent en robe rouge le propre iour de nostre Dame de Septembre, mil six cents dix-neuf. Chose non iamais vsitée dans aucune Cour souveraine de France: mais l'horreur d'un tel crime les incitoit d'en faire Iustice remarquable. La Cour étant assemblée, on confronte la deposition des tesmoins avec l'accusé, qui ne peut soustenir son innocence contre l'accusation de son aduersaire qui deposoit contre luy. La Cour le iugeant coupable des crimes à luy imposez; le declara par vn Arrest solennel digne veritablement de chastiment & expiation d'une telle meschanceté, pour reparation de laquelle il est
condamné

condamné à estre liuré entre les mains de l'executeur, & conduit par routes les ruës & carrefours de la ville d'Aix, & puis à l'Eglise Metropolitaine de S. Sauueur, pour y faire amende honorable, la hart au col, tenant vn flambeau ardent au poing de deux liures & là à genoux crier mercy à Dieu, au Roy, & à Iustice : & de là conduit à la place des Peres Prescheurs de la ville, ou la langue luy seroit coupée & iettée au feu : & seroit ledit Beliard ars & bruslé tout vif avec son procez, & ses cendres iettées au vent, tous les biens confisquez au Roy, desquels seroit tiré la somme de cinq cés liures applicable pour chacun des resmoins, & deux mille liures pour Esprit Ventier, tât pour les frais faits à la poursuite du procez, que pour recompence de ses peines. Quelle parité ce n'eust esté surmontée par vn tel iugement ? Quel cœur, fust-il le plus constant, dont les Histoires ayas jamais fais mention ressentant vn furieux & changeant effet de la fortune, n'eust esté contraint de s'affliger, & cōfesser l'imbecillité de la vie humaine, & le peu de suiet que nous auons de nous asseurer sur de si foibles fondemens qui sont les aises du monde; puis que comme dit le Prouerbe, pour vn plaisir mille douleurs.

L'Arrest de la mort estant conclud, prest à estre prononcé, les amis & parens presentent vne requeste à la Cour, pour auoir permission de soustenir la cause, s'offrās de faire voir son innocence, s'il plaisoit à la Cour d'octroyer leur requeste, & apres plusieurs deliberations & conclusions, la Cour leur octroya huit iours de terme, pendant lesquels il fut ordonné que les resmoings comparoistroient en personne au premier iour pour estre confrontez avec le prisō-

nier. Ses parens prenans la cause en main, poursuivirent diligemment l'assignation faicte contre les tesmoins, qui comparurent tous au iour assigné, excepté Iean Roland qui se treuva grandement incommodé de maladie, & Gregoire Melue qui craignant ce qui auind, fit dire par ses domestiques, qu'il estoit allé en quelque voyage, iusques à vingt lieues de Manosque. Cette équitable Cour, ayât estably deux Commissaires, pour entendre & auoir cognoissance des depositions & confrontations des tesmoins avec l'accusé. Ils les interrogent & oyent leurs confessions, lesquelles ils treuuent semblables à leur premiere deposition.

Ils sont confrontez deuant Beliard, qui pour toute deffence n'a autre recours qu'à celuy qui cognoit les secrets des hommes, auquel il remet l'entiere innocence de sa cause. Cependant que Beliard est prisonnier & que ses ennemis tachent de le prendre, pour le rendre la fable du monde, DIEU qui veille tousiours pour la conseruation des innocens, luy decouuroit vne voye extraordinaire pour descouurir son innocence.

I'ay dict cy-dessus comme Iean Roland estoit devenu malade, DIEU le permettant ainsi, à fin de descouurir toute la tromperie, Le malade se voyant reduict à l'article de la mort, comença d'auoir apprehension de ses pechez, & de craindre le Iugement de DIEU, deuant lequel il luy falloit bien tost rendre compte de toute sa vie, & pour descharger sa conscience, il fit venir vn Pere de l'Ordre des Carmes qui ont vn Couaent dans Manosque. Le Pere estant arriué, entre autres choses qu'il luy dict en sa confession, il declara les méchancetez qu'il auoit faussement

ment tesmoignées cōtre Beliard , & le pria qu'apres sa mort , il fist le rapport à la Cour de toute sa confession , & que cela seruiroit beaucoup pour prouuer l'innocence de l'accusé: Le Religieux luy respondit qu'il ne pouuoit descouvrir sa confession sur peine de grande punition : mais que s'il vouloit declarer tout deuant des tesmoins , cela seroit vne grande œuvre de misericorde, & que par ce moyen il se rendroit coupable deuant Dieu du sujet d'une telle trahisō. Le Notaire luy dict qu'il ne pouuoit declarer la confession deuant des tesmoins , de peur que reuenāt en conualescence ils ne tesmoignassent contre luy & ne le fissent perdre. Tout ce que ie feray (dit-il,) c'est de declarer le tout deuant vn Notaire, sans tesmoins , afin qu'apres ma mort , si tant est , que ie vienne à mourir, il puisse apres produire deuant la Cour ma confession , & par icelle tascher de sauuer vne personne innocente. Le Pere Carme entendant quelle estoit son intention , & le but où tendoit son dessein , va luy mesme aussi-tost querir vn Notaire, deuant lequel, en presence du Moine, il declara toute l'accusation qu'il auoit faicte contre l'innocent Beliard , sans rien oublier. Il leur fit vne ample confession du tout. Ce Notaire le fit signer au bas de la confession , y fait signer le Moine , & puis l'ayant bien fermée, feignant que c'estoit vn testament, met son signe au dessus du cachet , faisant signer dessous deux ou trois tesmoins, afin que leur faict fust mieux asseuré. Le Pere Carme s'en estant rendu entierement depositaire par la propre & pure volonté , & en fin par le consentement du malade promet de n'en faire iamais aucune ouuerture ny recit qu'apres la mort, qui fut bien-tost apres, au grād

contentement de ce bon Religieux, à qui il tardoit desia de paracheuer vn œuvre si bien commencée il demande congé à son Supérieur, qui luy oëtroiy, apres auoir sçeu le sujet de son voyage. Estant arriué au Conuent dudit Aix, il demande vn frere pour luy tenir compagnie & luy ayder à faire les affaires. Comme il sort du Conuent il va droit au Palais en intention de produire sa deposition deuant la Cour.

Mais ainsi qu'il entroit dedans la salle, il apperçeut l'innocent Beliard, qui venoit d'estre confronté deuant les tesmoins pour la secôde fois. Ne le reconnoissât point, il s'enquit du Procureur qui se trouua present, quel homme c'estoit qu'on conduisoit dans la prison. C'est dict le Procureur, vn nommé Beliard qu'on doit executer demain. S'il y meurt, dict le Religieux, on le fait mourir innocent. Et comment le sçavez vous, dict le Procureur qui s'estonnoit d'entendre ces paroles. Je vous le feray voir dict le Pere Garne, si vous me voulez introduire dans le lieu, où Messieurs de la Cour sont assemblez. L'autre luy dit, qu'il le seruiſt seulement, & qu'il le feroit parler à Messieurs, & de ce pas le conduit en l'auditoire où Messieurs estoient assemblez. Vn Huissier luy demanda, que c'estoit qu'il demendoit là, [dit-il] à descourir deuant Messieurs, la plus grande & la plus inouïye trahison que iamais la malice aye inuëtée parmi les mortels, & là dessus il bailla à l'huissier la declaration de Jean Roland, laquelle il presenta à vn des Conseillers qui l'ouurit, l'ayant communiqué à la Cour, la lecture de la deposition estant faicte, la Cour interroga le Moyne, qui de courir toute la trahison que Jean Roland luy auoit faicte,

&c

& de plus la grande priere qu'il luy auoit faite d'en aduertir la Cour apres sa mort. La Cour oyant le recit d'une telle melchanceré fait attester prisonnier Ventier avec ses complices dans la Conciergerie du Palais. Bremond & Hodoul sont appliquez à la question pour tirer la verité de leur bouche. Hodoul sans vouloir aucunement souffrir la torture confesse le tout, & estant confronté à Bremon Lardayret & Ventier, leur soustient que son dire estoit veritable, & que leur deposition estoit fausse & controuuée pour ruiner ce pauvre Beliard, qui estant ouy sur la deposition de Jean Hodoul, di& la mesme chose que luy, sur la fausseté de son accusatiō. On enuoya querir le Notaire à Manosque, qui auoit escrit la deposition de Jean Roland, qui confessa le tout estre ainsi que le pere auoit raporté. La Cour considerant l'horrible melchanceré des faux tesmoins à l'encōtre dudict Beliard, bailla 4. Arrests differents sur le même suiet. Le premier fut en faueur de Beliard, qui fut déclaré innocent des crimes à luy imposez, & mis hors de Cour & de procez sans despens. Le second fut contre Ventier, lequel fut condamné à la même punition, qu'auoit esté auparauant l'innocent Beliard, son bien confisqué au Roy, reseruée la somme de dix mil liures applicables audict Beliard. Lors qu'il fut prest d'auoir la langue couppée, il pria la Cour de luy permettre de faire vn bref discours des melchanceres qu'il auoit commises durant sa vie, & par le moyen desquelles il auoit acquis si grand nombre de richesses, que son bien valoit plus de cinquante mil escus.

Le troisieme Arrest fut baillé contre les faux tesmoins. Les deux qui n'auoient voulu recognoistre leur

leur faute, furent rouë tout vit, & Jean Hodoul qui s'estoit recogneu, & confessé le tout, fut pendu & estranglé.

Le quatriëme Arrest fut prononcé contre Gregoire Melue absent, lequel fut condamné d'estre rouë en effigie dans la ville de sainte Tulle, & cõtre les deux fils de Ventier. L'aîné fut pour tousiours banny du pays de Prouence. Et le puîné fut absous & déclaré entierement inculpable, à cause de sa ieunesse. Admirables effects de la diuine iustice, laquelle descouure les plus occultes & plus cachées trahisons qui se commettent parmy les mortels, comme les actions de cette Tragedie nous le demontrent par la iuste & équitable punition de ces traistres concitoyens de Sathan.

Voilà la fin tragique de cette Histoire, que ma plume vacillante vous a descrite, digne veritablemēt d'estre mise au nōbre des prodiges de ce temps, puis que ses moindres parties sont prodigieuses & émerueillables, pour l'horreur d'une telle & si detestable meschanceté.

DIEU veuille par sa sainte grace, priuer la France de tels monstres de malice & d'impicté, & en faire perdre la souuenance dans le fleuue d'oubly, faisant que iamais semblables Canibales ne naissent en la France. En fin par le recit de cette Histoire tragique, ie prie Dieu que les meschans en puissent faire leur profit & se recognoistre, afin de venir à amandemēt, voyāt de si émerueillables effects de la puissance Diuine, à laquelle nous ne sçaurions trop rendre de graces & de louanges.



*DES GRANDES VOLERIES ET
subtilitez de Guillery, & de sa fin
lamentable.*

HISTOIRE XIX.

Villey estoit natif de là basse Bretagne, yssu de noble race. Son premier exercice d'enfance fut à l'estude des lettres, où il profita si bien qu'il se fit admirer d'un chacun pour la gentillesse de son esprit. Son Pere l'ayât enuoyé à Rhenes pour paracheuer le cours de ses estudes, ayant attein le dix huitiesme an de son aage, il se rendit si redouté parmy les Escholiers qui sont en grand nombre dans cette ville, qu'il n'y auoit nul qui ne craignoit & redoutast grandemēt de luy faire desplaisir. Quand il se faisoit quelque meurtre ou batterie la nuict par la Ville tout le monde l'en accusoit, disant qu'autre queluy ne l'auoit cōmis, puis qu'il n'y audit aucune compagnie pernicieuse en laquelle il n'eust toujours le premier rang.

Son Pere estant aduerty de ses deportemens par quelques vns de ses amis qui tenoient l'œil sur ses actions, luy escriuit vne lettre, par laquelle il l'exortoit de chāger de vie, ou autrement qu'il luy baille-
roit sujet de le desauouer & de ne le tenir plus pour son fils. Cette lettre luy fut portée par vn de ses parens, qui auoit charge de son Pere de luy faire des reprimandes de bouche, & de luy escrire souuent de ses nouuelles.

Dès

Dés qu'il eut receu cette lettre , & qu'il eut cognéu que son pere estoit informé de sa vie , au lieu de se corriger & viure plus sagement à l'aduenir pour bailler quelque consolation à celuy qui l'auoit mis au monde, il se corrompoit tous les iours de plus en plus, se mocquant de ceux qui luy faisoient quelque remonstrance , & qui luy conseilloyent de prendre de la part de son pere, vn autre train de vie , leur disant qu'il estoit assez sage pour se gouuerner , sans qu'il se mélasse de ses actions ; son courage luy faisant proferer ces paroles & plusieurs autres qu'il disoit en se mocquant de son pere, & de ceux qui ne procuroient que son bien.

En ce temps nostre grand Henry , d'heure memoire, s'estant resolu d'auoir raison du rort que luy faisoit le Duc de Sauoye luy detenant son pays , auoit fait leuer vne belle armée en plusieurs endroits de son Royaume, qu'il vouloit mener en Sauoye. Le ieune Guillery en ayant eu le vent quitte ses estudes , & s'enroole pour simple soldat en vne compagnie, qui bien tost apres le rendit à l'armée , où il signala son courage en plusieurs rencontres qui se firent sur l'ennemy , desquelles il sortoit tousiours chargé de palmes & de lauriers qu'il acqueroit au prix de son sang.

Son courage luy ayant acquis le commandement d'vne compagnie, il s'en acquitra avec tant de generosité, qu'vn chacun l'admiroit , le iugeoit deuoir estre vn iour quelque chose de grand.

L'accord & traité de paix estant faict entre le Roy, & le Duc de Sauoye, l'armée fut cōgediée avec cōmandement à vn chacun de se retirer en sa maison. Guillery voyant que la paix luy empeschoit l'exercice

xercice des arm^s, & de s'entretenir parmy les grâds, pour le peu de revenu qu'il auoit, ayant vn tour assemblé vne quinzaine des plus reſolu^s, & mauuais garçons qui faisoient à la compagnie, l'un remonstre comme la paix leur empeschoit de faire leur profit, & que par ainsi ils seroient tous contrains de faire eslection de quelque autre experience pour gagner leur miserable vie.

Ces soldats qui ne demandoient autre chose, que d'estre employez en quelque entreprise, luy demanderent quel dessein il auoit, qui luy fist tenir ce langage, & que s'il y auoit quelque chose à gagner, il s'assurast qu'ils ne luy manqueroient iamais: Guillery leur respondit, que son dessein estoit de ne porter point les armes, & que plustost il se rendroit en quelque Forest pour destroussier les Passans, & par ce moyen acquerir de quoy s'entretenir le reste de la vie. Ses compagnons à qui on ne pouuoit faire plus grand plaisir que de leur parler de quelque gain, s'offrirent de le suiure par tout où il voudroit, sans le laisser iamais iusques à la mort, & luy ayant tous iurez foy & fidelité, ils commencerent à destroussier, & voler tous ceux qui par infortune se rencontrerent deuant eux en leur chemin.

Sa retraicte fust en Xaintonge & pays circouoissins, où il n'eust long-temps exercé son mestier de pillage, que les nouvelles en furent espanuës par toute la France. Plusieurs qui l'auoient cogneu aux guerres dernieres, s'estoient d'un tel changemé, voyans que de braue Capitaine il s'estoit rendu miserable voleur. Son pere estant aduertey qu'il menoit vne vie si mal-heureuse en mourut de tristesse dans peu de iours, ne l'aisant qu'un autre fils agé de dix-neuf

neuf ans, qui apres la mort de son pere, se vint retirer avec son frere, où il apprint la vie de guetteur de chemins.

Si ie voulois entreprendre de descrire toutes les meschancetez qu'il fit pendât neuf ou dix ans qu'il exerçavne si detestable vie, il me faudroit en faire vn gros volume, au lieu que ie me suis proposé de n'en dresser qu'un petit dilcours. Je me cōtenteray donc de reciter brièfucmēt les plus remarquables suptilitez qu'il a executé, pendant qu'il a exercé la vie de voleur.

Vn iour qu'il se promenoit dans le grand chemin qui va de Nior à la Rochelle, il rencontra vn payfant qui s'en alloit pour plaider à vn Seneschal qui est estably dans ladite ville. Guillery l'ayant accosté, luy demanda où il alloit. L'autre luy respondit qu'il alloit à la Rochelle. Et bien (dit-il) nous irons donc de compagnie: car ie m'y en vay aussi, cheminant il s'enquist du payfant, quels affaires le menoiēt à la Rochelle. L'autre luy respōdit que c'estoit pour playder, vous avez donc de l'argēt, repart Guillery. L'autre luy respōd, qu'il n'en auoit pōit. Guillery luy dict qu'ils estoient donc bien ensemble, puis que l'un ny l'autre n'en auoit. Mais sçauiez vous que nous ferons ? dit le larron qui se doutoit bien qu'il n'estoit pas sans argēt, & que voulez vous que nous fassions ? dit le payfant. C'est qu'il faut prier DIEU (dit il) afin qu'il nous en enuoye, & aussi-tost il se met à genoux, disant au payfant qu'il fist comme luy. Ce que le pauvre Diable fit avec beaucoup de regret, se doutant bien qu'il ne sortiroit pas d'entre les mains de ce Loup d'avarice, sās y laisser vne partie-de-la peau. Pour le faire court, ils se mettēt trois
ou

ou quatre fois à genoux, sans que Dieu eust enuoyé aucun argent au pauvre payfant, qui ne priois Dieu pour autre suiet, sinon qu'il luy oistat ce diable de sa presence. Guillery au cōtraire toutes les fois qu'il se fouilloit, treuuoit que Dieu luy enuoyoit tousiours quelque chose. La premiere fois cinq sols; la seconde dix sols, & la troisieme vn escu, qu'il partissoit en deux, & en bailloit la moitié au payfan, & luy dict qu'il regardast en sa pochette, pour voir s'il n'en auoit point dauārage, ce que le pauvre hōme ne voulut faire, disant qu'il estoit cōtent de ce qu'il s'estoit trouué. Il faut donc que ie regarde sur vous, dit Guillery, pour voir si Dieu ne vous en a point enuoyé aussi bien qu'à moy, & là dessus il le fouille par tout iusques à ce qu'il luy eust trouué sa bourse, où il y auoit cent cinquante escus d'or., qu'il mit en deux parts, baillant l'vne au payfant, & retenant l'autre pour soy, luy disant:prenez la moitié de ce que Dieu vous a enuoyé. Je cognois qu'il vous aime bien, puis qu'il vous enuoye tant d'argent à la fois, & ainsi il prit congé du pauvre desolé qui fut bien aise d'estre sorry à si bon marché d'entre les mains.

Vne autre fois qu'il se pourmenoit dās le bois de la Chasteniere, où il faisoit ordinairement sa retraite avec ses camarades, il rencontre vn Messager de Monsieur de la Rocheboisseau, Preuost de Niort, qu'il enuoyoit à la Rochelle de vers le grand Preuost de la ville pour le supplier de l'aller treuuer en vn sien Chasteau à six lieuës de la Rochelle, pour aller bailler la chasse à Guillery, qui estoit assenrement dans le bois mesme de la Chasteniere, tout ainsi qu'ils auoit esté certifié par des gens qui l'auoient veu. Guillery ayant prie ledit Messager, & luy ayant fait

confesser le ſuiect de ſon voyage, prend luy-meſme ſes lettres, ſe déguiſe en habit de Meſſager, & ſ'en va à la Rochelle porter le paquet au Preuoſt, qui l'ayant receu, & leu la lettre qui eſtoit dedans, monte tout auſſi-toſt à cheual avec dix ou douze de ſes Archers, & ſe met en chemin avec le Meſſager, qui les deuoit conduire au lieu de l'aſſignation. Or faut-il entendre qu'auparauent que Guillery ſe mit en chemin pour aller à la Rochelle, il auoit baillé charge à ſes hommes de ſ'embuſcher & cacher dans le bois tous armez, & que auſſi-toſt qu'ils le verroyent venir avec le Preuoſt, qu'ils ſortiſſent de leur embuſche, & l'enfermaſſēt ſi bien, qu'ils n'euſt moyen de ſe ſauuer, ny pas vn de ſes gens, ſans toutesfois les offencer aucunement. Comme il auoit pourpenſé il luy arriua: car ayant conduit le Preuoſt avec ſes Archers au plus eſpais du bois, en vn ſentier où ils ne ſe pouuoient deffendre. Ses gens ſortirent ſi à l'improuiſte qu'ils n'eurēt le moyen de mettre la main à l'épée, ny à la carabine pour ſe deffendre. Auſſi-toſt qu'ils les eurēt ſaiſis, Guillery les fit dépouiller de leurs caſaques, & fit veſtir autant de ſes hommes, attachans ces pauvres preneurs qui s'eſtoient laiſſez prendre, à des arbres ſans leur faire aucun mal, & eſtants montez ſur les cheuaux de leurs priſonniers, Guillery ſe reſolut d'attraper auſſi le Preuoſt de Niort: mais auāt qu'exercer ſon deſſein il ſe trāſporte en vn Chateau à deuy lieues de là, qu'il ſçauoit eſtre plein de richeſſe, que par pluſieurs fois il auoit taſché de dérober, ſas en eſtre iamais venu à bout, à cauſe que ceux de dedans faiſoient trop bonne garde ſur luy. Yeſtant arriué avec les gēs, on luy ouurit incontīnāt les portes,

tes,

tes, croyant que ce fut le Pouost, à cause des casques que les gens auoient vestuës. Entrez qu'ils furent, n'y trouuans que les seruiteurs, ils prindrent ce qui leur agreoit le plus sans que personne osast leur faire quelque empeschement, & apres s'estre chargez de meubles & d'argent, ils abandonnerent le Chasteau, & porterent leur prise où ils estoient accoustumez de cacher leurs voleries, & de là allerent où Rocheboisseau les attendoit. Y estant arriuez, ils ne voulurent mettre pied à terre, de peur d'estre recogneus, mais dirent au Preuost, qu'il se hastast de monter à cheual, à fin d'aller surprendre Guillery, qui pour lors estoit dans vne maison à l'ysuë du bois de la Chasteniere avec deux ou trois de ses hommes. Ils montent à cheual, & vont de compagnie au lieu où le Preuost de la Rochelle estoit attaché, & gardé par neuf ou dix voleurs. Ils n'y furēt pas plustost arriuez, que Guillery & ses gens leur metrent la main sur le collet, ne leur donnans loisir de se deffendre. Estans pris, ils furēt liez à la mesme sorte que les autres. Pensez de quel estonnement furent saisis ces miserables prisonniers, qui pensoient attraper celuy qui les attrapa. Iamais homme ne fut plus saisi d'estonnement qu'ils estoient, ne scachans comme eschapper des mains de ce voleur.

Guillery apres les auoir bien mocquez, les fit détacher, leur faisant rendre tout ce qui leur appartenoit, sās leur retenir aucune chose, & ainsi les réuolent disant qu'ils se gardassent vne autre fois de ses mains: que s'il y retournoient ils n'en sortiroient pas à si bon compte, comme ils auoient fait.

Vne autre fois habillé en Hermite, il rencontre le Preuost de Foutenay, qui s'en alloit à la Rocheile

Après qu'il leut salué, il le pria de luy faire vn plaisir. Et quel plaisir voulez-vous que ie vous fasse, dit le Preuost? C'est, dit l'Hermite, d'aller prendre Guillery, qui est à vn quart de lieuë d'icy, en vne maison où il dîne avec trois ou quatre de ses hommes. Et comment le sçavez-vous; luy dit le Preuost. Comment ie le sçay, dit l'Hermite; Parce qu'il m'a pris deux pistoles, ainsi que ie m'estois arresté pour dîner dans le logis mesme où ie crois qu'il est à présent.

Le Preuost qui croyoit desia tenir Guillery entre ses mains, le prie de le conduire où il estoit. Ce que l'Hermite fit, l'abusant si bien avec ses paroles, qu'il l'enferma au lieu où ses gens l'attendoient, qui mirent aussi tost les mains sur le Preuost & sur ses gés & leur ayans dépouillez leurs casques, les renuoyerent de la sorte, sans leur faire aucun dommage ny déplaisir.

Or comme la fortune luy auoit tousiours montré bon visage, elle luy voulut faire voir vn tour de son accoustumée influence. Or vous avez entendu les affronts qu'il auoit faitz aux Preuosts de la Rochelle, & de Niort, & iceux cherchans l'occasion de se venger de luy, & sçachans le lieu où il estoit avec dix ou douze de ses gens, le vindrent surprendre, enuironnat la maison de telle sorte avec l'ayde des gens qu'ils auoient menez avec eux, qu'il estoit impossible que ny Guillery ny ses gens se peussent sauuer sans vn euident peril de leur vie. Mais Guillery qui ignoroit quelle chose c'estoit que de la peur, ayant exhorté les gens à la deffée, sortit le premier monté sur vn cheual, le pistolet en main, faulxât genereusement la presse des ennemis, se sauua sans aucun

cun danger de la personne. Deux ou trois des hommes qui estoient d'un courage plus genereux que les autres sont pris avec son frere, duquel le cheual fut rüé entre ses iambes, & menez à Xainctes, où ils furent rompus sur vne rouë, son frere fut rompu tout vif, la teste, les membres mis en plusieurs lieux de passage, pour seruir d'exemple aux autres.

Guillery aduertty de la mort de son frere, ses plaintes commencement à sortir du plus profond de son estomach, & eussent esté capable demouruoir vn Tigre à pitié, il se fust donné la mort de ses mains, sans le confort de ses gens. Il detestoit le Ciel, & maudissoit son malheur. Dés-lors sa conscience commença de luy ronger le cœur, luy representant qu'il luy faudroit vn iour faire vne semblable mort que son frere, s'il ne venoit à amandement de vie. Il se mit dès lors sur ses gardes, ne se mettant plus en hazard d'estre pris comme auparauant. La mort se se representoit à tout moment deuant ses yeux, & la crainte d'estre pris ne l'abandonnoit iamais. Il ne songeoit qu'au moyen de se retirer en quelque lieu incogneu, pour y passer le reste de ses iours avec la crainte de DIEU. Si ie me voulois estendre à décrire les ruses & subtilitez qu'il fit, durant qu'il menoit la vie de voleur, il faudroit vn volume entier, & non pas vn abrégé, auquel ie me suis obligé dès le commencement.

Plusieurs ont éprouuez la courtoisie. Ceux qu'il rencontroit qui n'auoient point d'argent, il les en aydoit : & aux autres qui en auoient, il leur en prenoit la moitié.

Il estoit ennemy mortel des meurtriers. Si quel-

qu'un de ses hommes auoit faict quelque meurtre, il le chastioit aigrement. Ses ruses estoient si subriles, que iamais les cauteles des plus dressez Preuosts ne furent capables de reuener aucune inuention pour le surprendre: au contraire il les surprenoit le plus souuent, & s'estant mocqué d'eux les laissoir aller. Plusieurs tiennent qu'il auoit vn esprit familier, qui le conduisoit en ses entreprises, l'en laisse le iugement à leur discretion, & me rais sur ce sujet.

Je me conreteray de ce que i'ay escrit de sa vie, afin de n'estre trop prolix. Seulement ie décriray sa fin lamétable, qu'il deuoit plustost terminer en quelque bataille où service de s^{on} Roy, à la teste de quelque genereux exercice, & non sur vne rouë pour seruir d'exemple à ses semblables. De tous ceux que Guillery auoit premierement, commençant de mener la vie de voleur, il ne luy en restoit plus que 15. ze ou seize, lesquels ayant vn iour assemblée en vn lieu ordinaire & destiné pour consulter sur leurs affaires, leur dit. Vous n'ignorez pas, mes amis, la vie que nous auons mené depuis neuf ou dix ans que nous sommes dans ces bois, & que par le moyen d'elle nous meritons vn chatiment exemplaire, qui ne nous peut fuyr, si nous continuons d'aduanage nos deportemens, puis que DIEU ne laisse aucune meschanceté impunie, bien qu'il attende souuēt le pecheur pour voir s'il se cōuertira. C'en'est pas d'aujourd'huy que nous auons veu des exemples remarquables de ses iugemens: Mon frere nous doit seruir d'exemple pour cōsiderer nos actions. Je deplore grandement le desastre de sa ieunesse. Considérez le peril où nous sommes. Le Roy est aduertty de nos mauuais deportemēs. Sa iuste fureur ne nous laisse-

ra iamaïs eſchaper, ſans punition condigne à nos mériter. Croyez-moy, nous auons aſſez de moyens pour paſſer le reſte de nos iours en quelque pays où nous ne ſoyons point cogneus, & ce faiſant, euterrons le chaſtimét qui nous menace. Ses compagnôs ſaiſis d'autât ou plus de peur que luy, firent reſponſe qu'ils eſſoiét preſts de faire tout ce qu'il voudroit. Entédant leur bonne volonté, il les remercia & leur bailla à chacun vne bonne ſomme de deniers, & les renuoya les vns d'un coſté, les aures d'un autre, n'en retenât que deux avec ſoy auſquels il ſe fioit le plus. Quant à luy, il prit ſon chemin vers Bourdeaux, deguiſé en Gentil-homme. Il paſſa outre, iuſques à ce qu'il arriua à S. Iuſtin & s'y eſtant arreſté quelques iours, il iugea qu'il ne pouuoit treuuer lieu plus cômode pour ſa retraite que cette ville, qui eſtoit aſſez eſcartée du monde, & en vn lieu des plus deſerts de Franceſſe. Il n'y eut ſeiourné longuement que toute la Nobleſſe du pays ne luy fit cognoiſſance, luy reſmoignant beaucoup d'affection pour les bonnes qualitez qui eſtoient en luy, & des rares perfections dont il eſtoit doiüé. D'autre part qu'il ſe diſoit eſtre yſſu de noble maiſon. Ce qu'on croyoit de tant plus qu'il eſtoit liberal & courtois. Tandis que la fortune luy fut favorable, il ne mâqua iamaïs de compagnie, Mais dés que la fortune cômença de luy tourner les eſpaulles il n'y eut perſonne qui s'employaſt pour luy ny qui fiſt vn pas pour ſon ſeruiſe.

Pendant qu'il ſe fait cognoiſtre par ſes liberalitez & courtoifiſes, la fortune luy preſenta vn beau party pour ſon aduâcemét. Vne ieune veſue deuint amoureuſe de luy, luy deſcouuit ſa paſſion & le pria de la viſiter ſouuent, puis que ſa preſence luy eſtoit plus

agreable que chose du mode. Lors qu'il vëid que cette vefue l'aymoit entierement, & iugeant que s'il la pouuoit espoufer, c'estoit l'asseuré moyé pour viure à son aise : mais le miserable infortuné contoit sans son hoste (comme dit le Prouerbe) car au lieu de son profit, ce fut son entière ruine. Il commença à se faire paroistre plus que iamais pour complaire à sa Maistresse, & pour mieux paruenir à son dessein , il pria quelques Gentil-hommes ses amis de parler au Pere de la vefue touchant la resolution de son mariage? ils s'employèrent si bien pour son affaire qu'il le mariage fut conclud avec la vefue, les nopces se fôr avec beaucoup de pompe & de magnificence. On n'y espargne aucuns despens ny frais pour honorer son mariage. Le voilà esleué à l'vn des plus hauts degrez de la fortune. Il se baignoit dans son aise, croyant que iamais personne ne se douteroit de luy: mais le miserable ne consideroit pas que DIEU sçauoit tous ses desseins , & penetroit au plus profond de ses secrets.


Il auoit jôuy trois ou quatre ans du doux fruit de son mariage , mais sa retraicte n'auoit pas esté si bien couuerte, que plusieurs ne fussent informez de lieu de sa demeure. Entré autres vn Marchand de Bourdeaux , à qui il auoit autresfois volé deux ou trois mille francs. Ce Marchand assure du lieu de la retraicte, presente requeste au Preuost, le supplie de prester main forte pour prendre vn voleur qui s'estoit retiré à saint Iustin , & qui l'auoit autresfois volé pres de la Rochelle. Le Preuost mesme s'y achemine avec quinze ou seize de ses Archers bié armez. Il arrive à la porte du Chateau, où Guillery faisoit sa demeure. Cestoit au mois de May sur les quatre heu-

res du matin que le iour ne commençoit qu'à poindre. Il heurte à la portée, & demande à parler au maistre du logis, qui entendât qu'on le demandoit saute du liect en chemise, & prenant vn pistolet à la main, descend au portail de la maison, l'ouure & demanda qui s'estoit qui le demandoit. Le Preuost auoit fait cacher ses homes au derriere d'une vieille muraille qui estoit ioinant la porte du Chasteau, n'estant demeuré qu'avec vn sien home, qui comme il vit que Guillery auoit ouuert la porte, s'approcha le priant de sortir: disât qu'il auoit vn mot à luy dire. Le pauvre malheureux qui ne se doutoit de la fourbe qu'o luy auoit dresé, sort hors de la porte & s'approche du Preuost, dissimulant d'auoir vne chose de consequence à luy dire, le pria de s'approcher de luy, & cependât il faict signe à ses gens de s'aduancer & de couper chemin à leur homme, à fin qu'il ne peust r'entrer au logis. Comme il se vid enfermé de tous costez, il commence à iouer des talons, droit à vn bois distant de quelques deux mille pas du Chasteau. Le Preuost qui estoit à cheual se met à le suivre à grand galop, pendant que ses gens qui s'estoient mis à pied, remontoient à cheual. Guillery pouruiuy de si près retourne & charge son pistolet si à propos qu'il donne dans la teste du cheual de celuy qui le poursuiuoit, qui cheut incontinent entre les iambes de son maistre, & par ce moyen il eut le loisir de se sauuer au bois prochain. Le Preuost se voyant sans cheual poursuit à pied, pendant que ses gens arriuerent, qui le voyans à pied, le remonterent sur vn de leurs cheuaux afin de reprédre le chemin de Bourdeaux, puis qu'ils auoient manquez leur prise. Cependant qu'ils s'en vont, Guillery se sauue

au plus espais du bois. Comme il se veid asseuré, il commença à se lamenter, Il se voyoit en chemise de nue de moyés. Il n'osoit retourner à sologis, de peur que le Preuost ne s'en fust saisy. Il ne sçait où aller. Toutes places luy sont suspectes. Il craint qu'on ne le suiue par tout. Apres qu'il eut assez tournoyé par les hayes & buissons, il se treuve en fin à l'yslué du bois, en vn lieu assez loigné des maisons & lieux habitables. Se voyant là, il ne sçauoit à quelle chose se resoudre. En fin il se ressouuint d'une cache qu'il auoit laisé dans le bois de la Chasteniére, lors qu'il en partit pour se retirer à saint Iustin. Il prend resolution d'y aller voir, si elle y estoit encores, pour s'en accommoder, & se retirer en quelque lieu hors du Royaume. Estât arriué à Bourdeaux, il s'embarqua dans vn bastéau pour passer à Blaye. Estant dans iceluy il fut recogneu par vn marchand de Xaintes, qui l'auoit autres fois veu en plusieurs lieux. Du commencement il ne pouuoit croire que ce fust Guillery, il s'approcha tout exprés de luy pour le mieux recognoistre. Estant asseuré que c'estoit son homme, il ne dit mot. Ayant pris terre à Royan, il remarqua le lieu où ledict Guillery s'alla retirer, & l'ayant veu entrer à l'Hospital il s'en alla aduertir le Preuost de la ville, qui s'y transporta incontinent pour se saisir de luy. Estant arriué, il s'enquit où estoit ce pauvre qui estoit entré depuis peu là dedans, le maistre de l'Hospital luy ayant monstré, le Preuost luy demanda d'où il venoit, Je viens (dit'il) de Bourdeaux, & où allez-vous? demanda le Preuost, ie m'en vay à la Rochelle pour chercher quelque maistre. Le Preuost luy demanda quel estat il faisoit. Guillery se voyant enquis si auant de ses affaires, dit qu'il estoit iardnier;

nier. Et biẽ, dit le Preuost, j'ay vn iardin à cultiuer. Je vous prẽds dõ. pour le gouuerner, puis que vous estes de l'estat, & ainsi il le conduisit de l'Hospital droit à la prison, & comme il passoit par vne petite ruẽ estroictẽ, voilà qu'un hõme se iette sur le iardnier disant: ha voleur! c'est maintenant que tu me rendras les quatre vingts escus que tu me prins vne fois sur le chemin de la Rochelle. Le miserable se voyant decouuert ne sçauoit quelle contenance tenir. Le Preuost s'equiert de cẽt homme, que c'estoit qu'il auoit contre cẽt estranger. C'est vn voleur (dit-il) qui m'a derobẽ autres fois quatre vingts escus. Et si vous ne le connoissez pas, ie vous assure que c'est Guillery. Ouy, dit Guillery, ie ne le peux nier, car ie vois bien que Dieu me veut chastier de mes fautes. Le Preuost oyant ces paroles, & ne demandant autre preuue, le conduit aux prisons de la ville, & de là deux iours apres à la Rochelle, où son procez estant fait, il fut rompu tout vif, pour chastiment des voleries & pilliages qu'il auoit exercez durant sa detestable vie.

Voilà la fin lamentable de ce mal-heureux, qui croit euitter les iustes iugemens de Dieu par sa fuite: mais il fallut à la fin payer ce tribut de sa méchanceté.



D'VN HOMME QVI APRES AVOIR

demeuré vingt ans aux Galeres est reconnu

par son fils ; de ce qui en aduint ;

& autres choses dignes de

remarque.

HISTOIRE XX.

IE nommeray en cette Histoire de leur propre nom les personnes dont ie vous veûx parler , contre les protestations que i'ay cy-deuant faites. Leur condition vile & abiecte m'en dispensera : au lieu que le sang illustre de ceux de qui ie traite quelques fois particulièrement , m'oblige à la discretion. Les accidents arriuez en cette aduventure si remarquables , qu'ils meritent d'estre sçeus de tout le monde. Je l'ay apprise par des tesmoins irreprochables, & suiuant leurs memoires ie l'ay,escrite en ces termes.

Il n'y a pas long-temps qu'à Paris habitoit vn homme nommé lean Vaumotin , tailleur d'habits fort renommé pour son mestier. Les plus galants de la Cour se seruoient de luy, lors qu'il estoit question de se bié habiller:& les autres tailleurs se formoient à son modele , pour contenter les bonnes maisons dont il auoient l'entrée.

Après que cét homme eut passé à la Cour quelques années en garçon, il luy prit fantasie de se marier avec Jeanne Perrot , fille d'vn autre tailleur de

la meſme ville de Paris. Ils eurent de ce mariage vn beau fils qu'ils appelerent Michel. Le pere ayant touſiours la vogue d'eſtre vn des premiers Maîtres, continuoit à trauailler, & commençoit à bien faire ſes affaires. Mais comme les meilleurs Maîtres, & principalement de cét art ne ſont pas touſiours les plus gens de bien, il arriua que cét homme fut accusé d'auoir adheré aux larcins d'vn qui fut pendu pour auoir volé de la vaiſſelle d'argent à la maiſon d'vn grand Seigneur. Et d'effect ayant eſté conuaincu par le vol, d'ot il fut treuvé faiſi, il euſt fait le ſaut auſſi bien que l'autre, ſi beaucoup de perſonnes de qualité ne ſe fuſſent employées pour luy. A leurs prieres les Iuges modererent la peine, & le condamnerét aux Galeres perpetuelles. Henry II. marioit en ce temps Marguerite de France (cette rare perle de prix, à qui les muſes demeurent eternellement obligées) avec le Duc de Sauoye. Le Roy entre autres dons conſerez en faueur de ce mariage, fit preſent au Duc d'vne Galere, qu'on équippa à Marſeille. Ce fut là que Ieã Vaumorin avec d'autres forçats fut mené & attaché. D'eſcrire les plaintes & les regrets de ſa femme, qu'il laiſſoit avec leur fils qui n'auoit que deux ans, il n'étoit pas à propos. Le recit que l'entreprene de faire en ſeroit trop long. La Galere ayant eſté conduicte iuſques à Nice, elle denteura quelque temps au pouuoir de ſon Alteſſe, iuſques à ce qu'vn Capitaine de la Marine du Roy d'Eſpagne l'acheta, & la fit voguer à Naples. Pluſieurs ans ſe paſſent, ſans que Ieanne Perrot ait nouuelles de ſon mary. Cependant ſon fils deuient grand, & comme il s'informe quelque fois de ſon Pere, elle pour couvrir leur infamie, luy fait entendre qu'il eſt mort. A meſure

sûre que ce garçon croist en aage, il tasche aussi d'apprendre quelque mestier, pour s'en servir à passer le cours de cette vie. Son inclination le porte à chäter, de sorte qu'en peu de tēps ayant formé sa voix qu'il auoit fort bonne, par le moyen de la Musique, il s'introduit en vne bōne maison. Ayr atteint l'âge de vingt-deux ans, le desir de voir les Natiōs estrāgeres, luy fit prendre l'enuie d'aller à Rome. Vne commodité s'offre, au voyage qu'un prelat y faisoit. Il se met à sa suite, & auant que partir il prend cōgé de sa mere : laquelle, pour le long temps qu'elle n'auoit ouy nouvelles de son mary, & croyant que veritablement il fust mort, s'estoit remariée à vn Escruin. Cette femme pleurāt à chaudes larmes l'embrassa mille fois, & le coniura d'un brief retour. Michel Vaumorin estant arriué à Rome, y treuua bien-tost vne honneste condition chez vn Cardinal, qui pour l'excellence de sa voix le retint à son seruice. Mais comme les François sont impatiens, & curieux de voir; il demanda congé à son Maistre quelque temps apres, & l'ayant à grande peine obtenu, ils s'en alla à Naples. Comme il eut employé quelques iours à contempler la gentillesse de la ville, il s'achemina au Port, pour y voir les Galeres, & pour s'informer par curiosité, s'il n'y auoit point de Forçats qui fussent François.

Le premier qu'il rencontra estoit vn homme tout blanc de vieillesse; qui portoit des marques de forçat: mais qui neant moins auoit plus de liberré que les autres. Si tost que Michel Vaumorin l'apperçeut, il s'approcha de luy, & le salua en ces termes: *Dieu vous gard mon Pere.* L'autre luy respondit: *Dieu vous gard Monsieur,* A ce que ie vois (dit le ieune homme)

vous

vous estes François ? le le suis vrayement (repart le vieillard) mais y a si long-temps que ie suis exilé de mon pays qu'il ne me'n souvient presque plus. Et combien de temps (poursuit l'autre) y a-il que vous estes icy ? Il a plus de vingt ans (respond il.)

Ce bon homme, proferant ces paroles; regardoit fixément Michel Vaumorin, & tiroit des soupirs du profond de son cœur : de sorte que l'autre fut contrainct de s'enquerir de luy pourquoy il souspiroit de la sorte. Ce n'est pas sans raison (dit le vieillard) si ie souspire. L'estat de ma vie presente, & le souuenir du pâsé m'en dōnent assez de sujet. mais particulièrement la mémoire d'un fils que ie laissay à Paris, d'où ie suis nay, en l'aage de deux ans, dont vous m'avez fait ramenteuoir. Il me semble de le voir, quand ie vous vois , encores qu'il fust si ieune lors que mon desastre me separa de mes plus proches. Et comment se nommoit ce fils dōt vous parlez, respond le ieune homme. Il s'apeloit Michel Vaumorin, dict le vieillard. Et sur ce sujet il cōmança à faire vn brief discours de sa vie & de sa cōdition: nomma sa femme, designa le lieu où il habitoit, & representa tāt d'autres circonstances que Michel Vaumorin croyoit au commencement que c'estoit vn Diable, qui luy apparust pour le tenter. Il estoit si estonné qu'il ne scauoit que dire; neâtmoins pour s'eclaircir plus à loisir de cēt affaire, il prit congé de ce bon hōme & luy dit que le lendemain il viendroir le trenuer avec vn bocal de vin pour desheuner avec luy. Ils se separerēt doncques, & le fils ne fit toute la nuit que rominer aux discours que l'autre luy auoit tenus. Il ne scauoit qu'en dire. D'un costé il se ressouenoit que sa mere l'auoit souuent asseuré de la mort de son Pere: d'autre

d'autre costé il voyoit tant de verites apparentes , qu'il estoit forcé à croire, que son Pere n'estoit pas mort, & que sa mere luy auoit celé cette infortune. Il ne manqua pas le lendemain de se treuver sur le port. Ce vieillard l'attendoit desia, & incontinent qu'il l'aperçeut il se mit à pleurer , & luy tenir ce langage : *Il m'est impossible (dit-il) de contenir mes larmes. Tant plus ie vous considere, tant plus vous me ramentuez les traiçts de mon fils Michel Vaumorin.* A ces mots, le ieune homme ne se peut plus couter. La nature s'ouurit , le sang s'esmeut , & les affections qu'un fils porte à ceux qui l'ont engendré , operans leurs fonctions, firent qu'il courut les bras ouuerts vers son Pere. Il l'embrace estroitement , & le baisant il luy arrosee sa barbe blanche de ses larmes , & puis il luy tient ce discours : Je suis Michel Vaumorin vostre fils. Je louë DIEU de ce qu'il m'a fait la grace de trouuer ce que ie ne cherchois pas, & que ie deuois rechercher plus que routes les choses du monde. Je suis pourtant excusable , puis que la croyance que i'auois de vostre mort , m'exemproit de prendre cette peine. Le vieillard saisi d'estonnement non moins que son fils, ietta vn grand cry de resioüissance, & versant vn ruisseau de larmes de ioye, proféra ces paroles : C'est moy (ô mon cher fils) qui ay sujet de louer DIEU , de la faueur que ie reçois de reuoir ce que ie n'esperois pas. Je ne me soucie pas maintenant de mourir, puis que i'ay ce contentement. Apres plusieurs caresses reciproques, ils entrerent dans la Galere , & d'esciueuerent ensemble : Cependant le Pere dit à son fils que ce n'estoit pas le tout: mais qu'il falloit trouuer écores vn moyé pour le retirer de captiuité. Le fils qui desiroit la liberté de son

son Pere plus que luy-mesme s'offre d'y contribuer sa peine, ses moyens & sa vie. Il s'achemine à l'instant vers le Capitaine de la Galere, & se iettât à ses pieds, il luy tient ce langage. Je vous supplie Monsieur, de prédre pitié d'un miserable viellard, & d'un pauvre ieune homme. Vne disgrace plustost qu'un crime, à reduict en yne cruelle seruitude l'un & priué de l'autre l'épace de vingt années d'auoir ce bien de voir celuy qu'il l'a mis au monde. Quand l'un auroit bien merité ce chastiment toutes fois le long-temps qu'il y a qu'il sert à la rame vous oblige à la misericorde, & vous semond à prendre pitié de la ieunesse de l'autre, qui vous fait vne requeste si iuste, & d remplie de pitié. Je vous coniure doncques d'octroyer la liberté mon Pere. C'est ce bon homme que vous voyez icy à vos pieds avec moy. Il priera desormais Dieu pour vdtre prosperité, & ie vous feray obligé toute ma vie.

Il eust continué ses prieres, si le Capitaine rude, & barbare, comme sont ordinairement telles personnes qui hantent la marine, ne l'eust interrompu & avec des paroles mal gracieuses ne luy eust refusé tout à plat sa demande, & commandé qu'il se retirast. Michel Vaumorin, encores qu'il se veid rabroüier de la sorte, ne perdit pas pourtant courage. Il ny auoit préque iour qu'il ne l'importunat de la liberté de son Pere, si bien que l'autre commença à la fin de se courroucer de telle façon, qu'il luy dict, que s'il luy venoit plus rompre la teste de cette affaire, il l'attacheroit à la cadene : Aussi bien (disoit-il) estes vous plus propre (coquin) de seruir, que non pas celuy, pour qui vous m'importunez tant : & parauenture le meritez-vous mieux que luy,

Toutesfois si vous me baillés cent escus ie le deliureray: autrement non. Ne m'en parlez doncques d'auantage, si vous ne voulés estre mis à sa place. Ce ieune homme voyât qu'il employoit inutilement sa peine à penser fleschir ce barbare, est bien ennuyé. Il ne scait quelle voye prendre pour venir à bout de son dessein. S'il auoit l'argent quel'autre luy demande, il le luy auroit bien tost deliuré, mais ses moyens sont trop courts pour recouurer vne telle somme.

Luy & son Pere lamentent leur infortune. En fin Michel Vaumorin s'informe de son pere, du temps qu'il fut condamné à ce seruage, comment il estoit plustost à Naples qu'à Marseille, & d'autres circonstances sur ce sujet. Son Pere luy apprend que Henry deuxiesme donna vne Galere au Duc de Sauyoe, en faueur de son mariage, & que puis apres le Duc la vendit à ce Capitaine. Michel ayant ruminé sur ce qu'il venoit d'apprendre de son Pere, croit à la fin que le plus expedient est qu'il aille en Piémont se iettet aux pieds de son Altesse, & luy requerir vne lettre de faueur adressante à ce Capitaine. Il en communique le dessein à son Pere, & prend congé de luy avec larmes, d'vne & d'autre part. Quand le fils est arriué à Turin, il attend le Duc à la porte de l'Eglise, & comme il sort avec la Duchesse d'ouyr le seruice Diuin, il se presterne à genoux, & leur racontant sa iuste douleur, les supplie de l'assister de leur faueur, pour la deliurance de sō miserable Pere. Ces supplications accompagnées de pleurs & de sanglors toucherēt le cœur de ces Princes de sorte, qu'ayans cōpassion de la pieté de ce ieune hōme, le Duc parla à luy en ces termes: Mon amy, ie n'ay point de puiſſance absoluë de tirer rō Pere de captiuité. Ie
n'ay

n'ay plus de pouuoir sur ce que i'ay vendu. La liberté de ton Pere dépend d'un autre. Tout ce que ie puis faire, c'est de t'octroyer la lettre de faueur que tu me demandes. Je te la feray expedier ce iour même, & te donneray encorcs quelque chose, pour te subuenir à sa deliurance. Michel Vaumorin remercia la courtoisie de ce genereux Prince, qui luy fit à l'instant depescher vne lettre qu'il escriuit à ce Capitaine, telle que l'autre la demandoit, & avec cela il luy donna cinquante escus. La Duchesse luy en donna autât. Avec cette somme il reprend le chemin de Naples, & passant par Rome, il visite certains amis qu'il y auoit, ausquels il racompte encorcs son infortune. Chacun euen de pitié, contribuoit de quelque piece d'argent, si bien qu'il fit encorcs vingt escus. Quand il fut à Naples, il alla treuuet le Capitaine, & luy presenta la lettre de son Altesse. Cet homme, qui iusques alors auoit esté insensible à la compassion, en fut aucunement touché. Considerant sa perseuerance & sa pieté, il ne le receu point si inhumainement que de coustume, Il luy demanda seulement s'il n'auoit point d'argët, l'ay (respond l'autre) quelques trente escus (Baille - les moy) dit le Capitaine, & va-t'en avec ton Pere là où tu voudras. Luy bien aise de ces paroles, tire de sa bourse trente escus, & les luy baille. Auant que l'homme sorte des Galleres où il à esté cõdamné, il faut qu'il paye certains droicts reduits à certaine somme d'argent. Il n'y eust eut pas vn de ceux à qui ces droicts appartiennent, qui ne les luy quittaist, tant la pieté est recommandable, mesmes parmy les personnes qui mènent vne vie sauuage, & denaturée. Ayant deliuré son Pere, ils s'en vont tous deux dans la ville de Naples,

en resolution de reuoir biẽ-toſt leur patrie, & de s'y acheminer dès le lendemain meſmes. Ils logerẽt ce ſoir dans vn cabaret, & y firent ſi bonne chere que ce vieillard ayant pris du vin plus que de couſtume, commença à faire le plus grand vacarme du mōde. Il iniurie l'oſte & l'oſteſſe. Il vouloit tout battre. Son propre fils eut bien de la peine à s'empẽcher luy meſme à n'eſtre point frotté. Si l'hoſte ſe fut adreſſé tout à l'inſtant à la Juſtice, cẽt yurongne qui venoit tout freſchement de recouurer ſa liberté, eſtoit en grand danger d'en faire encores perte. Auſſi ſon fils, ſupplioit l'hoſte. d'excuser le bon Bacchus. A la fin on le fit coucher pour digerer ſon vin.

Quand il fut iour, Michel Vaumorin prit congé de l'hoſte, & partit avec ſon Pere pour reuenir en France. Mais ô choſe eſtrange de la mauuiſe nature de l'homme. Il eſt bien impoſſible de la changer: ſi ce n'eſt par vne grace particuliere du Ciel, que les Payens ignorans le vray DIEU, attribuoient à l'eſtude de la Philoſophie. L'exẽple de ce grand perſonage Socrates en fait foy.

Vn Phyſiomifte contemplant vn iour ce Philoſophe avec grande admiration, & diſoit tout haut, que c'eſtoit le plus mechãt, & le plus execrable hōme que l'on ſçeut rrouuer. Tout le peuple ayãt ouy ſes pároles, ſe mocquoit de luy comme d'vn mẽreur & d'y ignorant: lors que Socrates leur diẽt: Il a raiſon & tenir le diſcours qu'il tient de moy. Ses paroles ſon veritables. Mon inclination me portoit à la meſchãceté: mais i'ay corrigé les deffauts de ma Nature, par le moyen de ma Philoſophie.

Le pere de Michel Vaumorin, n'auoit pas corrigé
les

les Siens aux Galeres. Le tourment qu'il y auoit receu, ne l'auoit pas rendu plus homme de bien qu'il estoit auparauant. Il estoit tellement enclin de son naturel au larcin, qu'il n'eut pas cheminé deux iournées avec son fils, qu'il se leuoit la nuict pour fouiller en ses pochettes cependant qu'il dormoit, & pour luy desrober son argent.

Ce pauvre ieune homme qui s'en apperceut auoit bien de la peine à le cacher en quelque lieu. où il ne le trouuaist pas si librement. Il laissoit neantmoins quelque monnoye à ses chausses à fin d'en faire plus d'experience, & neantmoins il ne luy en disoit iamais mot, parce qu'il craignoit de le fascher.

Ce miserable à chaque fois iuroit & blasphemoit le nom de Dieu, & iuroit son fils, & le maudissoit de ce qu'il l'auoit tiré des Galeres, pour luy faire prendre tant de peine par les chemins. Ce pauvre ieune homme suportoit le tout patiemment, & prioit d'auoir bon courage, puis qu'en peu de temps, ils arriuoient en France. Apres beaucoup de mal ils y arriuerent estans prests d'entrer dans Paris, Michel dit à son Pere, qu'il falloit qu'il l'attendit en quelque lieu, iusques à tant qu'il eust parlé à la Mere.

L'autre qui ne s'estoit encores informé de sa femme luy demanda si elle estoit viuante. Michel luy respondit qu'il l'auoit laissée en assez bonne disposition, lors qu'il partit de Paris, mais qu'elle s'estoit remarié avec vn Escrivain, croyant qu'il fust mort, & qu'ils demeuroient à la rue des Carmes.

Le Pere oyant cette nouuelle, commença à se mettre en colere, & à proferer mille iniures contre sa femme, iurant qu'il l'assommeroit de coups, pour s'estre ainsi remariée, sans sçauoir asseurement s'il estoit

mort. Avec ce courroux il entre à la ville avec s^{on} fils par la porte de S. Victor, & vont droict à l'Eglise des Carmes où Michel Vaumorin prie son Pere de l'attendre iusques à ce qu'il reuienne, après qu'il aura appris les nouuelles de sa venue à sa mere. Il quitte doncques son pere, & entre au logis où elle se tenoit. Quand elle le vid, elle courut l'embrasser estroitement & verse en abondance des pleurs de ioye. M^{on} fils (disoit-elle) est-il possible que tu ayes peu demeurer deux ans sans auoir iamais fait sçauoir l'estat de tes affaires à ta pauvre mere, qui a fait tous les iours à D^{ieu} mille vœux pour ton retour; Puis que ie te tiens maintenāt, ie ne te laissery pas échapper si aisément vne autrefois. Aussi ne dois-tu pas désormais tesloigner de moy de la sorte: mais considerer que n'ayant d'autre enfant que toy, tu dois estre mon baston de vieillesse, & tout mon confort. Michel interrompant les plaintes maternelles, parla à elle en ces termes: Ma mere, ie loüe D^{ieu} de ce que ie vous reuois en b^{onne} disposition. C'estoit vn de mes plus grands souhaits durant mon absence. Mais il y a bien d'autres nouuelles, dont parauenture vous serez bien estonnée. Vous m'avez souuent fait entendre que mon pere estoit mort. Ie vous apprens qu'il est plein de vie, & qu'il n'est gueres loing d'icy. Ie me trouue bien empesché pour vous conseiller de ce que vous deuez faire, estant remariée comme vous estes. Cette femme fut bien esbahie d'ouyr parler son fils de la sorte, mais elle le fut encores plus, quand elle vit entrer son mary tout blāc de vieillesse, qui ayāt suiuy son fils de loing, & impatient de bien frotter sa femme, estoit entré dans le logis, & monté à sa chambre. Si tost qu'il vit sa fem-

me,

même, il commença à tenir ce discours : Vous estes doncques remariée, chienne putain de voirie. Par le DIEU qui m'a crée, ie ne souffriray iamais vn tel affront, mais ie vous battray tant que vous mourrez. Ce disant il se ruë sur elle à coups de poings. Sans le secours de son fils qui le retenoit, il l'eust sans doute mal accommodée. Cette femme cependant crioit au secours, & son second mary qui estoit en vne chambre plus haute avec ses escoliers à qui il faisoit la leçon, descendit promptement au cry. Voyât sa femme escheuelée, il se iette sur Jean Vaumotin, & l'autre sur luy, & à coups de pieds & de poings ils s'estrillent à bon escient. Michel qui ne pouuoit pas tout seul les separer, crie à l'ayde: Les voisins accourent, & ont bien de la peine à se mettre entre deux. L'vn dict à l'autre qu'il payera le tort qu'il luy a faict de battre sa femme. L'autre respond que c'est sa femme & non pas la sienne, & qu'il est vn meschant de la luy auoir desbauchée durant son absence. Le Commissaire arriue qui les fait tous deux prisonniers. Apres les auoir ouys, ils s'ont eslargis, & gros procez est par eux intenté, Il y a appel en la Court de parlement. Les Aduocats plaident la cause, & remonstrent chacun leur faict, & alleguent de belles raisons d'vn costé & d'autre, que nous n'insérons point icy, pour estre trop prolixés. Enfin ce iuste & équitable Senat ordonné par vn Arrest definitif que Jeanne Pertot demeurera à Jean Vaumotin, & les meubles qui estoient communs entre elle & son second mary appartiendroient à cet Escrivain. Il faut donc qu'il se pouruoye d'une autre femme, & peut estre est il bien aise de s'estre defaict d'une si pesante charge: la poursuite qu'il faisoit n'estant que pour

auoit les meubles. Ceux qui ont gousté du mariage, assuret presque tous, que les mariés n'ont que 2. bós iours. Celuy des nopces, & le iour des funerailles de la femme. Je m'en rapporte à la verité, ie n'en parle que par ouy dire. Le peu d'enuie que i'ay de me soumettre sous la tyrannie d'vne telle Loy, me fait prutoft croire ce qu'on en dit, que ne le croire pas. Tant y a que Iean Vaumorin estant possesseur de sa femme, se retire avec elle, & avec son fils dans vn mesme logis. Il recommence de nouveau à racoustrer pour les vns & pour les autres des vieux habits. Le long-temps qu'il auoit demeuré sans exercer son mestier, le luy auoit fait presque oublier, & puis la façon de la Cour qui change tous les iours depuis que les nations estrangeres s'y sont introduites, luy estoit fort estrange. Son aage mesme luy auoit diminué de la veüe, & réduit ses mains engourdies au travail, mais non pas aux larcins, ainsi que nous verrons maintenant. Je disois cy-dessus qu'il est bien mal-aisé de corriger les defauts de la Nature. Celuy qui de sa jeunesse est addonné au vin, se ressent tout le temps de sa vie de la contagion de ce vice. Nous lisons que l'Empereur Tibere, fut seuré par sa Nourrice, avec du pain trempé dás du vin, & qu'elle continua à le nourrir de la sorte vn long-temps. Aussi fut-il vn si grand yvrongne, que quelques-vns pour se moquer de luy, le nommoient Bibere, au lieu de Tibere. Caligula, Neron, Domitian, & autres pareils Monstres cruels, & infames, auoient esté nourris au sang dès leur ieunesse. On leur faisoit tuer des bestes & puis lauer leurs mains de leur sang, ils en firent vne telle habitude, qu'estans montez puis apres au souverain degre de pouuoir, ils faisoient aussi peu d'estat

d'estat de respandre de sang humain , que celuy de animaux. Leurs plus proches parens , comme leurs freres, leurs sœurs, leurs sœurs, & leurs propres mères n'en estoient pas exemptes. Autant en pouuons-nous dire de ceux, qui dès leur ieunesse se sont adonnez aux larcins. Combien d'hommes, autrement recômandables, soit pour leur valeur, soit pour leur sçauoir, ont esté atteints & conuaincus de ce defaut pour n'en auoir pas pris la correction en leur bas aage ? Nostre siecle est tout remply de ces exêples, sans qu'il soit besoin de mandier l'antiquité. Vn grand que ie cognois, disoit vn iour , que ses yeux n'apperceuoient iamais quelque ioyaux, ou quelque autre chose precieuse, que les mains ne desirassent aussitost de s'en saisir. Dieu sçait aussi comme durant les guerres ils exercent de pillages, & combien ils s'approprient des despouilles, par droict de bien sceance. Mais pour reprendre nostre discours Iean Vaumotin n'eut pas acheué l'année depuis son retour des galeres avec sa femme, qu'il ne fut soupçonné d'estre tousiours larron. Quand il tailloit quelque habit , il failloit auoir tousiours l'œil sur ses mains, autrement la piece leur en demeureroit. Misérable homme, que les rigueurs d'une mort ciuile n'auoient peu rendre homme de bien ! Après tant de perseuerance au mal, le Ciel se fâche, & permet que nous soyons punis suivant que nous le meritons. Dieu est prompt au pardon, & l'ont à la peine : mais enfin il paye avec vsure le mépris que nous faisons de sa misericorde. Iean Vaumotin le tesmoigne, ayant esté toute sa vie larron ; & n'ayant peu , ou plustost voulu se faire sage à ses despens, il receut à la fin le chastiment qu'il auoit deservy. Vn homme de sa co-

gnoissance vint à se marier. Luy & sa femme sont inuité à la nōpce. La coûtume ordinaire du peuple de Paris, & d'en cel. brer la feste en des salles que des Bourgeois loient, & qui sont particulièrement destinées pour ce sujet. L'on y dense au son des instrumens, l'on y rit, on y fait bonne chere, & chacun des inuitez contribué au bassin, à l'entrée & à la fin du repas, la piece d'or ou d'argent à sa discretion; & suivant les commoditez. Cét homme se trouuant doncques en vn pareille assemblée, y trouble toute la ioye. Quand on veut leuer la nappe, & recueillir la vaisselle, vn gobelet d'agent se trouue perdu. Vn bruiet cōfus se fait parmy ce ramas de peuple & chacun accuse le larron. En fin le maistre du logis, qui ne veut point perdre son bien, requiert qu'on viēne à fouiller tout le monde. Plusieurs qui scauent le mauuais naturel de Jean Vanmorin. auoient secrettement aduertty le maistre du logis de le fouiller tout le premier. Il le fait, & le vol est trouué sur luy. Les assistans se iettent sur luy, & sont prests de l'assommer, sans vn Commissaire qui estoit de la nōpce, qui d'office luy met la main sur le collar, & l'emmenne aux prisons du Chastelet. Son procez estant instruit, & appel estant interjetté sur quelque incident, la Cour retient la cognoissance de la cause, & apres auoir meurement exageré le fait, & consideré la perseuerance au mal de ce miserable, elle le condamne iustement à estre pendu & estranglé à la place Maubert. C'est arrest fust executé, tout le peuple couroit, non tant pour le supplice, dont l'espece est si commune dans cette grande ville, que pour la curiosité de voir celuy, de qui la mauuaise nature estoit auant detestée, que la pieté de son fils recommandées,

dée. Ainsi finit misérablement la vie cét homme par vn licol, après l'auoir si souuent eschappé, & après mesmes auoir demeuré plus de vingt-às aux galères pour ses malefices. Cette Histoire doit seruir d'exemple à ceux qui ne reçoient point d'amandement en leur vie. Elle leur doit représenter le iuste chastimé de Dieu, qui attrappe ou tost, ou tard les meschâs. Bien rarement eurent-ils (comme parlét les Theologiens) la peine du peché. Elle nous tesmoigne aussi l'amour & la pieté que nous deuons à nos parens, encore que pour leurs vices ils soient indignes de compassion. La nature nous y oblige, & la Loy nous le commande: Michel Vaumorin est recommandable pour cette vertu, encor que la peine qu'il prit pour retirer son Pere de seruages, ne luy seruit que pour le cōduire au gibet: Mais il ne pensoit pas que cela luy deust arriuer. La Iustice diuine n'estoit pas assez satisfaiete. Il falloit vn autre suplice pour expier son obstination. Le Ciel vueille amander les meschans, maintenir les gens de bien.



*D V B A R O N D E G V E M A D E V C ,
Gouuerneur pour le Roy en la ville &
Chasteau de Fougères en
Bretagne.*

HISTOIRE XXI.

LA charge de Gouuerneur de quelque ville, place ou Chasteau, dans vne Prouince, est vne chose tellement sacrée, que comme le Prince tesmoigne

gne la grâde cōfiance qu'il a en la foy & loyauté de celuy auquel il a confie, & la donne comme en de-
post: aussi le plus grâd crime & le plus digne demort
est celuy de la perfidie & l'infidelité qui se trouue
au Gouverneur, qui veut se rendre maistre des places
du Prince: de maniere qu'il n'y a sorte de chastiment
qui en puisse reparer la faute, d'autant que telles en-
treprises n'ont pour but que de la reuolte, & mettent
la vie de telles personnes à couuert, apres auoir
commis quantité de crimes.

Monsieur Thomas, Baron de Guemaduc, Gou-
verneur pour le Roy de la ville & Chasteau de Fou-
geres, en Bretagne, fut accusé d'auoir tué à Renes,
durant la tenue des Estats du pays, le Baron de Ne-
uet: & estât chargé de plusieurs autres crimes il se vit
contraint de venir à Paris: & remettre le Chasteau de
Fougeres entre les mains d'un Exépt des Gardes que
le Roy y enuoya, pour exercer la charge de Gouver-
neur pēdāt qu'il seroit à Paris, & chercheroit les mo-
yēs de se iustifier des crimes à luy imposez à la Cour
de Parlement: Mais se deffiant de sa cause, soit qu'il
doutast du succez de sa iustification, ou pour quel-
qu'autre dessein, au mois de Iuin l'an 1617. il partit
de Paris, se rendit en diligence en Bretagne, & alla
surprendre le Chasteau de Fougeres, duquel il se ren-
dit Maistre, & en chassa l'exempt des Gardes qui le
tenoit pour le Roy, en intention de s'y enfermer, &
de n'y souffrir l'autorité de sa Majesté, (action har-
dic & tres-mauuaise) qui ne fut pas sans punition:
car si tost que sa Majesté eut receu nouuelle de ceste
surprise, le Duc de Vendosme Gouverneur de Breta-
gne, & le Marschal de Vitry eurent commandemēt
de faire tant par leur diligence, qu'il peussēt estre à
Fougeres

Fougeres auât que le sieur de Guemaduc y fust reconnu: Ils executerent le commandemēt du Roy avec tant d'affection, qu'ils trouuerent le sieur Guemaduc, songeant plus à ce qu'il auoit fait, qu'à ce qu'il deuoit faire: il leur fit mille excuses sur ceste surprise du Chasteau de Fougeres, & leur dit tāt de raisons, pour colerer sa faute, que lesdits Seigneurs Duc & Marechal, luy firēt promesses de s'employer pour luy aupres du Roy, afin qu'il rentrast en grace.

Ils ne laisserent pas de se saisir de sa personne, & fut amené par la Normādie à Paris, & mis à la Conciergerie, où par cōmandement du Roy, le Parlemēt trauailla à son procez, en la Chambre des Vacations, laquelle ayant veu le procez criminel commencé à faire de l'Ordōnance du Parlement de Bretagne, par l'un des Presidents & deux Conseillers de ce Parlement, & depuis réuoyé par le Roy, par ses lettres parentes, à la Cour de Parlement de Paris, & parachevé d'instruire par deux Conseillers d'icelle, à la requeste du Procureur General demādeur en crime de leze-Majesté, contre Thomas de Guemaduc, & Mōdain Narfaut, dit Montargis, prisonniers en la Conciergerie du Palais, informations, interrogatoire, cōfrontations des tesmoins autre procez criminel fait au Parlemēt de Bretagne à la requeste d'Holiuier de Seruande, Senechal de Chastillon, & consors, demandeurs en excez, crimes & delicts contre ledict de Guemaduc, & complices, informations, interrogatoires, recollement & confrontations des tesmoins. Autre procez criminel fait au mesme Parlement de Bretagne, à la requeste de Dame Françoise Detreal, vefue de feu sieur Baron de Neuet, cōtre ledict Guemaduc & autres complices, informations, interrogatoires

terrogatoires des tesmoins faictes rât audit Parlement de Bretagne par deux Conseillers dudit Parlement, que par deux Conseillers du Parlement de Paris: Conclusions ciuiles, tant de ladite Dame de Neuert, que dudit Seruande, & leurs productions, defences par attenuation & productions de l'accusé, trois Requestes presentées par ledit Guemadeuc, les 22. & 25. Septembre mises au sac? Conclusions du Procureur General du Roy, ouy & interrogez en ladite Chambre, ledit de Guemaduc & Marsault, dit Montargis, prisonniers, sur le cas à eux imposez & contenus au procez, & tout considéré; Ladicte Châbre declara ledit Guemaduc criminel de leze-Majesté, pour reparation duquel, & autres cas mentionnez au procez, fut condamné à auoir la teste tranchée, & icelle portée en la ville de Fougères, plantée au bout d'une lace, & fichée sur le principal portail du Chasteau de Fougères, son corps porté à Montfaulcon, tous & chacuns ses biens acquis & confisquezz au Roy, sur icenx prealablement pris la somme de trente deux mille liures parisis le tiers à la vesce, les deux tiers au enfas, pour reparation ciuile, quatre mille liures parisis à Seruande & ses consors, seize mille liures parisis d'amande applicable, d'oit dix mille aux necessitez de la Cour, & six mille liures parisis applicables aux reparatiōs de l'Hospital de la Trinité, & trois mil liures employez à la fondation d'un seruice, pour faire prier Dieu pour l'ame du deffunt Neuert, en l'Eglise en laquelle son corps est enterré, & condamné en tous les despens, tant enuers la Dame vesue de Neuert, que ledit de Seruandre: Cét Arrest fut prononcé au sieur de Guemadeuc le 27. Septembre, & le mesme iour il eut la teste tranchée en Greve.

Pour

Pour toutes les supplications de ses amis & de sa femme, qui s'allajetter aux pieds du Roy dès qu'elle sceut son Arrest, demandant misericorde, elle n'eust autre respõce de sa Majeste, sinon: *C'est la Iustice qui faict regner les Roys, ie la dois à mes suiecls, & en cet endroit ie dois proferer la Iustice à la misericorde: pour ses biens qui me sont confisquez, ie vous les donne.* Le sieur Guemaduc estant decapité, son corps fut enterré en l'Eglise des Cordeliers de Paris.

Il ne fut pas seulement conuaincu du crime de lezè Majesté, mais encores des assassins commis es personnes du sieur Baron de Neuert, & du Seneschal de Chastillon en Vendelais, sous pretexte de luy demander Iustice, & d'auoir faict par deux fois deterrer le corps mort de deffuncte Damoiselle Dubé, Dame de la Vilotée mere dudit Seneschal de Chastillon, & iceluy ietter dans vn estang, pour la priuer de la sepulture deuë aux Chrestiens.



RELATION VERITABLE DE tout ce qui s'est passé en la prise de Monsieur le Duc de Montmo- rency, iusques à sa mort.

*Ensemble les responses qu'il fit sur les inter-
rogations qui luy furent faictes, &c.*

HISTOIRE XXII.

LE vingt-septiesme Octobre, 1632. Monsieur de Montmorency arriva à Thoulouse sur le midy, & fut mené dans la Maison de Ville, & luré par
Monsieur

Monsieur le Marquis de Brezé à Monsieur de Lou-nay, Lieutenent des Gardes du Corps. Les ruës & les places publiques, qui sont depuis la porte iusques à l'Hostel de Ville, estoient bordées de Soldats des Garoes & des Suisses, par tout ailleurs dans la Ville, il y auoit des corps de Gardes, ce qu'on auoit eom-mencé de faire le 22. que sa Maieité commanda aux Capitous de bailler les clefs de la porte de la Ville, à ses Capitaines des Gardes. Outre ceste Infante-rie, le Carrosse de M. de Montmorency estoit au mi-lieu des Mousqueraites à cheual, & de six cens Maistres armez de toutes pieces.

Trois heures apres que M. de Montmorency fut arriué, les deux Cômmissaires le furent interroger sur les charges & informations, on luy confronta sept tesmoins à sçauoir, trois Capitaines du Regiment des Gardes, vn Lieutenent, deux Sergents, & le Gref-fier des estats du Languedoc, nommé Guillemer. La Commission que le Parlement auoit deluy faire son procez luy fut leuë, & il dit, que quoy qu'il ne d'eût estre iugé qu'au Parlement de Paris, pour le rang qu'il tenoit en France, son affaire neantmoins estte de telle nature, que si le Roy ne luy faisoit grace, il n'y auoit point de Iuge qui se peust empelcher de le condamner : qu'il estoit tres-content, d'auoit pour ses Iuges Messieurs du Parlement de Thou-louse, qu'il auoit tousiours fort honoré, & qu'il les estimoit gens de bien.

Les Commissaires s'assirent au bout de la table, & firent asseoir M. de Montmorency à leur main gau-che, & les tesmoins venoient parler à luy, la table entre deux. Il aduoua tout ce que les Officiers du Regiment des Gardes deposerent sur la journée de Chastelnau-d'Arry.

Castelnau-d'Airy. Vn deux qu'on dit estre M. de Guicart, estant interrogé s'il auoit cogneu Mr. de Mōrmorency, dans le combat, il respondit en pleurant, que le voyant tout couuert de feu & de fumée, il eust de la peine à le cognoistre: mais qu'en fin luy ayant veu rompre fix de leurs rangs, & tué des soldats dans le septiesme, il iugea bien que ce ne pouuoit estre autre que luy: ce qu'il sceut certainement lors que son cheual estant mort sous luy, il demeura au milieu de ses Compagnons. Les Commissaires luy ayant demandé s'il auoit signé la deliberation des Estats du Languedoc du 22. Iuillet, dans laquelle ils appelloient Mr. le Duc d'Orleans à leur protecton, & promettoient de fournir de l'argent pour l'entretienement de son party, & de ne iamais se départir de ses interets: il nia qu'il l'eust signée, & le Greffier Guillemer luy ayant esté confronté, & sa signature présentée, il se mit en grand colere contre le Greffier, l'appella faulsaire, & luy dit qu'il auoit supposé son seing.

Le 28. toute la Court fut occuppée à faire des prieres à Dieu, & au Roy, pour la grace de Mr. de Mōrmorency: Messieurs le Cardinal de la Vallette, le Nonce du Pape, les Ducs de Chevreuse, & d'Espernon, Mr. le Premier, & de S. Preuil en supplierēt sa Majesté, & tous les Officiers du Regiment des Gardes auoiet resolu d'en faire de mesme. Les Penitēz blancs firent vne procession, en laquelle se mesla grād nombre de p. rsonnes de la Court, laquelle alla visiter les corps des SS. Simon & Iude, dont on faisoit ce iour là la Feste, qui sont dans l'Abbaye saint Sernin, où l'on chanta la Messe, & où le nombre des Communians fut fort grand, dont la plus part disoient qu'ils auoient fait leurs deuorions à l'inten-

tion de Mr. de Montmorency: Ce mesme iour Madame la Princeſſe qui auoit reculé d'Vxen & de S. Iory, alla à noſtre Dame de Briere, qui eſt vne Chapelle de grande deuotion à deux lieuës de Thoulouſe, conduite par les Iacobins reformez. Mr. le Cardinal de la Valette cōmunia à la Meſſe que dit Mr. l'Eueſque de Pamiers dans l'Abaye S. Sernin: le matin du meſme iour 28. Mr. de Montmorency demanda le Pere Arnoulx duquel il ouyt la Meſſe, à qui il diſt l'auoir appellé pour ſe diſpoſer à mourir, & que ſon intention eſtoit de commencer par vne Confefſion generale, à quoy il s'appliqua dès l'heure, & y employa le reſte de la iournée, & le lendemain 29.

Le 29. Auquel iour Mr. d'Espernon parut de Thoulouſe apres auoir demandé vne ſeconde fois la grace, Mr. le Garde des Seaux fut au Parlement acompagné ee ſix Maiſtres des Requeſtes; vn Preſident, & deux Conſeillers luy furent faire des complimens à la porte de la grande Salle de l'audiēce, en laquelle les Chambres s'aſſēblerent, cependāt qu'il faiſoit ſa Confefſion generale, & receuoir le S. Sacrement dās la Chapelle de l'Hoſtel de Ville, ſur le ſoir dudit iour enuiron les neuf heures vn Gentil homme enuoyé par Monſieur fut demander la grace de M. de Montmorency, il ſe ietta trois fois à genoux aux pieds de ſa Maieſté, & il euſt pour toute reſponſe, que M. de Montmorency eſtoit entre les mains du Parlement.

La nuit du 19. tous les gens de guerre qui eſtoiēt és enuiron de Thoulouſe entrerēt dans la ville, & ſe mirent en bataille par toutes les Places & carrefours. Le nombre eſtoit iuſques à douze cens hommes de pied, les Gardes du Corps du Roy, ſe laiſerent de routes les portes du Palais, auquel
iour

jour, il y auoit bien deux mille hommes en larmes.

Le 30. dès les deux heures du matin, on entendit battre le tambour dans toutes les rues, & on disposa l'armée depuis la porte de la maison de Ville iusques au Palais. Entre sept & 8. heures, Mr. le Comte de Charlun fut à la maison de Ville prendre M. de Montmorency, qu'il mena au Palais dans son Carrosse, on a remarqué que les chevaux estoient si meschans qu'ils ne le pouuoient trainer, les mantelets estoient abbatus, & les portieres estoient bordées de gardes Escossoises de sa Majesté: estant arriué au Palais, Monsieur le Garde des Seaux estant assis & l'ayant mis sur la Selette, l'entendit dans la sale des manteaux. La Selette estoit placée au milieu du Parquet, & l'auoit on extraordinairement leuée en sorte qu'elle estoit quasi à la hauteur des Iuges. Mr. le Garde des Seaux, fit les interrogations ordinaires de formalité, qu'il estoit, comment il s'appelloit, quel age il auoit, s'il estoit marié, s'il auoit des enfans, & en suite luy demanda s'il auoit signé la deliberation des Estats, il respondit qu'apres y auoir bien songé, il s'estoit souuenu de l'auoir signée. On luy demanda s'il auoit appelé Mr. le Duc d'Orleans dans son Gouuernement: il dit que non, ajoutant que mondict Seigneur estant entré dans le Royaume, les Estats l'auoient prié de prendre la protection de leurs priuileges.

Il fut interrogé si Monsieur luy auoit fait prendre les larmes, il dit qu'il ne vouloit point chercher d'excuses sur Monsieur.

Fut interrogé du nom de ceux qui l'auoient fuiuy au combat, respondit qu'il estoit demeuré d'accord avec les tesmoins de ce qui s'estoit passé en iceluy.

Plus interrogé s'il auoit intelligence avec les Estrangers pour la frontiere, il le nia absolument, & soustint qu'il n'auoit eu intention de nuire à l'estar.

Il respondit à tout ce qu'on luy demanda avec tant de moderation & ciuilité, d'un ton de voix si charmant, que les Iuges ont aduoué qu'ils en ont eu grand mal au cœur. Ils baissèrent tous les yeux lors qu'il entra dans la Salle, & la pluspart tenoient leurs mouchoirs au visage, comme s'ils eussent voulu cacher les larmes qu'ils ne pouuoient faire paroistre avec bien-sceance. Il estoit sur la Sellette nud teste, sans estre lié ny des pieds ny des mains, quoy que l'usage du Parlement de Thoulouse soit contraire à cela, veu que personne ne paroist sur la Sellette que les fers au pieds.

A la fin de l'interrogatoire Mr. le Garde des Seaux luy demanda s'il ne cognoissoit point auoir extremement failly, & s'il ne meritoit pas pour la reparation de sa faute qu'on le condamna à la mort, il respondit qu'il la meritoit au delà de tout ce qu'il en pouuoit dire. En outre il excusa le Greffier des Estats qu'il auoir chargé le iour precedant, il dit l'auoir obligé à signer la deliberation, outre son sentiment. Il fut ramené à la maison de Ville par Mr. le Comte de Charlon, de la mesme façon qu'on l'auoit conduit au Palais.

Cependant qu'il estoit au Palais Mr. le Cardinal de la Valere qui n'a oublié aucune action d'un parfait amy, estoit dans S. Sernin, oyant Messe & comuniant à son intention : d'où il sortit pour l'aller visiter par la permission du Roy. Ils furent vne bonne heure ensemble, & la separation fut avec soupir & larmes estranges. Mr. de Montmorency, qui durant sa prison auoit vn Citurgien & vn valet de chambre;

chambre, il le pria de luy enuoyer cét pistoles pour l'un & pour l'autre, ce qu'il fit, & s'en alla dès l'heure à son Abbaye de grand Selue. Durant ce temps-là, le Parlement estoit aux opinions avec Mr. de Long, l'un des Commissaires.

Et à la première opinion forma l'aduis de mort, sur laquelle il apporta tout ce que le droit Romain & François a ordonné sur les crimes de leze Majesté. On remarqua qu'en finissant ils auoient tous les larmes aux yeux : toute la compagnie du bonnet opinna, sans dire ny pour, ny contre, vne seule parole. Mr. le Garde des Sceaux cōclud de mesme, fit dresser & signer l'Arrest avant que sortir du Palais, ce qu'il fit enuiron les onze heures, & lors que les iuges parlerent à grande haste en leurs maisons pour donner liberté aux souspirs & aux larmes qu'il auoient retenu dans le Palais par ceremonie. On fit auertir le Roy de l'Arrest, & qui portoit que l'exécution deuoit estre faite dās la place du Palais, & ses biens confisquez à sa Majesté, laquelle tesmoigna par ses larmes qu'en cette action ses autres vertus auoient de la peine de ceder à sa justice.

Le Roy cōmanda au Comte de Charlon de luy aller demander l'Ordre du S. Esprit, & le Baston de Marechal de France. Il donna deux lettres, vne du grand sceau, & l'autre du cachet : la première changeoit le lieu de l'exécution, & ordonnoit qu'elle se feroit à huis clos dās la maison de Ville : l'autre donnoit permission à Mr. de Montmorency de disposer de ses biens, ce qu'il fit par son testament lequel il donna à Mr. de S. Preuil pour presenter à sa Majesté, le priant de luy demander pardon de sa part.

Il le chargea aussi de presenter à Mr. le Cardinal vn tableau de saint François, pour marque qu'il

mouroit son seruiteur, & qu'il l'auoit tousiours fort honoré.

Sur le midy du 30. les deux Commissaires & le Greffier Criminel furent dans la Chapelle de l'Hôtel de Ville, où ils firent venir M. de Montmorency lequel se mit à genoux aupres de l'Autel, & ayant les yeux sur vn Crucifix grâd comme le naturel qui est peint dedans. Il ouyt prononcer son Arrest : à la fin duquel il se leua , & dit à toute la compagnie (Messieurs) priés Dieu qu'il me fasse la grace de souffrir Chrestienement l'Execution de ce qu'on me vient de dire. Les Cômmissaires le laisserent entre les mains du Pere Arnoux; & l'on dit, nous allons faire ce que vous nous avez commandé , & prions Dieu qu'il vous console.

Estant resté dans la Chapelle avec le Pere Arnoux, & trois autres Iesuites haussant tout à coup les yeux vers le Crucifix, puis les baissant sur ses habits qui estoient fort beaux ce iour là, ozeray ie bien (dit-il) estant criminel, comme ie suis aller à la mort, estant vestu avec tant de vanité, cependant que mon Sauueur innocent meurt tout nud à la Croix (mon Pere) dit - il au Pere Arnoux. Il faut que ie me mette en chemise pour faire amende honorable deuant Dieu, pour les grandes fautes que j'ay commis contre luy.

Comme il estoit sur ce propos le Comte de Char-lun luy vint demander son Ordre & son Baston. Il employa le temps qu'il est depuis midy iusques à deux heures à faire des actes de contrition, baissant sans cesse vn Crucifix qu'il auoit dans les mains. Il demanda à quelle heure il falloit aller, on luy respōdit que l'ordinaire estoit sur les cinq heures, à quoy il repartit, s'il ne pouoit pas mourir plustost, & en-
uiron

viron l'heure que Iesus-Christ mourut en Croix, & cela luy ayant esté donné à son choix, il dit, mourés donc, que l'on me coupe les cheveux, qu'on me des-habille, cependât il quitta son pourpoint, & sô Chirurgien luy couppa les cheveux: Il se mit en canesson & apres les deux heures il demanda encores vne fois si tout estoit prest: luy ayant esté respondu que ouÿ; allons donc: mais plustôt que l'on me dône vne plume & du papier, & il escriuit à Madame de Montmorency la lettre qui est suiuaute.

LETTRE A MADAME DE MONTMORENCY.

MON COEUR

Je vous dis le dernier. Adieu, avec la mesme affection qui a tousiours esté entre nous. Je vous conjure par le repos de mon ame, & par celuy que i'espere bientost voir dans le Ciel, de moderer vos sentiments. J'ay receu tant de grace de mon doux Sauueur, que vous auez tout suiet de consolation. Adieu enser vne fois, mon cœur.

De Thoulouse, ce 30. Octobre 1632.

MONTMORENCY.

Il escriit encores deux lettres, l'vne à Madame la Princesse, l'autre à Mr le Cardinal de la Valette, Il pria le Pere Arnoulx de les faire rendre, & de dōner à Madamoiselle de Bourbon sa niepce vne bague qu'il portoit, & vn Reliquaire à Madame la Princesse sa sœur.

La Reine-Mere auoit escriit quelques iours aupa-

rauant au Roy, en ces termes; Si vous ne donnez la vie à mon Neveu le Duc de Montmorency, vous me desobligerez à iamais,

Le Mardy ensuiuant 26. dudit, Madame la Princesse de Condé arriua à la porte de la ville de Thoulouse, esperant y entrer, & voir sa Majesté, pour la supplier faire grace à son frere: mais le Roy manda tout aussi-tost qu'elle se retirast, & qu'il ne la vouloit voir pour ceste fois: de sorte qu'elle fit sa retraite à la mesme heure au bourg de S. George, à deux lieues de Thoulouse.

Les Venitiens escriuirent vne lettre fort ample, avec quantité de prieres, suppliant le Roy, de leur donner le Duc de Montmorency, pour les seruit en leurs armées, se sentât fort honnorer que leur Pays luy setuist d'exil. Lesquels furent de mesme refusez. Monsieur le Prince de Condé auoit aussi escrit vne lettre à Monsieur le Cardinal, & entre autres luy mandoit ses mots: Souuenez-vous que ie suis Prince du sang, que i'ay des enfans, & que Monsieur de Montmorency est mon beau-frere.

Monsieur d'Espernon estant arriué à Thoulouse, alla trouuer sa Mjsté, & se jetta à ses genous: la suppliant de vouloir pardonner audit sieur de Montmorency, & se voyant refusé, il prit cōgé, & s'en alla dé, le mesme iour, ensemble plusieurs autres Seigneurs Gentils-hommes, afin de ne voir ce triste spectacle.

Monsieur le Cardinal, ayant eu aduis que la Reyne vouloit joindre ses prieres à celle de tous ses Seigneurs, pour obtenir ceste grace, la fut trouuer, & luy dit: Madame, l'on m'a dit que voulez demander au Roy la grace pour le Duc de Montmorency: si vous le faictes, il vous l'octroyera: mais vous luy causerez la mort. Car vous scauez bié qu'il est tousiours malade

lade à l'extremité, quand on le prie de faire quelque chose contre sa volonté, tellement que la Reyne n'en parla point.

Sortant de la chambre, où il estoit monté vn peu apres que l'on eut leu son Arrest, son valet de chambre luy jecta sa robbe sur ses espauls; & il dit n'éfaut point, nous irons tous blancs en Paradis: puis trauersant vne allée qui conduit dans la Cour de l'Hôtel de ville, il rencontra les Gardes qui le saluerent sur son passage, & ayane passé l'aslée, il trouua tout à l'entrée de la Cour le chaffaut de quatre pied de hauteur, sur lequel il monta accompagné du P. Arnoux, & de son Chirurgien, auquel il donna vne paire de brassiers, qui furent estimez mille escus, après auoir demadé à Monsieur de Cadillac s'il n'y auoit point de grace, lequel luy respondit avec vne voix triste que nenny, & que tous les amis s'y estoient portez avec toute sorte de supplicatiō: Il salua toute la Cōpagnie qui n'estoit en tout que du Greffier du Parlement, du grand Preuost & de ses Gardes, des Capitoux, Officiers & Capitaines de la ville qui auoient eu commandement de s'y trouuer, & les pria tous de temoigner au Roy, qu'il mourroit son tres-humble subject, & avec vn regret extreme de l'auoir offensé, dont il luy demadoit pardon, comme aussi à toute ceste compagnie.

Il appella son Chirurgien, qui en luy coupant les cheveux auoit pris vn cordon de poil dont sa moustache estoit attachée, & s'en vouloit seruir pour le lier. Mr. de Montmorency se tourna vers l'Executeur, & luy dit, c'est vostre mestier, faictes-le, l'Executeur le lia, & Mr. de Montmorency luy demanda, suis je bien? l'Executeur luy respondit qu'on ne luy auoit pas coupé les cheveux assez près. Coupez les donc à

ton gré, dit-il, & son Chirurgien y voulant mettre la main, il se retira de luy, disant qu'un grand pecheur comme il estoit ne scauroit mourir avec trop dignominie, & que Iesus-Christ auoit esté non seulement batu, mais seruy par des bourreaux: L'executeur luy coupa donc les cheueux, & rōpit la chemise autour de son col pour ne pas le depouiller à demy corps, comme on a accoustumé de faire aux autres.

En fin il se mit à genoux deuant le poutreau, sur lequel il se mesura pour prédre posture, en laquelle ses blessures, dont il n'estoit pas guery ne le jettaissent point en impatience. Il receu la dernière absolution du Pere Arnoulx, il salua la Compagnie, baïsa le Crucifix, recita son (*In manus*,) se fit bander les yeux de son mouchoir, aduertit l'executeur de ne point frapper qu'il ne luy eu dit, il mit son col sur le poutreau, & les blesseures l'empeschant de demeurer ainsi, il se mit de costé, puis il dit à l'Executeur, frappe soudain. Après il dit (mon Sauueur, receuez mon ame. (L'Executeur fit son office, & d'un coup luy abbatist la teste, dès qu'il fut sur le poutreau, la Compagnie détourna les yeux, pour ne point voir le courroux pleuroient, & les Gardes iettoient les plus grands souspirs, ayans leur visage rous en larmes.

Le grand Preuost commanda qu'on ouurist les portes, le peuple être en foule pour voir le corps separé de la teste, se presse d'aproucher de l'escheffant pour cueillir le sang espanché, des vns le mettent dās leurs mouchoirs, plusieurs en boient, tous pleurēt: & ceste piece de chemise que l'Executeur auoit coupée d'alentour du col, fut diuisée en cent autres pieces, & tous s'efforçoient d'y auoir part.

Au sortir, ceux qui ont veu ce spectacle louerent la vertu Chrestienne, les autres sa generosité, & sont tous

tous d'accord, qu'on ne veid iamais tant de pieté & tant de courage.

Le Dimanche 31. dudict, arriva vn Courtier de la part de la Reyne d'Angleterre, avec lettres au Roy pour obtenir la grace dudict sieur de Montmorency. mais trop tard, & apres l'exécution, l'ont tient que si alors ce Seigneur eust esté en vie, il eust eu grace, pour la bonne affection que le Roy porte à sa Sœur;

Ainsi mourut Henry Duc de Montmorency, Pair; Marechal, & autres fois Admiral de France, petit Fils de quatre Connestables, & de six Marechaux; premier Baron de France, beau-frere du premier Prince du Sang; Oncle de deux de nos Princes. Apres auoit gaigné deux batailles, l'une nauale cōtre les Heretiques, l'autre par terre cōtre l'empire, l'Italie, & l'Espagne. En l'une il dompra les Mers, en l'autre il força les Alpes: celle là dispōsa la prise de la Rochelle; celle cy la deliurance de Casal. Depuis la Monarchie, il n'est point de Seigneur en France à qui la nature & la fortune ayent fait des plus rares presēs. Il naquit il y a trente-huict ans; le plus riche, le plus beau, & le plus noble Seigneur du Royaume.

Sa conuersation estoit rauissante, son visage aimable, sa parole charmante, vniuersellemēt: aymé, toujours dans la prosperité, & cōscu en vne reputatiō nōpareille parmy les Estrangers. Bref, qui osterà de sa vie le 22. Iuillet, le 1. de Septembre, & le 30. d'Octobre 1632. trouuera qu'elle est toute pleine de sagesse, & de bon-heur & de gloire. Dès que l'exécution fut faite, deux Ecclesiastiques Officiers de Mr le Cardinal de la Valette furent prendre le corps, & le porterent dās la Chapelle de la maison Abbatiale de S. Sernin, où la teste fut recōfue, le corps embaumé mis dans vn cerceuil de plomb, les portes ouuertes



SVR LA MORT DV DVC

de Montmorency.

SONNET.

MA R S est mort, il n'est plus que poudre,

Et ce grand Phœnis des Guerriers,

Sous vne forest de loriers

N'a sçeu guarentir du fourde.

Sa trame vient d'estre coupée,

Au regret du tout l'Vniuers.

Il ne vit plus que dans nos vers,

Ou de ce qu'a fait son espée.

Toy, qui les lis, & ne sçais pas,

De quelle facon le trespas

Attaqua ceste ame Guerriere,

Ces deux vers t'en feront scauoir;

„La parque l'a prins par derrie „

„N'osant l'attaquer par denant. „



Sizain 31. des Centuriers de Nostradamus.

Celuy qui a les hazards surmonté,

Qui fer, feu, & eau n'a iamais redouté,

Et du pays bien proche du basacle,

D'un coup de fer, tout le monde estonné,

Par Crocodrille estrangement donné,

Peuple rauy, de voir vn tel spectacle,

PARTI



*PARTICVLARITEZ REMARQVE'ES
en la mort de Messieurs de Cinq Mars;
& de Thou, à Lyon, le Vendredy 12.
Septembre 1642.*

HISTOIRE XXIII.

LA semaine passée nous fusmes icy spectateurs du dernier Acte d'une estrange Tragedie. Nous vismes mourir en place publique deux personnes qui deuoient viure plus long-temps, si leur crime ne les eust precipité dans vn malheur qu'ils n'ont pû eiter. Nous auons veu le fauory du plus Grand, & du plus Iuste des Roys, laisser sa teste sur vn échafteau en l'âge de vingt-deux ans, mais avec vne constance qui treuquera à sa peine sa pareille dans toutes nos Histoires. Nous auons veu vn Conseiller d'Estat mourir comme vn Saint, après vn crime que les hommes ne peuuent pardonner avec Iustice. Il n'y a personne au monde qui sçachant leurs conspirations contre l'Estat, ne les iuge dignes de mort: & il y aura peu de geus, qui ayant connoissance de leur condition, & de leurs belles qualitez naturelles, ne plaignent leur mal-heur. Voicy vne Relation tres-fidelle & sans fard de leur dernieres paroles & actions, que i'ay citées toutes de ceux qui les ont veües & ouyes, ayant moy-mesme esté tesmoin oculaire, & de fort pres des principales. On peut sans faire tort à la Iustice detester leur crime, & louer leur penitence.

Le Vendredy 12. Septembre 1642. Monsieur le
Chaa

Chancelier entra dás le Palais du Presidal de Lyon sur les sept heures du matin , accompagné de Messieurs les Commissaires deputez par le Roy pour les procez de Messieurs de Cinq-Mars, & de Thou , au nombre de quatorze. Sçauoir, Monsieur le Chancelier, Monsieur le premier President du Parlement de Gtenoble, avec vn autre President du mesme Parlement : Quatre Conseillers d'Estat: Vn Maistre des Requestes ; Et six Conseillers dudit Parlement de Dauphiné .

Monsieur le Procureur general du Roy audit Parlement faisoit icy la charge de Procureur du Roy.

Comme ils furent dans la Chambre du Conseil, le Cheualier du Guet fut enuoyé avec sa Cōpagnie au Cstasteau de Pierre Cize, pour faire venir Monsieur de Cinq-Mars, lequel fut amené au Palais sur les 8. heures dans vn carosse de louange. Entrant dans le Palais il damanda: *On sommes nous.* On luy dit, qu'il estoit au Palais, dequoy il se contenta , & monta l'escalier avec beaucoup de resolution.

Il fut appelé dans la chambre de Conseil deuant les Iuges , où il demeura enuiron vne heure & vn quart; en estant sorty, il témoigna quelque agitation desprit, regardant d'vn costé & d'autre , & saluant tous ceux qu'il rencontroit à son passage. Il fit trois ou quatre tours; se pourmenant depuis la grande sale de l'Audience, iusqu'à la chambre qui est vis à vis de cette sale regardât sur la riuere. Le Lieutenant des Gardes du Corps qui auoit la charge de sa persōne, l'ayant prié de ne point sortir de la grande sale, il dit. *Et bien il y faut donc demeurer.* Il s'y pourmena quelque temps à grands pas , soupirant quelques fois, & leuant les yeux en haut.

Enuiron 9. heures, Monsieur le Chancelier en-

uooya le Cheualier du Guet querir Mōsieur de Thou au mesme Chasteau de Pierre-Cize, & dans le mesme carrosse de loüage. Pendant quoy Monsieur le Grand estant vne leconde fois appellé pour entrer deuant les Iuges, il dit en y allant : *Mon Dieu, ne sera ce iamais fait ?* Quand il en sortit, il témoigna vne plus grande fermeté d'esprit qu'auparauant. Quelque temps apres Mōsieur de Thou estant arriué, demanda vn doigt de vin, & puis entra dans la Chambre, y estant apellé. On dit qu'estant interrogé s'il n'auoit point sçeu la conspiration de Monsieur de Fiac, il respondit en ces terme.

Messieurs, ie vous puis nier absolument que ie l'aye sceuë, & il n'est pas en vostre pouuoir de me conuaincre de faux, puisque Monsieur de Cinq-Mars seul le peut témoigner; car ie n'en ay ny parlé, ny escrit à homme du monde : Or Monsieur de Cinq-Mars estant accusé & complice ne peut pas estre vn bon tesmoin, ny suffisant pour me conuaincre, puisqu'il en faut deux irreprochables pour condamner vn homme. Et ainsi vous voyez que ma vie & ma mort, ma condamnation; ou absolution; selon les Loix & la Iustice, dependent de moy; Pourtant Messieurs, ie l'aduoue, & ie confesse que i'ay sçeu cette conspiration, & en suite ie me tens coupable, & ce pour deux raisons.

La premiere est, parce que durant les trois mois de ma prison i'ay estudié la mort, & ay considéré de pres la vie; & i'ay conneu tres-clairement, que de quelque vie dōt ie puisse iamais iouyr en ce monde, elle sera tousiours malheureuse: le visage de la mort m'a semblé plus beau, & ie l'ay treuuee plus aduantageuse, i'ay embrassée comme vne grande preuue de ma predestination; i'ay creu que Dieu me faisoit tant

rant de graces, i'aurois peut-estre quelque iour regret d'auoir laissé échapper cette belle occasion, de laquelle ie me veux seruir pour mon salut.

La seconde raison qui me porte à me vouloir condamner moy-mesme, c'est que si l'on considere mon crime d'un certain biais, il ne paroistroy ny si noir ny si énorme, ny si estrange, comme il semble d'abort: Il est vray, i'ay scen cettere conspiration; mais i'ay faic tout ce que i'ay pû pour la dissuader: Il m'a creû son amy & fidel, & peut-estre vnique: il ma tout confié, ie ne l'ay point voulu trahir: Et pour cela, ie merito la mort, ie me condamne moy-mesme.

On r'appella dans la chambre Monsieur le Grand pour estre confronté à Monsieur de Thou, où ils demurerent plus d'une heure, Monsieur le Grand en sortit le premier, & quelque temps apres Monsieur de Thou.

Vne heure apres ou enuiron, Monsieur de Laubardemont Conseiller d'Estat (qui estoit le Rapporteur) & Monsieur Robert de S. Germain Conseiller au Parlement de Grenoble, sortirent de la chambre pour disposer les Prisonniers à la lecture de leur Arrest, & les resoudre à la mort, ce qu'ils firent, les exhortas de r'apeler toutes les forces de leur esprit & de leur courage, pour tesmoigner de la resolution dans vne occasion qui estonne les plus constans. A cette nouuelle ils affermirent leur esprit, & témoignèrent vne resolution extraordinaire, aduoüans eux mesmes que veritablemēt ils estoient coupables, & meritoient la mort, laquelle ils estoient bien resolus. Icy Monsieur de Thou dit à Monsieur de Cinq-Mars en souffrant: Et bien Monsieur, humainement ie pourrois me plaindre de vous: vous m'auiez accusé, vous me faites mourir: mais Dieu scait combien

ie vous en aymer:mourons Monsieur,mourons courageusement,& gagnons le Paradis.Ils s'embrassèrent l'un l'autre d'une grande tendresse , s'entredifans,que puis qu'ils auoient esté si bons amis durât leur vie , ce leur seroit vne grande consolation de mourir ensemble.

Après ils remercierent ces Messieurs les Cōmissaires, lesquels Monsieur de Thou embrassa , & les asseurerēt qu'ils n'auoient aucun regret de mourir, & qu'ils esperoient que cette mort seroit le commencement de leur bon-heur. En suite on appella Palerne,Greffier Criminel du Presidial de Lyō pour leur pronōcer leur Arrest, lequel s'approchāt, Monsieur de Thou s'écria. *Quam speciosi pedes euangelizantium pacem , euangelizantium bona !* s'estans mis tous deux à genous, teste nuë, l'Arrest leur fut prononcé en ces mots.

ENTRE le Procureur general du Roy Demandeur en cas de Crime de leze Maieité, d'une part:

Et Messire HENRT DESFIAT DE CINQ-MARS , Grand Escuyer de France , & FRANCOIS AVGVSTE DE THOU , Conseiller du Roy en son Conseil d'Estat , Prisonniers au Chasteau de Pierre-Cize de Lyon , Deffendeurs Accusés d'autre.

VEV le Procez extraordinairement fait à la Requête dudit Procureur general du Roy,à l'encontre desdits Desfiat & de Thou , Informations , Interrogations, Confessions , Denegations , & Confrontations,Coppies reconnues du Traité avec l'Espagne,& de laContrelettre faite ensuite dudit Traité; en date du 13.Mars dernier , Arrest du 6.de ce mois de Septembre,&pieces contenuës en iceluy& tout ce que leProcureur general du Roy à produit

& remis: Ledit Desfiat oüy & interrogé en la Chambre du Conseil du Presidial de Lyon, sur les cas à luy imposez, sa Declaration, Reconnoissance, Confession, & Confrontation dudit Desfiat audit de Thou, contenant aussi l'adueu, reconnoissance, & confession d'iceluy de Thou: Ledit de Thou pareillement oüy & interrogé en ladite Chambre, Conclusions dudit Procureur general du Roy; & tout considéré :

LES COMMISSAIRES Depurez par sa Majesté, auxquels Monsieur le Chancelier à presidé, faisant droit sur les Conclusions dudit Procureur general : *ONT DECLARE* ledit Desfiat, & de Thou attains & conuaincu du crime de leze-Majesté: sçauoir ledit Desfiat pour les conspirations & entreprises, prodicions, ligue, & traitez, par luy avec les estrangers contre l'Estat: ledit de Thou pour auoir eu connoissance & participation desdites conspirations, entreprises, prodicions, ligue, & traitez: Pour reparation desquels crimes, les ont priuez de tous Estats, honneurs & dignitez, & les ont condamméz & condamnéz d'auoir la teste tranchée sur vn échafaut, qui pour cet effect sera dressé en la place des Terreaux de cette ville: Ont déclaré & déclarent tous & chacuns leurs biens immeubles, generallyment quelconques, en quel lieu qu'ils soient situez, acquis & confisque au Roy, & ceux par eu tenus immediatement de la Couronne reünis au Domaine d'icelle: Sur iceluy preallablement prise & leuée la somme de soixante mil liures, applicable à ceuures pies. Et neantmoins ordonnent que ledit Desfiat, auant l'exécution sera appliqué à la question ordinaire, & extraordinaire, pour auoir plus ample reuelation de ses complices.

prononcé le 12. iour du mois de Septembre. 1642.

Après la prononciation de l'Arrest, Monsieur de Thou dit d'un grand sentiment, Dieu soit loué, & dit en suite plusieurs belles paroles d'une ferveur incroyable qui luy dura iusques à la mort.

Monsieur de Cinq Mars après la lecture s'estant lené dit : La mort ne m'estonne point, mais il faut aduoüer que l'infamie de cette question choque puissamment mon esprit. Oüy Messieurs, ie trouue ceste question tout à fait extraordinaire à vn hōme de ma condition & de mon âge, ie croy que les Loix m'en dispensent, au moins ie lay oüy dire. La mort ne me fait point peur, mais Messieurs. j'auouë ma foiblesse, j'ay de la peine à digerer ceste question.

Ils demanderēt chacun leur Confesseur; sçauoir Monsieur de Cinq Mars le P. Malaualette, Iesuite, & Monsieur de Thou le P. Mambrun, aussi Iesuite. Celui qui iusqu'alors auoit eu la charge de les garder, les remit par l'ordre de Monsieur le Chancelier entre les mains du Sieur Thomé Preuost general des Mareschaux de Lyonnois, puis prit congé d'eux, & en suite tous leurs Gardes, tous les larmes aux yeux. Monsieur de Cinq-Mars les remercia, & leur dit mes amis ne pleure point, les larmes sont inutiles, priez Dieu pour moy, & assurez vous que la mort ne me fit iamais peur. Monsieur de Thou les baïsa & embrassa tous. Ils sortirent du Palais les yeux baignez de larmes, se couvrans le viage de leurs manreux. Après quoy les condannez allerent embrasser Monsieur de Thomé & luy firent compliment.

Le P. Malaualette venu, Monsieur de Cinq Mars l'alla embrasser, & luy dit : Mon pere, on me veut donner la question, j'ay bien de la peine à m'y resoudre, le Pere le consola & fortia son esprit autant qu'il

qu'il pût dans ce facheux rencontre. Il se resolut en fin, & comme Monsieur de Lambardemont & le Greffier le vindrent prendre pour le mener dans la chambre de la gescne, il se rassura, & passa près de Monsieur de Thou, il luy dit froidement: Monsieur, nous sommes tous deux condemnez à mourir; mais ie suis bien plus mal-heureux que vous, car outre la mort ie dois souffrir la question ordinaire & extraordinaire.

On le mena en la chambre de la gescne, & passant par vne chambre des Prisonniers, il dit: *Mon Dieu, ou me menez vous.* Et puis *Ab! qu'il sent mauvais icy.* Il fut environ vne demy heure dans la chambre de la gescne, puis on le ramena sans auoir esté tiré d'autant que par le *Rétentum* de l'Arrest, il auoit esté dit, qu'il seroit seulement présenté à la question.

Au retour son Rapporteur luy dit adieu dans la sale de l'Audience avec les larmes aux yeux, apres auoir parlé quelque temps ensemble.

Après quoy Monsieur de Thou l'alla embrasser l'exhortant de vouloir mourir constamment, & de ne point apprehender la mort: Il luy repartit qu'il ne l'auoit iamais appréhédée, & quelque mine qu'il eust faite depuis sa prise, il auoit tousiours cru qu'il n'en eschapperoit pas. Ils demurerent ensemble environ vn petit quart d'heure, pendant lequel temps il s'embrasserent deux ou trois fois, & se demanderent pardon l'un à l'autre, avec des demonstrations d'amitié tres-parfaicte, leur conference finit par ces mots de Monsieur de Cinq-Mars: *Il est temps de mettre ordre à nostre salut.*

Quittant Monsieur de Thou, il demanda vne chambre à part pour se confesser, qu'il eut peine d'obtenir. Il fit vne confessio generale de toute sa

vic, avec grandere pentance de les pechez, & beaucoup de sentimens d'auoir offensé Dieu. Il pria son Confesseur de témoigner au Roy, & à Monseigneur le Cardinal, les regrets, qu'il auoit de sa faute, & comme il leur en demandoit tres-humblement pardon.

■ Sa confession dura enuiron vne heure, à la fin de laquelle il dit au Pere, qu'il n'auoit rié pris il y auoit 24. heures. Ce qui obligea le Pere de faire apporter des œufs frais & du vin, mais il ne prit qu'un morceau de pain, & un peu de vin trempé d'eau, duquel il ne fit que se leuer la bouche. Il temoigna à ce Pere que rien ne l'auoit tant estonné que de se voir abandonné de tous ses amis; ce qu'il n'auoit iamais crû, & luy dit que depuis qu'il auoit eu l'honneur des bonnes grâces du Roy, il auoit tousiours tasché à faire des amis, & qu'il s'estoit persuadé d'y auoir reüssi: mais qu'il connoissoit enfin qu'il ne s'y falloit pas fier, & que toutes les amitez de Cour n'estoient que dissimulations. Le Pere luy respondit: que telle auoit tousiours esté l'humeur du monde, qu'il ne s'en falloit point estonner. Et en suite il luy cita ce vieux distique d'Ouide.

Donec eris felix, multos numerabis amicos:

Tempora si fuerint nubila, solus eris.

Il se le fit repeter deux ou trois fois, tant il le trouua à son gré, & l'ayant appris par cœur, le repeta quelque fois.

Il demanda du papier & d'encre pour écrire, comme il fit, à Madame la Maréchale sa mere, qu'il prioit entr'autres choses de vouloir payer quelques siennes debtes, dont il luy éuoya les memoires, qu'il remit au Pere, pour faire voir à Mr. le Chancelier. Le principal sujet de ses Lettres fut la priere qu'il

qu'il fit de faire dire quantité de messes pour le salut de son ame; il les finit ainsi. Au reste Madame, autant de pas que ie vay faire, ce sont autant de pas qui me portent à la mort.

Cependant M. de Thou estoit en la sale de l'Audience avec son Confesseur dans des transports diuins difficiles à exprimer. D'abord qu'il vit s^{on} Cōfesseur il courut l'embrasser avec ces parolles. Mon Pere, ie suis hors de peine, nous sommes condamnés à mort, & vous venez pour me mener dans le Ciel: Ah qu'il y a peu de distance de la vie à la mort Que c'est vn chemin bien court. Allons mon Pere, allons à la mort, allons au Ciel, allons à la vray gloire. Helas quel bien puis- ie auoir fait en ma vie qui m'ait p^u obtenir la faueur que ie reçois auourd'huy de souffrir vne mort ignominieuse, pour arriuer plustost à la vie eternellement glorieuse: Je me seruiray icy de la relation naïue de ce bon Pere qui nous a fait part de ce qu'il en a remarqué. Voicy comme il parle.

Mr. de Thou me voyant pres de soy en la sale de l'Audience, il m'embrassa, & me dit qu'il estoit cōdāné à mort, qu'il falloit bien employer le peu de tēps qui luy restoit de vie, & me pria de ne le point quirter, & de l'assister iusqu'à la fin. Il me dit encor: Mon Pere, depuis qu'on m'a prononcé ma sentēce ie suis plus content & plus tranquille qu'auparauāt: l'attente de ce qu'on ordōneroit, & de l'ysuē de cēt affaire, me tenoit en perplexité & inquietude, maintenant ie ne veux plus penser aux choses de ce monde: mais au Paradis, & me disposer à la mort. Je n'ay aucune amertume ny mal-veillance contre persōne: Mes Iuges m'ont iugé en gens de bien, équitablement, & selon les Loix; Dieu s'est voulu seruir

d'eux pour me mettre en son Paradis, & m'a voulu prendre en ce temps auquel par sa bonté & misericorde ie croy estre bien disposé à la mort. Je ne peux rien de moy-mesme, ceste constance & ce peu de courage que j'ay, prouient de sa grace.

Après il se mit à faire des actes d'amour de Dieu, contrition, & repentance de ses pechez & plusieurs Oraisos iaculatoires.

Il faut icy remarquer que durant les trois mois de sa prison, il s'estoit disposé à la mort par la frequentation des Sacremens: par l'Oraison, meditatio & consideration des mysteres Diuins, par la communication avec les Peres spirituels, & lecteurs des liures de deuotion, particulièrement du liure de Bellarmin sur les Pseaumes, & du liure. *De arte bene moriendi* du mesme Autheur.

Il choissoit pendant ce temps certains versets des Pseaumes, pour faire les Oraisos iaculatoires & éléuations d'esprit, qu'il disoit & reperoit souuent fort deuotement, & me disoit qu'il entendoit & penetroit beaucoup mieux, & avec plus de ressentiment en cette sienne affliction ces sentences de la sainte Escriture qu'auparauant.

Il rendoit graces à Dieu, & admiroit sa diuine bonté & prouidence, qui luy donnoit tant de commoditez, & vn temps si propre pour se disposer à la mort; qui n'auoit pas permis qu'il mourust lors qu'il estoit en peché mortel & en mauuais estat, & deux ou trois fois se recommanda à mes prieres (ce fut le Mercredy 10. de ce mois) & me pria de demander à Dieu, non pas qu'il fust deliuré de ce danger present de la mort auquel il se voyoit: mais que la volonté de Dieu fust faite & accomplie en luy.

Il recitoit souuent avec beaucoup de ressentimēt

le Pſalme 115. *Credidi propter quod locutus sum ego autem humiliatus sum nimis : Et particulièrement ce verset. Dirupisti vincula mea, tibi sacrificabo hostiam laudis, & nomen Domini innocabo.* Rendant graces à Dieu fort affectueusement de ce que par sa miséricorde il avoit rompu les liens qui le tenoient attaché à la terre & à cette vie.

Il disoit aussi & reiteroit souvent quelque autres passages de la sainte Escriure, avec des grâds sentimens de deuotion & ferueur desprit, particulièrement ceux icy tirez du Chapitre 4. de la seconde Epistre de Saint Paul aux Corinthiens.

Id enim quod in presenti est momentaneum & lene tribulationis nostra, supra modum in sublimitate eternum gloriae pondus operatur in nobis; non contemplantibus nobis quae videntur, sed quae non videntur: Qui enim videntur temporalia sunt, quae autem non videntur, aeterna sunt.

Comme aussi ces beaux mots du Chapitre 8. de l'Epistre aux Romains: *Quis ergo nos separabit à charitate Christi? tribulatio, an angustia? an fames? an nuditas? an periculum? an persecutio? an gladius? sicut scriptum est, quia propter te morificamur tota die; aestimati sumus sicut oves occisionis: sed in his omnibus superamus propter eum qui dilexit nos: Il repetoit aussi souvent ce verset du Pſalme 50. *Sacrificium Deo spiritus contribulatus: cor contritum & humiliatum Deus non despicies.**

Ces mesmes versets de l'Escriure luy seruoient d'entretien dans la sale de l'Audience, apres la prononciation de son Arrest: il les proferoit avec de grands sentimens d'amour de Dieu, & avec un grand mépris de toutes les vanitez du monde.

Il saluoit tous ceux qu'il voyoit en cette sale où

nous estions, se recommandoit à leurs prieres, leur témoignoît qu'il mouroit content, & que ses Iuges l'auoient iugé equitablement, & selon les formes & ordres des Loix.

Voyant venir Monsieur de Laubardemont qui auoit esté le Rapporteur du procez, il alla au deuant de luy, l'embrassa, & le remercia de son Iugement, luy disant: *Vous m'auex iugé en homme de bien*, Et ce avec tant de tendresse & de cordialité, qu'il tira les larmes non seulement des yeux des assistans & de ses Gardes, mais encor de son Rapporteur, qui pleuroit à chaudes larmes en l'embrassant.

Vn homme enuoyé de la part de Madame de Pôrac sa Sœur, luy vint dire ses derniers adieux: Monsieur de Thou croyant que ce fust l'exécuteur de la Iustice, courut à luy, & l'embrassa, luy disant: c'est toy qui me dois aujourd'huy enuoyer dans le Ciel: Mais ayant esté aduerty que c'estoit vn homme enuoyé de la part de Madame sa Sœur: Il luy dit, mon amy ie te demande pardon, il y a si long-temps que ie ne t'auois veu que ie te méconnoissois: Dis à ma Sœur que ie la prie de continuer en ses deuotions, comme elle a fait iusqu'à present, que ie connois maintenant mieux que iamais, que ce monde n'est que mensonge & vanité, & que ie meurs tres-content & en bon Chrestien, qu'elle prie Dieu pour moy, & qu'elle ne me plaigne point, puisque j'espère treuuer mon salut en ma mort. Adieu. Cét homme se retira sans pouoir dire vne seule parole.

Il sentoit vne force & vn courage si extraordinaire à bié souffrir cette mort, qu'il craignoit qu'il n'y eust de le vanité: & se tournant vers moy, me dit: Mon Pere, n'y a il point de vanité en cela? Mon Dieu ! ie proteste deuant vostre diuine Majesté, que
 moy mesme

moy mesme ie ne puis rien , & que toute ma force vient tellement de vostre bonté & misericorde, que si vous me delaisiez ie tomberois à chaque pas.

Il se confessa à moy au bout de la Sale , apres sa Confession il continua ses eleuations d'esprit en Dieu, & discours spirituels avec vn grand soin de bien employer le temps qui luy restoit.

Iusques icy sont les paroles du P. Mambrun confesseur de Mr. de Thou. Son Compagnon remarqua que comme il se pourmenoit dans la Sale de l'Audience , il dit Hé bien , on dira que ie suis vn poltron & vn estourdy , que ie n'ay point eu de conduite, que ie n'ay pas Iceu mesnager mes affaires: Et c'est ce que ie desire : Je veux bien qu'on ait cette opinion là de moy, qu'on me blasme, ie le souhaite pour l'amour de Dieu.

Après sa Confession , il fût visité par le P. Iean Terrasse, Gardien du Couuent de l'Obseruance de S. François de Tarascon , qui l'auoit assisté & consolé durant sa prison de Tarascon. Il fut bien aise de le voir, se pourmena avec luy & son Confesseur quelque temps dans vn entretiẽ spirituel. Ce Pere estoit venu à l'occasion d'un vœu que Monsieur de Thou auoit fait à Tarascon pour sa deliurance , qui estoit de fonder vne Chapelle de trois cens liures de réte annuelle dans l'Eglise des Peres Cordeliers de cette ville de Tarascon. Il donna ordre pour cette fondation, voulant s'acquitter de son vœu, puisque Dieu (disoit il) le deliuroit non seulement d'une prison de pierre, mais encore de la prisõ de son corps. Demanda de l'encre & du papier, & escriuit iudicieusement cette belle inscription, qu'il voulut estre mise en cette Chapelle.

CHRISTO

CHRISTO LIBERATORI

Votum in carcere pro libertate conceptum.

FRANC. AVGVST. THVANVS.

à Carcere vitæ iam liberandus
meritò soluit

XII. Septemb. MDC. XLII.

*Confitebor tibi Domine quoniam exaudisti me, &
factus es mihi in salutem.*

Cette inscription fera admirer la presence & la netteté de son esprit, & fera admirer à ceux qui la considereront que l'apprehension de la mort n'a pas eu le pouuoir deluy causer aucun trouble. Il pria Mr. Tomé de faire cōpliment de sa part à Mr. le Cardinal de Lyon, & luy témoigna que s'il eust plu à Dieu de le sortir de ce peril, il auoit de ssein de quitter le monde, & se donner entierement au service de Dieu.

Il escriuit deux Lettres, qui furent portées ouuertes à Mons. le Chancelier, & puis remises entre les mains de son Confesseur pour les faire tenir. Ces Lettres estant fermées il dit : *Voila la derniere pensée que ie veux auoir pour le Monde, parlons du Paradis.* Et deslors il reprit sans interruption, avec la mesme ferueur d'esprit ses discours spirituels, & se confessa vne seconde fois. Il demandoit par fois, si l'heure de de partir pour aller au suplice aprochoit, quand on les deuoit lier & prioist que l'on l'aduertit quand l'executeur de la Iustice seroit là, afin de l'embrasser. mais il ne le vid point que sur l'échafaut.

Sur les trois heures apres midy, quatre Compagnies de Bourgeois de Lyon (qu'ils appellent Penomages) faisoient environ douze cens hommes, furent rangées au milieu de la place des Terreaux en sorte qu'elle enfermoient vn espace quarré d'environ quatre vingts pas de chaque costé, dans lequel on ne laissoit entrer personne, que ceux qui estoient necessaires.

Au milieu de cet espace fut dressé vn échaffaut de sept pieds de hauteur, & environ neuf pieds en quarré: au milieu duquel vn peu plus fut le deuant s'éleuoit vn poteau de la hauteur de trois pieds, ou environ: deuant lequel on coucha vn bloc de la hauteur d'un demy pied, si que la principale face, ou le deuant de l'échaffaut regardoit vers la boucherie des Terreaux du costé de Saone: contre lequel échaffaut on dressa vne petite eschelle de huit eschelons. du costé des Dames de S. Pierre. Toutes les maisons de ceste place, routes fenestres, murailles, toits, échaffauts dressés, & generallyment toutes les éminences qui ont esté sur cette place quoy que fort éloignées, estoient chargées de personnes de toutes conditions, âges, & sexes.

Environ les cinq heures du soir, les Officiers prirent le Compagnon du P. Maluallette de le vouloir adueitir qu'il estoit temps de partir. Monsieur Cinq-Mars voyant ce Frere qui parloit à l'oreille de son Confesseur, iugea bien ce qu'il vouloit. On nous presse, dit-il, s'en faut aller. Pourtant vn des Officiers l'entretint encor quelque temps dans cette chambre, d'ou sortant, le valet de chambre qui l'auoit seruy depuis Montpellier, se presenta à luy, luy demandant quelque recompence de ses seruices: le n'ay plus rien, luy dit-il i'ay tout donné. De là il

vint vers Mr. de Thou en la sale de l'Audience, di-
ant ; *Allons Monsieur , Allons il est temps.* Mr. de
Thou alors s'écria : *Latatus sum in his qua dicta sunt*
mibi , in domum Domini ibimus. Là dessus ils s'em-
brasserent , puis sortirent.

Mr. de Cinq-Mars marchoit le premier tenant le
P. Malaualette par la main iusques sur le Perron, où
il salua avec tant de bonne grace , & de douceur
tous le peuple , qu'il tira les larmes des yeux d'un
chacun : luy seul demeura ferme sans s'émouvoir ,
& garda cette fermeté d'esprit tout le lon du che-
min , iusques là que voyant son Confesseur surpris
d'un sentiment de tendresse à la veüe des larmes de
quelques personnes : Qu'est-ce à dire cecy mon
Pere ; luy dit-il , vous estes plus sensible à mes
interests que moy.

Monf. Tomé Preuost de Lyon, avec les Archers de
Robecourte & le Cheualiet du Guet avec la Com-
pagnie, eurent ordre de les mener au supplice.

Sur les degrez du Palais Mr. de Thou voyant vn
carrosse qui les attendoit, dit à Mr. de Cinq Mars :
Quoy Monsieur , on nous meine en carrosse, va on com-
me cela en Paradis ? Je m'attendois bien d'estre lié &
trainé sur vn tombereau , ces Messieurs nous trait-
tent avec grande ciuilité de ne nous point lier, & de
nous mener en carrosse. Comme il y entroit il dit à
deux Soldats du Guet : Voyez mes amis , on nous
meine au Ciel en Carrosse.

Mr. de Cinq-Mars estoit vestu d'un bel habit de
drap d'Hollande fort brun , couuert de dentelles
d'or , larges de deux doigts , vn chapeau noir re-
troussé à la Catalane , des bas de soye verds , & par
dessus vn bas blanc avec de la dentelle , & vn man-
teau d'écarlatte.

Mr. de Thou estoit vestu d'un habit de dueil de drap d'Espagne ou d'Holande , avec vn manteau court.

Ils se mirent tous deux au fond du Carrosse sur le derriere , M. de Thou estant à droite de Mr. de Cinq-Mars, y ayant deux Iesuites à chaque portiere. Sçavoir, leurs deux Cōfesseurs avec leurs Freres. Il n'y auoit personne sur le deuant du carrosse.

L'executeur suiuoit à pied , qui estoit vn portefaix (qu'ils appellent à Lyon Gagnedeniers) homme âgé, fort mal fait, vestu comme vn manouvrier qui sert les maisons , qui iamais n'auoit fait aucune execution sinon de donner la gesne , duquel il fallut se seruir, parce qu'il n'y auoit point d'autre executeur; celui de Lyon se trouuant auoir la jambe rompue.

Dans le carrosse ils reciterent avec leurs Confesseurs les Litanies de N. Dame, le *Miserere* , & autres Prieres & Oraisons iaculatoires, firent plusieurs actes de contrition , & d'amour de Dieu , rindrent plusieurs discours de l'Eternité, de la constance des Martyrs, & des tourmens qu'ils auoient soufferts. Ils saluoient fort ciuilemēt de temps en temps le peuple qui remplissoit les ruës par ou il passoient. Mr. de Thou demanda encor vne fois pardon à Mr. de Cinq-Mars avec humilité , luy disant Mr. ie vous demande tres-humblement pardon , si i'ay esté si malheureux que de vous auoir offensé en quoy que ce soit. Helas Mr. c'est moy, répondit Mr. de Cinq-Mars, qui vous ay offensé , & ie vous en demande pardon, & là dessus ils s'embrasserent tendrement.

Quelque temps apres Mr. de Thou dit à Mr. de Cinq-Mars , Mr. il semble que vous deuez auoir plus de regret de mourir que moy, vous estiez plus ieune ,

jeune, vous estiez plus grand dans le monde, vous aviez de plus grandes esperances, vous estiez le favori d'un grand Roy : mais ie vous assure pourtant Mr. que vous ne devez point regretter tout cela, qui n'est que du vent, car assurément nous nous allions perdre, nous nous fussions damnez, & Dieu nous veut sauver. Le riens nostre mort pour vne marque infallible de nostre predestination, pour laquelle nous avons beaucoup plus d'obligation à Dieu, que s'il nous avoit donné tous les biens du monde, nous ne le sçaurions jamais assez remercier, Ces paroles émeurent M. de Cinq-Mars presque jusqu'aux larmes.

Après il continua : Monsieur mon cher amy qu'avons nous fait de si agreable à Dieu durant nostre vie, qui l'ait obligé de nous faire cete grace de mourir ensemble, de mourir comme son fils, d'effacer tous nos pechez par un peu d'infamie, de conquérir le Ciel par un peu de bonné: Ah ! n'est-il pas vray que nous n'avons rien fait pour luy? Fondons nos cœurs, épuisons nos forces en Actions de graces: Recevons la mort avec toutes les affections de nos ames, Mr. de Cinq-Mars respondoit à tout ce cy par divers actes de vertu, de foy, de contrition, d'amour de Dieu, de resignation, & autres.

Ils demandoient de temps en temps s'il estoient encorés bié loing de l'échafaut; Sur quoy le P. Malauallette prit occasion de demander à M. de Cinq-Mars, s'il craignoit point la mort; point du tout, mon Pere, respondit-il: Et c'est ce qui me donne de l'apprehension de voir que ie n'en ay point. Helas ie ne crins rien que mes pechez. Cette crainte l'avoit fort ment touché depuis sa confession generale.

Et comme le Pere l'eust assuré sur la bonné de Dieu,

Dieu, & sur la passion du Sauueur, luy disant de plus, qu'acceptant de bon cœur cette mort ignominieuse, il pouuoit estre certain d'entrer bien auât dans la gloire. O que Dieu est bon dit-il plusieurs fois, de me vouloir receuoir en sa grace apres l'auoir tant & tant offensé. Mais mon Pere, dit-il, comme puis-je meriter par cette mort, qui n'est point à m^o choix? car il estoit aux choix des martyrs de ne pas mourir. Le Pere luy ayant respondu qu'il la pouuoit rendre meritoite en acceptant volontairement, & offrir à Dieu par amour ce supplice infame, celuy des Martyrs estant honorable, il offrit à Dieu son supplice tant de fois par le chemin que son Confesseur n'en remarqua pas le nombre.

Comme ils approchoient de la place des Terreaux, le Pere Mambrun aduertit Mr. de Thou de se souuenir sur l'échafaut de gagner l'Indulgence plenièrè, par le moyen d'une medaille qu'il luy auoit donnée disant trois fois *Je s u s*. Lors Mr. de Cinq-Mars entendant cecy dit à Mr. de Thou: Monsieur, Puisque ie dois mourir le premier, donnez moy vostre Medaille pour la joindre aux miennes, afin que ie m'en serue le premier, & puis on les vous conservera. Et en suite ils contestoient eux deux à qui mourroit le premier: Mr. de Cinq-Mars disant que c'estoit à luy, comme estant le plus coupable, & le premier jugé, adioustant que ce seroit le faire mourir deux fois s'il mourroit le dernier. Mr. de Thou demandant ce droit comme plus âgé: le P. Malualette, prir la parole, & dit à Mr. de Thou: Il est vray, Monsieur, que vous estes le plus vieux, & vous devez estre aussi le plus genereux: Ce que M. de Cinq-Mars ayant confirmé: Bien Mr. reparti Mr. de Thou, vous voulez mourir le chemin à la gloire. Ah! dit

Mr. de Cinq Mars, ie vous ay ouuert le principal mais precipitons-nous dans la mort pour surgir à la vie eternelle. Le P. Malualette termina leur different en faueur de Mr. de Cinq-Mars, iugeant qu'il estoit plus à propos qu'il mourust le premier.

Estant proches de l'eschafaut, ou remarqua que Mr. de Thou s'estant baissé & ayant veu l'eschafaut estendit ses bras, & puis frappa des mains l'une contre l'autre, d'une action viue & d'un visage joyeux, comme s'il fut resioüy à cette veüe, & dit à Mr. de Cinq-Mars : Monsieur, c'est icy Mr. que nous devons aller en Paradis, & se tournant à son Confesseur : Mon Pere, est-il bien possible qu'une creature si chetive comme moy doüe aujourd'huy prendre possession d'une eternité bien-heureuse ?

Le carrosse s'arresta au pied de l'eschafaut, & le Preuost estant venu dire à Monsieur de Cinq-Mars que c'estoit à luy de monter le premier, il dit Adieu à Monsieur de Thou, & se congedierent d'une grande affection, disans qu'ils se reueroient bien-tost en l'autre monde, où ils seront eternellement vnis avec Dieu. Ainsi Monsieur de Cinq-Mars descendit du Carrosse, & parut la teste leuée & d'un visage gay. Un Archer du Preuost s'estant présenté pour luy prendre son manteau, disant qu'il leur appartenoit, son Confesseur l'en empescha, & demanda au Sr. Preuost si les Archers y auoient droit ; luy ayant dit que non, le Pere dit à Monsieur de Cinq-Mars : qu'il disposast de son manteau comme il luy plairoit : lors il le donna au Iesuite qui accompagnoit son Confesseur, disant qu'il le donnoit pour faire prier Dieu pour luy.

Icy apres les trois son de trompette ordinaire, Palerne Greffier Criminel de Lyon, estant à cheual
 asse

assez près de l'échafaut, lût leur Arrest, que ny l'un ny l'autre n'escouterent point. Pendant quoy on abbatit le mâtelet de la portiere du carrosse qui regardoit l'eschafaut; afin d'en oster la veüe à Monsieur de Thou, qui demeure dans le carrosse avec son Confesseur & son compagnon.

Monsieur de Cinq Mars ayant saluë ceux qui estoient près de l'eschafaut se courrit, & monta gayement l'eschelle. Au second échelon vn Archer du Preuost s'auança à cheual, & luy osta par derriere son chapeau de dessus la teste: lors il s'arresta tout court, & se tournant dit: *laisse moy vn chapeau*. Le Preuost qui estoit près, se fâcha contre son Archer qui luy remit en mesme temps s^{on} chapeau sur la teste, qu'il accommoda cōme mieux luy sembloit, puis acheua de monter courageusement.

Il fit vn tour sur l'échafaut comme s'il eüst fait vne demarche de bonne grace sur vn théâtre, puis il s'arresta, & salua tous ceux qui estoient en la veüe d'un visage riant, apres s'estant couuert, il se mit en vne fort belle posture, ayant avancé vn pied, & mis la main au costé, il considéra haut & bas toute cette grande assemblée d'un visage assuré, & qui ne témoignoît aucune peur, & fit encor deux ou trois belles demarches.

Son Confesseur estant monté il le salua, puis ietta son chapeau deuant luy sur l'échafaut, & baissant la main la presenta à son Confesseur, puis il embrassa estroitement ce Pere, qui pendant cet embrassement l'exhorta d'une voix basse de produire quelques acte d'amour de Dieu (à ce qu'il m'a dit) ce qu'il fit d'une grande ardeur parlant bas, tenant son bras gauche presque sur l'épaule droite de s^{on} Confesseur, ested^u droit en bas le long de son manteau. Il demeura as-

sez long temps en cette posture, tenât le plus souvent les yeux leuez au Ciel, vn visage tousiours riant, pendant que son Confesseur luy parloit fort bas à l'oreille, ie luy entendis plusieurs fois repeter ces poroles : *Ouy mon Pere, & de tout mon cœur, vn milion de fois, & autres semblables.* Puis de la main droite il prit vn Crucifix que le compagnon du Confesseur luy offrit. le baïsa avec ardeur au pieds, & le luy rendit en mesme temps.

De là il se mit à genoux aux pieds de son Confesseur, qui luy donna la derniere absolution, laquelle ayant receuë avec humilité, il se leua & s'alla mettre à genoux sur le bloc & demanda. *Est-ce icy mon Pere où il me faudra mettre; & comme il sceut que c'estoit là il y essaya son col, l'appliquant sur le poteau: Puis s'estant reueu il demanda s'il falloit oster son pourpoint, & cōme on luy en dit qu'ouy, il se mit en deuoir de se deshabiller, & dit: Mon Pere ie vous prie aydez moy.* Lors le Pere & son compagnon luy aiderent à le deboutonner, & luy oster son pourpoint. Il garda tousiours ses gans aux mains que l'executeur luy osta apres la mort.

Si tost qu'il eut mis bas son pourpoint, il s'approcha du poteau avec allegresse, & tout debout essaya si son col iroit bien sur le poteau, par deux fois: puis s'en estant vn peu éloigné, il prit le Crucifix, le baïsa aux pieds & le rendit, & estendant ses bras, il s'alla ietter de bonne grace à genoux sur le bloc, embrassa le poteau, mit son col dessus, leua les yeux au Ciel, & demanda au Confesseur: *Mon Pere seray-je bien ainsi?* S'estant releué l'executeur s'approcha avec des ciseaux, que Mōsieur de Cinq-Mars luy osta des mains, ne voulât pas qu'il le touchast, & les ayant baisé, les presenta au Pere, disant:

fant : *Mon Pere , ie vous prie , rendez-moy ce dernier service, coupez moy mes cheuenx.* Le Pere les donna à son compagnon pour les luy couper , ce qu'il fit. Cependant il regardoit doucement ceux qui estoient proches de l'eschafaut , & dit au frere, *coupez les moy bien près, ie vous prie.* Puis eleuant les yeux vers le Ciel, dit ; *Ah mon Dieu , qu'est-ce de ce monde !* Apres qu'ils furent coupez , il porta les deux mains à la teste , comme pour accommoder ceux qui restoient à costé. Le Bourreau s'estant auancé presque à costé de luy , il luy fit signe de la main qu'il se retirast. Il fit le mesme deux ou trois fois. Il prit encore le Crucifix, & le baissa, puis l'ayant rendu , il s'agenouïlla derechef sur le ploe deuant le poteau qu'il embrassa : & voyant en bas deuant soy vn homme qui estoit à Monsieur le Grand Maistre, il le salua & luy dit : *Je vous prie d'asseurer Monsieur de la Melletraye, que ie suis son tres-humble seruiteur.* Puis s'arresta vn peu, & continua : *Dites luy que ie le prie de faire prier Dieu pour moy.* Ce sont ses propres mots.

De là l'executeur vint par derriere avec ces ciseaux pour decoudre son collet qui estoit attaché à sa chemise, ce qu'ayant fait , il le luy osta, le faisant passer par dessus la teste. Puis luy-mesme ayant ouuert sa poitrine pour abbaïser sa chemise , & decouvrir mieux son col, ayant les mains jointes dessus le poteau, qui luy seruoit comme d'un accoudoir, dit avec grand sentiment ces paroles.

Mon Dieu , ie vous consacre ma vie , & vous offre mon supplice en satisfactiõ de tous mes pechez. Si j'auois à viure plus long-temps , ie serois tout aïtre que ie n'ay pas esté : mais mon Dieu, puis qu'il vous plait, que ie vous offre ma mort & mon sang pour l'expiation de mes fautes, & de tous mon cœur.

A ces mots on luy presenta le Crucifix qu'il prit de la main droite : tenant le poteau embrasso de la gauche, le baïsa, le rendit, & demanda les Medailles au Compagnon de s^{on} Confesseur, lesquelles il baïsa & dit trois fois *Iesus*, apres il les luy remit. Et se tournant hardiment vers l'executeur qui estoit là debout, & n'auoit pas encore tiré son couperet d'un meschant sac qu'il auoit apporté sur l'eschafaut, luy dit : *Quo-fais-tu-là ? Qu'attens-tu ?* Son Confesseur s'estant desia retiré sur l'eschelle, il le r'appella & luy dit : *Mon Pere, venez moy aider à prier Dieu.* Il se r'approcha, & s'agenouïlla aupres de luy, lequel recita lors d'une grâde affection le *Salve Regina* d'une voix intelligible, sans hesiter, pesant toutes ces belles paroles & particulièrement estant arrivé à ces mots : *Et Iesum benedictum fructum ventris tui nobis post hoc exiliu ostende :* & le reste, il se baïsoit & leuoit les yeux au Ciel avec une deuotion, & une façon toute rauissante. Apres, son Confesseur priant de sa part ceux qui estoient presens de dire pour luy un *Pater noster* & un *Aue Maria*, luy fit dire ces paroles : *Maria, mater gratia, Mater misericordia, Tu nos ab hoste protege, Et hora mortis suscipe.* En suite, *In manus tuas Domine, &c.* pendant quoy l'executeur tira de son sac son couperet (qui estoit fait comme celui des bouchers, mais plus gros & quarré.) En fin ayant leué d'une grande resolution les yeux au Ciel il dit : Allons, il faut mourir : Mon Dieu, ayez pitié de moy : puis d'une constance incroyable, sans estre bandé, posa fort proprement son col sur le poteau, tenant le visage droit tourné vers le deuant de l'eschafaut; & embrassant fortémēt de ses deux bras le poteau, il ferma les yeux & la bouche, & attendit le coup, que l'executeur luy vint donner assez lenté

lentement & pesamment, s'estant mis à la gauche, & tenant son couperet des deux mains. En receuant le coup il poussa vne voix forte comme *Ah*, qui fut étouffée dans son sang: il leua les genoux de dessus le bloc, comme pour se leuer, & retomba en la même assiette qui estoit. La Teste n'estant pas entièrement separé du corps par ce coup, l'executeur passa à sa droite par derriere, & prenant la teste par les cheveux de la main droite, de la gauche il scia avec son couperet vne partie de la Trachée artère, & la peau du col, qui n'estoit pas coupée, apres quoy il ietta la teste sur l'eschafaut qui de là bondit a terre, ou l'on remarqua soigneusement qu'elle fit encor vn demy tour, & palpira assez long-temps. Elle auoit le visage tourné vers les Religieuses de saint Pierre, & le dessus de la teste vers l'eschafaut, les yeux ouuerts.

Son corps demeura droit contre le poteau qu'il tenoit tousiours embrassé, tant que l'executeur le tira de là pour le despouiller, ce qu'il fit, & il le couvrit d'un drap, & mit son manteau par dessus. La teste ayant esté rendue sur l'eschafaut, elle fut mise apres du corps sous le même drap.

C'est vne merueille incroyable qu'il ne tesmoigna iamais aucune peur ny trouble, ny aucune émotion, ains parut tousiours gay, assésé, inébranlable, & tesmoigna vne si grande fermeté d'esprit que tous ceux qui le virent, en sont encores dans l'estonnement.

Monsieur de Cinq-Mars estant mort on leua la portiere du carrosse, d'où Monsieur de Thou sortit d'un visage riant, lequel ayant salué fort civilement ceux qui estoient là apres, monta assez vite & genereusement sur l'eschafaut, tenant son manteau plié

sur le bras droit, où d'abord iettant son manteau, d'une face allaigne, courut les bras estendus vers l'exécuteur qu'il embrassa & baisa, en disant: *Ah ? mon frere, mon cher amy, que ie t'ayme, il faut que ie t'embrasse, puisque tu me dois auourd'huy causer un bonheur eternal: Tu me dois mettre dans le Paradis.* Puis se tournant sur le deuant de l'échafaut, il se découvrit; salua le monde & ietta son chappeau derrière soy, qui tomba sur les pieds de Mr. de Cinq-Mars. De là se retournant vers son Confesseur; dit d'une grande ardeur, Mon Pere, : *Spectaculum facti sumus mundo, & Angelis, & hominibus* : Et en suite: *Vias tuas domine demonstra mihi, & semitas tuas edoce me.* M^o Dieu enseighez moy vos voyes, monstrez-moy. le chemin que ie dois tenir pour aller au Ciel.

Le Pere luy ayant dit quelques paróles de deuotion qu'il écouitoit fort attentiuellement, il luy dit, qu'il auoit encores quelque chose à dire touchant la conscience, se mit à genoux, luy declara ce que c'estoit, & receu la derniere absolution, s'inclinant fort bas. Laquelle ayant receüe, il osta son pourpoint, puis se mit à genoux, & commença le Psalmes 115. qu'il recita par cœur, & paraphrasa en François presque tout le long, d'une voix assez haute, & d'une action vigoureuse, avec vne ferveur indicible qui paroissoit sur son visage, meslée d'une sainte ioye, incroyable à ceux qui ne l'autoient pas veu. Voicy la Paraphrase qu'il en fit, que ie voudrois pouuoit accompagner de l'action avec laquelle il l'ani-moit, i'ay tâché de retenir ces propres mots autant qu'il m'a esté possible.

Credidi, propter quod locutus sum.

Mon Dieu *Credidi*, ie l'ay creu, & ie le crois fermement, que vous estes mon Createur, & mon bon Pere

Pere, que vous auez souffert pour moy, que vous m'avez racheté, qu'aux prix de vostre sang vous m'avez ouvert le Paradis. *Credidi.* Je vous demande mon Dieu, un grain, un petit grain de cette foy vive qui enflâmoit le cœur des premiers Chrétiens. *Credidi propter quod locutus sum:* Faites mon Dieu, que ie ne vous parle pas seulement des levres, mais que mon cœur s'accorde à toutes mes paroles, & que ma volonté ne démente point ma bouche. *Credidi,* Je ne vous adore pas mon Dieu de la langue, ie ne suis point assez éloquent mais ie vous adore d'esprit, ouy d'esprit Mon Dieu, ie vous adore en esprit & en verité. Ah *Credidi,* Je me suis fié en vous mon Dieu, & me suis abandonné à vostre miséricorde, apres tant de graces que vous m'avez faite, *propter quod locutus sum.* Et dans cette confiance, j'ay parlé, j'ay tout dit: Je me suis accusé.

Ego autem humiliatus sum nimis. Il est vray Seigneur me voilà extrêmement humilité, mais non pas encores tant comme ie le merite.

Ego dixi in excessu meo: omnis homo mendax: Ah: qu'il n'est que trop véritable: que tout ce Monde n'est que m'ensonge, que folie, que vanité: Ah: qu'il est vray: *Omnis homo mendax.*

Quid retribuam Domino, Mon Pere, *quid retribuam Domino, pro omnibus que retribuit mihi?* Il repetoit cecy d'une grande vehemence: *Calicem salutaris accipiam.* Mon Pere il le faut boire courageusement ce calice de la mort: Oüy, ie reçois d'un grand cœur, & ie suis prest de le boire tout entier.

Et nomen Domini inuocabo. Vous m'aidez mon Pere, à inuoker l'assistance divine, afin qu'il plaise à Dieu de fortifier ma foiblesse, & me donner du courage autant qu'il en faut pour aualer ce

calice que le bon Dieu a préparé pour mon salut.

Il passa les deux versets qui suivent dans ce Psalmme, & s'écria d'une voix forte & animée, *Diripisti Domine vincula mea*, Ah mon Dieu que vous avez fait vn grand coup: Vous avez brisé ces liens qui me tenoient si fort attaché au monde: Il falloit vne puissance diuine pour m'en degager: *Diripisti Domine vincula mea*, Voicy les propres mots qu'il dit icy:

Que ceux qui m'ont amené icy m'ont fait vn grand plaisir, que ie leur ay d'obligation: Ah qu'ils m'ont fait vn grâd bien, puisque ils m'ont tiré de ce monde pour me loger dans le Ciel.

Icy son Confesseur luy dit, qu'il falloit oublier qu'il ne falloit point auoir de ressentiment cōtr'eux: A ces paroles il se retourna vers le Pere, tout à genoux, comme il estoit, & d'une belle action: *Quoy, mon Pere, dit-il, des ressentimens? Ah Dieu le sçait: Dieu m'est témoin que ie les ayme de tout mon cœur, Oüy Dieu le sçait, que ie les ayme de tout mon cœur, & qu'il n'y a dans mon ame aucune auersion pour qui que ce soit au monde. Diripisti vincula mea; tibi sacrificabo hostiam laudis.* La voila l'Hostie, Seigneur, le montrant: soy mesme, voilà ceste Hostie qui vous doit estre immoderée maintenant. *Tibi sacrificabo hostiam laudis, & nomen Domini inuocabo.*

Vota mea Domino reddam (estendant les deux bras & la veüe de tous costez d'un agreable mouuement le visage riant & enflammé) *in conspectu omnis populi eius* (haussant vn peu sa voix) *in conspectu omnis populi eius*. Oüy Seigneur; ie veux vous rendre mes vœux, mon ame, ma vie, *in conspectu omnis populi eius* deuant tout ce peuple; deuant toute cette assemblée

blée: *in atriis domus Domini, in medio tui Ierusalem. In atriis domus Domini*: Nous voicy a l'entrée de la maison du Seigneur? Oüy c'est d'icy, c'est de Lyon, de Lyon qu'il faut monter la haut (leuant les bras vers le Ciel) Lyon, que ie t'ay bien plus d'obligation qu'au lieu de ma propre naissance, qui m'a seulemēt donné vne vie miserable, & tu me donne auourd'huy vne vie eternelle: *In medio tui Ierusalem.*

Il est vray que i'ay trop de passion pour cette mort: N'y a-il point de mal mon Pere (dit-il plus bas en soufrian, se tournant à costé vers le Pere) i'ay trop d'aïse: n'y a-il point de vanité? pour moy ie n'en veux point.

Tout cela fut accompagné d'une action si viue, si gaye, & si forte, que plusieurs de ceux qui estoient éloignez, pensoient qu'il fust dans des impatiences, & qu'il declamoit contre ceux qui estoient cause de la mort.

Après ce Psalme, estāt encorēs à genoux, il tourna la veüe à main droite, & voyant vn homme qu'il avoit embrassé dans le Palais, parce qu'il le récontra avec vn Huissier du Conseil, qu'il connoissoit, il le salua de la teste & du corps, & luy dit gayement: *Monsieur, Je suis vostre tres-humble serviteur:*

Il se leua, & l'executeur s'approchant pour luy couper les cheveux; le Pere luy osta les cizeau pour les donner à son Compagnon: Ce que M. de Thou voyant, il les luy prit des mains, disant: *Quay, mon Pere? croyez-vous que ie le craigne: N'avez-vous pas bien veu que ie l'ay embrassé: le le baise, cet homme la, ie le baise.* Tien mon amy, fais ton deuoir, coupe moy mes cheveux. Ce qu'il commença de faire mais cōme il estoit lourd, & mal adroit, le Pere luy osta les ciseaux, & les fit couper par son compagnon. Pendant

dant quoy il regardoit d'un vilage assés & riant ceux qui estoient les plus proches, lénioit quelquefois amoureuxément les yeux au Ciel, & s'estant ieux quelque peu de temps, il proféra cette belle sentence de Sainct Paul :

Non contemplantibus nobis quæ videntur, sed quæ non videntur: Quæ non videntur, temporalia sunt quæ autem non videntur æterna.

Ses cheveux coupez il se mit à genoux sur le bloc & fit vne offrande de soy-mesme à Dieu, avec des paroles, & les sentimens que ie ne puis exprimer. Il s'auoia le plus grand pecheur & le plus criminel de tous les hommes, mais que Dieu luy donnoit vne si grande confiance en sa bonté, qu'il craignoit qu'il n'y eust de l'excez, telmoigna vn grand regret de sa vie passée, disant que si on luy eust laissé la vie, il croyoit qu'il l'eust employée tout autrement qu'il n'auoit pas fait. Demanda à tous vn *Pater* & vn *Aue Maria* avec des paroles qui perçoient le cœur de tous ceux qui l'entendoient, baisoit le Crucifix avec grand sentiment d'amour & de joye demanda les medailles pour gagner l'indulgence, puis dit:

Mon Pere, ne me veut-on point bander? Et comme le P. luy répondit que cela dependoit de luy, il dit: Ouy mon Pere, il me faut bander: & en souffrant, & regardant ceux qui estoient les plus proches dit: Messieurs, ie l'adonne. Je suis poliron, ie crains de mourir. Quand ie pense à la mort ie tremble, ie fremis, les cheveux me herissent, & si vous voyez quelque peu de constance en moy, attribuez celà à Nostre Seigneur, qui fait vn miracle pour me sauuer; car effectivement pour bien mourir en l'estat où ie suis, il faut de la resolution: Je n'en ait point, mais Dieu m'en donne, & me fortifie puissamment.

Puis

Puis mit les mains dans les pochettes pour chercher son mouchoir, à fin de se bander, & l'ayant tiré à moitié, il le rescira, à fin qu'o le vit point, sinó ceux qui estoient au prés de luy sur l'échafaut : & pria de fort bonne grace ceux qui estoient en bas de luy jeter vn mouchoir ; aussi-tost on luy en jettâ deux ou trois ; il en prit vn , & fit grande civilité à ceux qui luy auoient iecté, les remerciant avec affection , promettant de prier Dieu pour eux au Ciel , n'estant pas en son pouuoir de leur rendre ce seruice en ce monde. L'executeur vint pour le bander de ce mouchoir, mais comme il le faisoit fort mal, mettant les coins du mouchoir en bas qui couuroient sa bouche, il le retroussa & s'accommoda mieux.

Après il mit son col sur le poteau (qu'un Frere Iesuiste auoit torché de sō mouchoir, parce qu'il étoit tout moitié de sang) & demâda à ce frere, s'il estoit bien ; qui luy dit, qu'il falloit qu'il auançast vn peu d'auantage la teste sur le deuant ; ce qu'il fit. En mesme temps l'executeur s'apperceuant que les cordōs de sa chemise n'estoient point deliez, & qu'ils luy tenoient le col serré ; il luy pottâ la main au col pour les denouer. Ce qu'ayant senty, il demanda : *Qui a-t'il ? faut-il encor oster la chemise & se dispoisoit delia à l'oster.* On luy dit que non, qu'il falloit seulement denouer les cordōs : Ce qu'ayant fait & mis la teste sur le poteau, il promōça ces dernieres parolles, qui furent : *Maria mater gratia, Mater misericordia, tu nos ab hoste protege, & hora mortis suscipe ; puis In manus tuas &c.* & lors ses bras commencerent à trembloter en attendant le coup, qui luy fut donné tout au haut du col, trop prés de la teste, duquel coup son col n'estât coupé qu'à demy, le corps tomba à costé gauche du poteau, à la renuerse, le visage contre le Ciel, remuant
le 3

les iambes & les pieds & haussant foiblement les mains. Le Bourreau le voulut renuerser pour acheuer par ou il auoit commencé , mais effrayé de cris que l'on faisoit contre luy donna trois ou quatre coups sur la gorge , & ainsi luy coupa la teste , qui demeura sur l'echafau.

L'executeur l'ayant depouillé porta son corps couuert d'un drap dans le Carrosse qui les auoit amenez , puis il y mit aussi celuy de Monsieur de Cinq Mars, & leurs testes, qui auoient encore ouures deux les yeux ouuerts, particulièrement celle de Monsieur de Thou, qui sembloit estre viuante. De là ils furent portéz aux Fucillans , où Monsieur de Cinq-Mars fut enterré deuant le Maitre-Autel : Monsieur de Thou à esté embaumé & mis dans vn cercueil de plomb pour estre transporté en sa sepulture.

Telle fut la fin de ces deux personnes, qui certes deuoient laisser à la posterité vne autre memoire que celle de leur mort. Je laisse à chacun d'en faire tel iugement qu'il luy plaira, & me contente de dire, que ce nous est grande leçon de l'inconstance de la Fortune des choses de ce monde, & de la fragillité de nostre nature. Je me souuiens, lors que ie vis à terre la teste de Monsieur de Cinq-Mars, d'un Epitaphe gravé vne sepulture de marbre en l'Eglise de Sainte Marie de la Chapelle à Naples, qui contient seulement ces mots :

Ecce superbientis natura qualis sit mox futurus casus.

O quelle cheute ! O quel changement ?

Ab qu'est-ce de ce monde.

R E C I T



*RECIT VERITABLE DE TOVT
ce qui s'est passé depuis que le Sieur de
Saint Preuil fut arresté, iusques
à sa Mort.*

HISTOIRE XXIV.

LE vingt-quatriesme Septembre mil six cens
quarante-vn, sur l'aduis que le Sieur de Saint
Preuil receut, que l'armée commandée par Monsieur
le Marechal de la Meilleraye venoit droit à Arras,
ayant disné legeremēt, il monta à cheual sur les dix
heures du matin, pour aller au deuant, & ayant ap-
pris pour quel suiet elle y venoit, dit à plusieurs
Officiers, qu'il l'accompagnoient, qu'il se retirassent,
& qu'il ne vouloit pas que persōne l'accompagnast,
& sortant de ladite ville d'Arras, par la porte de
Rouville, l'Officier qui commandoit la garde, luy
demanda, qui il luy plaisoit qu'il laissat entrer de
l'Armée; Il luy respondit, laissez entrer tous les hon-
nestes gens, ie ne suis plus Gouverneur d'Arras. Et
sans autre compagnie que d'un seul lacquais, il alla
trouuer ledit Sieur de la Mailleraye à l'Abbaye d'A-
vesne, distante de la ville de là portée du canon, où
ayant mis pied à terre, l'alla trouuer dans la salle, En
entrant, ledit Sieur Marechal luy dit, Monsieur de
Saint Preuil, j'ay ordre du Roy de vous arrester: il
luy repartist, Mōseigneur ie le sçay bien; C'est pour-
quoy ie viens pour executer ses volontez, ie ne de-
māde que trois heures pour ma Iustificacion enuers
luy & enuers vous vne seule me suffira; Donnez moy
vostre

espée, luy dit le Marechal, tenez, la voila, elle n'a jamais tranché que pour le service du Roy.

Pendant que cecy se passoit à l'Abbaye d'Auesne, le Sieur Sobelin, Intendant de l'armée, alla au logis dudit Sieur de Saint Preüil se saisir & faire inventaire de tous les papiers, escrits, promesses, effects, argent, de ce qui estoit de meilleur, & arrest de Franc Secretaire, du Poirier, les deux Vanniers, & Scorpion, garde des Magazins, tous domestiques dudit Sieur de Saint Preüil lesquels on vouloit seulement faire servir au procez de leur Maistre, puis que incontinent apres sa mort on les essargit tous purement & simplement.

En ce temps on fit battre aux champs pour son Regiment de gens de pied, composé de trente compagnies, & commandement fut fait à son Regiment de Cavalerie, de monter à cheval, pour tous deux sortir de la ville, sans aucun delay : Les Regimens des gardés & de Piedmont furent mis en bataille dans les plans d'armes iusques à ce que les susdits deux Regimens fussent sortis : fit le Regiment de Cavalerie de la Luzerne, qu'il y estoit arriué quelques iours auparavant, prit la place de celuy de Saint Preüil,

Estant ainsi arresté, il fut laissé à la garde du Sieur de Mance, enseigne des gardés de son Eminence, qui avec lesdits gardés, & celles de Sieur de la Maille-raie, l'emmenèrent environ vne heure apres midy dans vn carrosse à Arras au logis du Sieur du Plessis Beliere, Lieutenant pour le Roy dans ladite ville, où il fut mis dans vne chambre iusques environ sur les six heures du soir, qu'on le mena à Saint Vaast, où il fut gardé durant trois iours, attendant les ordres du Roy.

Le susdit iour vingt-quatriesme, incontinent apres dudit arrest, enuiron midy, ledit Sieur Marechal fut à Arras, & fit conuoyer les Officiers, du Conseil d'Arthois, de l'Eschevinage de la Gouvernance, & les principaux Bourgeois, dans l'Hostel de Ville, où apres leur auoir fait entendre, comme il venoit d'arrester le Sieur de Saint Preuil, leur Gouverneur, par l'ordre du Roy, dit entre autres choses qu'il leur ostoit vn Lyon, pour leur donner vn Agneau, en la personne du Sieur de la Tour, que sa Majesté auoit nommé, pour estre dorénuant leur Gouverneur, & sur ce leur fit prester serment de fidelité.

Chouppe Escuyer dudit sieur Marechal auoit esté despeché par luy, pour donner aduis en Cour de ce qui ce passoit, & pour rapporter les ordres du Roy, touchant les prisonniers: Mais il arriua qu'il fut pris en chemin par les Croates de Ludouic: Pourquoy il falut depescher vn autre Courrier le lendemain, ce qui fut cause qu'il fut gardé trois iours dans ladite Abbayé de Saint Vaast, pendant lequel temps on luy permit de parler à quelqu'un des siens tout haut, & en la presence de ses gardes, notamment audit Sieur de Mance, qui ne le perdit pas de veüe. Ledit Sieur de la Mailleraye le visita tous les iours, & luy promit toute sorte d'assistance.

Les ordres du Roy, estans venus, on partit à six heures du matin, il fut mis dans le fond du carrosse dudit Sieur Grand Maistre, avec le Sieur de Mance, & quatre autres Officiers, l'on y mit aussi son Secrétaire, à cause de son indisposition, auquel il ne fut pas permis de parler.

Les deux Vanniers, le Poirier & Scotton, furent mis sur vne charette, pieds & mains liez, deux à

à deux, & ainsi sortirent de la ville : Mais cōme le dit Sieur de sainct Preuil sceut, que ses gens estoient en ceste posture, il dit à vn de ses amis, qui estoit ptés de son carrosse, qu'il le feroit parler à Monsieur le Marquis de Gesures, lequel s'estant approché, luy dit, Monsieur mes gens ne sont pas coupables, ce qu'ils ont fait n'a esté que par mon commandemēt, ie m'estonne bien qu'on les traite : comme on feroit les plus grands criminels de la terre, cela est biē horrible à des gens, qui se sont faits estropier pour le seruice du Roy (parlant du Poirier, qui auoit eu la jambe fracassée d'une mousquetade, de laquelle il n'estoit encore guery) ie vous prie de voir Monsieur le Grand Maistre, & le prier de les faire deliier ce, qui fut fait aussi-tost.

Le carosse estoit escorté de soixante gardes de son Eminence, qui alloient deuant, & autant de Monsieur le Grand Maistre, qui alloient derriere, lequel Sieur Grand Maistre n'estoit pas loing, accompagné de grād nombre de Gentils-hommes & Officiers de son armée.

On prit le chemin de Corbie, où lon arriua des les trois heures apres midy, ayant marché tout d'une traite. A la sortie du carrosse le grand Maistre s'y rencontra, pour dire à Dieu à son prisonnier, & luy dit, Monsieur de Sainct Preuil, bien que vous croyez, que ie ne sois pas vostre amy, si est-ce, que ie vous le veux monstrier en cette occasion en foy d'homme d'honneur ? Je vous seruiray de tres-bon cœur, vous pouuez vous en assurer, & auoir confiance en moy : A quoy il respondit, Monsieur, ie vous en refteray obligé. Le Sieur de Hodencourt, Gouverneur de Corbie, vint saluēt le dit Sieur Grād Maistre, auquel il dit, Monsieur ie ne doute point, que

que Monsieur de Saint Preüil n'aye sujet de concevoir vne bonne esperance de son salut, puis que vous estes celuy, qui l'avez arresté: Car ayant esté son Preuost, vous ne voudriez pas estre son Bourreau, & vois que vous serez son intercesseur. C'est ce qui me console dans le regret que i'ay de la disgrâce de ce grand guerrier, dont ie deplore le malheur: Mais le Roy recognoistra le seruice qu'il luy a rendu, & qu'il est encore capable de luy redre. Alors ledit Sieur Grand Maistre partit, pour s'en aller à Chaulne, où sa femme l'attendoit.

Le Sieur de Saint Preüil demâda à parler en particulier à son Secretaire, ce qui luy fut accordé. Ledit Secretaire a rapporté, qu'il luy dit: Hé bien de France, que sera-ce de moy; Monsieur vous estes perdu, luy respondit il: Qu'est-ce que i'ay fait, ie n'ay iamais fait tort à personne? Car pour l'affaire de Bapaulme, tous ceux qui sçauent ce que c'est de la guerre, aduoüeront, que c'est la faute du Gouverneur, & non pas la mienne, le Trompette n'ayant paru, qu'apres le combat. De Franc adjousta, Monsieur tenez tout assuré, que Monsieur le Cardinal vous abandonne, puis que ses mesmes Gardes seruent à vous conduire en prison. Il luy repartit, ie ne le crois pas: Cela n'est que trop certain, replique de Franc, & de la façon qu'on y procede, c'est fait de vous, sans ressource: Car quand vous auriez attenté à la personne du Roy, on ne sçautoit s'y prendre avec plus de rigueur. & pour vous, & pour nous: Ils furent bien vne heure à parler ensemble de diuerses affaires, apres quoy on dit au Franc de se retirer.

Le lendemain vingt-neufiesme Septembre, il fût conduit avec la mesme escorte en la ville d'Amiens,

où il arriva sur les dix heures du matin, les trompettes de la ville, sonnantes es carrefours & principales rues. Le carrosse arrivât à les plans de la Citadelle, le Sieur de Cornillon, Lieutenant d'icelle, s'y presenta avec les ordres du Roy, dont il luy fit lecture. Lors entrant dans ladite Citadelle, ledit Sieur de Saint Preuil, qui tenoit vne canne à la main, la rompit, & la jeta dans le fossé par cholere, & comme par mauvais augure, qu'il ne devoit plus jamais commander. Puis il dit, que l'on portast sa cassette, dans laquelle il y avoit bien vingt-deux mil liures chez le Medecin du Moulin, ce qui fut fait, mais peu apres on la vint retirer.

Le prisonnier fut mis dans le logis du Roy, autour duquel on travailla incessamment à faire vne grande & forte paillissade de dix-sept à dix-huit pieds de hauteur, & esloignée de sept à huit pieds de la muraille dudit logis.

Dans icelle entroient tous les iours en garde, vingt Suisses, comme dans la chambre dudit Sieur de Saint Preuil vne escoliade des gardes, commandée par le Sieur de Guerriuel, Enseigne des gardes du corps du Roy, contre vne compagnie de soldats de ladite Citadelle, qui montoient chaque iour en garde es environs de ladite paillissade.

Deux ou trois iours apres il demanda à voir ledit Medecin du Moulin pour raison de quelque indisposition, mais on luy refusa, disant qu'il y avoit le Medecin ordinaire de la Citadelle, de qui il falut qu'il se servit.

En ce temps le Sieur de Bellejamine, Intendant de la Justice en Picardie, receut les ordres & la commission pour faire & parfaire le procez audit Sieur de Saint Preuil : Elle portoit de le faire assister des

Juges Presidiaux d'Amiës & d'Ableville, & du Lieutenant General de Montreüil sur mer, pour faire la charge du Procureur du Roy en cette commission. En execution de laquelle, ledit Intendant & ledit Procureur du Roy, se transporterēt à Arras, pour informer, où apres auoir fait assembler les gens du Conseil d'Arthois, de l'Escheuinage, de la Gouvernance, & les plus notables Bourgeois, il les harangua, & pour conclusion les assura, que le tyran ne le verroit iamais Arras, pourquoy ils deuoient craindre de venir libremēt faire leurs plaintes: Il enuoya aussi informer à Doulens, où ledit Sieur de Saint Preüil auoit esté deux ans Gouverneur, & assignation à tous ceux, qui voulurent estre ouys, tant audit Arras, qu'à Doulens à certains iours, pour estre recolez & confrontez audit Sieur de Saint Preüil dans la ville d'Amiens, où en effet vint vn grand nombre desdits tesmoins, tous estoient logez en la maison, où pend pour enseigne l'Assiguet, où ils estoient défrayez aux despens du Roy.

Ledit Sieur de Bellejamine fut par plusieurs fois en la Citadelle, pour prendre les interrogatoires de l'accusé, & luy confronter lesdits tesmoins, mesme pour vne apres-disnée luy en recola & confronta vingt-sept, ce qui obligea ledit Sieur de Saint Preüil à luy dire, qu'il voyoit bien qui le vouloit perdre, de luy faire paroistre vne si grande quantité de visages, qu'il n'auoit iamais veu, ny cogneu, & luy reprocha, qu'il ne faisoit escrire, que ce qui faisoit contre luy, & ne vouloit qu'on parlast de ce qui y estoit pour sa iustification.

Le Vendredy huiëtiesme iour de Nouembre 1641, ledit Sieur de Saint Preüil fut mandé à la Chambre criminelle du Bailliage, pour estre ouy par sa-

bouche, sur le cas qui ont esté à luy imposez.

Il fut mené dans vn carrosse, accompagné de vingt mousquetaires, & de six des gardes du Corps du Roy, & conduit dans ladite chambre, où il trouua douze Conseillers d'Amiens, & autant du Presidial d'Ableville, de tous les deux les premiers, & les plus anciens, auxquels presidoit ledit Sieur de Bellejamine, & où estoit aussi le Procureur du Roy de ladite commission. Ceux du Presidial d'Amiens le Dimanche precedant sur vne lettre, que leur auoit escrit à vn chacun d'eux ledit Intendant, & tandis qu'ils furent à Amiens, ils furent défrayez, & traitez splendidement à ladite hostellerie de l'Affiguet aux despens du Roy, à la diligence de son Procureur en cette commission.

D'abord que l'accusé fut érré en la chambre, apres vne grande reuerence à ses Iuges, interpellé de s'asseoir sur la Sellette, qui auoit esté couverte de tapisserie, il fit responce, qu'il n'auoit iamais deseruy le Roy, & qu'il n'y auoit Gentil-homme en France, qui se fust porté plus ardemment à le seruir, que luy : & s'estant assis sur ladite Selette, il n'y demeura guere, ains pour parler avec plus d'action, & ayant dessein de faire voir de pres audit Sieur Intendant les Lettres, Ordres, Instructions, & pieces iustificatoires en vertu desquelles il auoit agy, se leua, & dit qu'il se tiendroit de bout, s'il plaisoit à Messieurs, ce qu'il fit durant quatre heures entieres, son chapeau à la main, & lors qu'il fut sommé de prester serment de dire verité, il respondit, ouy Messieurs, ie vous la diray, puis que ie suis obligé par le bon heur que i'ay eu, quoy qu'indigne, de recevoir aujourdhuy mon Sauueur. Il est à noter qu'il l'auoit encore receu le iour de la Toussaint, dont il estoit long-temps en suspen

suspension, de laquelle se seruit son prudent Confesseur, pour luy faire recevoir la sainte Communion, deuant que de se presenter à ses Iuges, & peut estre à la mort, ayant aussi fait vne confession generale, avec tous les tesmoignages de repentance & de contrition, qu'on eüst pû souhaiter dans vn parfait Chrestien.

Après il commença à discourir deuant les Commissaires de toute sa vie, comme il auoit eul l'honneur de commander dès l'aage de quatorze ans, & que depuis ce temps là il n'auoit discontinué le service du Roy, tant dedans que dehors le Royaume, & deduisit si nettement & agreablement les accidens de sa bonne & mauuaise fortune, qu'il en rauit tous en admiration.

Mais quand ce vint aux interrogatoires, qu'on luy fit, touchant les derniers qu'on l'accusoit auoir leué contre les ordonnances, il fit voir qu'il l'auoit pû, & deu faire, puis qu'il auoit receu plusieurs lettres du Roy, escrites en ces termes. *Brave & Generereux Saint Preuil, vinez d'inductions, plumez la poulle sans crier, faictes comme font tels & tels, faites ce que font beaucoup d'autres dans leurs Gouvernemens tout est bien fait par vous, vous avez tout pouuoir dās vostre empire, trachez, coupez, tout vous est permis,* Où il est à noter que c'estoit sur ce qu'il mandoit au Gouvernemēt du Sieur de Ramburis dās Doulens qui possedoit de son chef soixante mil livres de rentes; & qui faisoit vne noble despenſe, & au Comptre d'Esclambourg dās le Gouvernemēt d'Arras dont la court & la table estoit manifique, il luy auroit esté vergongneux & indecent à l'honneur du Roy, de ne pas faire ce à quoy il estoit obligé journallement, tant par les visites extraordinaires des

gens de condition, que par le continuel passage des armées & gens de guerre, ce qui luy estoit absolu-
mēt nécessaire pour viure & subsister selon la qua-
lité & la condition, dans laquelle il auoit pleu au
Roy le placer. Aussi a-on bien veu par le peu d'argēt
qu'on luy a trouvé, quin'est pas suffisant payer le
quart de ses debtes, que tout ce qu'il faisoit, n'estoit
que pour la gloire, & le seruice du Roy.

Les iuges se trouuens bien interdits, voyant le
plein & absolu pouuoir, qu'on luy donnoit par plus
de trente missives, qui luy auoient esté escrites en
diuers temps, depuis trois ans, tant par le Roy, que
pas son Eminence, & par Monsieur de Noyers, pour
lesquelles faire voir à la cōpagnie, ils s'approcha du
dit Sieur de Bellejamine, les leur tout haut, & les
luy mit entre les mains : Il se deffendit si bien de
l'affaire de Bapaulme, qui estoit au dire de la gazet-
te, le seul sujet pour lequel on l'auoit arreste, qu'il
en fut trouué innocent, & de fait, n'en est rien por-
té en la sentence de condamnation, qui se verra cy-
apres.

Pour les crimes dont il estoit chargé par les in-
formations faites à Doulens, il dit, qu'il ne falloit
rechercher sa vie, que depuis qu'il estoit Gouver-
neur d'Attras, & qu'il constoit par les lettres de pro-
uisions dudit Gouvernement, dont il auoit pleu au
Roy l'honorer & recognoistre ses seruices qu'il luy
auoit donné abolition de tout ce qui s'estoit passé
auparauant, tant audit Doulés qu'ailleurs, & sur ce
produisit lescdites lettres de provision.

De tous les autres faits, dont il estoit accusé, im-
posa & fournit de si puissantes deffences pour sa ius-
tification, que si lors on fust venu aux aduis (com-
me il sembloit, que l'ordre le roqueroit) pas vn de
ses

ses Juges ne l'auroient, peut-estre condamné à la mort : C'est pourquoy on remit le iugement au lendemain , & lors les amis commencerēt à desesperer de son salut , quasi personne de ses Commissaires n'ayāt esté veu sortir sans auoir les larmes aux yeux non plus que sans admirer son iugement, sa memoire, son eloquence, sa bonne grace, mais sur tout son mal-heur.

Il fut remené en la citadello par les mesmes gardes, & la mesme voye , qu'il auoit esté amené à la chambre.

Ce fut alors qu'il se mit serieusemēt à penser à sa fin, il fit son testament, qu'il escriuit tout entier, & signa de sa main, le ferma & cacheta de ses armes & le consigna entre les mains du Pere Don Bernard de Saint Iean, Religieux Feuillans, entre les mains duquel ledit Sieur de Saint Preuil dès le comencement de sa prisō auoit aussi consigné, & entiere-ment abandonné sa conscience, avec tant de bonheur, & vn si bon succez, que tout le monde vit avec admiration vn si prodigieux changement en ce fameux guerrier, qui n'ayant iamais auparauāt quasi reconnu d'autre diuinité que sō espée, fit paroistre à cette derniere heure des sentimens si deuots, contraire à son humeur, & à ce qu'il auoit esté auparavant : Ils s'entretindrent quasi toute cette derniere nuit des choses de l'eternité, le Pere ayant soin de luy faire faire souuent des actes de vertu, d'humilitez, & de soubmissiō à la volonté de Dieu, le mettant tantost à prier, tantost à prendre quelque bonne pensée de quelque liure de deuotiō, à quoy il s'estoit souuent exercé depuis sa detention.

Il est à noter, qu'on ne permit à aucun, ny des parens, ny des amis de l'accusé, de solliciter pour

luy. Le Cheualier d'Ambleville, son Frere, estant arriué à Amiens pour ce faire, eut ordre d'en sortir promptemér. Ledit Medecin de Moullin, eust aussi la maison pour prison. Cependant ledit Sieur de Sainct Preüil escriuit plusieurs lettres, tant au Roy, à son Eminence, qu'à Monsieur de Noyers, mais on n'en laissa sortir aucun hors de la Citadelle; en vain en attendoit-ils les responses & les effets.

Le lendemain Samedy neufiesme, à sept heures du matin, les Commissaires s'estans assemblez pour le iugement du Procez, le Procureur du Roy de la commission se leua, & plaida beaucoup de choses, pour attenuer & destruire toutes les iustificacions dudit Sieur de Sainct Preüil, & afin de ne rien obmettre, (contre les formes ordinaires du criminel) produisit & fit lecture d'une grâde piece d'escriture en forme de contredits, pour respondre à tous les moyens par luy proposez, mesme contredire aux lettres, ordres, & autres pieces iustificatoires mises en auant le iour precedant par l'accusé, & soustient par vn grand nombre de passages & autoritez recherchées, que par la rigueur des ordōnāces il étoit digne de mort : à quoy il conclut. L'Intendant qui estoit de mesme aduis, prit la parole, & encherit sur tout ce que l'autre pouuoit auoir dit, nonobstant quoy, le Lieutenant General d'Amiens, rapporteur du procez, ne laissa d'opiner à la prison seulement, que le condamné tiendroit, tant qu'il plairoit à sa Majesté, soustenant, que le moindre de ses services estoit suffisant d'effacer les plus enormes des crimes dont il estoit chargé : Opinion, qui ne fut plustost proferé, qu'elle fut releuée, & ainsi dire, baffouée par ledit Intendant : quoy ledit Sieur rapporteur espondit genereusement, que sa vie, ses enfans, &

ses biens estoient au Roy , mais que son ame & sa conscience estoient à Dieu, qu'au plus iuste d'icelle il auoit dit son opinion , & que qui que ce fust, n'estoit capable de luy rien faire au contraire. L'Intendant se retournant vers le President Paschar d'Ableville , luy demanda son aduis , qui fut à la mort, & ainsi des autres, guidans la pluralité, opinerent pareillement à la mort.

Aussi-tost que le dictum fut dressé & signé , c'estoit enuiron l'heure de midy, la pluspart des Iuges sortirent de la Chambre, & se retirerent. Alors l'Intendant demande , où estoit le Bourreau , & sur ce que quelqu'un assez legerement luy eut dit , qu'il croyoit, qu'il n'estoit pas en ville, il enuoya querir le Sieur de Lattre de Villainecourt , Procureur du Roy d'Amiens, auquel il demâda, où estoit le bourreau, & pourquoy il n'auoit donné ordre , qu'il se trouuaft-là, lequel luy fit responce, que cela n'étoit du deub de sa charge, & que quand bien il en seroit, que le Procureur du Roy de la cômmission y deuoit auoit pourueu : A quoy ledit Sieur de Bellejamine vn peu esmeu, repartit, vous en respondree au Roy, & vous feray quitter la robbe : Je ne vous crains pas, replique ledit Procureur du Roy, ie suis homme de bien, & ne tiens ma robbe, que du Roy mon Maistre. Comme ils estoient en ces contestes , ledit Intendant eût nouuelles , que l'executeur n'estoit pas loing.

Il fut quelque temps contesté du lieu , où se feroit l'exécution, ayant esté proposé de la faire dans les plains au deuant de la Citadelle , où auoit esté en six cent trente-huict executé Monsieur de Hencourt, mesme à cet effet auoit esté tapissée & meublée vne chambre dans le logis du Iardin du Roy,

mais

mais il fut attesté, que ce seroit en la grande place de l'Hostel de Ville, afin que le iugement estant prononcé au condamné dans ledit Hostel de Ville, il n'eut pas loing à aller à l'eschaffaut.

Crainte d'esmotion, les portes de la Ville furent fermées, & les quatre compagnies priuilegiées commandées pour garder les aduennés de la place, où se deuoit faire l'exécution, & huit iours auparauant icelle; le regiment de Champagne fut encore en garnisó aux faux-bourgs de ladite Ville. Il faudroit vn trop long discours, pour exprimer, & rapporter icy tous les bons sentimens, auxquels le genereux Cavalier s'exerçoit, durant tout cecy, & les des-plaisirs inconcevables, qu'il tesmoignoit ressentir d'auoir cy-denant roûjours plus aymé les hommes que Dieu, en preterant leur seruice au sien, en comparailon duquel il recognoissoit, que tous les plus grâds Monarques de la terre sont moindres que les petits atomes de l'air. Et c'est ce qui donna peut-estre lieu aux reparties qu'il fit à son Confesseur, quand on le vint aduertir, que ses Iuges le demandoient encore: Mon Pere, luydit-il ie m'en vais à la mort, allez Monsieur allez, suivez Iesus-Christ au Caluaire, repliqua le Pere: Ah Mon Pere, luydit-il, y a bien de la difference, ie l'ay bien mérité ceste mort, du moins selon Dieu, mais selon les hommes, ie ne devrois pas mourir, pour les fautes, du moins dont on m'accuse, mais bien selon Dieu, pour celles qui sont seulement cogneuës de luy, de vous, & de moy, sa volonté soit faite en la terre, comme au Ciel, il me fait plus de graces, que ie ne merite, il veut aujourd'huy changer les hõneurs passageres que i'ay possédé pour vn réps, en des recompenses eternelles, qui ne changeront plus.

Il fut conduit du lieu de la prison dans la chambre du conseil de l'hostel de Ville, dans son petit carrosse, ou estoient avec luy le Sieur de Guerriel, & son nepueu, suivy & accompagné, tant desdits gardes du Corps, que des Suisses, ensemble des Archers de la Ville de robe courte, & de la Mareschaussée.

Mettant pied à terre hors du carrosse à la porte de l'hostel de Ville, il prit congé dudit Sieur de Guerriel, luy disant hautement, Monsieur; ie vous prie de dire au Roy, & à M^{rs}ieur le Cardinal, mon maistre, que ie meurs leur tres-humble Seruiteur, vous en direz autant s'il vous plaist, à Monsieur le Gr^d Maistre, & à Monsieur de Noyers, & direz à Monsieur le Comte de Noges, qu'il se souuienne de prier Dieu pour moy, ie luy en rendray en Paradis si Dieu me fait misericorde, comme ie l'espere.

Ledit Sieur Guerriel, apres luy auoir fait la reuerence, se retira, pleurant à chaudes larmes, n'ayant voulu se trouuer à l'exécution, quoy que ledit Sieur Intendant l'y eut voulu obliger, pourquoy ils eurent quelques paroles ensemble.

Il fut donc laissé entre les mains du Preuost des Mareschaux, & de ses Archers, qui le conduisirent dans la Chambre du Conseil dudit Hostel de Ville. En passant au trauers de la grande sale, il osta son chapeau, & salua fort courtoisement quantité d'honnestes gens, qui y estoient, pour voir ce qui se passeroit. Il estoit vestu d'un habit de drap gris, un peu brun, le manteau de mesme, doublé de pareille estoffe, le tout vny, sans aucune façon, ny aucun passement, estant celuy, le mesme qu'il auoit le iour qu'il fut arresté, n'en ayant pas changé depuis ce temps là, son chapeau estoit noir avec un cordon d'ardent trait.

Vn peu apres qu'il fut entré dans ladite chambre son Confesseur y arriua, qui se mit aussi tost à reprendre les discours de deuotion, desquels il auoit coustume d'entretenir son esprit: D'as ce pitoyable accessoir comme ils estoient debout au feu, voicy le Sieur de Bellejamine, avec le rapporteur, & huit ou dix de ces Cômmissaires, tant d'amiens que d'Ableville, suivis de Mōsieur Gendon, Greffier criminel du Bailliage d'Amiens, ce qu'ayant esté aperceu par le Pere Feuillant, il se retira avec son cōpagnon dans vn coing de la chambre. Le Sieur de Saint Preuil fit vne profonde reuerence à ses Iuges, & demurat debout & nud teste, le dos tourné à la cheminée: Ledit Sieur Intendāt fit signe au Greffier de luy lire sa sentence.

Veu le procez extraordinairement instruit à la requeste du Procureur du Roy, à Messire François de Iaffac d'Ableville, Sieur de Saint Preuil, Marechal des champs & armées de sa Majesté, cy-deuant Gouverneur des Villes & citez d'Arras, à presēt prisonnier dans la Citadelle d'Amiens, accusé de concussions, volleries, & exactions, sur les subjects du Roy, levées & impositions de deniers, tant sur les villages, qu'aux portes de ladite ville, oppressions & violences à l'endroit des Officiers de Iustice, excès, outrages commis contre ceux qui ont esté proposez affaires de sa Majesté, de l'homicide commis en la personne de Fleury Guillain menuisier, & autres crimes cōtre & au prejudice de sa charge, & du seruice du Roy, lettres patentes & commission de sa Majesté, donnée en la Ville d'Amiens le trentiesme Septembre dernier, par lesquelles il nous est mandé de faire & parfaire le procez audit Sieur de S. Preuil, & proceder incessamment à l'istruzione & iugement d'iceluy

d'iceluy , souuerainement & en dernier ressort, appellez avec nous les Presidens d'Amiens & d'Ableville, memoires mis en nos mains dela part de la Majesté, contenant lesdits faits, & accusations, & charges, informations par nous faites és Villes d'Arras, Doulens, & Amiens, des deux, trois, & quatriesme Octobre dernier, autre Informatiō faiçte par le Sieur Lieutenant Criminel d'Amiens Cōmissaire subdelegué à cét effect, tans dās ladite Ville de Doulens que Bourgs & Villages voisins, interrogatoires du Sieur de Saint Preüil, contenant les confessions, denegations, recolemēts, & confrontations de tesmoins oüys esdites Informations, avec les conclusions des gens du Roy, apres que ledit Sieur Saint Preüil mandé en la chābre du Conseil, a esté oüy sur la Sellette, parauant procedé au iugemēt de procez, tout consideré. Nous par iugement souuerain & en dernier ressort, auōs declaré ledit François de Iassac, d'Ambleville, Sieur de Saint Preüil deuēment atteint & convaincu des cas à luy imposez, & pour reparatiō condamné ledit de Iassac à auoir la teste tranchée sur vne eschaffault, qui sera pour cét effect dressé en la place deuant l'Hostel commun de ceste Ville, les biens acquis & confisquez au Roy, sur iceux prealablement pris la somme de vingt mil livres, applicables moitié en œuures pies aux Hospitaux d'Amiens, d'Ableville, d'Arras & Doulens, & l'autre moitié aux reparatiōs des sieges Royaux desdites Villes, & autre sōme de trente mil livres, pour estre employez à la restitution des deniers pris & leuez, & autres pertes souffertes par les communauttez, particuliers, pillez, & ruinez par par les ordres & commandemens dudit Sieur de Saint Preüil: Donné à Amiens, prononcé & executé le neuuesme

huitième Novembre, mil six cens quarante-vn.

La sentence ne luy fut pas prononcée suivant sa teneur, mais seulement fut dit pour les cas mentionnez au Procez sans en exprimer aucun.

Après la prononciation, ledit Sieur de Saint Preuill salua pareillement ses Iuges avec le visage le plus serain & esgal, qui se vit en telle occurrence, leur disant; Ah Messieurs i'ay bien plus offensé Dieu que les hommes, ie vous remercie Messieurs de m'auoir donné vne si douce sentence, ie prieay Dieu pour vous. Les iuges sortirent, & se retirerent dans la châtre des Iuges Consuls, proche de ladite grande salle, où il demurerent iusques après l'executiō.

Lors son Confesseur, s'approcha de luy, & luy l'embrassa tendrement, disant ah ! là mon Pere, prions Dieu. Ils se mirent donc à genoux deuant vn Crucifix, & reciterent les Litanies de la Vierge, & puis après s'estre recōcilié, ils se leuerēt & tout en se promenant dans la châtre, le Pere luy fit faire plusieurs actes de charité, de contrition & de resignation au bon plaisir de Dieu, il luy disoit mon Pere, c'est grand cas que Iesus-Christ ayt apprehendé la mort. & moy que ie n'en aye aucune apprehension, & que ie ne sois quasi point esmeu de ce qu'o me vient de lire, tachez moy le poux, mon Pere, ie vous prie, & luy ayant pris la main, le Pere en effect n'y sentit aucune esmoration extraordinaire.

Comme il se fut retourné, il apperceut venir à luy vn ieune homme, qu'il ne connoissoit point, il demanda qui il estoit, & luy respondit, qu'il estoit l'executeur, He bien mon amy, est-il temps? non pas encotes Monsieur, luy dit l'executeur, mais c'est la coustume de lier les condannez après la prononciation de leur sentence: Mon amy; luy dit-il, il

n'est besoin de me lier, n'aye pas de peur, ie ne te feray pas de peine; ie ne suis plus Sainct Preüil, mais vn agneau. Puis ayant vn peu pensé à par soy toutes fois, dit-il; Iesus-Christ fût bien lié, c'est la raison que ie le sois aussi, & en mesme temps presenta les mains, mains l'exécuteur lui dit, qu'il seroit à propos auparauât d'estre lié, d'oster son pourpoint, ce qu'il fit fort volontiers. Puis ayant donné les mains, ne m'estrains pas, dit-il, ce n'est que pour la forme, ie ne te donneray pas de peine: l'exécuteur le lia doucement, & luy mit sur les mains vn grâd mouchoir à dentelle, par dessus lequel il luy bailla le Crucifix: apres il luy dit, mon amy, met-toy vn peu à genoux, & monstre moy la posture, en laquelle il faudra que ie me mette tâost, ce que fit le bourreau, & luy dit, Monsieur, il faudra vn peu escarter les genoux, & allonger ainsi le col, puis l'ayât considéré, le fit leuer, & s'estant mis luy mesme à genoux en sa place, luy dit regarde, si ie seray bien de la sorte: l'exécuteur ayât dit qu'ouy, hé bien dit-il, ie n'y manqueray pas, ie te prie, de ne me point manquer aussi.

S'estant leué, le bourreau luy dit, qu'il estoit besoin de faire ses cheveux, auquel effet ledit Sieur de Sainct Preüil demâda son valet de chambre, mais il n'auoit garde de venir, parceque l'on l'auoit retenu prisonnier dans la citadelle? L'on fit venir au lieu le garçon d'un Chirurgien, lequel ne coupant pas ses cheveux assez promptement à son gré, dit au bourreau, qui estoit de bout à regarder, mon amy travaille, afin d'auoir plustost fait, mon Sauueur Iesus-Christ a bien esté abandonné entre les mains des bourreaux, il n'y a plus maintenant de des-honneur d'en estre touché. Cela estant achevé, il dit au compagnon Chirurgien, mon amy, ie voudrois auoir de

l'argent pour te contenter, mais ie n'en ay pas, ie suis denüé de tout : Puis le bourreau luy abaissa le collet de sa chemise, & luy ayant descouuert les espauls: chercha son manteau, pour le luy mettre par dessus, mais ne l'ayant trouué, pour ce que durant ce triste appareil, vn Archer l'auoir desrobé, il luy mit sa casaque par dessus & son chapeau dessus sa teste, le laissant ainsi aupres du feu entre les mains de son Confesseur, & puis sortit.

Quelque temps apres estant retourné, & le Sieur de Saint Preuil l'ayant apperceu, luy demanda, s'il estoit temps, & luy ayant respondu, qu'ouÿ, ils s'acheminèrent au lieu de l'exécution, accompagné du dit Preuost & de ses Archers, en repassât par la grande salle dudit Hostel de Ville, il salua fort civilement de la teste & d'vn œil vn peu moite, beaucoup de gens d'honneur, qui estoient bien tristes, attendans la fin, & leur dit d'vne façon tres-affable : Messieurs vous prenez bien de la peine, ie vous en suis obligé, & vous en remercie.

Estant assez proche de l'eschaffaut, il y eut vn fol qui l'arresta, luy disant qu'il deuoit auoir eu recours à luy, pour obtenir sa grace, à luy qui étoit l'Empereur de tout le monde. Le Sieur de Saint Preuil ayant reconnu l'extrauagance de cet homme, passa outre, celui-là le voulât derechef arrester, pour luy continuer sa saillie, en fut empesché par le Preuost des Mareschaux, & les Archers, qui le chasserent.

Arriué au pied de l'eschaffaut, & montant le premier eschelon, il dit à son Confesseur, hélas mon Pere, si ie n'auois non plus offensé Dieu, que le Roy & Monsieur le Cardinal, mon maistre, ie n'aurois pas sujet d'appréhender de rendre cõpte là haut, & puis hausât les yeux au Ciel, priez Dieu pour moy, qu'il me fasse misericorde.

Si tost qu'il fut sur l'eschaffaut, il clina doucement la teste, pour en faire choir son chapeau, & s'estant mis à genoux, il secoüa la casaque de dessus ses espaulles. Le bourreau luy dit, Monsieur, vous estes vn peu trop pres du bord, vostre teste tóberoit en bas. Lors se retenant, il luy dit ie me mettray, ou tu voudras. Puis il alla parler à l'oreille de son Cōseiller, qui a rapporté, qu'il luy dit ces dernieres paroles, mon Pere, ie crois que l'orgueil me veut accompagner insqu'après la mort, il me semble, que ie fais gloire d'aller au supplice, duquel ie n'ay ny honte ny apprehension, priez Dieu pour moy, qu'il me le pardonne, cependant ont lisoit la sentence, sans qu'il fit autrement reflexion.

Puis s'estât remis à genoux, fit sa priete, les yeux luy furent bandez, & ayant receu la derniere absolution, & proferant le Saint nom de Iesus & de Marie, le fil de l'espée luy trancha d'vn seul coup la teste, qui tomba sur le petit eschaffaut, qu'on auoit dressé à cét effet, tout joignant le grand, enuiron deux pieds plus bas du costé du marché aux volailles. Mais vn clou s'estât rencontré n'auoit point esté bien frappé, & le visage ayant donné dessus, il en fut marqué d'vne petite cicatrice à l'endroit du nez.

Le temps auoit esté le matin assez beau pour la saison, & qui ne monstroit aucune apparence de pluyé, se mit en tel desorde, que l'on eust dit que c'estoit la fin du monde, vn vent impetueux & horrible se leua, meilé de pluye, grêle, & neiges si espouuantables, qu'on n'en vit de long-temps vn semblable, comme si le Ciel & les Elements eussent voulu plurer & tesmoigner quelque ressentiment de la perte, que la France faisoit d'vn si grand Capitaine à la fleur de son aage (car il n'auoit que quarante-deux

ans (& notamment la Picardie, dont il sembloit estre le protecteur & le bouclier, & d'as le sein de laquelle l'enuie plustost, que le Crime l'auoit condamné à mourir. Le fascheux temps, qui commença sur les deux heures, continua dans la violence de l'orage si longuement, qu'à peine peust on prendre vn demy quart d'heure, sans pleuuoir, pour faire l'exécution, qui fut sur les quatre heures du soir.

Après laquelle, le bourreau despoüilla le corps bié promptement, & s'enfuit. Vne femme de Paris, qu'on dit auoir esté autresfois son hostesse, monta sur l'eschaffaut avec vn drap mortuaire, dans lequel elle mit le corps & la teste, mais comme on alloit deualer ledit corps, la teste estant retombée sur l'eschaffaut, elle la prit & la mit en sa robe, & estant descenduë elle la remit dans ledit drap avec le corps qu'on mettoit d'as vn carrosse, qui l'emporta dans la maison du susdit Medecin du Moulin, qui auoit esté bon amy au deffunt. Vn grand nombre de personnes de condition furent luy donner de l'eau benite, ce soir & le lendemain Dimâche auquel iour ledit Medecin le fit enbaulmer, recoudre la teste au tronc, & puis le mettre dans vn cercueil de plomb, couvert d'vn drap de velours noir, & ainsi fut porté à sept heures du soir en vn carrosse dans l'Eglise des Peres Feuillâs dudit Amiens, où il est enterré en la Chapelle de la Vierge, sauf le cœur, qu'on dit auoir esté reserué par ledit Medecin, pour estre porté en son pays, pour la consolation de ses parens.

SON EPITAPHE.

Que tu sois, O passant, arreste icy tes yeux & tes pas & considere dans ce tãbeau celuy de l'esperance humaine Sainct Preuil, grand de naissance, & plus grand encore de courage, nous monstre par son malheur, que les grandeurs du monde n'ont rien d'assuré, que leur ruine. Il est mort, c'est un accident; qui doit t'obliger à respandre au moins quelques larmes sur le lieu qu'il a mouillé de son genereux sang: Mais il est mort, couronné de cent belles actions, c'est un bon-heur, qui t'oblige à luy porter enuie: Rez, Carignan, Castelnau-dari, Corbie & Arras, furent les monumens de sa Gloire. Amiens est le tesmoin de son trespas: Que cét espouuantable changemēt te fasse changer de vie. O passant, & te porte a songer, que toute diuinité est impuissante, hors celle qu'il a inuoqué en mourant: Fremez dans la consideration des iugemens de Dieu, prie pour son repos, & pour le tien, & que tes vœux obriennent du Ciel, que sa seconde vie soit plus heureuse que sa premiere.

Alors le Roy prenant le Duc de Gloucester sur les genoux, luy dit, *Mon petit cœur, c'est à ceste heure qu'ils s'en vont couper la teste à vostre Pere; à ces mots on vid ce petit Prince le regarder fixemēt au visage) considereZ mon enfant, ce que ie vous dy, ils me couperont la teste, & peut-estre qu'ils vous feront Roy, mais prenez garde à ce que ie vous vay dire, il ne faut pas que vous le soyez, tant que les Princes Charles, & Jacques vos Freres seront vivants; & croyez qu'ils leur couperoient la teste, (s'il falloit qu'ils tombassent en leurs mains) & enfin aussi la vostre: c'est pourquoy ie vous enioint de ne souffrir jamais que ces gens la vous fassent Roy: A quoy l'Enfant repartit en jettant vn grand soupir (ie souffriray plustost qu'ils me mettent en pieces,) Ce qui rejouyt extrememēt le Roy d'entendre cette responce quasi contre toute apparence en vn aage si tendre.*

S'adressant encor à la Princeesse Elisabeth, il luy dit qu'il ne pouuoit lui exprimer la joye qu'il auoit de la voir pour la dernière fois, & qu'il estoit bien aise qu'elle fust veüe là, & qu'encor qu'il n'eust pas le temps de l'entretenir de beaucoup de choses, néantmoins il en auoit à luy dire qu'il ne pouuoit communiquer à d'autres, ou les laisser par escrit, d'autant qu'il craignoit que la cruauté de ses ennemis ne s'estendit iusqu'à l'empescher de luy escrire, qu'il souhaittoit qu'elle ne s'affligeasse point outre mesure pour l'amour de luy, son trespas deuant estre glorieux, puis qu'il mouroit pour les Loix, & la liberté du Pays, & pour maintenir la vraye Religion Protestante, il luy commanda de lire les Sermons de l'Euesque Andreunes, la Police Ecclesiastique de Hookers, & le Livre de l'Euesque Laud contre fisher, qui luy fournissoient ce de quoy l'affermir en sa

Religion, qu'il auoit pardonné, à tous ses ennemis, & qu'il esperoit aussi que Dieu leur feroit misericorde, & qu'il desiroit qu'elle, ses Freres, & Sœurs leurs pardonnassent semblablement. Luy anjoignant de dire à la Reyne sa Mere que ses pensées ne s'estoient iamais esloignées d'elle, & que l'amour qu'il luy auoit porté l'accompagneroit iusqu'au dernier soupir: il fit promettre à la Princesse Elisabeth & au Prince Charles de luy redre toute sorte d'obeyssance, & la chargea d'escrire au reste de ses Freres & Sœurs qu'il leur donnoit sa benediction, se recommandant, à tous ses amis. Il leurs comanda derechef de pardonner à ses ennemis: mais qu'ils ne se fiaient iamais à eux, d'autant qu'ils l'auoient laschement trompé, & qu'ils auoient abusé ceux mesme qui leur auoient mis l'autorité en main, aussi bien que leurs propres Ames, come il l'apprehendoit: mais qu'il ne faisoit point de doubte que Dieu quelque iours ne remist son Fils en son Throsne, & qu'ils seroient alors plus heureux qu'ils n'eussent osé esperer pendant sa vie: Le Roy assura le Duc qu'il ne luy diroit rien qui ne fust pour le bien de son Ame: qu'il couroit vn bruit que l'Armée auoit dessein de le faire Roy, mais qu'il se donast garde de l'accepter, s'il auoit le salut de son Ame en recommandation, ayant comme il auoit deux Freres qui deuoient marcher deuant luy, c'est pourquoy il luy deffendit expressement sur peine d'estre privé de sa benediction, d'y concentrer, si cela ne luy escheoit par les voyes legitimes: qu'il cheminast en la crainte du Seigneur, & qu'il auoit soin de luy.

Le Roy laissa quelques memoires, & instructions au Prince de Gales pour le Gouvernemēt du Royaume, & touchant ce qui estoit arriué de plus remarquable

quable, és differents qui s'estoient meus aux derniers troubles, l'exhortant à la douceur, & à faire toutes les actions à la gloire de Dieu, d'estre pieux, de ne point favoriser aucune factiō nouvelle, & enfin d'appuyer la Couronne par des vertus insignes, se plaignant à luy de la rigoureuse prison que les desseins ambitieux de ses ennemis & subjets luy faisoient souffrir injustemēt, dont il esperoit que Dieu en feroit en temps & lieu vne punition assez exemplaire, encor que par des mouuements d'une charité vraiment Chrestienne, il leur pardonnoit. Il le pria encor de se cōserver dans les veritables maximes de Pjeté & de l'hōneur, & qu'il ne luy māqueroit jamais de Royaume; & qu'un des principaux points de son honneur consistoit à tesmoigner toute sorte de respect, d'amitié & protectiō à la Mere: laquelle par vne magnanimité & patience incomparable auoit beaucoup souffert, le voyant traicter iniustement par des Gens auxquels la synderesse, & horreur interieure de leur crime seruiroit premieremēt de bourreau, & ne pourroient eschapper à la seuerité des iugemens exemplaires, & que tous ces pretextes deceuant, & ce masque de Religiō, dont la rebellion s'estoit emparée s'esuanouyroient, il luy manda que si la desloyauté de ses persecuteurs s'acheuoit par la mort; que sa memoire, & son nom fussent toujours graüés dans son Ame comme d'un Pere qui l'aymoit, & qui autrefois étoit Roy de trois florissans Royaumes, que Dieu auoit voulu honorer seulemēt du droit de regner sur eux, mais aussi trouué digne de souffrir plusieurs indignitez, & vne mort immaturée pour eux, dans les efforts qu'il auoit faiēt de conseruer les droicts de l'Eglise, l'autorité des Loix, l'hōneur de la Courōne, les Priuileges des Parlements, la liberté

de ses subjects & de sa conscience qui luy estoit plus chere & precieuse, que mille Royaumes. Apres tout il s'assura qu'il ne scauroit qu'aller deuant luy en meilleur Royaume, que le Sefgneur luy auoit préparé, auquel il se reCOMMANDOIT, & tous les siens, il luy dit Adieu en esperance de se pouuoir rencontrer au Ciel, si ne le pouuoit en la terre.

Apres que le Parlement eut resolu qu'on ne s'adresseroit plus au Roy, & que sa Majesté eut esté plus estroitement referre dás le Chasteau de Carisbrooke, en l'Isle de Vvigt, il fit plusieurs Meditations sur la mort, & quelques prieres pour son particulier vsage durant le temps de sa captiuité, lesquelles furent mises es mains du Docteur Iuxon, Euesque de Londres immédiatement auant sa Mort. Il dit des raisons aussi fort pertinentes à l'encontre de la pretendue Iurisdiction de la haute Cour de Iustice, erigée par la Chambre des communes, à la deuotion de l'Armée, pour luy faire son procès, lesquelles raisons sa Majesté a voulu estre deliurées par escrit auant sa Mort, ne luy ayât pas esté permis de les declater de bouche pour seruir à sa defence contenues dans son pourtrait. Enfin le Roy de la Grande Bretagne estant conduit sur l'eschafaut il profera ces dernieres paroles.

Difficilement pourray-ie icy estre entendu de personne, c'est pourquoy, (*parlant au Colonel Thimelinson, un de ceux qui l'auoient amené au lieu de l'exécution*) Je m'adresseray à vous & en peu de paroles: Il ne me seroit pas mesme besoin de vous parler, si ce n'estoit que i'estime que plusieurs prendroient occa sion par mon silence, de croire que i'aduoüe aussi frâchement les crimes que l'on m'impute, commẽ se subis la peine? & ie tiens que ce que ie dois premierement à Dieu, puis à mō Pays, m'oblige de faire voir à tout
le

le monde que ie suis homme de bien, bon Chrestien,
& bon Roy, ie commenceray par mon innocence,
certainement, ie ne pense pas qu'il me soit beau-
coup necessaire d'insister la dessus : car chacun sçait
que ce n'est point moy qui ay commencé la guerre
contre ce Parlement, & Dieu (auquel ie doy bien-
tost rendre compte) me sera tesmoin que ie n'eus ia-
mais dessein de leur rien oster de leurs privile-
ges ; ce sont eux qui ont commencé à me faire la
guerre, en commençant par le pouuoir de la Milice
qu'ils confessoient bien m'appartenir, mais dont ils
trouuoient à propos de me despoüiller ; en vn mor-
ont n'a qu'à voir les commissions qu'eux & moy
auons delivrées, pour leuer des forces, comme aussi
nos declaratiōs, & en quels temps cela s'est fait de-
part & d'autre, & ie m'asseure que l'on cognoistra
euidemment qu'ils en sont les auteurs, & non pas
moy, d'auoir excité ces troubles, de sorte que i'ay es-
perance que Dieu rendra mon innocence manifeste
touchant ces crimes enormes, dont ie suis accusé.
Dieu me veuille garder de dire (& ma charité me le
defféd) que les deux Chambres du Parlement sont
coupables de tous ces maux, cela n'est pas ici neces-
saire, ie veux croire que ce n'a point esté leur faute :
mais qu'il y a eu de mauuais instrumēt̃s entr'eux &
moy, qui ont esté les principales causes de tout le
sang qui a esté respādū : & de mesme (s'il faut ainsi
dire) que ie me sens ne de ce peché, ie prie Dieu
aussi qu'ils le puissent estre, comme ie le pense, ce-
pendant ja à Dieu net plaie que ie sois si mauuais
Chrestien, que de ne pas recognoistre que c'est iuste-
mēt̃ qu'il deploye ses iugemēt̃s à l'encontre de moy
car souuent il exécute les Arrests de sa Iustice, par
des sentēces iniustes que les hommes donnent, cō-
me

me cela se void ordinairement, & ie ne diray seulement la dessus, qu'un Arrest (*Entendant parler du Comte de Strasford, Viceroy d'Irlande.*) Mort iniustement prononcé, & dont i'ay souffert l'exécution, est maintenant puny en ma personne par cét autre Arrest iniuste, que ie m'en vay subir. Voilà ce que i'auois à dire touchant mon innocence.

Maintenant pour vous faire cōnoistre que ie suis bon Chrestien i'espere que cét (*Montrant le Docteur Iuxon qui le consolait.*) cét honneste hōme que voilà, rendra tesmoignage que i'ay pardonné à tout le monde, particulièrement à ceux qui sont les principaux Autheurs de ma mort; ie ne souhaite pas de sçauoir quels ils sont, Dieu le sçait, & ie le supplie de pardonner à tous. Mais ce n'est pas là tout, il faut que ma charité s'estende plus loing, ie souhaite mesme qu'ils se repentent, car pour dire vray ils ont en cecy commis vn horrible peché, ie requiete mon Dieu (avec S. Estienne) qu'il ne leur soit point imputé, & non seulement cela, mais qu'il luy plaise les adresser dans la droite voye, capable de redōner la paix à ce pauvre Royaume: car ma charité m'enjoint non seulement de pardonner aux particuliers, mais aussi de ne respirer iusqu'aux dernier soupir, qu'apres la paix de cét estat; c'est pourquoy Messieurs (& i'en voy quelques vns icy qui le porteront plus loing, (sçachez que c'est tout le souhait de mon cœur, qu'ils se portent à procurer ceste paix, & qui est aussi ce que i'espere d'eux. Il faut à presēt Messieurs que ie vous fasse voir, non seulement que vous vous fouruoyés du droit chemin, mais aussi que ie vous montre de quelle façon il vous y faut r'entrer, premierement il est euident que vous n'y estes nullement, car en ce que i'en ay pū connoistre, la

voye

voye que vous avez suivie iusques icy; c'est la voye de conqueste laquelle sans doute est tres-mauuaise, d'autant (Messieurs) que selon mon iugement, quelque conqueste que ce puisse estre, n'est iamais equitable sans vne cause legitime, & à quelque tiltre qu'on l'entreprene; si vous y passiez les bornes, toutes vos pretensions rendent enfin iniustice, ce qu'au commencement pouuoit auoir de la Iustice: & si c'est seulement par des simples mouuements de cōquerir que vous vous y portez, ce n'est plus qu'un fameux brigandage, comme disoit autrefois ce Pirate à Alexandre, lequel luy reprochoit ses volleries, qu'il n'estoit qu'un petit brigand, & luy un grand volleur. C'est donc par là (Messieurs) que j'estime que vous estans dans un fort mauuais chemin, & afin de vous en retirer, croyez moy, vous ne ferez jamais rien iustement, & n'attirerez point la benediction de Dieu sur vos actions, iusqu'à ce que vous rendiez à Dieu, ce qui appartient à Dieu, au Roy (c'est à dire à mes successeurs) ce qui appartient au Roy, & au Peuple ce qui luy appartient aussi, scachés que j'ay l'interest de ce peuple aussi cher qu'aucun de vous le pourroit auoir.

Vous rendrez à Dieu ce que vous luy devez, en redressant selon l'escriture, son Eglise qui est maintenant toute en desordre: de vous marquer à cette heure particulieremēt les voyes que vous deuez tenir pour cet effect, c'est ce que ie ne puis faire, ie vous diray seulement qu'il s'en faudroit remettre à un synode national libremēt cōuqué, lequel apres que les matieres y auroient esté debatüe clairement & avec la liberteé requise pour les suffrages, reestabliroit enfin toutes choses.

Quant à ce que vous devez au Roy; ie ne veux pas vous en entretenir, les Loix du Pays vous en informeront.

formeront assez clairement & comme cela me concerne particulièrement, ie ne vous le dis qu'en passant pour ce qui est du Peuple. Certainement il n'y a personne qui ait leur liberté, leurs immunités, plus à cœur que moy : mais il faut que ie vous die, que leurs libertez, & leurs priuileges consistent à estre assujettis à vn Gouuernement, & à des Loix qui soient capables de leur assurer la propriété de leurs vies & de leurs biens, & non pas à partager le Gouuernement avec le Prince, qui est vne chose à laquelle ils n'ont point du tout de droit. Il y a bien dela differéce entre le Souuerain, & ses subjects de sorte que si vous ne mettez peine à restablir le Peuple en cette liberté, dont ie vous ay parlé, ils n'en jouyront jamais d'vne assurée. C'est pour defendre cette liberté (Messieurs) que ie suis en ce lieu : si i'eusse voulu consentir à vsurper vne puissance arbitraire, qui eut changé les Loix par la force des armées, ie croy que ie ne serois pas maintenant icy; ie vous dis donc que ie meurs le Martyr du Peuple, ie prie Dieu que cela ne vous soit point imputé. Je ne vous tiendray pas plus long-temps (Messieurs) seulement i'eusse bien voulu auoir, vn peu plus de loisir afin de mieux digerer les choses que ie vous ay dites : mais ie m'assure que vous m'excuserez.

I'ay deschargé ma conscience : Dieu vueille (& ie l'en supplie) que vous vous mettiez au train qui sera le plus expedient pour le bien de l'Estat & celui de vostre salut.

Au reste (Messieurs) ie pense que mes sentimens touchant la Religion sont assez connus de tout le monde; de sorte que i'auois presque oublié de vous en parler: ie declare donc deuant toute l'assemblée, que

que ie meurs Chrestien , & selon la profession de l'Eglise Anglicane, telle que ie l'ay receuë de feu mon Pere de glorieuse memoire: C'est ce que le Docteur Iuxon temoignera pour moy. Je defends vne bonne cause, & mon Dieu est vn Dieu misericordieux: c'est fait ie ne diray plus rien, (*se tournant vers le Colonel Hacher, puis vers l'Executeur.*) Donnez ordre ie vous prie , que ie ne languisse point, ma priere sera fort courte & attendez pour signe, que i'étende les bras: ie deffend vne bonne cause, & mon Dieu est vn Dieu misericordieux: le m'en vais de cette Couronne corruptible à la possession d'une Couronne incorruptible de gloire, où il n'y peut auoir de troubles ; non certes aucun trouble du monde.

*Tunc caput orantis Domini, nec plura parentis
Dicere, deturbat terra; truncumque relinquit
Tortorum scelerata manus.*

A S T

Excidat illa dies æuo nec Postera norint
secula.

NOSTRADAMVS CENTVRIE I X. fol. 137.

Quatrain XLIX.

*Grand, & Bruxelles marcheront contre Anuers,
Senat de Londres mettront à mort leur Roy:
Le sel & vin luy seront à l'Enuers,
Pour eux auoir le regne en desarroy.*

F I N.

2549755A

1900

100

...the ...

17

SECRET

En libry

Joseph Kaueru Kovaresu

@ 25 ng ^{bre} 1990

- Futukuh

~~Joseph~~

B.20.2.672



BNCF

